


11. 21.



Digitized by the Internet Archive
in 2011 with funding from
Open Knowledge Commons and Harvard Medical School

<http://www.archive.org/details/iosephiripamonti00ripa>





IOSEPHI RIPAMONTII
CANONICI SCALENSIS
CHRONISTAE VRBIS MEDIOLANI
DE PESTE
QVAE FVIT ANNO MDLXXX.
LIBRI V.
DESVMPTI
EX ANNALIBVS
VRBIS
QVOS LX.
DECVRIONVM
AVTORITATE
SCRIBEBAT

Ripamonti (Joseph) 262
De feste quae fuit anno
1630

Die prima Octobris 1640.

IMPRIMATUR

Fr. Basilius S. Officij Mediolani Commissarius.

Io. Petrus Puricellus pro Eminentiss. D. Cardinali
Montio.

V. Arias pro Excellentiss. Senatu.

Mediolani

apud Macalesta

1641,

2265

+

Originals received 1874.

IMPERIAL

THE IMPERIAL

THE IMPERIAL

THE IMPERIAL

ILLVSTRISSIMIS VIRIS
VICARIO ET LX. DECVRIONIBVS
CONSILIO GENERALI
VRBIS MEDIOLANI.

Urbanus Mediolani

TERTIVS hic annus est,
ex quo, Generalis Con-
siliij autoritate, ac de-
creto Ill.^{mi} Ordinis, ad
componenda Patriae
monumenta electus ego admotusque
fui, cùm iam omne id aeuum à pri-
mordio Urbis ad vsque Philippi II.
Catholici Regis initia, & D. Caroli
Pontificis exitum continuata narra-
tione perduxissem. Idque nostrum
Opus, quia sub Ecclesiastico titulo
mista omnia profana sacris habebat:
iudicatum ita decretumque est: per-
tinere ad magnitudinem, famamq;
Ciuitatis, vt omnis rerum memoria
deinceps etiam per nos consignata
extaret,

II 12. 26. 1625

extaret , lingua scilicet ea , quae
semper est habita propria Artis ,
quaeue sola rerum memoriam face-
re sempiternam potest . Sic de ea re
censuere duo Sapientissimi Decu-
riones , Marchio Ioannes Maria
Vicecomes , & Hieronymus Legna-
nus , quibus huius Historicae Pro-
uinciae regimen ac tutela deman-
data erat . Namque , adiuncta sic ad
prioris Historiae volumina , pari
nostra industria & continuatione
scribendi , effici posse crediderunt ,
vt haberetur iustum atque comple-
tum , & vno tenore constans , ac
sibi consentiens Patriae Historiae
corpus : quod vnum inter haec In-
subriae monimenta desiderari ac
deesse animaduertebant . Nam om-
nis memoria Insubrum Urbisque
huius , ab condita Metropoli ad
hanc ferè diem sanè multis clarisq;
Authoribus perscripta extat . Sed ,
nec

nec arte, nec diligentia pari, neq;
etiam eodem sermone omnes haec
monumenta condiderunt. Obstre-
punt enim uerò sibi inuicem inter-
dum: confusio quaedam ex multi-
tudine oritur: ac sicuti de magnis
Imperijs aliquando dictum fuit,
etiam Historica res Urbis huius co-
pia moleq; sua laborat, & quodam-
modo fatiscit: nec tanta varietas,
& turba scriptorum facile alibi re-
perietur. Adeò, in Vrbe hac, quae
Roma altera ab Aufonio Vate prae-
ceptore Caesarum nuncupata est,
quantò plus casuum & rerum sub-
inde oriebatur, tantò magis ad scri-
bendum ingenia excitabantur. Idq;
Reip. sanè temporibus etiam eue-
nit, tunc scilicet, cùm liberi Me-
diolanenses, Romano penè ritu In-
subriae Imperium hoc tenerent: sed
multò magis, posteaquam Ducum
hereditas Resp. facta est: ac feli-
citus

cuius etiam ; atque copiosus , postea-
quam, finita Ducum stirpe, sub Catho-
licae Maiestatis Imperium atq; tute-
lam Resp. haec venit . Atq; inde
turba exitit hominum historicorum ,
quos sua voluntas , quosue nutus im-
peritantium in id ferebat . Neq; lau-
de tantum , & facultate , verumetiam
inclinatione quadam , & genio quis-
que suo dispares fuere . Inclinat
Galuanus ad fabulosa libenter , re-
petens ab Heroicis fere temporibus
nomina familiarum illustrium , mi-
scensque miracula semper aliqua
rebus , & incredibilia multa conqui-
rens , etiam vbi veritas ipsa sibi ad
legendium oblectamenta sufficere
possit . Alius, narrator tantummodo
sincerus eruit ex profundo antiqui-
tatem , & nihil nisi ex tabulario de-
promptum asferre mauult . Fuere ,
qui studerent rem ornare modicè
verbis : fuit qui immodicè ornando,

& congerendo portenta verborum
Arlunus , corrumpere ornatum &
artem quodammodo ipsam , qualia
ex declamatore Alcidamante prin-
ceps humanae sapientiae refert in
vaniloquentiae exemplum . Scrip-
sere ephemerides & Urbis diaria
nonnulli . Collegit inscriptiones , &
marmora Bonaventura Castilleonaeus
Canonicus olim huius Ecclesiae Sca-
lensis , & Collega noster : eoque nec
paruo , nec illiberali , sed apud mul-
tos forſitan arido & ieiuno labore ,
per nominum , ac locorum , tempo-
rumq; notationem , atq; per aequa-
lem lapidum aeternitati memoriam ,
effecit , vt Patria quodammodo nar-
raret ipsa ſuos caſus , atque fieret
ipsa ſibi Scriptoris inſtar . Calchusq;
& Simoneta , qui ſerè duo de no-
ſtris , veteris Romanae hiftoriae ge-
nium indolemue quandam , aut aſſe-
cuti fuere , aut viderunt certè , &
aſſequi

assequi concupiuerunt , Sfortiade
sua hic , ille Henrici III. Caesaris
fine contentus , inchoatam historiam
imperfectamque reliquerunt . Ob
eam rem , censuere Historici Duum-
uiri , nihil fieri posse commodius atq;
expeditius , quàm si filum Historiae
Mediolanensis , quae scripta à me
olim , & edita est , exciperem ipse-
met , scriberemque reliqua ad ean-
dem formam : & agenda rei man-
data mihi ab hinc fere triennium
dare coeperunt . Cùmque mortuo
interim Vicecomite , superstes huic
Collega Legnanus , non modò ad-
hortator operis , sed etiam qui opus
ipse magnum suo Marte facile po-
tuerat exhibere , instaret , haud ultra
cunctandum esse putaui . Atque or-
sus ab Philippi II. fine , & alterius
Borromaei initijs , sub Vicario Sor-
mano primùm , deinde sub Vicario
Archinto institui scribere tempora
casusque

casusque, & actiones infecutas, bel-
lumq; hoc, quod geritur inter duos
Reges, implacabile, atrox, Regibus,
etiam aetatibusque venturis exem-
plo ac documento futurum. Hu-
iusque etiam Historiae volumen
tradidi Decurioni Legnano, ut is
pro iniuncta sibi potestate arbitrio-
que negotij totius recognosceret
scripta haec, atque de editione sta-
tim adornanda, siue differenda sta-
tueret arbitrato suo, prout probasset
improbassetue opus. Interea, cum
de peste, quae Mediolani fuit Anno
CIC IDC XXX. notata perscriptaq;
multa haberem: motus sum & au-
toritate eiusdem, & efflagitatione
Vicarij Castilleonaei, dein Alferij
Successoris, ut redigerem ea in treis
libros, & eos tempore antecapto in
lucem emittere maturarem ab reli-
quo historiarum corpore separatim;
haud aliter, quam sicut Historici no-
biles .

biles etiam olim partes separauere
nonnullas, quoties, vel rei alicuius
magnitudo res caeteras supergressa
erat: vel eam admirati ipsi vehe-
mentius illustrare cupiuerunt. Et ta-
lium imitari mores, ac sequi vestigia
licitum est, etiamsi vim assequi non
possimus. Operi autem paruo, &
funesto huic, decus illud quaesui
ingens, vt in magno Consilij Gene-
ralis nomine appareret, vobisq; di-
caretur, sicuti etiam ius fasque erat.
Nam, & vobis nata domires ad vos
redire debuit: & fuistis verè vos in
illo tristissimo tempore Patres Pa-
triae Urbisque huius: atque eroga-
uit Ordo vester in illa clade pecu-
nias, quantas confici potuisse non
fieret credibile Gentibus nationi-
busue alijs, nisi si aduersaria sum-
marum etiam, rationumq; volumina
inspicere possent. Pretiaq; profectò
Vrbium aliarum pecuniae istae ae-
quauerunt.

I. R.

RIGINES & primordia Urbis
Mediolani, quaeue ibi pos-
tea, magnis ciuium virtu-
tibus, magnisque vitijs, &
rerum humanarum sorte me-
morabilia euenerunt, pro-
didere scriptores indigenae

O vel externi : nosque etiam omne id aeuum,
triginta libris nouissime amplexi eramus, no-
ua, & admiranda multa, famae communi,
memoriaeque mortalium historico opere exhi-
bentes. Neque sanè post Romana secula,
postue Senatum illum Principem Orbis ter-
rarum, Respublica, populusue fuit ullus, bo-
nis, malisue exemplis citior, nec vbi pace,
belloque, & studijs ciuilibus magis tumultua-
tum esse credam : nec rursus, vbi haec ipsa
studia flouerint magis, magisque spectatum
sit, quicquid in humani generis disciplinam
vertere scribentium ingenia consueuerunt :
talisque documenta vitae mortalium narra-
tione illa edita esse plurima arbitror.

At nunc pestilenciae tantummodo tela,
horrendasque mortes, exhaustam funeribus
Vrbem, populumque diminutum, vel potius,
sublata hinc etiam funerum, & Urbis, & Po-
puli nomina, simul & iura naturae sublata,

narra-

narraturus, venia opus habebo, apud eos, qui
politica grauitate, dira haec, & moesta, &
desertis simillima legentes, meque, & tam
horribile carmen fortasse aspernabuntur. Non
tamen absque vfu fuerit, etiam in haec ipsa
animum intendisse: pectoraque prudentum
fatiata alibi fraudibus, & contemplatione
malarum artium, hinc demum pretia fallendi
agnoscent, atque incipient veris momentis
aestimare ea, per quae tantopere inquietan-
tur, vbi scilicet videbunt, tot millia cecidisse
venenato inter se halitu: tot relictas, absque
haeredibus domos: & acta per Metropolim,
solitudine, gloriae, famaeque nominis insul-
tatum. Caeterum, quod funestior adhuc fiat
haec, quae in rerum humanarum contume-
liam pompa adornatur, atque, vt melius, cer-
tiusque agnoscant homines, non solum, ex
comparatione, magnitudinem, atrocitatemq;
mali, sed etiam, per quos veluti gradus, & à
quibus initijs in tanta mala deuentum sit, pau-
ca supra repetam, de forma, & statu Ciuitatis,
qua scilicet forma, & statu fuit antequam pe-
nè esse desineret.

DE FORMA RERVM ET STATV VRBIS
ANTE PESTEM

VRBIS Mediolanum in plano sita circumspatiantibus latè campis excipit purissimi Solis radios : quodque rarum alibi : nec ab riguo solo contaminatur illic inficiturque vaporibus , amoenum , & salubre coelum : nec coeli salubritas ea est , quae munera telluris negata compenset , fraudetue necessarij humoris alimentò . Ita , coelo , caeterisque syderibus apprime fauentibus , & respondente vbere agri , neque in alimenta , neque in delicias vitae mortalium quicquam deest , nec longior alibi felicioe durat vita , si intemperantia aduersus haec ipsa naturae munera absit . Euehitur large frumentum in Heluetios , & Rhaetos , aliasue cinctas patrij soli angustijs gentes , & , aut vinculo hoc in foedera trahuntur , obliganturque fidei pignoribus , ne fauces , in quibus ipsos natura collocavit , hosti prodant : aut facultates , & compendia euectionum , pro magnis erga se meritis , diuidere , & dare praemiorum loco Rex consuevit . Prouinciae Gubernatores etiam , inter conficiendae pecuniae vias , hanc maxime compendiariam semper expeditissimamque censuere . **Tanta foecunditas**

*Descriptio Vr-
Mediolani.*

cunditas agro Mediolanensi : exuberantque illic adeò feliciter fruges.

Euehendi porrò inuehendique facilitatem præstant, Ticinus, & Abdua, amnès inclyti: ille Verbani vndas trahens : hic Lario lacu effusus . Hi totam agri Mediolanensis latitudinem amplexi confluunt diuerso itinere in Padum, qui mare Adriaticum intrans admo- uet quodammodo Oceanum Vrbi, & Urbem ipsam Gades vsque defert, quàm terrarum Or- bem antiquitas finiuit . Nam quidquid pe- tendum ab mari est, pelagoue tradendum, in- fert, atque exportat nauigabilis fossa, amni ab utroque circumducta moenibus, atque, hinc Abduae, hinc Ticini vlnis amplexa Metropolim.

Ipsa in medio sita, viris, armis, ingenijsq; potens, non finitimorum tantummodo po- pulorum domina, sed alienorum quoque nu- trix, hoc ipso magnitudinem sui nominis au- get, quòd Catholico Regi subiecta, pars haud vltima curarum Imperijque eius semper ha- bita est: claustraque, & munimenta verè haec, & fores, & rerum Italicarum summa tanto Regi habetur, sicut Italia verè ipsa, flos, & decus, & robur Imperij, cuius fines Orientem, Occidentemque solem includunt.

Colligit Vrbs in circuitu millia passuum
septem

septem haud amplius : sed adeò frequenter
 habitata fuit , vt partes singulae singulas verè
 Vrbes videantur efficere posse , si ab suo auel-
 lerentur corpore , separatimque collocaren-
 tur. Trécenta millia capitum aliquando cen-
 sa fuerunt. Ducenta habitauere ante cladem ,
 ob quam, referri sic ordine ista attinere arbi-
 tramur. Testa , cultusque ciuium hoc inter se
 ordine , gradibusque fuerunt , vt Principum
 fortunam , & habitum nobilitas pleraque re-
 ferret : Principes verò ipsi Maiestatem splen-
 doremque Regum imitarentur : rursus, nego-
 tiatores , & nummularij quaeuofum maximè
 genus , compendijs , emolumentisque suis , eò
 fere processerant, vt omiffa negotiatione, quae-
 stuque contempto attollerent ad Imperia
 animos ; & coronata iam stemmata multi prae-
 ferebant , quorum maiores, stemma, siuè infi-
 gne gentis aliquando nullum habuere. Re-
 liéta ab his loca paulatim occupare proxene-
 ta, siuè fellularius audebat. Plebs infima sor-
 des exuerat : sordebatque marito vxor nisi
 super serica indumenta , etiam onerata torqui-
 bus , & auro conspiceretur. Serica simplex , &
 pura vestis coeperat esse mendicorum . Cir-
 cumferre gemmas , digitique vnus pretio ,
 vel auricularum pondere opes , coeperat igno-
 bilis

bilisiam, & obscura esse ostentatio: taedioque talium, & veluti suscepta aduersus plebeias aemulatione, matronae nobiles in altitudinem conditae simpliciore vestitu satietatem superbiae testabantur. Par taedium apud viros: paulatimq; descensum ad ostentationem, & pompam, & imitamenta virtutum, signa, & tabulas pictas, & miracula alia artium antiquarum, quibus haud magis exornatas fuisse Syracusas, terramue Atticam putem, tunc cum Marcellus illas, hanc Philippus Macedo iure belli diripuerunt.

Sed & Attica verè ingenia, studiaq; Gentis, non modò circa leuiiores illas artes, inuenta Graecorum, oblectamenta oculis, oculos & ora mortalium exprimentes, pedissequas, ancillasque scientiarum: verùm etiam circa scientias ipsas, vitae magistras, dicendi artifices lumina animi humani: patriamque verè Philosophorum hanc dici potuisse monumenta testantur, Oratores, & Poetae, quàm multi numero, & hoc nomine digni fuerint, item generis vtriusq; scripta argumento sunt. Ac sicuti bonis temporibus olim, cum foderent, ararentque Imperatores, gaudebat tellus bipalio, vomereque laureato, & manibus felicis ingenuis cuncta proueniebant: ita Me-
diolani

diolani, nobilium ingenijs exercita studia literarum, dedere messem hanc; cui nocere pestilentia non potuit, cum caetera omnia depopularetur, faciēmq; rerum sicuti postea demonstrabo verteret totam, planeque immutaret.

Historia de litteris

Certauere pauperes etiam cum proceribus fama & claritudine studiorum: quantumque hos ingēnita nobilitas & gloria, tantum illos accendebat crescendi amor, spēsque praemiorum, & gratiae in Vrbe, in qua, vel Philosophi dominarentur, vel dominantium ingenia, litteraeque antestarent. Et spem eam res ipsa infecuta est, tanta per omne tempus liberalitate Principum, fauoreq;, & animo effuso erga bonas artes, vt in earum cultu, facultateque discendi, pauperum liberos à principali fortuna discernere non possis, totaque Ciuitas Musarum vna ferè domus dici queat, si Collegia, si scholæ, si plena voluminum conclauias facta publici iuris inspiciantur.

Magna, & opulenta, & florentissima olim, ac beata, eademque misera, & factiosa, & semper inquieta certamine partium Ciuitas, Vrbes, populosque alios, aetæ pariter, & ventura saecula, sapientiae studijs, atque disciplinarum omnium affectatione superauit. Et studium

*Laudatio Vrbi
et conspectio.*

studium ante omnia, cura; Religionis eminebat: miraue diuersitate, mores, & instituta populi Mediolanensis; hoc ipso famam, & nomen addidere Metropoli, quod res adeo diuersae, & contrariae coalescere hinc inter se potuerunt, consistereque in vna sede: publicae opes, publica modestia: tumultus, & disciplina. Ciuium: publica pietas, & luxuria, fastusque communis: quaeue alia naturali bello vitia cum virtutibus pugnant.

QVOMODO RES MÈDIOLANENSIVM AFFLICTARI
COEPTAE BELLORVM APPARATV
DEIN FAME.

INDVXERAT, alueratque mores istos habitumque rerum, & sinistri rumoris cum magna fama pugnam, inueterata pax, otiumque diuturnum ab externis armis, quo Ciuitatum omnium bona pariter, & mala nutriuntur. Namque, post illa arma, quibus, Gallos inter, & Hispanos, sub Carolo Quinto, & Francisco Rege de re Mediolanensi magna gentis ytriusque clade decretum est, nulli lacefluere Metropolim hostes. & cum nullos etiam ipsa lacefferet, quantum ad motus, & pericula externa, per centum fere annos, veluti mare tranquillum

quillum, Vrbs, & Prouincia haec fuerat, ne
minima quidem aurâ fluctus mouente.

At, posteaquam atrox ex Gallia Rex Hen-
 ricus, ex Regnis, Prouincijsque ceteris con-
 iurata cum eo capita flare coeperunt: coepit
 simul istud, quod dico mare nostrae Vrbs, ex-
 terno pariter, & interiore motu cieri, vt tem-
 pestas paulatim ea concitaretur, quae malo-
 rum vltima nobis inuexit, bellum, famem, ac
 tertium denique hoc, quo penè deleti sumus,
 quodque etiam condere annalibus iuuat. Et
 initia quidem illa molemque coniurationis,
 quae parabat vertere ab imo terrarum Orbem,
 quaeue in tanta vastitate consiliorum immine-
 bat Vrbi praecipuè huic, vnus hominis dex-
 tera furorue repente oppressit, nisi si potius
 fuit Numinis ea verè manus, & coeleste vere
 Numen. Caeterùm, iactis in longum ab eo
 principio seminibus, longa causarum exorta
 series est, quae Regum animos, ac Regibus
 interiecta capita dominationum, Principumq;
 minorum inquietaret odijs, suspicione, metu,
 prout atrocissima quaeq; inuicem moliti erant,
 siue fuerant stimulatores, aut ministri talia
 molientibus, siue etiam stimutores, minis-
 trosque ipsos, re, consilio, nutu, palam, siue
 ex occulto adiunissent. Ex eo tempore, Pro-
 uincia

uincia nusquam sine apparatu, nunquam sine expectatione belli fuit; haud aliter, quàm si secreta coniurationis vnā hanc petissent, vnaue discrimen illud horribile euitasset.

DE ACEVEDIO ET VELASCHIO ET MENDOTIO

GVBERNATORIBVS VRBIS ADHVCQVE

NONNVLLA DE CAVSIS ET

ORIGINE BELLORVM

ET inciderat is forte Gubernator Vrbi, qui inter pacata etiam, ac sēcura, & quietā omnia quiescere tamen ipse nequireret. Azeuedius erat cognōmento Fōntium Comes inuētritus ab ineunte aetate armis, per arma nomen, famamque adeptus, & prācipiti iam senectā, quietum vitae exitum, haud minus profectō, quā mortem penē ipsā timens. Is, ingenio, totaque vita bellator, impatiens otij, profundus, inquietusque, gloria suū accensus, anxius inueterata erga Regem fide, suspectans omnia, cunctisque suspectus, sui obtegens, alienorum explorator, alendo id genus hominum; atque per eos obsidendo modis inenarrabilibus non limina magis, quā pectora Principum inimicorum, simulque augendo munimenta, & vires, atque iustru-

*aus regulari
Ducis*

instrumenta omnia belli, eò rem adduxerat, ut si demersi, ac sopiti alta quiete animi hostium tenerentur, ipsis Fontani motibus ad circumspicienda pericula sua, nouandumque aliquid excitari possent. Sed infidi amici occulti hostes sua sponte concitati erant, & ea moliebantur, quae, incertum fuit, absumpserintne deprehensa, moerore, atque aegritudine senem, an potius senex ille Gubernator conflasset ea suis modis, necessitatemque moliendi imposuisset. Vtcunque fuit: mirifico sane casu, miraue in praesens opportunitate ad quietem rerum, in tempus fere idem congruerant, Galliae Regis cedes, & Fontani huius mors: siue moeror hunc, detecta repente coniuratione discrimineque summae rerum, siue absque cura etiam illa, senectus ipsa dissoluisset. Mutua dein, ac fera dissimulatione partium quieta omnia aliquandiu inter Imperium vtrumque erant: & magis sine bello, quam in pace Prouincia habebatur.

Infidam eam, minimeq; duraturam pacem, & magnis odijs, atq; necessitatibus suspensa omnia, Fontano, sicuti dictum est, extincto, regebant Velaschius, & Mendotius, post alterum alter, magna nomina Hispaniae Procerum, sed nec perinde formidata hostibus, nec sanè ipsi vlla
hostium

hostium meditamenta laceffentes. Ille delicijs, & studijs, & amoenitate vitae, hic ad rem suam paulo attentior, & contentus vterque maiorum suorum gloria, quamquam sermonibus fortasse multorum incesferentur, hanc tamen ex diuerso, approbatione consensuque prudentum, laudem ferebant, quòd quies illa, animorum, aptissima temporibus, pacique habendae videretur.

Interpellauere postea securitatem, otiumque Mendotio, Sabaudiae Ducis arma, cum socer inuisus inimici generi, facta in Mantuanum irruptione, licentia, motuque illo turbaret Italiae Statum, modestiaeque fines egrediendo, perniciosi exempli initium id fecisset. His armis Catholica interponi arma, partemque defendi eam, quae infirmior esse videretur, pars Regiae magnitudinis fuit: atque exordia calamitatum haec fuisse, admissio in terram hanc externo milite, gentibusque subinde receptis, quibus pestilentia populare malum est, morbusque quotidianus, ut insueti nos luem ab ea contagione, perniciemque contraheremus. Sed prænuntia mali fames antecessit, cuius etiam dirae aduentum, & faciem exsequi pergam, tamquam scilicet historiam ancillari pestilentiae oporteat, quod fieri pene videtur

videtur dum velut itinera furiae eius singulique incessus ordine describuntur.

DE TOLETANO ET FICEROA ET CONSALVO
CORDVBENSE GVBERNATORIBVS VRBIS
AQ DE ORIGINE FAMIS.

INchoata, sicuti demonstratum est, serie bellorum, receptaque semel peregrinitate, porta simul ingens patefacta pesti erat, ut structo hoc aditu, & gradu, per alterum deinde illud esuriale malum, ad contaminanda, & peruastanda cuncta lues ingrederetur: fierique ita naturae ipsius ritu, & consecutione causarum oportebat. Nam, sicut artes, & nequitiae dominantium, & humani animi peruersa meditata illa, rem ad arma deduxerant, conflauerantque bellum: ita ex bello fames, ex fame contagia oriri debuerunt.

Sanè sufficiebant alimenta Vrbi, populoque urbano, & agrestibus, & nostratibus, & externis, & praesidijs, & castris, & populabundo interdum etiam hosti, cum per quindecim ferè annos, nunc gererentur bella, nunc omitterentur, & in pace, plus penè frumenti exportaretur ad foederatos alienis egentes, quàm quantum vñibus, necessitatibusque belli consumebatur.

Idque

Idque singulare temperamentum , & in rei frumentariae dispensatione, miraculo simile quiddam , vt & sufficeret largissime nobis ea res, & externis, gratiae, vel compendij causa impertiretur aliquando, negareturue, attulere homines duo ad obtinendam, regendamque Proninciam ex Hispania missi, Toletanus, & Ficeroa, inter se comparati sermonibus hominum ad laudem, & gloriam, haud aliter, quàm quomodo priores duos anceps etiam fama distraxerat.

Toletanus venerat prior ex veterum Hispaniae Regum stirpe sicuti ferebatur, toruus tetricusue quidam, audus gloriae, impatiens æmuli, cunctos infra se despectans, exercitus bellis, in pace asper, totius vitae forma compositus ad imaginem antiquitatis: & seculi nostri prudentes, virtuti huic, innocentiaeque, & seueritati, diuersum finitimumq; nomen aliquando imponere audebant. Comprimendo hic, & laxando opportunè annonam, prout etiam anni spes, & munera agrorum, restrictè, siuè large prouenissent, ac veluti patris familiae ritu, impendia sumptibus attemperando, & nihil nisi quod redundaret euchi sinendo, aluerat opiparè plebem, cùm & gereret necessariò bellum, & iniuriæ coeli terram interim

gra-

grauissime affligerent. Non mala modo famis aberant, sed nomen quoque illud ex communis sermonis consuetudine exciderat.

Par sub Duce, & successore Ficeroa securitas, obliuioque mali eius infecuta, & continuata est. Venerat successor Ficeroa iuuenis Toletano seni, sed consilio, atque rerum usu pene senex, quemue Toletanus ipse in extrema sua aetate, annis, & expectatione gloriae florentem comparari sibi, vel etiam anteponi haud aegrè ferret. Vna certè re superior, potiorque erat, astu, & artibus, elegantiaque saeculi ad eos quoque eludendos, qui, Toletani antiquum, horridumue illud callidissimi, & politi ipsi irridebant.

Mox interregnum, & reliquiae belli prioris, bellumque recrudescens, & postea magnis natalibus, magna virtute, sed infesta sibi rerum Italicarum forte Consalius: atque post eum, implicitus propinquante circa Casalis moenia fato Spinula: ante hunc, adducta in Insubriam tot millia Germanorum: pressa oneribus haec patria: incubantes horreis frumentarij diuites: irata quodammodo culpis tellus: iratumque coelum: dum euehitur frumentum: dum frustra absumitur: dum malignè occultatur: haec, & alia famem inuexere populo,

pulo , qui aliarum circa gentium altor , & nutritor, poterat omnia vendere, & nihil inuicem redimere eorum, quibus vita indiget.

DE FAME QVAE PESTILENTIAM ANTECESSIT.

Multa tristitia, multa horrenda exempla famis retulere, qui veteris memoriae monumenta condiderunt, passimque narratur, quemadmodum, strictis rubis, aut sutrinae corijs foedisue animalibus nutrita sint corpora obsessorum ab hoste fameue publica. Praecipitasse de muris ultro se se multos desiderio alimentorum, lateraue nuda praebuisse telis, ut ferro potius caderent, quam tabe sic lenta absumerentur, aliaque desperationis ultimae facinora esurientium leguntur. Ego nihil compositum ad ostentationem scenae gaudentis incredibilibus, sed spectata cuncta hisce oculis, & saepe defleta narraturus sum.

Incessit, incubuitque populo malum hoc, & publica clades, non impetu statim, moleque tota, sed ipsa quoque gradatim, & sensim, tamquam ordine quodam regeretur etiam haec vitae mortalium tantopere inimica res. Esuriere in mortem usque pauperes primò agrestes, deinde maiores diuitesque rustici
velut

velut punientibus eos glebis ijsdem quas labore immodico fatigarant. Mox vrbanus luxus, vrbanæ vitia, poena, maloque eodem plectuntur. Ac nisi faceta in malis alienis, & procacia quamvis ingenia hominum obstupesceret propria calamitas: negotium plane comicum, scenicasque personas, & vera ludibria superbiae mortalium diceret, atque rideret, quisquis praepotentes istos tremenda capita olim, & tantopere formidata populo intueretur, siue quisquis, comitatus insanos, & sanguinarijs illis nutibus, atque ministerijs attonita nuper omnia meminisset. Solitarij nunc fere procures incedebant, mansueti, demissis auribus, quasi pacem vultu exposcentes, & obsoleta veste nonnulli mutationem rerum haud obscure fatebantur. Par ex diuerso spectaculum eodem tempore prae buerunt olentes nuper vnguenta famuli gladiatores, ministri mandatis, supplice nunc ad stipem manu seminudi vagi per Urbem. Tanta, vel poena, vel disciplina vitij, nequitij siue mortalium, vindice, siue magistra fame adhibita est. Sed qui innocentiores erant, acrius puniti sunt, aratores, artifices, fabrique, & mendicitati iam proxima plebes, mendicique ipsi, & quibus ad aliena limina spes, & vita in vagando tantum, *pauper.*
 peten-

petendoque, & quiritando occupatis.

Opificia primò omnia, atque ad Reipublicae
vsum, siue splendorem, siue ad nequitias, &
humanae vitæ vitia, tot hominum ingenijs, tot
saeculorum experimentis repertae, tantis quae-
stibus exercitae artes exoleuere paulatim. Ta-
bernaeque illae, sedes, & alimenta familiarum,
& haud dubiè praesidia urbanae multitudinis
claudi coeperunt: vel si apertae manerent,
erant simillimè agro, qui sterilitate, & incultu
squallet, horretque imago egestatis, & famis.
Hoc destituta subsidio plebs ac ne ad opera qui-
dem laboremque admissa, in triste resoluta
otium, esurire, languere, perire fame coepit,
insueta malo, & opulentia, magnitudineque
Vrbis, particeps antea semper etiam ipsa deli-
ciarum, & vestem, mensasque diuitum imitari,
aemulari sumptus ausa. Nunc frustra supplex
ijsdem, frustra requirebat famam, nidoremq;
menfarum, quarum reliquiae pauperes alue-
rant: pauperumque etiam ipsa altrix promi-
scua multitudo, tota pauper, & mendica.
Neque iam differebant à prioribus mendicis
nouitij isti, nisi quod, & numerum eorum ag-
grauabant, & illorum vicissim vrgente numero,
desiderium atq; repulsas impatientius ferebant.

Corpora consumpta egestate cibi procum-
bebant

*simili
modo*

bebant passim, siue errabant per compita,
 per templa, errabantque facie cadauerum,
 & cadauera mox fiebant. Neque gregem nu-
 merumque infelicem ideo minuebat mors,
 quae prouincias etiam, & regna exhaurit.
 Nam quantò plures absumebantur, peribantq;
 fame, tantò numerosior noua turba prodibat
 delabentibus ad egestatem quotidie familijs,
 quae trahebant secum alias, subtractisque sub-
 sidijs, vel facta frustratione, & fraude, neces-
 sitatibus ijsdem inuoluebantur. Crescebatque
 maximè numerus, eo quod, non ex agris tan-
 tùm, collibusque nostris, sed ex vrbibus etiam,
 populisque alienis, decepta vrbis nomine, ac
 magnitudine, & adhuc ignara miseriarum, in
 quas tenderet multitudo, Mediolanum, tam-
 quam, ad certam opem, & parata scilicet hic
 alimenta confugiebat: ac res plane miseranda,
 spectaculumque id flebile erat. Ciues, agre-
 stesque alieni Metropolim fame stimulante pe-
 tebant. Metropolitani in agros, Vrbesq; fini-
 timas, ab ijsdem stimulis, ab eodem errore fere-
 bantur. Et spes vtrosque delusa in itineris fine
 angebat, vel etiam, spei huic, itineriq; & labori
 vano immorientes, nihil aliud lucri fecerant,
 quàm, vt in solo, terraque aliena expirarent.

Vidi ego circum Vrbis moenia fortè ambu-
 labundus,

*criptio mulieris
ante q̄sumptū.*

labundus , & vidēre qui mecum vnà ibant, mortuam in militari via feminam , pendente ab humeris sarcinula , circa pectus suspenso fascijs infante , vt appareret, iratam negantibus alimenta coelo soloque , sublatis , quae minus inuisa habebat , abire aliquò voluisse, morteque retentam, quae concepta praecordijs exturbasset abalienatum illud vitae iure corpus , atque exire Vrbe coegisset . Sed & graminis herba semimanducata prominebat ab ore , faucesque , & labia contaminata notabantur , inditium efferatae famis, pabulique ab rabie , & desperatione quæsitum . Atque enecta sic matre, infans quærebat vbera vagitu, qui , famem pariter , desperationemque fate-retur, quantamcumque capere simplicitas illa posset . Ea comitatu nostro species obiecta confuderat moerore animos, & superuenere, qui miserati casum atrocem, sublato inter manus infante, materna munera exsequebantur.

Pleraque similia istis, & atrociora nonnulla quotidie referebantur ab ijs, qui ipsi viderant, quique ab alijs visa audierant vltima exempla mortalium sortis, mortalesque ita ab sumptos, vt mors leuissima poenarum fieret. Ritu naturae, legeque humanitatis institutum est, vt pane alatur animal rationi natum, virtutique,

&

& coelo: atque propria nutrimenta haec ho-
 minis habentur, ex quo semel à glande, syluis-
 que discessere priores, domiciliaque, & mensas
 illas relinqui belluis famae humani generis
 interfuit. Interciderat hoc tempore ritus hic
 honosque, & clementia naturae apud agre-
 stes: nec ad vetera modò redierant alimenta,
 sed infra bestias etiam, pabuli foeditate de-
 scenderunt. Vicitauere corticibus arborum,
ipsisque epulis excruciatì, pretium hoc talia
 manducandi ferebant, vt tam infestae vitae
 poenis festinata morte eximerentur. Optime
 meritis agricolis, quorum strenuae manus
 etiam otiosos aluerant, moriendum ita erat,
 & moriebantur in vestigijs, glebisque ijsdem,
 quae ipsorum saepe sudore rigatae messem
 vberem dedissent. Plures fuere, qui fugiendo
 procul ab talibus exemplis in Urbem, casuum
 suorum horrore, aspectuque miserabili, fugere
 ex Vrbe plerosque coegerunt. Cum tenera
 prole deserta mater, siue cum vxore maritus,
 onusti liberis vterque tergum, ac totae domus
 agricolarum, trahendo fessa, & defecta corpora,
 si in Urbem vsque peruenire potuerant, quàm
 deprehenderat itineris finis virium quoque
 finem, pro cubili humum, & suggrundia aliqua
 pro tectis occupabant, atque quotidianis ho-
 rum

rum aduentibus, & hospitij, permixta mendicorum urbanorum turbâ viae complebantur. Odor insolitus inde, & aspectus odore tetrrior, ac rufus adfpectu ipso triftior etiam animis obiecta imago fortis miferiæque mortaliū, ac veluti per mediam haud dubiè peftem iretur, ofque, narefque viator ſibi occludebat. Per diem viſu, per noctem vlulatu, ac quiritatione, infelix haec turba miferias Urbis augebat: eratque inter calamitates, videre, & adſpici, & audire, cum exprobratio quaedam illa eſſe videretur, & veluti reum vnufquiſque tantae deformitatis fieri ſe ſe exiſtimaret.

Sed in tanta colluuiōe rerum, ac deformitate, nihil magis vtique turbabat animos hominum, qui liberali aliquo ſenſu mouerentur, quàm ſquallor, & horror, & ad maciem extremam, tabemque deducta ſimplicitas, & innocentia, ſtrenuitasque agricolarum. Sicuti beſ arator, totum diem ſub ſole, ſub iugo pondus immane trahendo, terramque findendo durauiffet, indignaretur, atque praeferret naribus, & ceruice, roſtroque iras, ſi pabulo ad extremum, ſtiſpeque debita fraudaretur: ita cernere erat, bouinis oculis homines aratores in ipſa calamitate, & luctu toruū quiddam, & ſimile furori tuentes, quia nullis ſuis laboribus

redimere

ſimilitudo.

redimere illa famis tormenta potuissent, quodque ipsa etiam laborandi facultate prohiberentur. Cernebantur adusti, retorridi vultus, abdit introrsum oculi, pectora torosa, corpora vix haerentia ossibus, toris lacertisque consumptis, pudorque, interim, & verecundia subibat: veteres etiam Romanos Imperatores arasse, fodisse, & laureatam triumphalem artem nunc fame ita emori, cunctaque ista, in parte publici dedecoris, dedecus imò publicum accipiebantur.

*Descriptio viti
emaciat*

DE PVBLICO CONSILIO SIVE DE LX DECVRIO-
NIBVS VRBIS PER QVOS FAMI EGESTATIQUE
PVBLICAE SVBVENTVM.

INter alia Mediolanensium consilia, & Magistratus, LX Decuriones sunt. Hi statum Urbis annonamque, quodq; patrimonij nomine publice possidetur, regunt, flos haud dubie nobilitatis, summaque inter nobiles potestas. Indigenae patritijque omnes à Gubernatore Prouinciae leguntur. Nulli peregrino aditus in id Concilium est: parque ibi, & peritia patriae rerum, & cura: par concordia inter ipsos curandis Reipublicae vtilitatibus, certamenque, cui Respublica plurimum debeat.

Inte-

Interimque praecipua sollicitudo cunctis, ut nomen Urbis, & fama ingens, quam veterum bona facta pepererunt, facta tecta conferuetur, porròque maior etiam in dies fiat. Cùmque sexaginta numero sint, (nongenti olim fuere) apparet totidem esse institutos, ut in eo numero, eoque delectu reperiretur quicquid publica dignitas optare posset.

Sunt pacis artibus innutriti: sunt qui magis nouere artes, viasque bellorum: sunt mansueta ibi, sunt turbida etiam ingenia: alium misericordia, & lenitas, religioque in consilia ducit: alium nequitiae, vitiaque mortalium asperant, siue ipse nequitijis pariter, vitijisque miscetur. Hic parcè, & restrictè agit: illius sententia ad larga, & effusa cuncta inclinat: tantaque diuersitas, & mixtura ingeniorum ad Patriae commoda mirifice congruit, qualem nempe mixturam, atque diuersitatem veteres sapientes in describenda perfectae Reipublicae forma optauerunt: scilicet, ut acris lenibus temperarentur quod in ciuili administratione saluberrimum esse crediderunt. Sed nihil in hoc publico consilio salubrius, atque sapientius institutum esse arbitror, quàm quod regendis, administrandisque rebus apposui sunt, quorum maxime intererat, Rempublicam esse saluam, quive

quiue opibus etiam ipsi suis adiuuare salutem possent. Videntes igitur isti cladem, exitiumque, & foediorum exitio faciem deformitatemque rerum, atque indignum Metropoli casum, si tamquam in pauperrima domo, negatis alimentis, fame populus periret ad subueniendum erexere animos, atque Lazaretum veluti publicam vniuersæ plebi domum aperuerere.

DE LAZARETO RECEPTAQVE ILLVC MVLTITVDINE
PAVPERVM.

Condidere Mediolani Duces id opus, quo tempore Imperium hoc Sfortia adeptus, suae stirpis hereditatem Prouinciam facere voluerat: posterique eius Urbem ceu domum verè aliquam ornandam operibus, excolendamque sibi susceperunt: in quibus hoc Lazareti opus testatur regales nouorum Principum animos, spiritusque, non fortunae, lociue eius vnde profecti erant. Vergit ad septentrionem porta Urbis, quae de steriore in solem orientem flexu, Orientalis ex eo nuncupata est: coeliq. vel saluberrima plaga haec habetur, opposita collibus, vnde spirant aerae molles: nec sunt humentia circa, sordidaeue paludes, que purum, & liquidum aera, sicuti alibi, corrumpant, atq; inficiant

Regionis Des.

inficiant. Ibi Lazaretum posuere Principes sedem, atque receptaculum affectis pestilentia corporibus, si quando calamitas incideret, ut separari morbosa siue suspecta corpora ab integris, salutis publicae interesset. Nomenque loco illud ex vetere Lazaro inditum esse reor, quem vlceribus, & tabe scatentem ad exemplum iustitiae simul, & clementiae diuinae sacrae litterae inducunt.

Forma, & descriptio aedificij totius quadrata est: campos late patentes includit: cingitur fossa, quam ab suis venis emicantes aquae implent: cubicula numerantur paria totius anni diebus, quae octonos siue denos capere singula possint, appositis insuper, atque excurrentibus in singula latera porticibus, quae cubiculorum vice praebeant tecta multitudini. Et rursus, structis ordine tugurijs, in campos, tamquam in atrium impluuiumue exonerari haec potest, sicuti patrum, & auorum memoria factum fuerat, cum depopularetur pestilentia Urbem. Medio in campo stat ara conspecta vndique, imminente desuper tecto, quod porticus in gyrum columnata sustinet, ne prospectus impediatur, neue mysteria venti atque imbres turbent.

Haec, quae fuerant aduersus pestilentiae malum

*Descriptio
Lazareti*

malum olim parata tecta, subsidia aduersus famem hoc tempore fiebant, vt paulò post ad pristinos vsus redirent, turbaeque ibi pestilentes alerentur. Quicquid pauperum in Vrbe erat, quicumque ex agris ad vrbana subsidia frustra contenderant, omnes, qui vagabantur, aut iacebant per compita destituti, famelici, nudi, proposito edicto in hanc publici hospitij sedem euocantur. Imò potius Ciuitas ipsa, publica; maiestas oblita egestatis, inopiaeque suae, materno in populum regali munere perfunctura commigrat in angustias illas, ibique munificentiae solum locat. Moram publico edicto, domuique aperiendae parumper attrulerat ab alterius mali imminenti metu profecta res, & oblatum fortè impedimentum. Namque, dum pedem, & vestigia famis antecedentis terit calce suo pestilentia propinquans, & populorum, gentiumq; finitimarum satiata funeribus, Vrbi etiam huic ex longinquo minitatur: mercimonia omnia, quae interim veniebant ab gentibus, populisque suspectis, haud aliter, quàm pestifera capita & funesta, periculi atque experimenti causa, in haec septa cōdebantur: atque iam tota occupata domus erat.

DE HOSPITALI DOMO STELLAE AC DE INSTITUTA
ILLIC ATQUE INTRA LAZARETVM
DISCIPLINA.

Subsidio fuit alia mendicantium domus, & satis in praesentia capax, & eo situ, ac vicinitate hortorum, ut porrigi in ulteriora, facileque amplificari posset. Stellae cognomentum Xenodochio est, receptaculumque id extremae mendicitati puellas ferè puerosque alit terrae plane filios, imò, quos terra ipsa proiecit, capita ignara suae originis, absque parentibus, sine lare, & foco. Ea subitaria publicae hospitalitatis sedes, atque temporarium esurienti populo domicilium fuit. Multi ex angues iam penè senes, & debilitate macieque senum iuvenes utriusque sexus, aetasque tenerior, urbani pariter, & agrestes, qui pridem, qui nuper esurire coeperant, quibus mali eius ingenua verecundia, & pudor inutilis, quibus procacitas, & impudentia irrita, omnes impliciti fame, & necessitate eadem, congregantur illuc: & quantum numerus quotidie crescebat, tantum conclavia illa, hospitalesque termini proferebantur. Crescebat simul munificentia civium erga coeptum opus: atque in domesticis angustiis fraudantes nonnulli se suo victu, tributa eò, stipesque mittebant

tebant. Fuere, qui in vitae termino, spe atque cupiditate proximorum exheredata, quicquid superfuerat, legarent hospitio huic, quâ separata mensis, discreta cubilibus multitudo tanta degebat. Ad tria millia contubernaliū pauperum intra paucos dies fuere, pluresque quotidie fiebant. Sed notatum interea est, manifestoque experimento compertum illud, quod prouerbio ludicro irridetur: dulcedinem nempe quandam esse mendicandi. Viri feminaeque, quibus, sine tecto, sine cubili noctes, sine villo certo nutritu dies agebantur, qui expositi ventis & imbris procumbebant, sub operta vocabantur, vbi cibum, vbi lodicem, & quietem acciperent: & satellite tamen opus erat, per quem comprehensi vinculis iniectis ducerentur: isque magistratus hoc tempore in Vrbe fuit, denis assibus in singula capita constitutis, vt lictori pretium id esset, quotiescumque captiuum pauperem ille stiterat. Apparebat, male mendicos nostros petere per compita pabulum, quàm alibi accipere, & eiulare libere subdio, quam pernoctare clausos. Iam sarcinae externae multiplices, & mercimonia omnium generum suspecta pestilenti contactu, quae primis diebus fuerant impedimenta Lazareto, suffimentis experimentisque properatis, tentata purgata,

purgata, in locum vnum congesta, sedem eam, atque domicilium, pauperibus accipiendis, & disponendae per cubicula plebi liberarant: neque Stellae hospitium illud, de quo narraui, sufficiebat. Igitur, aperto hoc etiam altero hospitio, bifariam hominum turba collocatur: hinc ubi fuerant antiqua receptacula desertis, hinc ubi contagia pridem habitauere, & rursus habitare debebant. In sedem utramque dum confluunt vtroque quotidie voluntarii multi, & inuiti plures à lictore ducuntur, completur utraque breui tempore sedes, & pari utrobique cura multitudo tanta sustentabatur.

Non sumus profectò grati erga nostrorum temporum decora, & virtutes: atq; recentium incuriosi prisca tantummodo admiramur. Si quid haec aetas praeclari atque admirandi tulit, in vili habetur. Non ego, si redeant saecula celebrata Latronum, & disciplina illa vetus, censeam exhiberi posse instituta praestantiora regendae intra parietes aliquos multitudini, quàm quae Proceres nostri hoc tēpore exhibuerunt. Sed aberat rigor, & toruitas inhumana, & rursus peccare docens indulgentia, quae antiqua illa, & praeclara Graecorum haud dubiè deformabat, dum vnius provinciae ciues intra eadem conclavia iuncti virtutibus vitijque permiscerentur. Non hinc
sicuti

sicuti apud profana illa contubernia veterum, callidae libidines, callidaq; furta pro virtutibus habebantur. Sed in tanta colluione mortalium, honestatis in primis habita cura, sedulòque effectum, vt efferata malis ea multitudo, atque per licentiã exsolutae, & alienatae mentes ad Christianae disciplinae cultum, & iam oblita illis instituta traducerentur. Specimen illustre, ingens catholicae pietatis ediderant hoc tempore praesides nobilesque nostri, dum alerent simul, excolerentque ita plebem: ac mihi etiam apud superba politica ingenia impunè fuerit, quendam eius rei, disciplinaeq; ordinem hoc loco exposuisse, prout spectare talia non semel gratissima voluptas fuit.

Res diuina quotidie fiebat ad Aram, quae, sicuti dictum est, media regione campi, subdialis eadem, & operta tecto aspicitur praetentis in quadrum campo vniuerso porticibus: & porticus vicissim ipsas, atque ostia cubiculorum adspicit, vt ab limine, & statione quisque sua possit mysteriorum esse spectator, quibus humani generis causa, Dei filius immolatur. Peracto sacro, ad opera ibant, prout artem quisque aliquam, & umbratile genus opificij intulerat. Ita, quae stu simul nonnullo iuuabantur, & otium vitabant, rem adeò miserabilibus quoque turbis
inutilem

inutilem atque perniciosam. Desides tamen, otiosi; multi vagabantur per ludum, atq; lasciuia extrahentes tempus, donec dimensa venirent. Hi tugurijs, & operibus alienis importunè oberrando molestierant, nec potuit adeò constans esse disciplina, vt non, et turbarum infeliciū vitia aliqua in solo illo germinarent.

IMPROBATVR DISPLICETQVE LAZARETVM.

S Ed et corpora magis adeò, quam animi corrumpebantur: suntque tam crebrae mortes infecutae, vt parua quaedam pestilentia illa dici posset. Causam morbi ad fraudem mancipū retulere nonnulli. Eos corrupisse frumenta sabulo admixto, panesq; adulterasse. Ego ad calores illius anni maximos, haud minus referri potuisse existimo: simul ad corporum ipsorum illuuiem, & pedorem, qui comitatur ferè mendicos, & confertam illic sub tecto multitudinem turpius affecerat. Insuper, adempta libertate, ac iure vagandi per Urbem, gratissimum id sibi pabulum, atque laxamenta, frementes gementesque mendici requirebant. Desperatio, & moeror, taediumque, & odia domicilij illius in singulorum vultu eminebant, neque lamentis, & querelis abstinencebatur. Ideo nimirum, in
claustra

claustra se fuisse coniectos, vt, ne in patriae quidem conspectu morerentur, neq; patriam nouissima luce adspicerent. Fremebant talia, fremendoque moriebantur. Etiam Proceres Urbis pudor & dolor, & indignatio ceperat, quòd sumptibus, & alimentis illis, tantaque inter publicas angustias liberalitate nihil aliud profecissent, quàm vt viderentur ultro necasse, quos alere ac sustentare voluerant. Itaque re communicata, rursus, consilij viam hanc in malis aptissimam esse censuerunt, vt dimitterent quamprimum inde homines vniuersos, & iure, ac licentia pristinae mendicitatis redonarent. Postquam ea sententia stetit, aperitur effundendae multitudini Lazaretum, gratia, plausuque maiore, quàm cum extorris, egena, sine tecto, sine lare, multitudo nuper eadem, ad mensas, tectaue illa congregaretur. Ad breue tempus liberata Ciuitas odioso funestoque adspectu, spectacula nunc rursus eadem stomacho taedioque pari repetebat, nisi quòd miseratio etiam augebatur reputantibus quae causa numerum imminuisset. Ipsis subsidijs, ipsisque alimentis, & publica ope absumptos fuisse pauperes videbant, plusque pudoris inde etiam, quàm cum absumi fame olim viderent.

ANNO, quem fames hactenus repraesentata sequebatur ad III. Nonas Nouembris, quæ D. Martino sacra dies fuit, ob rei frumentariae caritatem Mediolani tumultuatum erat; cùm rarò aliàs eiusmodi tumultus incidisset in Vrbe scilicet, quae, sicut initio retuli, finitimis, longinquisue etiam, propter agri vbertatem, frumenti copiam antea facere solita fuisset. Eius negotij initia, & finem expediam: quomodo scilicet, & cōmota licentia plebis, & repressa fuerit: quaeue publica consilia, & remedia adhibita ei malo sint, tum vt in praesentia sedaretur, tum verò ne existeret in posterum, neue multorum capitum bestia illa Regibus etiam Ciuitatibusque potentissimis, semper formidata plebes, aut ferret impunè quicquid illud nunc ausa esset, aut auderet iterum.

Ferrius, hoc tempore Magnus Cancellarius, absente Consaluo Governatore, statum rerum, Urbemque regebat. Is, ingrauescente quotidie magis annona, cùm, neque laxamenti quicquam inueniretur, & fremitus iam, ac lamenta populi audirentur, adiecerat remedio animum, quo dilata magis, quàm sublata causa seditionis, malique imminentis erat, quoue

ue remedio, pars hoc tempore non vltima rerū,
 frumentarij, pistoresque exacerbat minitaban-
 tur extremum malorum: nempe se se negocia-
 tionem eam, & artem, & mercimonium omne
 deserturos. Tritici modius vendebatur, vt mi-
 nimum, quadraginta quinque, seu quinquaginta
 libris: pretiumque hoc veluti iustum, & vulgare
 erat, quod neque venditor poscere erubesceret,
 neq; emptores cum indignatione audirent. Sed
 praualidi mancipes, impudentissimi foenera-
tores, praediatoresque locupletes, pretia pri-
 uatim in occulto statuerant, dixerant, pronun-
 tiauerantque, & afferebant, polluto, efferato,
vilissimo ore, enormia, & immodica, tamquam
 aut facti ipsi potentes, arbitrique vitae Ciuum,
 aut spiritus, & vita tantummodo ipsis. Scio ego
 fuisse nonnullos, ipsosque noui homines, qui
 centena aeris in singulos modios poscerent, ne-
 que eo contenti, spe in posterum maiore, clausa
 horrea tenerēt, velut necessitati, famiq; publicæ
 minitantes. Neque aduersus auiditatem hanc,
 seu potius rabiem hominum auarorum solita
 edicta profuerant, queis profiteri singuli coge-
 bantur, quantum quisque frumenti numerum
 domi haberet. In ea caritate annonae simul,
 fraudeque, & auaritia hominum, siue etiam, in ea
 penuria, & publica egestate, coelique, & tem-
 porum

porum iniurijs, excogitauerat Magnus Cancellarius, tentaueratque mediam hanc remediij viam, vt luerent pistrina quicquid illud iniquitas hominum temporumue deliquisset. Fieri vendique panes iussit praescripto pondere ad eam aestimationem & metam quasi tritici modius triginta tribus libris, nec vltra venderetur, emereturue: idque fortasse detrimentum sarciri posse crediderat caetero mercaturae eius emolumento, quod habuissent antea pistores, quodue in posterum habituri essent: siue etiam, vbi tempestas illa transisset, è publico posse compensari, spemeis fecerat. Sed incerta quidem haec, damnum verò praesens, & onus intolerabile erat: vociferabanturque pistores, & assidue denuntiabant, se se clausuros esse tabernas, desiturosque artem. Non interim à Magno Cancellario poterat impetrari, vt semel placita mutaret. Ac Populus, velut oblatum sorte quadam eo pretio panem, quasi celeritatis & diligentiae munus rapere festinans, obsidebat assidue furnos, & cum labore, ac festinatione coquentium certabat importunitate sua. Tanto magis exposulare cum Rep. pistores, nec poterant iam eorum querelae, denuntiationesque sustineri. Sanè Decuriones, datis ad Gubernatorem in castra litteris, egère
cum

cum eo, vt temperamenti aliquid inueniretur: isque Praesidē Senatus, & Magistratus vtriusq; Praesides, & duos è Quaestorum numero nominat, quorū consilio, atq; arbitrato, statueretur tritico pretium in sextarios, ad eam summam, vt durare, atq; exerceri pistrina possent: & congregati isti adiecere denos asses, quo ne minoris sextarij panise pistrino peterentur. Sed quantū eo additamento recreati, & deliniti pistores erant, tantum accenditur ira furorque plebi. Expectauerant, vt minueretur potius pretium, quam vt augeretur. Vbi vident conditionem sibi deteriorem esse factam, nihil vltra decretis, pretijsuē opus fuit. Domini ipsi alimentorum suorum, & rei frumentariae dispensatores sunt, atque in Vrbe, quae obsequio & modestia plebis erga Rempub. & erga dominatores gloriari iam inde antiquitus potest, cognosci hoc tempore potuit, quid Populus iratus, imò quid plebis ipsae quiesquiliae, immistiquae pueri feminis, & inops, & imbellis illa multitudo, quid etiam secures, & fasces, & ipsa pene Maestas imperij aduersus numerum infelicem, esurialesque turbas valeret. Aderat Sancti Martini dies laeta semper, & ferè genialis, ob vindemiarum eo anni tempore finem, comportataque vina in cellas, & velut migrantia rura cum muneribus

neribus suis in diuitum ciuium domos . Eius diluculo lucis, atque etiam procedente mox die, sicuti affolet, plenos pane saccos corbesue geruli ad loca destinata portabant, prout, vel Monasterijs domibusue amplis coempta, & prouisa cibaria, vel in diem alicubi venditanda erant.

Copiam hanc panis intercipere omnem, imò veluti suam excipere populus coepit; haud aliter, quàm si ex antecondicto mitteretur ad sedomum. Obuij facti, feminarum, adolescentum, puerorum, senumque globi, ne fustibus, quidem telisue vllis, sed armati multitudinetantum, & necessitate sua, tyrannidem ita, imperiumque exercentes, vt in quosque inciderant, sistere, & deponere, & abire iuebant. Nec mora. Circumuenti repente ita, & attoniti, qui panem humeris ferebant, ne depositis quidem, sed abiectis oneribus trepidabant aufugiebantque.

Laniaretur vnguibus, pedibusq; proculcaretur quisquis stare contra, & repugnare vellet. Id audendi principium plebi fuit: inescatique passim dulcedine praedae, quae incruenta sic, & sine sanguine obtigerat, vires suas reputare coeperunt; in eo positas, si tantummodo audere possent. Antea miseros famelicosque fuisse quia in perniciem suam modesti & mansueti esse voluissent. Iam magnum illud ediderant
audaciae

audaciae, siue potius Imperij potentiaeque popularis opus, quòd, & gratuita cibaria corripuerant impetu, nutuque vno, & coegerant ad breue tempus esurire potentiores, illuserantq; domibus, & familijs, ad quas illa portabantur. Nec dum ira tamen, & indignatio Magistratum in talia ausos, sed tantummodo miseratio erat. Et ludibria illa ridebant iidem, ad quos iniuria pertinebat, quiue diei eius panem frustra domi expectarant. Mox praedator in sua patria populus ad infestiora prorupit. Pistrina diripere ipsa statuerunt: eòque ferebantur. Non author, caputue vllum: ipsa sibi dux erat propemòdum iam infinita multitudo: & multa seditionis ora, vocesquè. Clamant: irent, excinderent pistrina castella famis & fraudum, miseriae calamitatisque publicae sedem. Ad Portae Orientalis pistrinum ita vociferantes impetus fortè tulit. Et iam erant arma furentium exercitui, quae fors dederat in manus, machinaeque tamquam ad bellum irent. Moliuntur, incenduntque fores: claustra perfringunt: conuelluntque cancellos: ac nihil deinde hostile omissum. Quicquid farinae ibi accumulatum erat: quicquid tritici in horreo afferuabatur, spargitur etiam humi, proijciturque foras in contumeliam. Fuere qui implerent aufe-

*simile quiddam
in Virgilio, lib.
Aeneidum.*

auferrentque farinae faccos: fuere, qui caris
 exportarent, redirentque saepius per otium
 nemine contradicente ad easdem vices: & iti-
 nera Urbis quâ ierant redierantque isti, cerne-
 bantur albicantia tamquam nixisset. Haec
 praeda pauperum viliumq; plebeiorum erat.
 Sed qui in ea turba veluti primores, & antesi-
 gnani fuerunt, reperto etiam pistorum aerario,
 quicquid ibi nummorum fuit (& erat pecunia
 multorum fortè dierum) abstulere. Cùmque
 rabies, & auditas Populi debacchata in hunc
modû esset in omnia, quae tumultum ipsum con-
ciuerant, nec reliqui iam ibi quicquam fecissent
tot praedantium manus, ad extremum vertère
furorem etiam in ea, in quibus nihil materiae
 ad praedam erat, ligna, & tabulas, & corbes,
 & instrumentum omne pistrini, atque congesta
 cucta in cumulum vnum cremauere, veluti fa-
 crum Cereri, & Fami, & Diuo, cuius festa dies
 occasionem hanc dedisset. Codices quin etiam
 ipsos, & aduersaria rationesque mercimonij
 totius cremauere rogo eodem, & quominus ad
hominum etiam corpora furor perueniret, nul-
 la magis res saluti fuit, quàm fuga latebrae ip-
 sorum. Seruauere latebrae eaedem, testû inter,
 & laquearia, praefectum quoque rerum capita-
 lium, qui cum farissophoris & satellitio suo ad

vim

vim, seditionemque prohibendam excitus in
ultima spe, remedioque vnico, accurrerat, la-
pidisque tamen ictu petitus inter fugiendum
 aegrè euasit, mansitque abditus in angulo ob-
 scuro; donec prodire, & abire tutum fuit.

Exacto inter haec portenta matutino tem-
 pore vltimum flagitiorum fuit saeuitia, qua
 Vicarium Prouisionum optimum nobilissimum-
 que Virum (est Mediolani Magistratus hic
 Praefectus ferè Urbis, & publici consilij ca-
 put, creaturque annuus) ad necem implaca-
biliter, & efferate conquirebant. Id ab vno
 fortè exclamatum tota passim Vrbe persona-
 bat: atque ipse, siue strepitu audito, siue ab
 aliquo monitus, clausus, abditusque domi mo-
rabatur. Sicuti atro nubium globo, effusa
procella, fardibus, & eluue, ac terrore cun-
cta compleuit: Ita plebeiorum agmina aedes
 repente illas circumuenere, cladem, interi-
 tum, ignominiam, si successissent destinata,
 portantes. Attulerant scalas, & ferramenta
 secum, vt fores effringerent, siue per fenestras
eniterentur; siue demum etiam, vt euaderent
in tecti culmen. Inualida parietum ipsorum
 munimenta futura erant aduersus vim tanti
 populi circumfredientis, ac volentis utique
ingredi: nec de euentu dubitabant. Conspec-
 tusque

similitudo

furore ingens.

tusque senex est, malleum secum, & funem, & clauos ferens, atque dicatans, velle se foribus affigere Vicarium vbi laniatus à populo exanimatusque foret.

His animis, atque hac destinatione cum venissent, oppugnabant, & quassabant iam ictibus crebris pertinacissime Domum innoxiam, & ascensum vndique tentabant. Accitur à Magistratibus ex vicina Iouis Arce cohors Hispanorum, mittiturque illuc, vt praesidio esset. Haec ipsa cohors, timuerat magis, quam teruerat, vbi circumfusus domui populam, quasi exercitum vidit. Quid ageret illic instructus fistula miles, posteaquam in permixtas viris feminas puerosque displosisset, strinxisset etiam deinde ferrum? Neque mandatum huiusmodi habebant: & efferassent ira maiora multitudinem hanc, quam quanto impetu saeuiebat iam, atque domitis veluti frenis in praecipitia, & dirupta abibat. Itaque trepidare milites: stare procul: irrisui esse ipsi, & tela eorum, quae propter missile plumbum formidata semper alias, nunc vana, & irrita erant: ac ne auersi quidem, ad huiusmodi cohortis adspectum oppugnatores in coepta aedum verberatione perstabant.

Inhibuit paulisper impetum Magnus Cancellarius

cellarius praecipiti iam senecta venerabilis quidam, & miserandus simul, atque validus apud plebis animos, hoc ipso, quod obijcere se se furori non dubitarat, adieratque tale discrimen. Is curru deuectus in medias turbas, nunc poscens manu silentium, atque populi suppliciter aures, nunc interrogans humeris, & flexo capite quidnam agere vellent: interimque, ubi conticuerat strepitus, & audiri aliquid poterat, panis quantum vellent, tacto pectore promittens, sedabat quidem hac sua lenitate tumultum: sed compressit, ac sedauit magis arte, quae inter veterum quoque seditiones, saluti fuit hominibus, quos populus ad exitium necemque deposcebat. Namque affirmabat velle se curru secum eodem deportare Vicarium in Arcem, ut ibi, si qua ipsius in tam benemeritam plebem iniuria teneretur, daret poenas, & puniretur more maiorum. Id plebi placamen: sublatumque Vicarius in currum, haud aliter, quam simulatione supplicij, mortem in eo discrimine euitauit. Iam serum diei erat, & remedij pars nox, tenebraeque insequutae, fatietasque, & fatigatio, cum in sua quique tecta paulatim, praeda & punito utcumque dolore contenti dilaberentur, ac fruerentur ibi inter suos parte quietis, vel
actae

actae rei sermonibus. Magistratus tamen, Decurionesque Urbis, veluti minacem eam noctem, & in noua scelera fortasse erupturam timuere: Vicarijque aedes, traiectis per viam tignis, & apposita militari statione firmauerunt: ac de remedijs inde consultabant.

Egêre primùm omnium, vt copia panis in posterum diem, quae Dominica dies erat, affatim, largeque suppeteret: ac tota nocte apud pistrina feruebat opus: simul mandata opportuna dedere, vt frumentum vndiq; conquireretur, ne deesse posset. Virosque primores elegerunt, qui summo mane digressi in suam quique stationem pistrina custodirent auctoritate nominis, & fama, gratiaque, & fauore quodam in vulgus prohibitori tumultum, si recrudesceret rursus, vti accidit. Orto die, quies populo erat. Prodibant ad coemendacibaria semisopiti: tendebant itinere quisque suo: vix inter se colloquebantur: crederes verecundia pridianae seditionis esse confusos.

Aliquantum id spatij fuit. Mox exarsere truculentiore impetu, non tam vt spoliarent, diriperentque pistrina, quàm vt euerterent etiam à fundamentis atque demolirentur, siue vt subderent faces, atque inflammarent. In pistrinum Curiae Ducis ea noua rabies praecipue

cipuè incubuerat: iamque egesto inde quic-
 quid ibi farinae, & frumenti, quicquid etiam
utensilium erat, parabant inijcere ignem, &
inuoluere cuncta flammis, siue nihil ultra co-
 gitantes, siue ultro meditati hoc, vt traijceret
in vicina tecta incendium, & continua, dein
 longinqua corriperet. Id flagitij parabatur.
 Verùm ab vno pio homine vicinitatis eius
 fortè excogitata res, quamuis non illico de-
 terruerat ab tanta saeuicia plebem, dederat
 tamen spatij nonnihil, vt mistum illud damno
 dedecus inexprabile vitaretur. Namque ve-
 xilla Crucis, accensis hinc inde funalibus,
 ante pistrinum repente collocata conspicie-
 bantur, & pendens altè Saluator, per tormenta
 illa, quae seruauere genus humanum, expo-
 scebat scelerum infaniaeque finem. Ita mi-
 tigati paulisper erant, prout scilicet, numquam
 tantae fuere miseriae populi huius, vt pietatis
 insitae obliuiscerentur: & Christi necis hor-
rore, atque imagine obiecta animis attoniti
constiterunt.

Aderat interim ex Aede Metropolitana
 Clerus vniuersus: velati Canonici insignibus
 suis composito agmine procedentes immiscue-
 rant se se turbis: reliquerant in Templo solen-
 nia sacrorum ob huius nuntiati periculi terro-
 rem

rem, & Crux maxima praeferebatur: flammisque ita temperatum est. Ad pistrina deinde minora plebs auertitur, quâ nempe panes atrii venduntur: nec finis, antequam, & plebeio huic, & triticeo pani pretium à Magno Cancellario statueretur, quo ne vilius quidem optare potuissent. Statutum est: plebei panis octonae vnciae darentur in assem: Nobilior alter trinis libris in sextarios singulos vendi iussus. Tunc enim verò haec desperata plebes inolescere laetitia: ridere amarum: in angulis, tabernisque iactare, quod annonae vilitatem ipsa sibi fecisset: simul cauillari, atque incusare breui duraturum id munus: infectum veneno cibum dicere: non capere utique tanti boni fidem, & interea tamen frui velle praesentibus: accurrere: emptitare, vel è superuacuo: implere arcas, & doliola, & lebetes: abscondere modis omnibus, quasi rapturi mox ab ore panem forent iidem illi, qui vendiderant.

Haec omnia cum ita agerentur, interfui ego: incideramque fortè ita in principia seditionis, ut cura humani ingenij ad finem usque spectator esse vellem, nihil sanè minus eo tempore cogitans, quam futurum esse me aliquando narratorem etiam huiusmodi rerum. Sed & reperi nunc inter acta Ciuitatis adnotata con-

signata sic ordine cuncta, prout moueri primò, deinde gliscere, postremò fatiscere, & placari, ac reprimi sua sponte tumultum videram.

Totum autem hoc, cum, ita sicuti retuli accidisset, non dolor, & moestitia solùm, sed verecundia quaedam etiam in publico Consilio erat, haud aliter, quàm vbi paterfamilias, lapsa fortè domi pudicitia, dehonestatam sibi prolem, famamque esse maculatam videt. Acciderat sanè etiam aliàs nostra memoria caritas, & pènuria annonae Vrbi, vt frumenti sextarius septenis libris staret: Interdumque pretium id augeretur. Sed non ideo ruperat obsequium, modestiamue populus, cui gratia semper, & hōnos fuerat apud nobilitatem hanc, ideo quia reuerentia, & fide, erga nomen, maiestatemque Regis, fuit multitudo semper altera quodammodo nobilitas: neque vmquam ab huius publici Consilij autoritate discesserunt. Nunc omnia violasse videbantur: nomen auctoritatemq; publicam: Imperium, Regemq; ipsum, & Patriam, Urbemque hanc, idè charam, dilectamque Regi, quia robora virùm hinc, & modestia animis semper fuit.

Angebant Procere illa cura insuper, ne ferens mista falsa veris in Regiam sinistra fama
perue-

perueniret, tamquam aliqua publici Consilij culpa deuentum esset in rei frumentariae angustias, quae causam seditioni praebuere. Miserant ob alia Ciuitatis negotia legatum ad Regem: isque Madriti hoc tempore erat, aliarum quidem rerum inchoata spe, alia verò penè desperans, prout natura negotijs, & non vnus formae postulata, quae attulisset. Ad hunc suum hominem per tabellarium expeditum miserè litteras, & mandata in hunc modum.

Infimae sortis homines fuisse paucos, qui, spe, ac destinatione furandi, primò pueros, feminasque concitassent: his deinde aggregasse se se alios: deinde plures, ac denique tumultum ortum populari seditioni similem ob annonae difficultates: dilapidata pistrina, Vicariumque Prouisionum frustra petitem ad necem; Accidisse haec, & alia, quae fusius ordine cuncta perscripta fuerunt. Proinde accederet ipse primò quoque tempore ad pedes Regis: exponeret Maieitati casum hunc: atque ita subijceret. Neque populi mentem eam, sed insaniam fuisse, impetumque repentinum: & nobilitatem vniuersam viuere animo, ac fide, quam à maioribus acceperint, quamue tantae Maieitati debeant. Neminem vnum esse Mediolani nobilem virum, qui non paratus fuerit

fu^{er}it in ea populari conſternatione effundere vitam ſi pertinacior ea fuiſſet : & poſteaquam deſederit, quieueritque haec, cuncta iam etiam apud plebem eſſe qualia ſemper fuiſſent.

Inerant hiſce publici Conſilij litteris etiam alia, quae locis temporibusue opportunis, dicere, & exponere deberet Ciuitatis ille legatus, ſi arrepta motus huius occasione nonnulli fortaſſe aliquid praeter vetera Urbis inſtituta, & iura nouare in Regia ſtuderent, ipſamue Ciuitatem criminarentur apud Regis aures.

Repraefentaret publici Conſilij ſolicitudinem, & impenſas, & nihil umquam ab vlla parte curae remiſſum, vt ſuppeterent alimenta Populo. Nouiſſimè xv millia tritici modiorum, Duodecim millia ſeliginis in publicum comparata eſſe, negotiationemque inſtitutam, vt copia, numeruſque maior ſubinde comperetur in Urbem. Neque frumentum umquam Urbi deſuturum fuiſſe, ſi ea, quae decuriones facienda cenſuerant, facta eſſent. Cenſuiſſe enim imprimis hoc, atque etiam de ea re ſupplicaffe poteſtati maiori, ne qua exportandi frumenti facultas cuiquam fieret. Cenſuiſſe, atque ſupplicaffe, vt edictis, poenisque grauiffimis fanciretur, ne frumenti coemptio eſſet inſtitoribus, qui ab vltimis Ver bani lacus
oris,

oris, ad Urbis, usque portas venire cum iumentis, & mercari, traicereque postea ab domo in Heluetios facili confinio possent. Etiam ex agro Laumellino, hoc est ex ipso horreo Urbis, traiectum in terras alienas, euectumque esse frumentum, cuius emendi, & in horrea sua comportandi, pistoribus, atque farinarijs Urbis petita, & negata facultas fuerit.

PESTILENTIA VRBEM INVADIT

PONS Vetus, & vicus Portae Orientalis sunt nomina partium Urbis, ipsaeque paruarum Urbium instar. Inde primi incessus, & prima indicia prodire pestilentiae incipientis, quae, sicuti per continentia tecta flamma traicit, ita per singulas domos, & per singula fere Ciuum capita itura erat, ut serpendo paulatim in agros etiam latè porrigeretur: nec finis, antequam, veluti coelestis providentiae ministra lues cuncta purgauisset. Haud alienum fuerit, diem etiam, & locum, personasque notauisse, quo die, quoue loco, & quaenam in capita primum tela haec inciderunt, ut factò ita leniter initio, procella, deinde telorum Vrbi ingrueret, atq; tot mortalium agmina sternerentur. Gregarius fuit
vnus

vnus miles ex eorum numero , qui commotis Rhaetiae rebus apud Clauénam in statione positi fuerunt. Nomen viro Petrus Paulus Locatus. Is ad x. Cal. Decembris, ab Tribuno Italicae Legionis , vnde erat , impetrato commeatu cum venisset fortè in Urbem , diuertit apud auiam suam Elisabetam nomine , ibique per tridui spatium securus pariter, incustoditusque manebat. Mox aegrotare coepit: & quia longior fiebat morbus, quàm , vt in tenui domo sustentari posset , in Valetudinarium Urbis maximum ad solita egentium subsidia deportatur. Intra biduum mortuus ibi est: & corpore inspecto, reperti bubones, inditia manifesta pestilentiae, quae nusquam haecenus alibi deprehensa per Urbem , in sermonibus tantummodo rumoreque hominum erat. Secutae deinde mortes omnium , quotquot sub eodem tecto mansitauerant, haud dubium fecere, quin contagium in Vrbe esset , ac delato protinus ad Magistratum casu , domus illa prima omnium clausa est. Columnaeq; domus ex possessore Columna appellatur, qui ipse cum vxore, & liberis, pestilentiae manifestus cecidit.

Hoc facto initio , per eas etiam , quas dixi partes , lentè serpebat id malum , tamquam scilicet clementia Numinis per interualla illa

&

& spiramenta , remedio locum daret. Nobilisque nostri tamen, in quorum manu Respublica erat , parum intellecta ea diuina benignitate, segniter obuiam iere cladi : quod accidere solet , vbi vim suam imminuentem infringi seu euitari Maiestas eadem abnuuit. Lentae aures , lenta remedia fuerunt: atque interim ab ipsis exordijs primoque suo incessu pestilentia per aliquot dies minitabatur Vrbi simul, & quodammodo pauens ipsa latitabat.

Quia descendisset ab Rhaetiae vallibus , & quia steterat paulisper intra illam tantummodo Columnae domum , fiebat sic , vel longinquitate locorum , vel tarditate progrediendi , vt quasi malum alienum , alienaque cura acciperetur . Sed & ante casus, quos memoraui istos circa Februarij mensis initium anno 1627. percubuerat incertus primo rumor pestilentiae imminuentis : certior deinde fama , nuntijque quotidie funestiores antecesserant aduentantem eam cladem . Ipsa demum aderat, obscure interdum, & furtim in capita ciuium latrocinians, alios sternens vi aperta, subsidens, exorientsque rursus, & sicuti sunt hominum ingenia, securitatem apud animos, & metum, variosque motus alternans, tamquam , aut sibi finxissent inani suspitione periculum , aut ad-

versus

versus pericula dissoluti, negligentisque fuissent. Sic appositae, dein remotae custodiae, munimenta cancelli, tesserae, inspectiones ad portas Urbis, morae, & experimenta quadraginta dierum, & quicquid aliud in tali discrimine cauetur, atque prouidetur, cautum aliquandiu, dein remissum, atque neglectum, varietate, & inconstantia, quae ipsa portentum videri cladis posset.

Inter haec solitudinum anxiarum, & fatalis negligentiae portenta triennium ferè exactum. Post primos illos deinde casus, vulneratamque Columnae domum, centum, haud amplius, intra quatuor menses periere vi eadem: numerus exiguus, si, vel genus, & natura morbi, vel magnitudo Urbis, vel tot milia spatio deinde breuiore absumpta inspicerentur. Mox, velut irritata vinculis, & ruptis, per quae cohibebatur fera erupit, & sine discrimine villo corpora obuia laniauit. Laniamenta namque verè ista corporum fuere, licet sine tēlo, sine hostili vulnere res ageretur. Saeuitumque atrociori spectaculo in hominum vitam, per contactus, & halitum, occultamque tabem, quam vbi patentia viscera, ceruicesque defectas, & brachia abscisa, foeditatemque aliam vulnerum inter duas contrarias acies furor humanus ostendit.

DE

Pestilentia in an-

trorum tota ci-

uitate perie-

DE FVRORE ET INSANIA PLEBIS CIRCA
PESTILENTIE FIDEM

INTER alimenta pestis autem, quae plurima, & perniciosissima fuerunt, vt cresceret ita, confirmareturque malum, nullum ego, neque maius, neque perniciosius fuisse crediderim hoc ipso, quòd credere nolebat plebs, pestem esse hanc, sibilisque, & conuitijs, & cachinnis insectabatur loquentes id verbum. Neque verò plebis haec insania tantum, sed medici quoque nonnulli, ambage definitionum, atque non inuenientibus exitum disputationibus eleuabant rem, carbunculosque, & furunculos, & luxuriam inguinum, intemperantiamque libidinis irridebant, si quis consuetos illos in pestilentiae morbo tumores nudasset, remediumque poposcisset. Februm etiam esse contagia, & naturae deliquijs, siue ob causas occultas, & arcana viscerum, subito extingui nonnullos: haec, & alia prompta fallacissimae arti, siue diuinae artis malè periti homines in circulis differendo, remedia, quae fuerant antecapienda distulerunt.

Profecerantque isti subtilitate fauorabili apud vulgus in tantum, vt contraria his, aut diuersa censentes alij, qui perniciem, & exitium

tium intra portas , qui vim tabificam inesse corporibus, & circumſpecte agendum praecauendumque monebant, non pro medicis iam, ſed pro impoſtoribus, atque ſycophantis, imò pro patriae hoſtibus eadem importunitate plebis acciperentur. Quaeritare opus eos, & emolumenti ſui cauſa, peſtem, vbi nulla eſſet, inducere velle aiebant.

DE LVDOVICO SEPTALIO PRINCIPE MEDICORVM
AC DE DISCRIMINE EIVS CIRCA
PESTILENTIAE PRINCIPIA

MEmorabo caſum vnus, cui, ad eiufmodi conuiſijs, & ſecuta dein publica calamitate, creſcere gloria potuerat, niſi claritudine ſtudiorum, & magnitudine ingenij iam ad ſummum ea perueniſſet. Ludouicus Septalius erat Medicorum facile princeps, philoſophantium idem, & interioris litteraturae ſummus: addideratque etiam Arti dignitatem, tum caetera honeſtate vitae, tum pecuniae contemptu, quotieſcunque ad pauperes, ad litteratos, amicosque vocaretur, & minima pars laudum, gloriaeque eius haec. Longa aetas ei: & veritate praedictionum authoritatem naſtus,
noſtri

nostri saeculi Hippocrates apud prudentissimum quemque habebatur : magnaue reuerentia Viri etiam apud plebem, antequam vecordia temporis huius animos infatuaret.

Is, die quodam cum ad aegrotos fortè suos, solito propter aetatem sellae gestamine circumferretur, adeò proturbatus est infesto clamore baiulorum, atque mulierum, vt, qui succollabant, hero metuentes, intra notam, & amicam domum, quae proxima fortè fuit, ingredi, sistereque illic, pretium duxerint, donec tumultus ille resideret, ac foedissima turba dilaberetur.

Vociferabantur consono clamore omnes: hunc esse caput asserentium, confirmantiumque pestem: huius barba, supercilioque Ciuitatem in terrores agi vniuersam, ne cateruae medicorum otiose manerent essetque non-nihil, ad quod illi adhiberentur. Ita grauissimus, optimusque senex, & antistes sapientiae Septalius, qui innumeris penè mortalibus vitam excellentia artis, quae multis etiam liberalitate sua subsidia vitae dederat, ob petulantiam stoliditatemque multitudinis periculum adiit. Neque principi tantummodo medicorum huic, temeritate plebis insultatum est: sed Tribunalia ipsa, sanctumque Iustitiae nomen,

nomen, & latas pro publica valetudine leges, illudere audebant, tamquam essent inania cuncta, & eos sibi timores authoritas publica finxisset.

PROCERES AD REMEDIA ACRIORA ANIMVM
ERIGVNT

POSTEAQVAM, non credita primò aliquandì, deinde contumacissimis etiam manifesta simul, & confessa pestilentia fidem sui fecerat, & tamquam in bello, per stragem, cumulosque corporum, ed processerat, vt traheret in se cuncta, & Vrbem occuparet ipsa, atque haberet, rursusque tamen à multis haec furia, imperiumque eius spernebatur: Constitui tribunalia, circumdari lictores, quaeri iudices, apponi magistratus, leges, & iura describi necesse fuit, fierique, & curari omnia velut ad Regni speciem attentius atque providentius, quàm sicuti facta & curata umquam fuissent. Grauiissimi Patrum electi qui praesiderent. Ioannes Baptista Archonatus, & M. Antonius Montius fuere. Hic illi successerat, & vterque vitam vere Senatorijs animis in eo munere posuerunt. Namque, pulcherrimam, & maximam Catholico Regi Prouinciam, & Reip.

Reip. statum, & quicquid reliquum miserae Ciuitatis, patriamque ipsi suam, prudentia, & fide, & vigilantia, & contemptu periculorum tuebantur.

Hi Praefides, id regimen summae rerum: consiliaque, & adiutores è magistratibus alijs, primaque nobilitate, prout cuique, vel promptus in pericula animus, vel plurimum prudentiae inter ipsa pericula erat. In singulas portas, regionesque Urbis descripta munera, & vices, & dies, quos quique nobilium obire deberent. Edictum in primis, nequa mercimonia, quaeue iumenta, quosue mortales, & ne rem omnino vllam intra moenia recipi admittique sinerent, nisi explorata prius, chirographisque testata incolumitate loci, vnde mercimonia, iumenta, hominesue illi venirent. Ac ne temerè pateret accessus, vtque milites ad custodiam perpetuò excubarent, cancelli ante portas, tuguria post cancellos erant. Regionatim, atque vicatim, & per singulas in Vrbe Paroecias, nobiles alijs, quibusue curam illi delegassent, circumibant quotidie domos, necessitatibusque multorum, publica impensa, vel etiam priuato aere subueniebant.

Morbum ipsum, suspicionesue morbi, casusque quotidianos ita regebant. Qui iuciderant,

derant, hi confestim, aut Lazareto tradebantur, ipsi familiaeque eorum, & omnes, qui sub eodem tecto mansitauerant: aut si remanere praeoptassent, appposito satellite custodiebantur. De quibus autem coniectura tantummodo aliqua, & anceps existimatio esset: hos quoque seorsim à caeteris haberi cautio fuit: sed aliquanto minus arcta custodia erat: ac si egestas manifesta esset, alimenta de publico accipiebant. Cadauera plaustris euehebantur, antecedente apparitore, qui submouebat clamore homines, & obuium quemque elata voce monebat, facessere procul, abstinere, contactu, vitare Monattos, adesse mortuos, adesse pestem. Mortuis accipiendis, excauatae ingentes & vsque ad aquam depressae fossae erant. Congerebantur cadauera huc, superiniecta in singulos ordines viua calce, vt caustica vis citius absumeret saniem illam etiam sub terra formidolosam vitae salutique communi, si qua iam esset publica salus, & vita. Nam, quò plus mortuorum quotidie egerebatur, tantò plus egerendum in singula penè momenta, euehendumque erat: oppletisque decumanis, & maximis hisce voraginibus, alijae deinceps, atque aliae aperiebantur, quae tamen ipsae non sufficebant.

D. CAROLI CORPVS AD PESTEM AVERTENDAM
SOLENNI SVPPPLICATIONE EFFERTVR

IN tanto malo , tantisque terroribus , cùm nihil humanae opis vltra occurreret , efflagitauere Proceres , atque impetrauere à Cardinale , & Archiepiscopo Federico , vt Corpus , quod D. Caroli fuerat , aperto monumento redderetur luci , portareturque per Vrbem . Spem videlicet in eo summam habuerant , si mortales exuuiæ diuini hominis reuiferent adita sibi compita hæc olim , coelumque , & auras easdem , posse depelli inde tabem , & venenum , & quidquid illud ab omni parte , corporibus , ac vitæ inimicum spiraret .

Posteaquam petierant ab Eminentissimo Borromæo Ciuitatis nomine Decuriones , annue-
ratque ille , vt Sancti Caroli Reliquiæ depromerentur ducerenturque per Vrbem : illicò trepidari coeptum est ad apparanda disponenda , ornandaque omnia in eum modum , vt tecta ipsa , parietesque , & viae , & facies Populi supplicantis , & quasi superflusus ipse aer , & cuncta simul faterentur pietatem insitam erga Diuum , atque essent etiam hæc quodammodò preces . Id publicæ simul^o , & priuatae munificentiae opus fuit , cùm & effudisset sese

Ciuitas

Ciuitas in omnes sumptus , queis opes angustae mortalium possuat adorare superum Maiestatem: & singuli Ciuium, non inter se modò , sed etiam cum Rep. penè ipsa certarent, ac superare Decurionum edicta conarentur. Edixerat namque Vicarius , vt quacunque pompa ducenda esset, exquisitissime ornatam, & excultam pro se quisque frontem aedium suarum exhibere studeret . Si restrictè nunc segniterque agerent , fortasse non vltra dari tempus exercendae pietatis , opumque promendarum . Quà sine domino domus esset, siue quàm pauper inquilinus habitaret, ibi, vel diutior accola fortunis & splendore suo rem gerebat : vel publica res eadem vice defungebatur. Atque, vt spatia, & viae omnes , quacunque praeterueheretur agmen eo die essent totae Corporis, reliquiarumque Sacrarum, & Diui eius , vnde petebatur salus, sublata rhedarum importunitas , impedimentaue alia edicto eodem . Sua item mandata Clero suasque caerimonias edidit Cardinalis: vt die, & hora destinatis tempestiue congregarentur in Templum : vt ritè expiati , purique conuenirent, vt pio , modesto agmine deiectis in terram oculis, absque tumultu, siue etiam absque euagatione animi incederent . Ordo
agminis

agminis itineraque, & positiones, quâ efferretur, quâue consisteret, quâue rediret Arca, de scriptus ita, seruatusque fuit.

Ab Templo maximo, rectâ, per viam quae via Decumana antiquitus dicta est, & flexu inde per viam trium Regum ad Pontis Nudi Crucem.

Ab Nudo Ponte, per Viam Latam; inde per Aream, quae Basilicae D. Stephani praeiacet: hinc noto flexu, per totum Portae Tonsae spatium, ad Crucem vsque sitam ibi post vltimos. Ab vltimis, & Cruce, per viam, quâ ad eiusdem Portae cloacam itur: atque hinc ad Orientalis Portae Crucem. Ab Orientali Cruce rectâ praeter S. Andreae Templum ad viae caput, quâ Portae Nouae Crucem ipsa in capite altero Porta adspicit. A Portae Nouae Cruce, capto diuerticulo per S. Augustini viam ad minorem Vltimum atque inde ad Pontis Veteris Crucem. Ab Cruce Pontis Veteris ad D. Thomae Templum, & flectendo per D. Prosperi viam, ad Crucem Portae Vercellensis. Ab ea Cruce ad Corriuium: ab Corriuio ad S. Sepulchri Aedem: ab Aede ista ad Curiam Ducis. Inde per forum Mercatorum ad templum maximum.

His ita dispositis adque constitutis, age sanè: struitur adornaturque pompa, non tamquam

quam in peste, cladeque media, & in funestissimo, ac moestissimo tempore patriae huius, sed tamquam in publica gratulatione, natalique die Urbis. Tunc lugubre spectaculum potuit esse laetitia ipsa Mediolanensium, festusque apparatus in funere suo. Neque luctus, & misericordia minor, si quis indigena, siue externus, in apparatu pompaque illa, alia quidem contempleretur, alia verò diuinare posset. Contempleretur inquam tabidae Ciuitatis, populique paulò post morituri alacritatem, & magnificentiam, opesque profusas, simulque amoenitatem, & certamen ingeniorum, ad excipiendum composito plausu cadauer, & ossa Pontificis, qui viuus etiam olim depulisse ab Vrbe pestilentiam crederetur: diuinaret autem id quod postea secuturum erat, stragem nempe tantam, & velut irritato supplicationibus Numine, congerenda paulò post in cumulos exanima corpora eorum, qui prodituro in lucem cadaueri excoluerant ita adornauerantque Urbem.

Tridui spatium non amplius ad comparandum habuere, ex quo, transfuehendis reliquijs, ducendaeque pompae dicta dies erat. Intra id tam breue tempus, compita viaeque omnes steterunt in triumphi faciem: neque veterum
modo

modò Romanorum munificentia structos apparatus eos triumphales, sed Romana quoque lingua loquentem eum triumphum exhibuere Ciues, quos concepta visceribus pestilentia simul, & elegantia ingeniorum agitabat. Emblemata, & carmina passim, titulique, & mille inscriptiones amplexae laudes, & decora Pastoris antiqui cubitalibus sanè litteris inauratis, sed & sententiae continebantur altae illustres, specimina veteris Latij, tamquam, non in Longobardica Vrbe res ageretur. Arcus, & Arae, & alternantes per pulpita chori, quà ducebatur ibatque pompa, per totum iter, totoque flexu, & anfractu viarum visebantur atque audiebantur. Textilia, tabulae pictae, & stragulae vestis omne genus, vasa, & quicquid pretiosi, vel antiqui domus vnaquaeque haberet, expositum, obuiumque Cadaveri Sancto venienti stabat. Parietes, & testa pauperum regali sumptu ornata erant. Inumbrabatur iter continuo desuper textili, exclusoque per id tegumen aestiuo sole, & structis hinc inde ramalibus, sylvarum horror, atque pars tenebrarum in parte pompae. Profectò, si non alta aeterna mente repositum, fixumque maneret, vel purgare, vel admonere Gentem, potuisse arbitror per huiusmodi obsequia,

obsequia, & placamina leniri coelestes iras,
Ciuitatemque exitio eripi.

Placamen namque longè maximum aderat
ipsum D. Caroli corpus, siue potius quicquid
illud, ex corpore, ac mortalitate ipsius reli-
quum fecerat iniuria, tabesque aevi, quae, cum
marmora etiam, & aera exedat, truculentius,
infestiusque corpora hominum absorbit. Arca
erat insata peristromate serico albo, crystal-
linis ad latera fenestris, per quas corrupta
Diui facies translucebat iucundiore apud
piorum animos, oculosque specie, quàm si in-
tegra, & nitidissima foret. Canonici porta-
bant: pars populi, Clerique praecedebat: pars
sequebatur: velati suis insignibus ibant Sa-
cerdotes, Magistratus, primores: facibus
cuncta collucebant, & nudo plerique pede, ac
syrmate oblongo alij, consternationem ani-
morum, poenitentiamque testabantur. Interea
tamen, omnium, & ab moerore, ac sollicitu-
dine animos, & oculos ab contemplatione
rerum aliarum in se auerterat, mitrata illa cal-
ua D. Caroli, squalidusque rictus oris, abdi-
cato munere vitae, dentiumque horrida desti-
tuta seges, & inanes caui sinus oculorum, quam
humani capitis compagem in Sancto Ponti-
fice corruerat quidem, atque dissoluerat
mors

mors, potestatis, & licentiae suae ritu. Sed & vestigia, notasque nonnullas reliquerat, per quas vultus antiquus, & pastoralis honore grata facies agnosceretur, qualem eam fuisse simulacra testantur.

Huc intenta erant tot millium ora, precesque, atque audebant suo iure exposcere, ut conseruatum semel ab se populum, iterum tueretur dextera, vique eadem. Spectabant ita, & precabantur, simulque ab arido illo, & corrupto surdoque iam capite, ad praesens aliud, spiransque caput, preces, & spei partem vertebant sublatis alte vocibus petentes ab Cardinale Archiepiscopoque Borromaeo, qui ponè sequebatur Arcam, ut offerret ipse vota Patrueli, cui, & meritis, & sanguine, & munere, corporeque etiam proximus iret.

SUPPLICATIONE HABITA PESTIS AVGETVR

INCASSVM missae preces, & velut excitata pestilentia vocibus illis, amplius, infestiusque saeuire coepit. Cuius tanti arcani causas exquirere, anceps, illicitum, nec ideo assequi possis, causasue assignare, cur pestilentia lentum aliquandiù, dein terribile negotium, eadem ab motis D. Caroli Reliquijs, & sollicitato

tato veluti Coelo terribilior multò violentiorque facta fuerit, adeò scilicet, vt pij, fanique diuinitus immissum esse malum, stolidi, atque vaecordes, ne vi quidem, & potestate diuina depelli posse autumarent. Quàm lentè, quàm timidè, quàm cunctanter, ac propè diffidenter egerat furia per aliquot menses : tanto iam impetu grassabatur : Ad III. Nonas Iunias, qui dies erat D. Barnabae sacer, apertae sunt, & deportatae Reliquiae, gratulatione, quanta dici fatis, explicarique non potuit. Ex eo die, pestilentia vim, & nomen, & regnum verè suum obtinuit. Antea, species, & vmbra tantummodo mali eius fuerat : semperque contagia, & mala generis huius, quae nobis, quaeue gentibus, vrbibusue alijs aliquando inciderunt incidentue in posterum, improprium id, ac veluti translatum ex alieno pestilentiae nomen habebunt, si quis aliena cum nostris comparare volet. Continens Arca Reliquias, & in corporis humani figuram, composita, trabeata, mitrata ossa Pontificis antiqui per ostidui spatium, totidemque noctes in Ara maxima stetit adfluente illuc populo ad petendam cum precibus & lacrymis opem, quae iam coelestis arcani occulta lege, ac decreto, non quidem negata, & abscisa, sed dilata

lata erat: Eo temporis spatio tam multi perierunt, ut id ipsum pro responso esse posset. Eiusque responsi, ne ambigua interpretatio haberetur, augebatur, quotidie sic perentium numerus, donec ad mille octingentos quotidiana summa peruenit. Egeruntur rectis, plaustris euehuntur corpora exanima, omnis aetas, omnis ordo, sexus uterque, nec fortunam, animosue Libitina discernit. Non scrobes vllae, voraginesque extra Urbem destinatae cadaueribus accipiendis, non cubacula Lazareti, sufficiebant multitudini alteri cadauerum, quae spirantia adhuc, & viua mortem optabant; Erantque miserabiliores isti, quam quos mors tam repentina, & foeda abstulisset.

FOEDISSIMA RERUM FACIES: OB CADAVERVM

ACERVOS, INSOLENTIAMQUE

MONATTORVM

MVLTA fanè, & bellorum casibus, & scribentium ingenijs repraesentata leguntur ludibria rerum humanarum, qualia misere summa imis mors exhibere consuevit. Sed quale ludibrium omnibus horis, hoc tempore Mediolani spectabatur nunquam alibi spectatum esse arbitror. Monatti, desperata ministeria

ministeria pestis, atque contemptu exitij prae-
 ceptis in pericula vespillonum genus, quinam
 fuerint, haud cuiquam ignotum esse arbitror.
 Origo nominis, ex eo, quod relinqui solita-
 rios oporteat, nec debeat se quisquam immi-
 scuisse illis. Mortuos, siue moribundos, cada-
 vera, bubones, saniemque bubonum, & puru-
 lentos artus absque discrimine vlllo contrec-
 tans, atque in ipsis epulari cadauerum aceruis
 gratissima voluptas huic hominum generi est:
 turpiusque etiam, siue portentosius, quod
 proloqui pudeat, incubuere Monatti cadaue-
 ribus, vltima exempla libidinis, insaniaeque
 humanae exhibentes, nisi si tamen supra, vel
 potius infra belluas etiam ea portenta fuerunt.
 Vt quaeque maxime suspecta domus, vel etiam
 ubi nulla suspicio, tantum quia suspicari de
 vniuersis iam licebat: ingressi isti, corripiebant
 pueros, puellas, maritos, vxores, tamquam ad
 Lazareta ducturi nisi pretio placarentur. Ho-
 rum effingere personas procacissimi iuuenes,
 annectere tintinnabula plantis, ingredi do-
 mos, tentare cubilia, quaerere, vel inspicere
 plagas, eoque aditu tamquam auctoritate pu-
 blica, quiduis aliud, ex disciplina facere,
 atque experiri non dubitauerunt. Acciditque
 aliquando, vt tempore eodem intra domum

vnam,

vnam, & laruae istae debaccarentur, & iusti vespillones ingredi vellent. Inde rixa, mox pugna pseudomonattorum cum veris, legitimisque Monattis; verberaque, & mutui ictus, nec sine sanguine abscessum. Atque huiusmodi rerum etiam iudicia tractari apud Magistratus, pars publicae calamitatis fuit. Sed & ministri infimi magistratuum ipsorum, lictores nempe, & satellites, irruptiones in aedium penetralia, furta, raptus, iniurias semper quidem solita sibi, tunc licentia temporis petulantius, & impunitate maiore exercebant.

Neque finis extorquendi ita, & rapiendi, donec accusati comprehensique nonnulli eorum, poena simul, & exemplum è furca pependere. Cùm tres vno die suspensi satellites essent, & carnifex iam fortè deesset, remissa vni poena est, si defungi munere vellet, quam conditionem laetus ille accepit, strangulavitque Collegas. Sed Monatti velut suo iure petulantiae genus omne in viuos mortuosque exercebant, trahebantque cadauera, veluti cùm macellarius homo, vitulos, haedorumque gregem vno omnes vinculo implexos in lanienam ducit. Viri simul, foeminaeq; erant, & cum pueris innuptae puellae, & affixum vberi infantem adhuc amplexu tenens mater, iuuenesque

nesque , & fenes , & incubans domino seruus,
 aut faciem illius, temere protenso, vel in ora
 coniecto pede pulsans : diuites , pauperesque
 nudi: rara ad pudorem velamenta corporibus,
 & , si cui iniectum fortè linteum fuerat ,
 diripuerant, abstulerantque vespil-
 lones. Huius brachia, & crura,
 caput illius pendebat è
 carro , inuolueba-
 turque rotis,
 &
 corpora tota passim
 humi prouolue-
 bantur.

IOSEPHI RIPAMONTII

DE PESTILENTIA QVAE

MEDIOLANI FUIT

ANNO CIO DC XXX

LIB. II.

NERAT persuasio multorum animis;
 feri, spargique pestem, fraudemq; esse hanc coniuratorum,

I inter se Principum, ad Prouinciam, Urbemque faciliore successu inuadendam: cui spei haud
 vmquam feliciter tentatae, infestius nunc;
 certiusque imminerent. Scilicet, acta per
 hunc modum vbique solitudine, ac vastitate,
 sublatisque cultoribus, defuturos, qui arma
 contra ferrent; nudumque & inerme solum
 habituros, quicumque occupare vellent.

Magni Reges, & proximi eis, iunctique
 siue interiecti destinabantur tam desperati
 consilij auctores: ac publica desperatione,
 iniuria fiebat haec illis etiam, qui maxime
 omnium res nostras afflictas fortasse misera-
 bantur. Nec mirum, si Ciues nostri incess-
 bant

bant ita , criminabanturque longinquos , & alienos, cùm eodem genere suspicionum inter se etiam saeuirent , mutudque infamarentur. Atque ad Diuinæ Prouidentiae arcana referri hoc etiam potuit , ceu morbus quidam , & poena animis , calamitati illi , exitioque corporum haud dispar: resque, in tantum , siue calamitatis, & miseriae , siue vanitatis , & insaniae processit, vt eodem tempore, & vnctores in Vrbe quotidie , sicuti postea demonstrabo , punirentur : & intra Lazaretum, hoc est in publico pene sepulchro, suspensiones , & indicia sceleris manarent , euanescerentque simul. Ac mirum sanè dictum: reperti ibi quidam sunt instructi arculis, & ampullis, & omni apparatu flagitij : confessique isti flagitium , & tormentis omnibus excruciatu perseverauere confitentes , donec in patibulum agerentur. Ibi demum, iuxta laqueum, inter carnificis manus, de sua innocentia ad populum ita dixere. Mori se libenter ob scelera alia , quae admississent : caeterum, vngendi artem se factitauisse numquam : nulla sibi veneficia aut incantamenta nota fuisse. Ea, siue insania mortalium, siue peruersitas , & liuor , astusque Daemonis erat . Sic indicia rerum , & iudicum animi, magis , magisque confundebantur.

Prima

Prima, & certissima lethaliū, vnguentorum, & humanae fraudis in creanda vel alenda peste suspicio sedit animis, posteaquam frontes, parietesque aedium, per totam Urbis longitudinem, dextra, laeuaque, grandioribus per interualla maculis contaminati apparuere. Id accidit ad x Cal. Maij summo mane, puro, ac sereno coelo, vt cuncta, sicuti erant, clarissime oculis notari possent. Notauere prima luce labes eas ad sua quique negotia vagi matutini nonnulli: deinde hi alios, & alij caeteros ad inspiciendum excitauere: & mox properè vniuersi ad spectaculum effundebantur. Funestares, facta paulatim erat quasi populi ludicrum: & nos quoque imus visere. Maculae erant, sparsim, inaequaliterque manantes, veluti, si quis haustam spongia saniem adpersisset, impressissetue parieti: & ianuae passim, ostiaque aedium eadem adspergine contaminata cernebantur. Inhorruerant animi: statimque suo more obliuisciebantur: & rursus imago eadem, tantò praesentior erat, quantò magis crescebat morbus, & quò maior quotidie strages corporum fiebat. Quotidie referebatur, vncta pervncta reperta esse nonnulla, protinusque lethiferam tabem concepisse, qui adhaesissent.

Qua semel recepta fama, homines deinde
etiam

etiam vngi ipsos, adeò percrebuit, vt in tanta morientium multitudine, pauci essent, qui non traxissè ita venenum crederentur: siue vncti videlicet ipsi: siue polluti, atque infecti contactu aliorum, quos polluisset id virus: siue demum, quia polluta infecta attigissent, ligna, parietes, & quaecumq; alia quotidiano mortaliu vsu teruntur, atque contrectantur. Paulatim inde, à ferramentis, & lignis corporibusq; ipsis, eò transgressa fama est, vt itinera etiam viasque Urbis, & auras, aeremque circumfusum, ceu manibus ijsdem venenata cuncta timeremus. Et quia aderat iam id anni tempus, vt frumenta in areis, & agris, sicuti fit, in cumulos metasue congesta agricolae haberent, haec pariter alimenta vitae venenari persuaferat timor. Adijciebat fama eadem, carmina, & deuotiones, & in parte operis Orcum, atque coniuratos cum hominum scelere Daemonas ad Prouinciam & Urbem ita peruaftandam.

DE QVODAM TETERRIMO ET FALSO RVMORE
VVLGATO PER VRBEM ATQVE
APVD EXTEROS

PLERAQVE eorum , quae retuli quaeue refe-
ram, in maius aucta videri posse nonnullis,
haud nescius sum. Illud verò etiam fabulosum
ego fuisse arbitror, quod, inter haec, siue ludi-
bria mentium humanarum, siue calamitatum
exempla, vulgatum, creditumque est. Creber-
rima, namque fama in vrbe fuit apud pruden-
tum etiam plerosque non sicuti debuerat ir-
rifa; Conductas Mediolani Daemonem ha-
buisse liberas aedes, in quibus, sedem, & Au-
lam, & omne ministerij sui domicilium, ad re-
genda, & exercenda, atque dispensanda,
vnguenta collocauisset. Audebant plerique
dicere regionem Urbis, in qua aedes illae sitae:
aediumque dominum adeò nominabant: &
nominabatur denique, monstrabatur, agnosce-
baturque vnus, qui ita referebat. In area,
quae templo maximo obiecta est, se fortè con-
stitisse die quodam: vidisse aduenientem seiuge
curru, albentibus equis, numerofo comitatu
specieque principali virum quendam, sed fusca
eundem torridaque fronte flammantem ocu-
lis, vibrato crine, & labro superiore minacem,
quale

Descriptio vi-

quale os faciemque humanam nunquam antea vidisse meminisset. In peregrinum id caput, dum obuerso penitus ore staret, inhibuisse fraenos, & sustinuisse currum, eum, qui regebat equos, & dictum esse sibi: conscenderet, seque daret vnà transuehendum. Quod cum protinus ipse urbanitatis etiam causa fecisset, aliquandiu esse circumductum, donec ad ianuam aedium quarumdam descensione facta, vnà cum locijs ingrederetur.

Aedes sibi visas esse simillimas ei, à quo sublatus in currum, eoque perductus fuisset, & cuius heriles nutus in ea domo ab omnibus attendi, obseruarique animaduertisset. Summa descriptionis aedium illarum erat ad eam penè formam, qua forma, & facie, Vates Homerus antra Circes imaginatus, carmine suo descripsit. Socios maiestati horrores: amoenum simul, ac terribile quiddam: alibi fulgores, & lucem: alibi tenebras imaginemque noctis: hic dispositas per subsellia Laruas, & imitamenta Senatus: illic vasta deserta, conclauia, nemora, & hortos, & ab obscurae petrae supercilio, magno strepitu cadentes passim in subiectum craterem aquas noster etiam iste referebat, adnectebatque alia portentosa admiranda: si serio acciperes, ridicula, & vana.

vana. Finis in eo: thesauros ingentes, atque
 plenas denariorum arcas illa in domo sibi
 esse ostentatas, latamque conditionem: si in
 Principis verba iurare vellet, ac minister ad-
 esse rei, quae foret agenda, participem ipsum
 fore tantarum opum, & habiturum insuper alia
 omnia, quae optare posset. Si annueret, acci-
 peretque conditionem? daret signa consen-
 tientis: attolleret digitum, circumageretue
 corpus, flecteretue poplitem.

Quod cum ipse recusauisset, repente inde
adsportatum constitisse loco eodem, vnde ab-
 ductus paulò antea fuisset. Author fabulae,
 quam multi velut depromptum ex vetere
 historia casum accepere, ita referebat. Cre-
 didere nostri: credidere exteri: Germanique
 bibliopolae quaestum ex ea vanitate sibi insti-
 tuerunt, compositum rei simulacrum publicae
 curiositati latè venditantes. Vidimus ipsi
 chartae segmenta Germanico inuento prae-
 ferentia sublimem curru Daemonem, adiectis
 litteris, quae patrio Gentis eius sermone nar-
 rarent quemadmodum ea species Mediola-
nenſibus illuſiſſet. Sed & vidi ego Electoris,
 Archiepiscopique Maguntini litteras, quas
 ad Cardinalem Archiepiscopumque nostrum
 ille miserat petens, vt, quoniam de Mediola-
nenſis

nenfis populi casibus tam multa incredibilia,
 atque admiranda vulgarentur, particeps ipse
veritatis fieret. Rescriptumque est: nullos
 tartareos currus, nulla spectra Mediolani visa
 esse. Et apud exteros quidem, atq; alienos,
 falsa, siue vera haec minore cura accipieban-
 tur, quoniam, & longinqua ipsis, atq; aliena
 erant. Nobis assidue crescens ante oculos, &
 intra viscera malum, tantò magis credibilia
 cuncta faciebat, quantò magis atrocia &
 inopina essent.

Postquam igitur, super fraudes, & flagitia
 mortalium, etiam Daemonas adesse operi,
 pestilentiaeque faciendae officinam in Vrbe
 positam esse persuasit animis promptus in-
quamlibet insanam opinionem timor: ne-
 gligentia incessit ea, quae desperationis esse
 comes solet. Ab exquirendis remedijs, &
 purganda Ciuitate auersi Principes ad tanti
 mali contemplationem, subtiliter tractando
 sermonibus arcana imperitantium, inter se
 exquebantur, quisnam ille Principum, Re-
 gumue externorum, in consilia sua excire In-
 feros, & socias conatibus assumere Diras
 potuisset. Ea coeca quaestio erat: neque ar-
 bitror ipsos potuisse caput reperire flagitij,
 quod nullum fortasse fuit. Cum aceruis, &
 tabe

tabe cadauerum omnia complerentur, corporaque exanima iacentia passim, afficerent traherentque viuos, & mixti mortui viuis, hanc Urbem, sepulcrum vnum, bustumue fecissent: maior tamen interim erat publica deformitas ob infensos inter se animos, exasperatasque inuicem mentes, & monstra suspicionum, tamquam acceptis à Daemone pecunijs, corrupti, & empti nonnulli, negotium id inferendae tabis, ac profeminandae pestilentiae sustinerent. Intimi etiam & proximi quique vitabantur. Non ab vicino solum, & amico, & hospite metus, periculumque erat: sed humanae caritatis nomina, & vincula illa, maritus, & vxor, & parens, & filius, & fratres timebantur: foedumque, & horribile dictu, lectulus, & mensa genialis, & quicquid aliud gentium & naturae iure sanctum habetur, terrori erat, tamquam tegeretur ibi, propinareturue pestis. Nec minus trepidi pedeq; suspenso per vias ibant, quibus pestifera haec vnguenta timebantur.

DE PLATEA ET MORA ET BARVELO
VNCTORIBVSQVE ALIIS

Nihil absurdi facturum esse me arbitror
si vnguentorum etiam, veneficiorumque
reos

reos induxero in tragicam scenam hanc , vt,
 quemadmodum, in vinculis, iudicijsque & tor-
 mentis spectacula tetra simul, & curiosa prae-
 buere : ita spectaculo hodie legentibus sint
 ipsi , responsaque eorum , & quicquid illud,
 seu patrant , seu patrasse conuincebantur.
 Ductus est in vincula primus omnium Vnctor
 Platea quidam . Hunc, mulieres interrogatae
 dixerant è fenestris aedium suarum visum esse
 sibi illinentem vnguenta parietibus : habi-
 tumque viri , & vestem , congruentibus inter
 se, responsis ita notauerant, vti deprehendere-
 tur , atq; agnosceretur . Erat ex eo ministro-
 rum genere iste , qui ad circumeundas quoti-
 die domos , nominaq; aegrotantium in album
 referenda adhibiti fuerunt : curamque hanc,
 acceperat in regionem Vrbis, quae Ticinensis
 Porta appellatur . Ab vico, seu, Vedra Citta-
 dinorum (id nomen particulae regionis eius)
 orsus, viciniam illam vniuersam, angulos , an-
 giportus, directasq; vias, templa , & nobilium
 aedes vnxisse arguebatur, & mandato Senatus
 à Praefecto rerum capitalium die Sabbato ad
 x Cal. Quintil. ducitur in carcerem, corpore
 procerus, turpi macie , barba subrufa, crine
 subflauo, foemoralibus, tibialibusque lacera-
 tis, pro thorace subuculam atrò panno similem
 gerens :

gerens : & faciem haud minus , quàm caput , demissis alis pileus ipse contegebat. Comprenderant , duxerantq; hoc habitu nebulonem.

Post consueta illa Iudicum , formulasque fori solennes , interrogatus , ecquid dici audiuisset , parietes ad Portam Ticinensem repositos fuisse quodam vngvine delibutos , negauit se de ea re omnino audiuisset , ac scire quicquam . Id arguendi , conuincendique principium . Nam , cum , & res esset nota iam , atque divulgata per Urbem , & in ea praesertim ipse regione curaret , circumiretque domos , haud verisimile fieri , quod nihil ipse audiret , ac sciret , atque vnus omnium in tam manifesto negotio , in tanto communi discrimine peregrinaretur . Varias hinc interrogationum responsionumque ambages , & veluti conflictus malitiae tergiuersantis cum prudentia & arte Iudicum ..

Imponitur deinde in equuleum , & fune suspensus omnibus carnificinae ingenijs torquetur ultra solitum etiam , ob contraria , & pugnantia multa , per quae , flagitium , dum vult negare , significabat . Ibi quoque in tormentis abnuere , atque inficiari perseuerabat , responsis semper implicans tortuosis , & cogentibus maiora suspicari : vnde , & equulei vices

vices repetitae saepius.

Quarto tormentorum die, cùm in eadem ludificatione perstaret, post vexata diù nequicquam membra, fatigatione magis, quam clementia ludicum, è sublimi ad ima demissus, vinclis, quibus implexa erant brachia exolvebatur, vt in pristini carceris custodiam, locumque suum ita sicuti erat fractus exossatusque reportaretur. In eo ipso temporis articulo, ac momento, praeter omnium expectationem: dedit (inquit) vnguenta mihi tonsor: verbumque hoc sicuti posui ultro est effatus.

Tunc enimverò Iudices, avidè arrepta voluntaria ea confessione, quae, simul, magni sceleris, simul publicae salutis aperuisse fores videretur, caetera strenuè exsequi, percunctarique pergunt: nec finis, antequam, & de Tonsore, quisnam ille esset, & quo die, quoque loco, quibusue pactis dedisset iste vnguentum, ordine cuncta elicuerunt. Aiebat inprimis: datam sibi à Tonsore, vna cum vnguento lagenulam aquae, qua epota, confitendi quoque arbitrium inenarrabiliter vi occulta inhiberetur: potione nimirum ea esse effectum, ne posset fateri quicquam, donec stetisset, pependissetque sublimis: posteaquam laxatus, redditusque solo fuerit, mentem simul redditam esse

esse sibi liberam, & sui iuris, quae prius illigata medicaminis imperio, non solum abhorruisset à confessione culpae, sed rei quoque notitiam, memoriamque amisisset.

Aiebat omnia haec: subnectebatque deinde, & ordinem vngendi suum, & quam pecuniae summam, quemque fortunae locum pronuntiavisset, ostendissetque sibi Tonsor, si strenue, fideliterque nauasset operam: sperata sibi cuncta: sed nummorum adhuc nihil esse datum. Iacobus Mora fuit Tonsor nomen, quem Platea ediderat vngendi sibi participem, & authorem. Habebat in vico, qui Vedra Cittadinorum, ut antea dixi nuncupatur. Ibi ad viae principium, aedes, tonstrinamque habebat, quae columna infamis hodie cernitur, patrati sceleris, aediumque dirutarum, apposita etiam inscriptione, monumentum.

Audito, & perscripto quicquid Platea iuratus responderat, exposueratque, & semel, iterumque affirmarat, properat illuc cum sua cohorte, ministerioque Iudex, tamquam ad cubilia ipsa flagitij, quod & deprehendi statim, & opprimi posse crediderunt. Nec dubia inde publica iam salus. Ingressi, hominem reperere ampullis, operi, fornacibusque intentum, ardebatque caminus: & stillabant aquae

aquae multifariam, referta tota foculis, & cortinis domo: officinamque venenorum esse hanc, mussitantes inter se pronuntiauerunt quotquot aderant, scribae, satellitesque; & ductor agminis Iudex.

Tonsor principio compositus in securitatem, dicere coeperat: salutares illas, & medicas esse aquas, atque edifferebat, in quaeque usum ea miscerentur, siue eliquarentur. Praecipuèq; monstrabat praesentissimum vnum aduersus contagia medicamen: quod tamen ipsum si absque autoritate publica non componi debuisset, ut sibi ignosceretur petebat. Nam se specie recti fortasse lapsum, ut Urbis commune malum pro sua virili prohiberet ab amicis saltem, & propinquis, in quos diuidere pharmaca instituisset. Obstrepente suspicionum irarumque tumultu contemptim audiebatur publici exitij reus.

Auersi inde magistratus ad perscrutandum, inspiciendumque. Et momento penè vno, tota collustrata, siue potius euersa domus erat: rursusque à principio orsi, sensim, ac lentè collustrabant, donec exscripta ordine, & exsignata cuncta haberent, vasa, vrceos, ampullas, tripodas, lebetes, & quaecumque alia sub infelici illo tecto ad capiendum coquendumue.

dumue aliquid, instrumenta habebantur. Praecipue commouerat, accenderatque animos, innoxia fortasse quidem, & casu oblata res, caeterum foeda in faciem, & spurca, valdeque congruente adspectu ad id, de quo anquirebatur.

Athena siue cortinae duae repertae sunt plenae lixiuij marcidi atque inueterati, sordibus admixtis in imo subsidentibus, quae, tenacitate viscum, colore cineres, odore, reliquias cibi referrent, quales eae nimirum ab humano corpore excernuntur. Inspectaque, & contractata huiusmodi mixtura per medicos, assuetudine, & usu, nihil tale fastidientes, haud fere addubitatum, quin ad venena componenda materies illa adseruaretur. Rapitur deinde in latumias Tonfor, ipse familiaque eius, & omne tonstrinae ministerium, pueri omnes, alumnique artis, vxor, liberique, & si qui consanguinei erant.

Pater familias, & miser, & imprudens, sibi, suisque, infamiam, & excidium infausto illo capite portans, quamdiu par ipse tormentis erat, solito reorum more negabat scelus. Vbi tormenta praeualebant, poscebat laxamenti aliquid, ac pro eo spem veritatis aperiendae faciebat, loquebaturque nonnihil, quod veri speciem

speciem praeferret: atque statim id reuocabat, vim doloris incusans, quae sibi verbum inuito extorsisset. Ideo torquebatur etiam acrius: & rursus, ut tormenta placaret, respondebat grata Iudicibus, & mox in contrarium eadem illa vertebat.

Producitur Platea index, & particeps idem, & minister, atque inter se ipsi componuntur, & committuntur aduersa fronte inuicem, diuersitate notabili inter vtrumq; reum, & pugna. Compellauerat productus Platea familiariter simul, & amarè Tonforem hunc Moram. Mora negauit quicquam sibi cum isto esse familiaritatis, & notitiae: statimque ad conuitia progrediebantur. Exprobrare Platea Tonfori susceptum immane scelus, & spes insanas, & hunc denique finem. Contra, vociferari Tonfor, & inuocare vindicem Deum aduersus fraudem, inuentumq; malignum, aduersus, insidias, quae parari cuilibet innoxio possent. Mox redditum ad tormenta: perseuerabatque Tonfor in pristina illa confitendi, & negandi vicissitudine, donec, velut alienato ab sensibus animo, confessionis simul, & exitij sui gloriam, veluti amplexus, fanda, tacenda effudit. Ordinem, & initia, seriemque negotij, & socios, & vngendi artem, & consilia delendae

delendae Vrbiſ, & quot, in quoſque vaſa di-
uiſiſſet, quaeue iam contaminatae partes, &
vnctae eſſent, expoſuit omnia cum fide.

Sed dum ferueret ita iudicium, & quaeſtio
excerceretur, manauere etiam aliunde inditia,
vnctoresque noui reperti ſunt, ex ganea, &
popina homines, ſed & ex officina ſcholaque
eadem, nomina deuota furcis, & igni, Me-
liauaca, & Baruelus, & Berton. Ac miſſo
confeſtim liſtore hi pariter in compedibus iu-
dicioque ſteterunt: nec magna mole ſubacti,
rem, ſceluſque conſitentur, prout in contu-
bernium illud infame veniſſent egiſſentue,
aliquid. Ac lapſa vni fortè vox eſt, ob quam
iudicia ipſa intremiſcere coeperunt, ac trepi-
dare magni ſecreti horrore, veluti cùm ſua
mala ne proloqui quidem homines poſſunt.
Namque vnctor, & verbero Baruelus, cùm cae-
tera exponeret, dixit hoc etiam: vnum grande
Caput fuiſſe, ſub cuius vmbra, & tutela late-
rent omnes artis eiufdem, neque mali, ſiue
periculi quicquam timerent.

Id ſtatim velut maioris mali inditium accipi-
tur: & vrgendo, atque ſciſcitando, quodnam
id grande caput, quiſnam ille tam fortis prae-
ualidusue auctor, eò peruenere, vt elicerent,
Ioannem Caietanum Padillam eſſe, qui, &
pecuniae

pecuniae summas dedisset, & mutationem rerum, atque honorum inde titulos promississet, si sublata forma Ciuitatis & Imperij, dominus ipse rerum omnium foret. Detulere illicò Magistratus totum hoc ad Prouinciae Gubernatorem, antequam vltcrius, altiusque scrutarentur: atque interim, summa ope, silentioque alto premebatur res. Ab colloquio dein, mandatoque Principis repetita questio: & orsi à principio nebulones, nunc leniter, amabiliterque interrogati, nunc excruciatii omnibus patientiae humanae exemplis ita exponebant. Crebra sibi colloquia primò fuisse cum Padilla, de quo memorauimus. Multa dicta, pactaque inuicem, & nuntios aliquoties vltro, citroque commeasse: denique conuentum in planitiem Iouis Arci subiectam obscuro notis: atque ibi parte in ea, quà regimen & disciplina equorum exercetur, electam incantamento sedem, vt ea, quae pacta conuenta inter se haberent, firmarentur etiam tartareo quodam Inferno ritu: excitos ibi Daemonas in veneficij partem: fidemque vngendi, cum eis ritè sancitam. In eo incantamento comparuisse togatum Pantaleonem vnum cum gale-riculo, & brachis, ipsumque Padillam, inuoluentem palliolo rostrum: & presbyterum vnum

unum, qui tenens manu virgam, lineas, circulosque describeret. Haec, & alia, quae dixerant, ad vanum, irritumque reciderunt. Comprehensusque Padilla, personas, & loca, & tempora confutavit ipsa locorum & temporum fide, cum se tunc abfuisse procul, neque homines unquam cognovisse, aut vidisse illos, probasset, atque conuicisset. Vinctores puniti tamen: inhorrueratque Ciuitas foeditate suppliciorum, nisi atrocitate flagitij leniora omnia viderentur.

DE ALIIS QVI FALSO HABITH
SIVE COMPREHENSIS PRO
VICTORIBVS EVERE

SED & innoxij multi, quos, aut tristior vultus, aut obsoleta vestis, aut mora aliquibi nonnulla suspectos fecerat, circumuenti sunt populi clamoribus, impetuque tanto, & verberum, ac lapidum tanta repente procella, ut carcerem, & vincula, quo ducebantur, ceu requiem, portumue tutissimum spectarent. Rura pagique, & agrestes, inter damna saevum maxime genus, irritati cladibus etiam ipsi suis, & sterilitate frugum, si quis forte viator lentus iret: militari via, vel itinere decessisset.

decessisset , vel fessa humi membra strauisset , facto repente agmine circumsiscebant , iniiciebantque vincula , victosque trahebant in Urbem , & armatae illae cateruae ferramentis suis quotidie cernebantur captiuos eiusmodi adducentes .

In Vrbe senex fuit octogenario maior , quem ego vidi curua proceritate , non vultu , non pallio , caeteroque vestitu vltimum plebis , & nobilem esse plebeium compertum est , posteaquam casus incidit ille , quem memorabo . Intrauerat senex D. Antonij Aedem , quā sodales , Clericiue Theatini , vitae , ac litteraturae sanctioris Vrbi specimen praebent : & Abbatis antiqui dura instituta is Ordo refert . Ibi fundendo quotidianas quasdas suas ad Deum flexo poplite preces valdè fatigatus , cum residere paulisper voluisset , tergeretque prius palliolo locum , exclamant statim vna voce mulieres : ungere subsellia senem . Idipsum alius , ac deinde alius , & mox plura simul ora vociferantur .

Dieserat , haud equidem memini , qua religione sacer , sed frequentia tanta populi , quanta maxima per illud tristissimum pestilentiae tempus , perque solitudinem eam esse posset : statim vbi senem victorem clamor ille populo

populo monstrauit : accurrunt vniuersi , concioque tota in eum iuit . Corripitur miser ab ijs , qui proximi steterant : vellunt crinem : tundunt os & latera pugnis : calcibus alij pulsant : crura diuellunt : emortuum illum iam penè ventrem , & capulare caput , quominus ferro lacerarent , vna res tenuit , quia ducere in vincula reum , reseruare quaestioni , sistere Iudicibus volebant . Vidi ego cùm ita duceretur , neque de exitu sineque eius vltra comperi . Mortuum statim esse arbitror . Probumque & honestum fuisse hominem retulere illi , qui miserati casum , indignitatemque tantam , cognoscere cuncta de conditione eius , ac statu , facta percunctatione voluerunt .

Postridiè quàm , in celeberrima Antoniana Aede acciderat , spectaueramusque hoc , spectauimus consimilem alium casum , sed nequaquam luctu , & miseratione pari , quia Gallorum erant corpora , quae furor , & infania plebis laniabat . Facto grege iuuenes venerant videndae Italiae , cognoscendae antiquitatis : & sicuti postea compertum est , venerant artibus instructi nonnullis ad vitam , procul ab domo sustentandam , litterator , pictor , & machinarum quarumdam artifex , haud leuia secum ferentes in Urbem subsidia peregrini ,

grini, si temporibus alijs venissent.

Mouerunt hi quoque populo suspicionem, dum Templi marmora contemplantur, nec oculos satiasse contenti, gestiunt paulisper eadem contrectare manu, eaque dulcedo magno iuuenibus stetit. Sunt hi quoq; conspecti ab vno primum, deinde ab altero: mox vnus, & alter innuere duobus alijs: hi deinde pluribus: & momento penè vno, ora, oculique multorum tacitè speculabantur innoxium id nefas. Circumfunditur paulatim turba simpliciter incautis, perguntque illi, vt quidque proximum, atque pulcherrimum hauserant oculis, etiam altero hoc delibare sensu, & manum subinde admouebant.

Enimuero id satis fuit ad flagitij fidem, nec ultra sustineri impetus potuit: desauijque tantò magis ira, in eos, quia brachae, comaeq; & genae, & suspensae sarcinulae collo tergoque patriam arguebant, fatebanturque ipsi Gallicum quiddam inter verbera eiulantes. Saeuitiae, verberumque finis carceres fuisse. Ibi interrogati à Magistratibus, pronuntiatq; infontes, & dimissi sunt. Hisce duobus exemplis notare volui populi suspicionum in tali tempore, leuitatem, atque saeuitiam: retulique potissimum ista, non quia saeuissima fuerint.

fuerint eorum, quae quotidie fiebant, sed quia casus vtriusq; spectator ipse fui: sumque illa- crymatus, haud magis profectò innocentibus illis, quàm plebi nostrae ob mala sic tanto- pere insanienti.

Et miseranda quidem haec, planèq; digna lacrymis erant apud omnes, qui sensu quo- dam humanitatis talia intuerentur. Nonnulla verò interim etiam faceta, & penè ridicula- euenerunt. Quae, sicut in media calamitate, tantoque communi luctu potuerunt triste lu- dicrum esse animis, ut, qui viderant, audie- rantque talia, ridere cogerentur vultu inuito: ita, post calamitatem ipsam, in hoc continuae moestitiae campo, velut interualla quaedam, & spiramenta doloris apud legentium animos praebebunt.

Dum pestilentia simul, & atrocia suspi- cionum, ita, quemadmodum demonstraui in Vrbe saeuirent, dumque periclitaremur omnes, aut imagine periclitantium attoniti moestiq; iaceremus, voluerat Cardinalis Ar- chiepiscopusque noster eximere discrimini, calibusque Clericos, familiaresq; duos, quo- rum fideli in primis opera utebatur, nec fa- cile pares industria vel fide, alios reperiret, si acerbitate temporum etiam isti intercepti- fuissent.

Statuit

Statuit vtrūque mittere in Senecianum suum, quā septimo ab Vrbe lapide villam, atque arcem, & modesta amoenitate hortos subsidia & receptacula Musis nuper fortē coemptos habebat. Eò Clericos mittit, fecitq; elegantia, & humanitate ingenij sui Princeps, vt, dum ipse inter funera mortēque quotidianas, & afflictamenta caetera temporis illius parcē, ac duriter cum reliqua familia viueret, mandaret lautē omnia, & copiosē parari Clericis istis, qui ad villam interim litteraria quaedam negotia tractaturi erant. Non attigerat pestilentia locum eum, neq; verò postea attigit. Eò acrior custodia, & cura paganorum illorum excubabat, accensis etiam gloria, atque aemulatione animis, si in communi velut incendio intacti ipsi ad finem vsque permanerent. Munito claustris atque cancellis pago neminem admittebant. Sed domus extra pagum imposita est leniter edito colli, qui & pago imminet: Clericique, die, & comitatu destinatis, vitata pagi eius porta, quā duxit via in collem, capto ambitu peruenerant in arcem, &, aut non sensere custodiae, aut sentire se dissimulauerunt.

Primo die non extulere Clerici ex arce pedem, stuporq;, ac silentium, & metus manebat animis,

animis, quem ex Vrbe attulissent. Postero, & sequentis aliquot diebus, par intra herilia illa tecta silentium, & solitudo. Dein egredi con-clauia ausi, in atrium, atque inde in hortos intulere pedem: contemplantur arbuſta, poma, flores: & blandiente dulcedine longius pro-uecti, hortorum etiam septa transcendunt, atq; in vicinum alium collem paulatim erexere gra-dum. Ibi, quā arbores, & vmbrae inuitarunt, ſtrauere corpora humi, & quoniam tulerant Breuiaria ſecum, ne periret id tempus, coepe-runt pſallere alternis quicquid illud ex eius diei Officio reliquum Eccleſiae legibus debe-bant, partem oneris amoenitati, & quieti ita deleganteis.

Placuerat horae pretium: & recitatis iu-cundè precibus, etiam pugillaria depromunt: commentabanturq; ſuo more nonnihil, haud parum laeti, ſi penſum vtrumque diei eius abſque taedio, ſocia etiam voluptate exegſſent. Interea, capitis, & vitae discrimen- pijs litteratis hominibus aderat vnde minime quis exiſtimare poſſet. Paſcebant in eo colle armenta pecuarij pueri quatuor numero, pares aetate, pilaeque etiam interea luxu ſe ſe oblectabant. Horum fortè vnus, cū vidiffet in vmbra iacentes homines nigros intentos
operi

operi, quod voce ab illis manuque peragi videretur, monstrat gregalibus suis, atque omnes ad ignota peregrina ora contemplanda subsistunt.

Illico statuerunt: vnos esse de illis, qui ex urbana illa Daemonis domo (nam vulgata fabula erat) ad perungenda, atque execranda arua dimitterentur. Collatis inde capitibus, inter se consultando exsequebantur, quidnam agendum sibi esset. Haud puerilibus animis decreuerunt: irent duo ad commonefaciendos loci homines, conclamandumq; ad arma: duo ad custodienda, & obseruanda vestigia permanerent, si fortè vidissent aufugere laruas, veneficosque illos. Larvae interim, veneficique illi, quiduis aliud quàm imminetia cogitantes, securis animis, curas, & negotia Musarum sub arbore tractabant. Mox sublati fortè oculis vident syluam inhorrescere sclopis, & hastis, agrestiumque globo.

Totus namq; in armis aderat subiecti pagi populus: & dato per vicina rura signo, plures undique affluebant, in Daemonas, in furias, furiarumue ministros: & hoc illud esse tempus diuinæ, humanæque ultionis in monstra Inferna clamitabant. Iam cinxerant indagine Clericos, iam in terga haerebant, & contorquendi

quendi hastas, scloposque displodendi vnica illa mora erat, quòd eorum nutum, qui propius accesserunt, expectabant illi, qui ordine subsequebantur. Et qui proximi steterant, voluerant prius ora, vultusque nigrorum hominum contueri paulisper, atque etiam interrogare; qui, aut vnde, quidue quaerentes edvenissent. Assurrexerant etiam interea Clerici, & quidnam illa sibi vellet armata multitudo taciti mirabantur. Saluti fuit, ex pago eodem, & ex Cardinalis ipsius rustico famulatu, sorte quadam diuinitus repentè superueniens vnus homo, qui custos arcis idem, & villicus, & veluti Praefectus domus apud villam habebatur, obtinueratque munerum caeterorum hoc tempore vacationem, dummodo Clericis hisce sedulò, & lautè, comiterque ministraret.

Is, ad primum tumultum puerili illo nuntio excitus, anhelus inter anhelos, arrepto venabulo cùm accurrisset, posteaquam herilia capita vidit esse, quae neci destinabantur, inhorruit, exarsit ira, gemuitque, & erubuit, & risit, & tot simul motibus animi, magis quàm verbis indicato popularibus errore: Ite mecum, inquit hinc: & abiere. Is saeuo ludicro finis fuit in veneficos vnctores Clericos,

cos, qui nulla venefica' vnguenta tractabant :
sed artes eorum pietas, & simplicitas, litte-
raeque, & stylus.

DE MAGNO ET INSIGNI VNO VIRO QVEM
SVSPICIO EADEM ABSVRDISSIME ATTIGIT

NVNC casum alium memorabo, qui in his
Patriae funeribus, & tragica scena tris-
tissimarum Mediolani rerum ridere homines
coegit. Tantòque magis ridicula res fuit,
quia non de humilibus, obscurisque Clericis,
sed de clarissimo, & magno capite agebatur :
nomenque tamen huius etiam subtrahi, atque
reticeri pertinet ad Viri simul, historiaeque
decorum. Quales rarò aliquos multa saecula,
multaeque Vibes tulerunt, talis iste erat
quaeue singula, gloriam atque admirationem
habent, omnia simul in eo coniuncta specta-
bantur.

Litterae, tum hae interiores, quae pro-
prium ex humano cultu nomen habent, qui-
busue ingenia nutriuntur simul, & excoluntur:
tum coelestes, & diuinae illae, per quas ani-
mus humanus attolitur illuc, vbi exquirere
mysteria, naturamque Diuinitatis ausit. Phi-
losophus, Theologus, Orator, Poeta, fulmi-
nanti,

nanti, tonantique similis dictus, permiscere, vertere, ac turbare animos, cum olim ad populum ipse concionaretur. Quòdque in sacra hac toga rarò feliciter contingit, diuturna pertractatione, & usu negotiorum, rerumque maximarum eò peruenerat, vt par ei politicus non facilè reperiretur.

Nouerat arcana, mentem, opesque Regum, & quicquid, vel meditari, vel efficere eorum vnusquisque posset. Intimèque familiaris, & minister, & legatus vni, qui nostra aetate calidissimus imperitantium habitus est, aulicorum more, forteque infelici, periculosissime colluctatus Hero, superior denique fuerat, euaseratque in tutum. Erat claritudo generis ei, dignitas oris, quae hanc ipsam fatetetur. Praeterea, come ingenium, gratia, lepos, & his penè contraria laudibus pietas, & religio. Oraculum verè Ciuitatis habebatur, consilijque causa plurimi ad eum quotidie ibant. Fortè iste paucis diebus, anteaquam esse Mediolani pestilentia inciperet, peregrinari Romam vsque voluerat, desiderio, sicuti ferebatur, reuifendae Urbis, & compactas illas Martyrum sanguine glebas, atque Sanctorum vestigijs nobilitata loca, ab insita animo religione exosculandi: sed, sicuti fuit animus huic viro mis-

tus

tus ex pio sensu simul, & curiositate ciuili, iuisse negotij alicuius causa aiebant, quibus curae fuit interpretari profectionis eius causas.

Et sicuti semper est audax ad fingenda, quamuis atrocia rumor, & insania ciuiliū ingeniorum, dixere, iuisse ad colloquendum de periculis, & magnitudine belli cuiusdam in occulto gliscentis, vt regna quaedam, Prouinciaque transferrentur. Simplicior interpretatio: motum Pontificem ea fama, quae de litteris, ingenioque Viri huius vulgata esset, cupiuisse colloqui cum eo, atque fecisse, vt ipse Romam hoc tempore iret. Quantos in vetere Romana Regia motus animorum, aduenientem illuc ex Hetruria Lucumonem fecisse perhibent: Imperij illius annales: tanta fere gratia, fauorque nostrum hunc ibi excepit, prona statim in eum tota Pontificis Domo, pronisq; suo more aulicorum caeterorum animis illuc, quò studia, voluntatesque Dominorum inclinare videbantur.

Patriaue haec, haud profectò vñquam egens minimarum, alienarumue laudum, gloriabatur aliquandiu sui. Ciuis decore hoc, & gloria: & libenter sanè audiebamur, quotiescumque diceretur: aut misisse munuscula hospiti Principem Sacrorum: aut eum in Vaticano,

ticano iussisse prandere: aut circa colles amoenos, & rura nata Musis vnà iussisse aestiuatum: aut denique Cardinalium aliquem, & plures vno die Cardinales ad eum vltro venisse, salutandi, & colloquendi causa. Adeò scilicet in Vrbe, quae sua tantum admiratur, placuerant viri huius, vel ingenij dotes, vel artes animi, & quicquid illud, magnae fortunae mole fatigatis, ex consuetudine minorum, solatio, ac leuamento esse potest. Laetiores quin etiam saepe nuntij vulgabantur: haud mirum fore, si fieret etiam iste Principum vnus illic in Vrbe, quae mutare ita repente fortunam hominum potest, atque consuevit. Illud verò longè laetissimum, quòd spernere excelso animo talia noster ferebatur: & constans fama erat: repudiasse solita illa, per quae struitur illic ad summa gradus.

Mediolani, in tantis miserijs, in tanta publica, praesentique clade, dum finem, interitumque suum, aut timeret Ciuitas, aut ad finienda mala optaret, praebebat ita sermones, ex longinquo peregrinabundus vnus Ciuis, nunquam scilicet adeò consternatis, afflictisq; animis hominum nostrorum, vt non & pabula ista rumusculorum adinittant: nunquam verò etiam adeò prohibito commercio
gentium

gentium aliarum in Ciuitate, vt non maneret ibi velut forum, theatrumque famae, quò scilicet vndique peruenirent, & rursus vnde resonarent latè apud gentes alias fabulae, sermones, rumoresq; quotidiani. Mox, tristissima fabula, & rumor insanus, atque atrox famae ludibrium de viro, Ciueque eodem oritur: compertum haberi scilicet, remq; teneri manifestis inditijs, quòd ille Caput Vngentium esset.

Hic namque noui criminis, titulus, & formula reperta erat, haud minus iam hoc tempore familiaris, atque peruulgata, quàm criminum aliorum, quae puniuntur quotidie, & admittuntur. Fuit deinde septem, siue octo dierum spatium, & rursus affertur: in latumias, in carcerem inferiorem eum esse coniectum, custodiri militari praesidio: Pontificemq; ipsum, quod ad custodiam eius attineret, nulli, nec homini, nec loco satis credentem, iubere quotidie ad se referri carceris clauēs: obsignari claustra, stationesque, tum duplicari, tum mutari: sperari rerum incredibilium certa indicia: atque ea omnia, adedò nihil variante fama nuntiabantur, vt intimi, & coniunctissimi quique, quos propinquus sanguis, aut amicitiae fides absentis
nomini,

ac dignitati patronos dabat, ne hiscere quidem, aut obrectantibus respondere auderent.

Et erant primi ferè nobilium, aut certè proximi primis annexique magnis domibus, qui negotio diuulgato hoc angebantur, & quamuis tenui, ac longinqua consanguinitate erubescabant: coeperantque inficiari, & eiu-rare communes olim auos, & vincula alia, quibus antea gloriabantur, addentes etiam ultro veritati nonnihil, & exoletae vetustatis necessitudines, repetendo, ob gloriam, & decora Viri eius. Nec ideo vitauere, quominus, in circulis, atq; sermonibus incesferentur cauillis, & probris, qualia iaci solent in eos, quibus est calamitas aliqua, dedecusue domi: & gladios strinxere laceffiti, colaphisq; etiam res acta dicebatur. Sed interea crebrescebat, adduci, & iam, iamque adesse captiuum: adduci multo satellite cinctum: sed & equitum alam custodiae eius apposuisse Pontificem, ne elabi, neue eripireus posset: adduci non quaestionis, Iudicijue causa, quippe manifesto iam, & certo crimine, sed ad tormenta suppliciumque vltimum: scilicet, vt laceratus ipse vicissim spectaculum praeberet ei Ciuitati, quam beneficio suo delere voluisset.

Dixere hoc plebis homines, credidere ple-
beij

beij quoque nobilium : & adeò validus fuit ille rumor , vt spatia quoque itinerum , & positiones , & momenta venientis nuntiarentur : qua noctis hora , quoque mensis die exemptus arci captiuus , inditus rhedae , eductus extra Urbem fuisset : venire per Aemiliam , superasse Apennini iuga : esse ad Bononiam : agmen substitisse Mutinae : Parmae expectari : aliaque de ratione itineris , tamquam Rex Vandalorum ille , qui nuper tumultuari coeperat , in acie captus adduceretur . Diem quoque notabant , quo die sistendus ille Mediolani foret , & diem , genusque supplicij , & composita sic omnia , vt si vera essent , non magis recipi animis , & credulitate hominum potuerint .

Tunc enimverò , & consanguinei , proximique illius , latitare , secedereque in auia : & alieni illi nuper in aliena calamitate procaces , versa in misericordiam lasciuias , moerere tam honorati Ciuis adeo infelici , tristici casu , & veluti suum , ac patriae dedecus accipiebant labem , quae honestissimae Domui , ex vnius flagitio , mox poena supplicioque pararetur . Nihil interea dedecoris , nihilue flagitij erat . Sed vir , Ciuisque ille , dum hoc famae ludibrio in sua patria conflictaretur absens , florentissima apud Pontificem , Aulamque

Aulamq; vniuersam gratia agebat, delictumq; illic humani generis habebatur ac redijt postea in patriam, Urbemque hanc, ornatior, & acceptior hoc ipso, quod honora, & ampla omnia repudiasse ferebatur. In media clade, medioque incendio, & sicuti verè dici potuit, in ipso funere Urbis, penè ridicula haec quotidie accidebant: quae mihi leuiter attigisse visum; quomodo tragoediarum quoque lacrymis, chori, saltationesque nonnullae interponuntur.

Caeterum his ita expositis, anceps, atque difficilis mihi locus oritur exponendi: praeter innoxios istos victores, & capita honesta, quae nihil cogitauere mali, & periculum adiere ingens, putemne, veros etiam fuisse victores, monstra naturae, propudia generis humani, vitae communis inimicos, quales etiam isti nimium iniuriosa suspitione destinabantur. Neq; eo tantum difficilis ancepsue locus est, quia res etiam ipsa dubia adhuc, & incerta, sed quia, ne illud quidem liberum, solutumue mihi relinquitur, quod à scriptore maxime exigitur, vt animi sui sensum, de vnaquaque re depromat, atque explicet.

Nam si dicere ego velim victores fuisse nullos: frustra coelestes iras, & consilia diuina trahi

trahi ad fraudes, artesue hominum, exclamabunt illico multi, historiam esse impiam, meque ipsum impietatis teneri, iudiciorumq; violatorum. Adeò sedit contraria opinio animis: pariterque, & credula suo more plebes, & superba nobilitas, cursu in eam vadunt, amplexi rumoris hanc auram, quomodo quis, aras, & focos, & sacra tueretur. Aduersus hosce capeffere pugnam, ingratum mihi nunc inutileque est. Proinde, neque affirmando, neque negando, neque in partem hanc inclinando, neque in illam, sententias tantummodo alienas opinionesue proponam.

QVOD SENSERINT PHILOSOPHI MEDICIQVE
CLARISSIMI DE PESTIFERIS HISCE
VNGVENTIS CASVSQVE VARII
NARRANTVR

QVANTA sapientia, quantus animus, quantum etiam fuerit Ludouici Septalij nomen, exposui in priore libro, cùm narrarem eius Viri casum, & vitae discrimen apud stolidi capita baiulorum nolentium scilicet credere de peste quicquam, atque clamitantium, hunc esse, per quem sereretur in vulgus, & inualesceret id nomen. Huius Philosophi

Iosophi Medicique alumnus idem amicusque
 magnus fuit Alexander Tadinus, pari animo,
 pari indole, pari etiam nobilitate generis,
 ac studiorum: & vno verbo, vel paria, vel
 certè simillima inter eos omnia fuere, praeter
 aetatem. Circumsteterat etiam hunc ab ea-
 dem insectatione furor idem: atque euaserat
 pari effugio, & pariter aucta gloria ob id pe-
 riculum. Viuebatque hodie Philosophus hic
 penè adhuc in robore aetatis, veluti heres
 sapientiae, famaeque Septalij, & Medicorum
 etiam ipse fere princeps. Socius igitur hic,
 & particeps, & aemulator tanti Viri studio-
 rum, atque post eius mortem futurus alter
 quodammodo Septalius, cùm viueret ille, af-
 fixus lateri senis haerebat: & quantum licebat
 vtrique per occupationes, ac vitae genus,
 hoc praesertim pestilentiae tempore, multùm
 inter se philosophabantur de origine mali, ac
 de veneficio ipso, quod subesse iam credebat
 Ciuitas.

Mortuo postea Septalio superstes institit
 de toto hoc genere commentari multa, tum
 suo Marte seorsim, tum ex colloquijs sermo-
 nibusque eius: atq; suam de ea re sententiam
 subtiliter, & copiosè explicauit. Cùmque, &
 ego accepissem de huiusmodi scriptis aliquid,

&

& audisset ille, scribere nos quoque, & iam sub praelo habere de tota peste narrationem: annuit libenter, vt opinionis, disputationumq; suarum particeps fierem: ac tradidit mihi commentarios, è quibus bona fide referam praecipua eorum, quae Philosophus Medicusque clarissimus, de peste manu facta, & de tartareo hoc negotio differebat: idque cum fecero, nihilominus in ancipiti, & dubio relicta nobis erit res: prout scilicet profecta planè ab Inferis adhuc, & plena tenebrarum torquebat multiplici ambage animos.

Ordiebatur philosophantium more Tadinus disputationem de ea re suum ab Syderum etiam Coelique argumentis, haud minus nobilis eius supremae regionis inspector, quàm artifex Medicinae, quae dicta vna est scientiarum illarum trium natarum simul atque adultarum. Aiebat ita, scripseratque etiam: praecessisse vnguenta Cometem, de quo Sydere semper opinio fuit, tamquam noua quaedam & magna, & funesta portendat. Sydus fuisse truci ultra solitum etiam facie. Mense Iunio, quo maxime tempore, vnguentorum officina illa caluisse credita est extitisse crinitam eam Stellam: exarsisse ad Septentrionem spectatores fuisse multos: neque dubitasse diuturna
Coeli

Coeli affectatione peritissimos atque praefatos imminentium homines, quin eius exortu, ea, quae euenire denuntiarentur. Sed & alium eiusmodi fulgorem emicuisse prius anno cio dc xxviii in cardine dextro ab coitu Saturni, quo non aliud inter Coeli portenta minacius truculentiusue haberetur.

Haec, & alia ille scilicet altitudine scientiae, quae scandere Coelestes Orbes, habitare illic, rimari arcana, deducereq; ad vitam casusue mortalium sempiterna Lumina & affine generi humano facere Coelum audet: imò & fortasse potest. Nobis, neque animus, neque potentia eadem est: satisque habuero depresso nempè humi, si depressa nobiscum, & communia quaedam narrauero, vnde & ille sumperat momenta in vtramque partem aliqua circa vnguentorum horum fidem. Non autem argumenti tantum, sed penè oraculi instar ad credenda haec, & praecauenda, potuerunt esse, & fuerunt litterae D. N. Regis ad Gubernatorem Prouinciae Spinulam, in quibus ita perscriptum fuit.

Quatuor homines deprehensos esse Madriti, qui medicamenta attulissent ad faciendam in Regia pestem, eosque repentè aufugisse. Nesciri quonam abiissent, quoue ferrent cadem venena:

venena : proinde sibi suisque caueret Gubernator , ac videret , ne in Prouinciam , & Urbem , cui praeeset ipse , recideret id scelus . Hae litterae , quia Maiestatis ipsius chirographo subsignatae fuerunt , grande sanè momentum inclinandis ad peffima quaeque credenda animis facere potuerunt : protinusque ab illo Gubernatore missae ad Tribunal , & inde communicatae cum proceribus , vulgatae per Urbem , adeò impleuere animos , & solitudinis ad circumspiciendum , & irarum atque indignationis in omnes , qui suspecti aliquo modo fierent , vt de omnibus etiam suspicari licitum sibi esse arbitrantur .

Haec igitur Regiae admonitionis auctoritas , veluti certissimum argumentum vnctionum venenatarum haberi potuit : certius inquam illa denuntiatione Syderis , quae Philosophum perculerat ipsum , à quo notatum vtrumque , accepi . Sequitur deinde statim Regias hasce litteras vnus peregrini hominis casus , qui , primò quidem , tam formidato , tam incerto sceleri fidem adstruxerat terroresque nouos : deinde verò , ad obscurū , sicuti pleraq; redactus , nihil effecit aliud , quàm vt quodam huius negotij fato ambigua veris miscerentur , semperq; posteriora prioribus offunderent tenebras , &
obscu-

obscuriora essent : ea scilicet conditione , vt succederent alia mox, vnde dubia etiam, atq; incerta illa confirmarentur.

In publico diuersorio trium Regum , quò fere transalpina , siue transmarina peregrinitas diuertere consuevit , estque Germanis , & Gallis id fere in hac Vrbe domicilium , reperitur die quodam, liberali facie , liberalique etiam habitu, & vestitu Iuuenis quatuor & viginti annorum Hieronymus Bonus nomine , brachatus , & comatus , & flauo crine , multoq; sanguine & florida carne diffluens in Gallicum haud dubiè morem : sic nomen & figura indolesque ad Magistratum relata est. Sarcinae quoque descriptae : necnon , si quid super mensam fortè dixerat : & alia per cauponae ministros notata , & relata diligenter .

Iecerat inter caetera Iuuenis ille Gallus : peritum ipsum esse medicae artis , multaque pharmaca ferre secum , & medicamina nota nullis : arculas praesertim aduersus pestem , habere mirabiles , & remedia praesentissima , quae paratus esset depromere & approbare Ciuitati si ad Lazareta adhiberetur. Urbem Panormitanam quam penè sustulisset pestilentia , & penè sepelisset, non alia magis, quàm ipsius ope velut esse reuocatam è funere,

*Descriptio
santis*

nere, & quasi stare hodie remedijs suis. Aiebat haec: simulque diplomata & priuilegia ostendebat ab Siciliae Prorege concessa sibi ob id meritum: & denique exposcebat ultro, ad Magistratum vti deduceretur, fieretque sibi in Lazareta aditus.

Archonatus eo tempore Praeses, re sicuti exponebatur, audita, haud immemor litterarum, ab Rege, quae scriptae venissent, eo maxime mouebatur, quòd, &, Gallus iste esset, & medicamenta loqueretur, rem tunc tantopere suspectam atque inuisam, & vellet utiq; admitti ad opus, quasi maleficij locum quaerens. Comprehendi & adduci, sistique hominem iubet: simul comportari peras sarcinulasue eius, & quaecumq; alia ferret secum. Refibulata, & aperta, euolutaque pera, omnia quidem apparuere, quae magni Vnctoris instrumenta videri possent: ampullae multiplices, & vascula plena pulueris, plena liquorum, & vnguentorum, cum sua quodque inscriptione, & indice, obturata, & obsignata diligenter: sed & innoxia esse cuncta, & in medicos ac salutares vsus comparata ille affirmabat.

Ipseq; Tadinus, qui Tribunalis eo tempore Conseruator aperiendo interfuerat, iudicauit

ita

ita & pronunciauit : nec alibi quàm in Lazareto ipso deponi inspiciq; ista tutum existimarent. Interrogatus aduena ad omnia commodè respondebat : iudicijsque satisfecit , haud tamen inficiatus, quòd Apostata & desertor Ordinis cuiusdam bona fide esset , quòdque ab Geneuae lustris, ea lupanaria paertaesus ueniret , ac vellet peregrinari paulisper : hinc ad Pontificis Maximi pedes ire Romam. Dimissusque postea est , adedò confutatis de se suspicionibus , vt innocentia illa sua peregrinos absoluisse omnes, & liberasse infamia videretur.

Caeterùm, vano hoc casu, & temerè oblato terrore, casibusq; & terroribus eiusmodi alijs, quantopere eleuantur vana suspicionum & opinio veneficij: tantopere firmatur eadem. euentis ex diuerso compluribus , quae Tadinus idem, non solùm ob excellentiam Artis , sed ob eximiam quoq; prudentiam ad iudicia adhibitus notarat, & retulerat inter argumenta , quae confutari non possent , imò de quibus ne ambigere quidem vllus posset. Constat, flagitij reos in tormentis à Daemone, fuisse strangulatos. Constat, aedes easdem , quae noctis vnus furto vnctae fuissent , iterum ac saepius fuisse repetitas , nouumque virus prioribus maculis occultè superinductum, vt

Daemo-

Daemonem adfuisse operi appareret ?

Duodecim vno grege erroneos comprehensi, & in vincula ducti, dixere, dictaque semel affirmauere saepius in tormentis iisdem : fuisse quotidie, qui duceret ipsos in popinam: ibiq; benè pastos, & saturos dimitteret ad vngendi suas quemque vices, siue ad conquirendam materiam, vnde vnguenta conficerentur, bubones, & scorpiones, & alia foeda id genus animalia saniemque bubonum. Ac ne dubitari posset, & fieri haec, & esse Daemonem artificem operis : constitit in medio luctu, & penè in media desperatione Ciuitatis, significasse Sancti Officij Patres, & affirmasse Praefidi Archonato, quemadmodum certa dies esset praefinita Daemoni, vltra quam diem, nulla potestas Inferis, nulla licentia Orco in Populi Mediolanensis vitam. Haec verba praeses Sanctissimi Tribunalis Inquisitor, Praefidi nostro effatus, litem, quae de vnguentis esset, potuit videri diremisse auctoritate Apostolica, quae, nec fallere, nec falli potest.

Philosopho, & Medico, & Tribunalis Conseruatori Tadino, tamquam elementa haec opinionis, ac sententiae de tota vnguentorum ratione erant: similiaque his, & efficaciora quaedam

quaedam alia insuper, vel, quae inde penderent, vel à quibus illa sustinerentur. Non fuit nouum hoc, neque Vrbi tantummodo nostrae accidit, vt crearetur hominum arte, pestis, quae naturae malum aliàs, & aeris humorisue corrupti quaedam iniuria, corporumue lues intestina, ab halitu vel contactu transmissa, & accepta inuicem habita esset. Etiam Panormi in Sicilia quadriennio fere ante nostram hanc pestem mistus idem insania mortalium & fraude, furor Daemonum fuit: horribilique societate conspirauere cum aeterno implacabili hoste nefarij homines ad venenanda praecordia hominum aliorum, intercipiendamque vsuram spiritus huiusce, & lucis, qua spiramus diuino munere, & fumus.

Ibi, in Vrbe, & nobili, & antiqua, & opulenta, sex mensium spatio periere centum triginta quinque milia mortalium, fraude, scelereque, & furore isto, quo mortales Daemonum etiam ibi nequitiam induerunt. Et fuere Monatti, qui principio pestilentiae eius, singuli senis in singulos dies conducti aureis nummis, posteaquam, decrescente malo timebant, ne quaestus quem facere coepissent, sibi periret, ab commercio fortasse sagarum, quaesito, & inuento ad Infernos spiritus aditu, petiere

petiere inde subsidium , & turpi immanique temperamento composuere venena , quibus & vis mortifera per se , & veneficij nodus , vinculumque inesset .

Nobis item in priore peste , quae Populo huic anno CIO ID LXXVI acciderat maxima omnium nisi posterior haec illius quoque famam obtriuisset , haud ambigua portenta eadem , fuere . Artifexque talium vnus , detecto , & conuicto scelere , cum ei frangeretur laqueo gula , confessus rem , sicuti erat , edidit remedia simul , quae ex aduerso opposita , & contraria eiusmodi venenis habuisset , remediumque expertae postea virtutis celebre ex illo suspensio . authore nomen adhuc inter antidota habet . Ac praeter recentia , & nota haec , nihilo leuior authoritas passim inter veteris memoriae monumenta extat : quoties & veneficae repertae mulieres ob pestem ita factam punitae fuerunt : & sapone , & acu , & alijs denique quotidiani vsus instrumentis inducta peste in maximas Urbium , in classes quoque & naues , in Prouincias , & Regna tota , reperi , & puniti venefici dederint exempla , quae ideo non absterruere alios eiusdem portenti mortales , quominus eadem auderent .

Semperque erit hoc in terris quamdiu homines

mines erunt , vt noua subinde flagitia reperi-
antur , punianturque simul , & punita inua-
lescant , atque suppressa resurgant , & omnino
recurrat , sicuti rerum caeterarum , ita scele-
rum etiam idem orbis vicesque eadem. Vn-
de arguitur efficiturque : quod , & alibi aliàs ,
& in hac Vrbe nostris temporibus olim factum
spectatumq; sit , potuisse etiam fieri , & acci-
dere nuper , vt audaciae mortalium , & artes ,
naturam Inferosque prouocarent , siue assu-
merent hinc , atq; illinc , & vtrinque tertium
quoddam potentiae genus aduersus ipsorum
vitam .

Affirmabat longo volumine differens talia
Tadinus , notansque etiam singula personis ,
& locis , temporibusque distinguens , necnon
testimonia in caput vnum quodq; depromens ,
atque assignans : affirmabat vidisse ipsum in
via Sancti Raphaelis , vidisse quendam equo
insidentem , adspergentem venenato puluere
obuios , siue praetereuntes , occulta sanè , &
leniter ac dextere , modò porrecta , modò re-
ducta manu : sed ita tamen vt oculis ipse suis
vidisset : cùmq; admonendae vicinitatis causa
exclamare coepisset , incitato calcaribus equo
protinus aufugisse latronem . Noui , inquit ,
ego honestam vnam domum , in qua , & ami-
citiae

citiae causa, & occasione artis, frequens mihi consuetudo.

Haec tota domus extincta, desolataque est adspergine pulueris concinnati in duplicem illum exitij modum, vt venena simul inessent deuotionesque Inferorum: pestemq; eam duae nobiles puellae ab Seruitarum Patrum Templo tulere domum, cum in Templi exitu, lustralis aquae partem immisso in sacra labra crateresue digito de more retulissent ad frontem, pectusque sibi, & humeros Christiano sic ritu munire voluissent. Ab eo contactu virgines notauere puluerulentum arenosumue quiddam quod vnâ cum aquae guttis, fronti, vestibusq; & digitis, & in vola manus haesisset. Et mox, cum oculorum animiq; vertigine vacillare puellae: rotari capita illis: aegerrimeque delatae ad suos, conflictatae quadraginta horarum spatio innoxiam vitam miserrima morte finierunt absque vlla pestilentiae nota, quae compareret. Mater, & proximi ministrique eodem inexplicabili letho inuoluti ablatique omnes.

Senator Cacia notus Mediolani fuit, non ob Ordinis modò dignitatem & suam: sed ob casum denique vltimum, qui propter rei nouitatem, potuit perferre Viri nomen, ad eos
etiam,

etiam qui antea ignorassent . Habebat in familia Ferletam nomine , siue familiaris proprie ille , & seruorum vnus , siue ex eorum tantummodo grege fuit , qui compendij vel clientale alicuius causa frequentant Patrum domos , deducuntque & reducant ambitiosè simul & callidè quotidie Herum . Is Ferleta matutino accessu lautus, elegansque, & venerabundus, & amoeno renidens ore obtulit Senatori florem, quem fortasse commendabat eximia species , odorue praecipuus ab florum grege discriminabat . Admouet humanitatis etiam causa Senator statim hunc naribus florem specie odorantis : & contaminatis illico vitalibus intra pauculas horas cecidit .

Ad Volpedum in agro Derthonensi reperti septem , & in iudicium adducti , confessi que crimen , & damnati atque in rotam lethaliū veneficiorum magistri erant . Sub id tempus idque supplicium, ibi in uicino adnotata circa molas labe , quae pestifera haec vnguenta referret , excogitatum experimenti causa factumque est , vt molli pane labes cae premerentur , obijcerenturq; mīcae gallinis , quae vorato carptim , sicuti natura pullis est, eo cibatu, supino rostro mortuae conciderunt : extaque sectarum nigerrima comparuere .

Musca ,

musca , quae fortasse federat huiusmodi maculis , cùm in auricula cuiusdam stetit , est ille mortuus , absque villo alio , vel morbo , vel dolore , nisi quod bestiolae aculeum morsumue fenserat . Magna sanè indicia , pecudes homines , casusque isti , pestem hanc non fuisse naturae tantummodo , sed hominum ipsorum opus , & operi efficiundo simul adfuisse quicquid illud , aut irata natura parauit , siue deliquit aduersus vitam , siue delinquere Daemones possunt . Sed interius ad regna caernasque Inferorum accedit , exijtue inde , quod memorabo .

Antonius Cruceius , & Io. Baptista Sarac-
cus , fuere ciues Portae Ticinensis , incolae
regionis eius , quae rectà fert ad Portam , &
Cittadela loco nomen est . Accessere isti ad
Tribunal , & iurati ita exposuere . Esse ibi in
vicinia carpentarium hominem amicum suum ,
qui decumberet aeger . Ad eum visendum
ire quotidie ipsos pro familiari consuetudine
commotos etiam praesenti statu eius , si quid
fortè vellet . Eum in proximo colloquio locu-
tum esse totidem verbis . Intempesta hac no-
cte sensi per cubiculum ire nonnullos : clau-
sumque ostium erat . Cùm stupens , attonitus-
que caput erexissem , propinquauere lectulo ,
& dixere :

„ & dixere : surgerem , sequererque : stare in
 „ pomperio Urbis grandi auctoritate virum ,
 „ qui vasa mihi daturus esset vnde vicinitatis
 „ huius aedes vniuersae vngerentur .

„ Robur , & vires , & morbi finem , si vellem
 „ ire , promittebant . Dabant praesentis pecu-
 „ niae vigintiquinque nummos aureos , quos ,
 „ & deposuere super mensam , ita , vt sonitus ,
 „ tinnitusue mihi audiretur : sentiebam interea
 „ concuti , & intremiscere lectulum : diripi mihi
 „ lodicem , subtrahi lintea , & inhorruerat ani-
 „ mus meus , neq; hiscere audebam . Sed quia
 „ instabant saepius atque vrgebant : interrogavi
 „ quinam hominum ipsi essent . Octauium Sa-
 „ xum edidere nomen . Negavi me facturum : neq;
 „ vltra quicquam audiui . Vos videte amici quid
 „ istud rei sit . Nam mihi neque sermo iam con-
 „ stat , neq; animus . Duo illi , Cruceius , & Saraccus
 totum sicut retuli istud detulere ad Tribunal .
 Adeò , per haec , & alia , neque Tribunali , neq;
 Conseruatori eius Tadino dubia veneficiorum
 fides erat .

DE QVODAM REPENTINO PESTIFERO TVMVLTV

AD XI Cal. sextileis , Quum fere decessisset
 suspicio animis , terrorque lethalium
 vnguen-

unguentorum ille , si minus ex tota sublatus Vrbe , certè intra multorum pectora sopitus quotidie magis euanesceret : repente praeter expectationem opinionemque omnium, arma, & ignes , discursusque per omnes vias armatorum , & hac data occasione , sicuti credidit vulgus , ac timuere primores , plena omnia vngentium fuere . Circa horam eius diei xi in Palatio congregati pauci Decurionum sedebant de negotio fortè aliquo , prout ancipitia, & necessaria quotidie multa incidebant, inter se consultantes.

Illuc in Aulae penetralia peruaferat tumultus : ac subitò ab sedibus suis non excitì, sed consternati Proceres , ad fenestras alij profiliere : quosdam , & per scalarum gradus animi feruor tulit. Vna vox erat : ad arma : & hostes in Vrbe sunt. Is subitò clamor ploratu mulierum , & vlulatu mixtus confuderat aures animosque absque vllo certae rei sensu , quae intelligi potuisset . Vt verò melius iam aliquid clariusq; percipiebatur : rumor hic , & consula tamen adhuc fama resonabat. Callos esse , qui iam ad moenia successissent diuisique , & in latebras abditi misissent ad incendendam Urbem . Haec promiscua vox Populi tumultuantis erat.

Sed

Sed & è Palatio missi qui viserent , referebant , conspici flammæ : flammæque verè erant , & ad Portam Tonsam flagrantibus ibi macellariorum tabernis : & ad Corriuium : & in Curia Ducis , congesta illic , & micante lignorum strue , quæ incendia coniurati in id è plebe nonnulli excitant , vt prædandi turandique locum , turbata sic & commota Ciuitate , haberent . Accurritur vndique & itur , non ad restinguendos ignes subsidiaque aquarum ferenda vicinis , vti assolet , sed ad rem solita animorum curiositate fruendam oculis , & momento horæ vnius , quicquid ferè mortalium ad eam diem superstes incolu-
meque erat : aut cinxerant rogos in coronæ modum : aut imperio quasi alicuius , impetu suo ferebantur illuc , & nihil aliud , quàm facti spectatores erant , fierique volebant .

Proceres adhuc ignari quidam istud rei esset , & rati vtique hostiles eos esse ignes , hostemq; adesse , & intrasse Gallum , armant quoscumq; circa se habebant , armanturque ipsi , & aditus Virbis adeunt : adstantque cum cateruis globisque suis velut in aciem . Neque diè tantum nocteue illa , sed & diebus aliquot noctibusque inscutis , quasi , aut intrassent iam , aut possent clausis vtique Portis intrare Galli,

Galli , aut ipsos profectò hostes intra moenia repentè tellus edidisset . Nihil aliud , quàm coniuratio latrociniumque paucorum erat .

Caeterùm , dum vadunt ità : dum redeunt : dum inter se conglobantur : dum colloquuntur : dum attoniti haerent , conflata denuò quaedam parua pestis est , quae , quoniam , sine ullis pestilentiae signis argumentisue consuetis absumpsit postea exanimavitque multos : haud addubitatum , quin essent vnguenta rursus immissa , & corporibus admota per Gallos mercenariosue Gallorum . Et ea quidem hominum opinio ad vanum facilè postea recidit .

Pestis autem contracta repente hoc & renouata tumultu , posteaquam exterruerat delibaratq; nouis funeribus aliquandiu Populum , vertit deinde in iumenta : bouesque veluti populus ille alter , & bestiae subsidiae agrorum , aut in opere statim ipso , aut ad stabula caulasque , non secus ac telo repente confixae moriebantur . Ea per triennium rusticae rei clades fuit , idque damnum : & praesenti damno maior etiam futuri metus : ecquae futura finis vmquam esset irarum coelestium , nunc in vitam , nunc in ea queis vita sustentatur .

Sub eos dies relatum est ad Tribunal , & retulere grauiissimi Patres è sacro ordine , quibus,

bus, neque mos, neque causa mentiendi erat: in agris villisq; suis, aedibusue, quas ad tuenda rura, quasue ad recreandos è studiorum labore animos haberent, quasdam repertas esse pilas, & quaedam inuolucra glomose nonnullos, agglomerata conuoluta contexta omnia ex peruncto ac manante guttis, & venenato filo, quae cum sustulissent contrectassentque agricolae, vel è familia siue comitatu minus cauti quidam, confestim expirasse, & cecidisse exanemes: spicas item demetentibus in corbem cecidisse perunctas, & vnctis inde digitis, mortem illico secutam.

DE VARIIS PESTILENTIAE CASIBVS INTRA
LAZARETVM AC DE PATRE FELICE
PRAESIDE LAZARETI

DVM haec, & his similia mista tristibus ludicra, per Urbem, atque in agris quotidie acciderent, continua intra Lazaretum, ac veluti profunda, & obstinata mali facies erat. Regimen, & summae rerum arbitrium ibi penes vnum fuit, quem memorari, inferiq; annalibus oportebat, etiamsi, non pestem, & cladem, sed patriae tantummodo decora, atque ornamenta scriberemus.

Frater

Frater Felix à Mediolano fuit è sancto Capucinorum Ordine, per omnia aptus muneri, & prouidentia, nutuque diuino, veluti prae- paratus, vti subsidium hoc in vltimo discrimine Respublica haberet. Corpus ei laborum tolerans: in medio virium robore aetas: animus ingens, placidus, mitis, ex mansuetudine, ac rigore temperatus: vitae, mortaliumque rerum contemptor, & spiritu planè eo, quo vitam etiam ipsam, resque omnes humanas abdicare potuerat, cùm à saeculi delitijs ad faccum, & dura illa instituta transiret.

*sophia
dictus*
Litterae quoque Viro, siue quibus misce- tur mens humana coelo, siue quibus naturae arcana speculamur. Et eloquentia aderat, nihil sanè ad misérias, & funera congruens, sed tamen vsui futurum etiam id coeleste munus cùm seclusa vanitate, pompaque Artis, remaneret solidum, & graue tantummodo illud, quod prudentia Christiani Orationis, ad permouendos, siue continendos in offitio animos apte depromit atque dispensat.

Hunc appellauere Decuriones, vt dignam suam, & Ordinis sanctitate curam suscipere vellet. Ac modestè ille de se, de oneris, & negotij grauitate magnifice praefatus, sumpto ad deliberandum spatio, statuit adire Cardina- lem.

lēm Archiepiscopum Urbis ea scilicet mente consiliorque , vt, si Vir Dei, Pastorque tantus annueret: ingrederetur illico ipse Lazaretum, vocemque : & nutum Archiepiscopi diuina esse mandata interpretaretur : alioqui crederet , nequaquam se esse huic muneri destinatum, neque id officij ab se exposcere Numen. Accidit verò facetum , atque elegans in medio luctu quiddam cū ad Cardinalem super ea re Capucinus accessisset.

Nam, quia Cardinalis, audito Fratre haeserat paulisper, intuleratq; nonnihil, quo dubitationem animi sui nonnullam significare videretur : flexo reuerenter poplite Capucinus, veluti dimissus abibat. Tunc Cardinalis amōeno vultu : Ita ne verò Pater, inquit, tam facile , tam subito ? Dixerat hoc, & statim in amplexum Patris Felicis effusus , hominem sine fine deosculabatur, familiaritate, & tene-ritudine testificansea, quanti aestimaret , reperisse virum , qui pari ambitionis vitaeque contemptu , & relinquere Magistratum , & pericula adire itā paratus esset. Versus deinde in viri penitus admirationem, nihil omisit quo potestas ei , honosq; augetetur, atque ad publicum iudicium aggregata sua quoque auctoritate , praeesse Lazareto ipsum iussit.

Mandato

Mandato hoc accepto, ingreditur ad pestilentem intra septa illa Populum pesti sanè destinatus, sed non moriturus peste Pater, vt res etiam ea venerationem augeret Viri, qui tot millibus, vitae salutisq; auctor, ipse opis indiguisset, quam alijs ferebat: idemque, posteaquam tot millia sepelierat, occumbere vnà frustra optauisset, tormentoque corporis penè occubuiisset tamen, sicuti narrauere. Interea pulchrum simul, & miserabile spectaculum erat, quod miseria temporis, necessitasque exhibebat.

*via agit prela
a. Pater*

Opertus cilicio Pater, atque in eo paludamento exercens Imperium: interdiù maiestate nominis, & cuculli, per tenebras etiam hasta seu dolone armatus, assiduè peruigil, ac fere ieiunus, fessus semper, lacrymas, sudoremque miscens, obibat tuguria, porticus, viasque omnes: hîc vt flagitia ex occulto prohiberet: illic poenarum palam, premiorumue ostentator: alibi vestem, & fomenta diuidendo: alibi praebendo moribundis aures, & quos mortalis haec vita deserebat, his vitae alterius solatia, atque inuitamenta proponendo. Quotidianus hic, & sine quiete vlla perpetuus Patri labor erat: sollicitudinesque interdum, & tormenta animi maiora vrgebant.

Quin-

Quinquagintamillia mortalium fere sub-
tentorijs porticibusque habebat. His alimen-
ta vniuersis quamquam ex publico praeberen-
tur: tamen exsuperans saepe multitudo falle-
bat curam, & dimensa, partesue eludebat,
ita vt tanta illa cibariorum & vini copia infra
famem sitimque multorum esset. Itaque
grauissime aliquandiu in singula momenta an-
gebatur, donec experimenta docuere, adesse
Numen, atque assuefecere ita, vt cibaria tot-
millibus opportuna quandocumque deessent,
in ipso vitimae necessitatis articulo, velut è
coelo expectaret.

Narrauit Pater ipse, narratque adhuc: sae-
pissime accidisse hoc, vt cum exhausto poe-
nore omni, & consumpto, quicquid panis, &
vini praeparatum, conuectumque fuisset, ma-
lorum extremum dira fames Lazareto timere-
tur, copiae repente omnes in septa venirent,
nomnibus quoque suppressis hominum, vnde
tanta liberalitas: tantum aliquando auri, &
argenti esse oblatum, vt plures circa se-
pecuniae saccos attonitus admiraretur. Di-
uites homines, & opulentissimi Ciuium, siue
monitu, instinctuque diuino, siue actum iam
de rebus humanis, neque pecuniae vsum ultra
quemquam sibi fore existimantes, vltro exci-
tabantur,

tabantur, vt demereri ita Numen, & coelestes iras placare studerent, ac vile iam sibi metallum allegabant precibus, exonerabantq; illuc: nec ideo miseriarum finis modusue fiebat.

Nam, statim vbi necessitati alicui subuentum erat, alia superueniebat grauior, instantiorq; necessitas, cui subueniri non posset. Ipsamq; subueniendi alacritatem, dum recreandis corporibus opportuna diuiduntur, dum prospicitur etiam in posterum atque consulitur, tristissimi casus turbabant, atq; in id quod subito acciderat à praesenti cura auertebant. Deliquia nempe, mortisue eorum, quibus cibus offerebatur, spumaeque ab ore manantes, & deprehensa in zonis venena, & morte in ipsa facta confessio, indiciaq; manifesta, tamquam vnctores ipsi quoque fuissent, & vncti vicissim.

Sed, & subitum aliud è Coelo portentum, ac ni mirificè subuentum foret, exitium, & ruina repens, tuguria, quae sub dio erant, intempesta nocte, tugurijsque inclusos penè demersit.

Ad x Cal. sextileis, nocte, quae diem hunc insequeretur, tanta aquarum proluuius deiecta est, quantam nunquam antea visam fuisse memorabant senes: & ipsum ruere coelum, viri foeminaeque crediderunt. Conuulsae, & diffi-

& dissipatae sublicae, fulcra, regetesque, sub quibus infelix turba degebat: permixtique paleis, lectulis, capsisque mortales per prata fluitabant. Matres, patresq; non de sua, sed de filiorum salute solliciti: quos dum inquirunt, dumue retinent, dumque ululatu, & vagitu, vocibusque confusis inter tenebras, & umbras malè agnoscunt: desperatio, dolor, inconditi clamores erant silentij instar, quia fragore coeli obstrepente nihil aliud exaudiri poterat. Nisi narratio iam inde à principio esset ista, quae clades humanas, & miracula diuina coniungeret: haud credibile cuiquam fieret hoc: hominem potuisse vnum obuiam ire violentiae huic, atq; ex tanta illa nocturna eluione eripere naufragos infantes: conseruasse eis, imò reddidisse vitam.

Ad primum procellae strepitum, commotus animo Pater, ratus id quod erat, obtinere mox cuncta aquas, & infirmæ praesertim aetati adesse exitium, ac ni propere succurreretur, serum, & inutile fore auxilium, excurrit, raptis vnâ secum hominibus, in quibus ad grauissima quaeque plurimum fiduciae speique habebat. Rapidior ipse vnda, vndas certè contemnens, per stragem illam hominum, atque tuguriorum cum suo comitatu vadit. Ac sicuti
piscator

piscator eripit, ex nassa pisciculos, traditque
 capturae socijs, ac ministris, illique condunt
 in fiscellam: ita extrahebat ipse infantes, tra-
 debatque satellitibus, qui & ipsi extrahere
 non cessabant, atque ita, per manus, è prato
 in porticum, ex porticu in cubilia ferebantur:
 exsaeuijque procella. Ea per aliquot dies
 tenuerat intemperies Coeli, syderumque, nec
 largius, umquam effusi fuisse imbres dicebantur.

Cùmq; nocturna tempora diurnis iungeret
 veluti resolutum in pluuias Coelum, rapiente
 insuper, ac perscindente omnia vento, penè
 putrefacti mortales tabidum deinde illum spi-
 ritum inter infesta cuncta trahebant siue effila-
 bant. Culpa in eo Principum Urbis, an ne-
 cessitas, improuidusque casus fuerit, haud
 equidem facile ego dixerim, discreuerimus.
 Namque, vt tuguria plura struxisse, tabulas, &
 munimenta obiecisse potuerunt, quemadmo-
 dum, & patrum memoria factum fuerat: ita
 fuit is terror, ac violentia morbi, quae adi-
 mere consilium, obtupecacere mentem posset.

Periere incommodo vexationeque tanta
 etiam illi, quos nequaquam in mortem pesti-
 lentia corripuerat, quosue conquistorum, ac
 vespillonum diligentia tabidis integros temerè
 aggregarat. Sanè proceres nostri adiecere

curae,

curae ; cogitationique huic animum, vt alias in remedium sedes, & Lazareta minora pararent : sed id lentè fiebat, vt appareret, vim quandam esse occultam, quae subsidia illa impediret. Interim, aut intra ruguria constipati moriebantur, inficiebantque aegri validos, mortui aegros odore, & contactu : aut in Lazareta semifacta delati, subsidijs ipsis absumebantur.

simile habet T.

QVOMODO REMITTERE PESTILENTIA COEPERIT
ET QVOMODO FINIS MALO HVIC

CONTVMAX aduersus omnia remedia humana malum, & coercendis hominum culpis repertum, immissumq; diuinitus, non nisi nutu, & ope diuina coerceri, depellique poterat, quae ipsa exhaustae penè iam, & nisi è Coelo subueniretur funditus interiturae Ciuitati in discrimine rerum ferè vltimo adfuit. Miraculumque tam praesens & certum habitum est, quàm ea habentur, quae sensus ipsi percipiunt, ac perferunt suo munere ad animos.

Inter Templa alia, quae prisca religio Urbis, quaeue recentior aetas, secuta mores, & exempla maiorum, Virgini Deiparae sacrauit,
cele-

celeberrima est aedes, cui gratia Diuae, & fauor in Urbem ipsam, nobile cognomentum dedit. Gratiarum aedes ob crebra erga Cives munera Sanctissimae Matris nuncupatur. Excoluere regali munificentia Duces nostri, cum id nomen, Imperiumque in Vrbe esset. Dominicani Patres columnina Religionis, Monasterium Aedi adiunctum habent, Aedemque tuentur. Ibi Sancti Officij sedes, supremumque Tribunal.

Illic ad x Cal. Octobris intempestae noctis silentio, cum requiescerent Patres, aut lucubrarent, siue quibus id studium, in preces, & pia meditata effusi, in suo quisque cubiculo, aut in angulis Templi obscuris, expectarent antelucanae psalmodiae horas: confestim aera campana Templi eius, pulsu, ac tinnitu suopte personuerunt. Excitantur, qui semisopiti decumbebant: vigilesque alij ad eius rei nouitatem admirabundi stupent, siue per conclauia trepidant, atque discurrunt. Cito apparuit, moueri tintinabula mirifico tactu, sonoreque; illos nemine pulsante cieri diuinitus. Aliorum admiratio, aliorum pauor eminet.

In commune omnes, quid rei esset, ambigebant: interimque sono campanarum mixtam maiorem humana vocem auditam ferunt.

Haec

Haec dicta : MISEREBOR . POPVLI . MEI . MATER . & sequuta protinus interpretatio : finem adesse pesti . Deiparam id à Filio petijſſe , precibusque eius ita conceſſum . Id ego retuli , quia testimonio Patrum , atq; deinde Ciuitatis vniuerſae fide , exituque ipſo firmatam rem in haec quoque publica monumenta recipi ius faſque erat . Inſomnis quoque turba captiuorum , quae ob aliquas in Religionis cauſa ſuſpiciones , aut culpas , Sancti Officij vinculis in ſeparata Monasterij parte attinebatur , audierat : terroresque ſuos ritè interrogati iſti expoſuere , cùm ſonitus vocesque inuſitatae ad trepidās aures ea nocte ſibi accidiffent .

Ac ne dubitari poſſet : ex eo Templo , & Praefide Templi Diua proſectam fuiſſe ſalutem : ſalutifera vis aduerſus publicam luem etiam oleo poſtea fuit , quod ante ſacratiffimam Diuae ipſius effigiem in penſili lychnucho ardebat .

Eumque liquorem , ſequutis diebus , in praefentiſſimo , ac mirifico remedio habitum ſummi infimique expetebant , in quos veluti coeleſte munus , guttae aliquae ſtillaeque diuidebantur . Inde , cùm ſeneſceret , ac remitteret quotidie malum , & propitiatum eſſe Numen , non ſpecies tantùm , atque fiducia
mira-

miraculi, sed iam fructus ipse, minore in dies mortuorum numero declararet: animi quoque procerum, magis, magisque excitati sunt, ut negligentia procul omnis haberetur, cui raro unquam diuina munera obtigerunt: atque quadraginta dies, ceu nouam, ultimamque spem indixere Ciuitati, populoque vniuerso, per quod temporis spatium, abditum, atque inclusi manerent. Commercia cum vicinis, euagationes & alia ferendae amplificandaeque pesti, vetita sub capitalibus poenis, quas antea spretas timeri iam vitarique cogebant monstrata inuitamenta vitae, & obiecta spes salutis.

Sub anni deinde finem pestis magis desierat, quam securitas redierat, speciesque sicuti resurgentis, ita trepidae, & afflictæ, ac penè deletæ Urbis cernebatur. Pallido, & exanguis ore, lurida macie, turbatis oculis, attonitoque vultu superstitibus, tamquam ab tumultu prodibant. Colloquia inter ipsos, mutuique congressus, non sine pauore adhuc, & quadam inuicem fuga. Non contingere dexteris, non fociare halitus, & reddita salutatione statim auerti, seruatae patriæ, redditaque salutis fidem haud capientes. Cautissimisque istis alij rursus occurfabant inter publica mala, priuata

priuata secordia , multoq; otio pingues facti , prudentiam intempestiuam , metumq; ridentes , eò quòd absque metu , prouisusque villo nihilominus ipsi euasissent.

Simplices aut obstinati homines , qui credere nolebant , quibusue persuaderi non poterat , inesse panno , multisque rebus vim tangenti inimicam , atque exitiabilem : & nimium solertes alij , quibus potior erat rapiendi , habendique dulcedo , qui , dum rapiunt , atque seponunt quicquid ad manum fortè venisset , ac postea deinde raptis perstinacissime incubant , nec euolui inde possunt , alimenta pesti praebuere , magnumque negotium aduersus infelices eos Tribunali fuit , & aduersus spolia , quae occultata , defossa , abdita tenebant .

Puniebantur isti à Iudicibus : erant iudicia & multae poenaeque & quotidiana edicta in eos : neque ideo poterant , vel pestilentiae , vel poenarum , vel vtroque simul terrore cohiberi , quominus , & emerent , & furarentur , & absconderent perniciem ipsi suam , venderentq; eandem alienis , nullo interim eius mercimonij fructu , atq; emolumento maiore , quàm ut , vel inter mercandum ab satellite deprehensi punirentur , vel , si fefellerant vtique speculatores ,

tores, inuoluerentur alio ineuitabili supplicio
quod res ea vendita siue empta irrogabat.

Immortui pleriq; erant vestibus, linteis,

quae abdiderant : & fuere, qui non

familiam modò suam, sed pa-

gos, oppida, municipi-

piaque tota, vnde

abierat pestis

iam,

vnus teruntij quaestu re-

digerent in pristina

mala clades-

que.

IOSEPHI RIPAMONTII

DE PESTILENTIA QVAE

MEDIOLANI FVIT

ANNO MDCXXX.

LIBER III.

ARDINALIS & Archiepiscopi
 Federici grandem animum,
 atque in omni vitae parte
 germanam diuini Patruelis
 altitudini mentem satis ex-
 pressam esse arbitror ijs libris,
 quos de vita eius & Pontifi-
 catu composui tradidique

C

Primicerio Vicecomiti filio sororis eius & ma-
 gnarum Auunculi virtutum penè heredi, pro
 singulari rerum istarum notitia & cura reco-
 gnoscendos; edendosque si ita videbitur.

Admiranda ibi pastoralia facta, & celebratis
 antiquorum Episcoporum, imò & Imperato-
 rum virtutibus artes pares: penè militaris
 inter sacra labor, spiritusque tantummodo
 honesti appetens: modestia, & sobrietas, &
 virginale occultum illud, quod numquam fa-
 cilè

cilè de vllò creditur , tot annorum tenore
 custoditum approbatumque famae communi :
 litterae demum & opera ingenij relata sunt :
 vtinam verò omnia haec dignitate & elegan-
 tia , quae propria Scriptoris illius fuit. Cae-
 terùm , artium virtutumque tantarum , nulla
 fuit , qua , vel ipse delectaretur , vel alij ob-
 stupefcerent magis , quàm irrequieta peruigile
cura in subiectos , non illa sanè magnifica
tantummodo verbis atq; consilij , dispare ma-
nu , qualis esse multorum solet , sed illa con-
 temprice auri , & effusa in sumptus omnes ,
queis publica salus , atque etiam vita singu-
 lorum indigeret .

EXPONVNTVR EA QVAE PROVIDIT
 INSTITVITQVE CARDINALIS AD
 PRIMOS DE PESTE RVMORES.

ANNO, qui prius dederat infauitos de pesti-
 lentia susurros, apertas deinde suspicio-
 nes, postremò rem ipsam, & exordia imminentis
 exitij, cùm accepisset, serpere coepisse malum
per Dioecesis extrema, Valles. nempe Rhae-
 tis Heluetijsue subiectas: perculsus eo nuntio,
 haud aliter , quàm sicuti aliquis familiam do-
 mumue suam & prolem opprimi repentè pes-
 sumdarique

sumdarique sensisset : primùm omnium edidit mandata Parochis atque Vicarijs , quid providere , circumspicere , agere deberent , nequi decederent in tali tempore temerati graueq; culpis , neue fame ac necessitate redigerentur in desperationem , grauissimam vltimamq; culparum .

Certùm deinde Sacerdotem elegit prudentia sibi probatum , innocentiaque vitae , atq; hunc pecunia probè instructum misit in Valles vnicuique agrestium illorum ex re ac necessitate consulturum , sicuti largè acquabiliterque fecit : & ex ea dein curatione reducem Cardinalis amplè remuneratus est . Haec cura Pastoris ad Vallium incolas fuerat statim vbi pestilentia facili ex Germania transitu incedere illac coepisset antequam nobis vllus eius mali timor . At nostrae famis tempore , quae prima fuit huic terrae pestis , vicina pariter Vrbi , & longinqua , & his interiecta rura , campestria simul & montana cuam sensere eandem .

Tamquam alterum etiam ipse Publici Consilij corpus , alteraq; Ciuitas , & altera Resp. vel certè publicae liberalitatis aemulator vnus , adhortatorue simul , mittebat , dispensabatque pagatim hordei frumentique saccos , vt esurirent

rent minus & minus qui fatiari non poterant omnes. Cùmq; famelica illa turba agrestium, relictis agris, montibus, vallibusque fugeret, sicuti in principio exposuimus, in Urbem: aperuit infelicibus istis ultro domum, unde acciperent alimentorum quotidie partem, & pulmento paneque resecta agmina matutinis horis, veluti sibi oppigneratam ab fame vitae spem haberent in eum diem.

Et quoniam hac illecti fama veniebant in Urbem quotidie plures, languoreque ac debilitate confecti sternebant corpora per vias, & antequam possent alimenta vlla accipere, moriebantur: instituit fecitq; Cardinalis verè paternum illud, vti dimitteret per compita, Sacerdotes, qui attenuatissimis illis exigua in spe trahentibus animam, super alterius vitae hortamenta, salubres potiunculas hauustusque praeberent: seducerent eos in vicina quoque recta, & ibi quiete necessaria, simul remedijs alloquijsq; recrearent. Excogitauerat & mandauerat ista Cardinalis, quae seruata sunt, & mansere, donec conquiri vagos Vibe tota pauperes, cogique intra Lazaretum, & multitudinem illic ali vniuersam, publico Consilio expedire magis visum.

Non tamen ille postea destitit alere sicuti
insti-

instituerat modis ijsdem , & refouere multos, qui, vel pertaesi Lazareti disciplinam , & consistendi leges , ex eo loco abibant , vel relicta sua quisque domo subinde confugiebant adhuc in Urbem. Quantum huic esurientium populo poterant sufficere Cardinalis opes , pergebat vuà cum Rep. sustinere onus , ac reperere apud ipsum pristina subsidia miseri , cum è Lazareto effusa colluuius iterum impleret foedaretque Urbem. Iuuat conferre Viri huius Pastoralem hanc curam cum cura & munificentia ciuili erga Patriae res afflictas , atque erga vltimum penè tempus Urbis populi que tanti. Talisque comparatio neutri partium ingrata fuerit . Nam , sicuti Ciuium vnus etiam ille erat : ita gloria communis in secula ibit exempli certaminisque huius.

ORTA PESTILENTIA CARDINALIS MVLTÀ AGIT

AD primas pestilentiae exorientis minas , sicut prouiderant egerantq; procures omnia , quae aduersus immissa diuinitus tela prouidere agere poterat humanus timor : ita sollicitudo Pastori eadem fuit , neque , vt corpora tantum exitio eriperentur , sed multò magis , vt pars altera potior in tuto esset . Ac , ne
sibi

sibi quidem satis ipse credens, satisue prouide animaduersum aduersus pericula quicquam existimans, habebat quotidie consilium super praesenti rerum statu, prudentumque Sacerdotum sententiam anxie exquirebat. Vbi exquisisset, alia ex dictis ac sententia ipsorum, plura prouisu arbitraturaque suo exsequebatur.

Consiliarium verò certissimum vnum habebat, in cuius penitus autoritate conquiesceret : nempe Diui Caroli commentarios, Memorialemue libellum, quem ille pestilentiae suae tempore confecit. Inde pleraque desumendo, multa etiam ad illa addendo constituit huius calamitosissimi temporis quasi regimen & monstrauit itinera Sacerdotibus ac populo, quae ferrent ad salutem : quid obseruare, quid praecauere deberent, tum ne contraherent contactu halituue tabem, tum ne coelestes irae, vnde essent omnia, irritarentur.

Ad animas in extremo illo articulo ac discrimine expiandas eripiendasq; poenis, quicquid Apostolicae facultatis ipse habebat, concessit indulisitque Sacerdotibus, & nouas alias à Pont. Max. facultates impetrauit : atq; per vniuersam latè Dioecesim, huiusmodi facultatibus voluit instructos esse Sacerdotes,

ne qua humani animi labes absque remedio foret, neuè spiritum extremum culpa vlla sequeretur. Sub initia ipsa pestilentiae mouerat Cardinalis ad ista animum, tunc scilicet, cùm Magistratus etiam, Decurionesq; & proceres Vibis perculsi infausto rumore, qui quotidie magis inualefcebat, ad remedia conquirenda consilijs sumptibusque trepidarent. Vt verò propinquare Vrbi malum, & praesentior iam res erat, consilia simul sollicitudinesque Cardinales flagrantius ardescere coeperunt. Colloqui cum Decurionibus & consultare assidue cum eis: accersere Parochos: admouere terrores: ostentare praemia, quò promptius atque libentius pericula alioqui ineuitabilia adirent. Monasteriorum quoque praefectos, & capita Ordinum Sacrorum excibat, qui & ultroaccedebant ob celebrem de tanto Pontifice famam, operamque suam ei ad omnia quae vellet imperare pollicebantur. Laudabat benignè istos, & praeter sempiterna praemia, quae sperare possent, se quoque memorem fore ostendebat pietatis & obsequij singulorum, atque effecturum, vt fructum operae qui deberetur ipsis, Ordines vniuersi Familiaeque Sacrae illae sentirent.

Affirmabat verò, & quam sanctè testaba-
tur

tur : certum ac destinatum esse sibi , non decedere muneris sui sede quamdiu pestilentia in Vrbe esset : non Vrbe egredi , non domo , nisi quoties populi salus , & publica aliqua necessitas euocaret . Constititq; promissi fides , adeò scilicet , vt in pertinaciae penè nomen interpretatione nonnullorum constantia tanta exiret . Quippe , cùm familia circa eum penè tota perijsset , desolatus , atq; destitutus necessarijs quoque ministerijs , abnuìt exire , pedemq; efferre recusauit , irritis amicorum , & principum , medicorumq; precibus , qui secessum interea aliquem , & rura amoena suadebant .

Ad Lazareta tantummodo inspicienda , siue supplicatum ibat , siue ad fenestras & ostia pauperum familiarum domi clausarum , vtì subueniret . Nemo qui vellet ipsum adire & alloqui prohibebatur . Nec solita caeremoniarum ritumue sacrorum atq; concionum etiam omittebat : inerepabatq; vocibus planè pater- nis , nunc è suggestu , nunc ad compita populum , primis vtique diebus , quòd segnes , & tardi , siue contumaces essent ad intelligenda oracula denuntiationesque diuinas . Interfui-
mus nos , cùm ad D. Barnabae Fontem , ducta illuc supplicatione concionaretur , instauraretque preces exposcendae veniae auxilioque
diuino

diuino per Apostolum , quem huius Ecclesiae fundatorem Episcopumque primum , non solum pietas & inueterata fama Vrbs , sed consensus quoque communis credit .

Nondum tunc clausae per omnes vias , sicuti postea domus erant : nondum ab colloquijs & adspectu mutuo dirempti ciues : nondum in solitudinem versa Vrbs erat : populusq; iturus in funera penè vniuersus spirabat adhuc , aderatque Archiepiscopo supplicanti circumfusus vestigia illa calcans adoransque simul . Ipse lurida simul & fulgida macie referens Diui Caroli speciem , qualem eum in simili Patriae clade supplicantem multi supererant adhuc qui vidissent , lacrymas ab singulorum oculis , & ab imo pectore suspiria eliciebat . Facta ibi re diuina , consensu suggestu , spargebat modò limpidam , & sonoram , modò raucam flebilemque toto campo vocem , & vatis in modum , ea , quae euenere , praedicebat .

„ Viri Mediolanenses : Popule infelix : pesti-
 „ lentiae praeda futura multitudo . | Iam iam te
 „ diuinae Iustitiae tela appetunt . Ibitisq; sub ter-
 „ ram : & stabunt animae vestrae ad Dei Tribu-
 „ nal . Sed neq; credes tu mihi , donec impleueris
 „ mortuorum congerie campos , caroque tua
 esca

esca vermibus fiat. Cecinerat haec, quae & secuta sunt. Obseratis tota deinceps Vrbe domibus, & repleto Lazareto, praefecit primores Cleri viros, qui ministeria cuncta recognoscerent, aliosq; minores qui ministrarent. Ac, neque his, neque illis credens, nonnullos occultè submittebat, per quos nauiter atque ordine diurna quaeque sibi exponerentur.

Volebat cognoscere mortuorum praecipuè numerum, casusq; subinde alios: & vt quidque nouum, atrox, miserabile inciderat, velibat ipse statim: vel mittebat alios: & quicquid opis humanae foret, aduersus ea moliebatur. Segniter in suo munere versatos increpuit ac puniuit asperitate vultus, quae maximum ei telumerat, quoties mouerat iusta iura animum. Desertorem vnum sui gregis reuocauit in stationem, poenisque & interdictis redire coegit. In commune omnes munifice tractauit ornando beneficijs ipsos, con sanguineosq; eorum. Sic meruerant Parochii in primis. Nam inter omnia mirabilia vel incredibilia dictu, quae retuli, quaeue relaturus sum, nihil perinde superauerit fidem, quam horum alacritas ad pericula contemnenda mortemque oppetendam, dum Deo, & Patriae, Cardinaliq; inséruirent. Ac, sicuti miserè

miserè morientis populi spectacula foeda, ita ruentium Sacerdotum in mortem spectacula non amplius reditura extiterunt.

Nocturni horis omnibus ad cadauerum & pestilentiae recta ibant Animae vnus causa, quam vbi mysterijs & Sacramentis ad alterius, vitae limina produxissent, in eadem domo alios subinde expirantes expiare pergebant, expiatisq; immoriebantur. Fuere, qui relata domum peste cum familia sua rota perirent. Fuere, qui superstitibus suis, non damno, non moerore, praesentique mortis imagine, de constantiae suae gradu mouerentur, vellentq; nihilominus in eiusdem muneris perfuntione finire. Laus haec propria Parochorum fuit. Neque Canonici Sacerdotesue alij exsortes tanti decoris.

Cùm possent abire plerique mansere succedentes in munia etiam ipsi vicemque Parochorum. Patres Dominicani praesertim, Theatinique, & Franciscani Minores, quos calopodia, cucullique distinguunt, ad extremum vsque, focij laboris, imò Martyrij huius fuere: Martyresque veluti eos Ciuitas tota intuebatur. Auxere hoc merito nobilitatem Ordinum suorum: & parentum loco habiti sunt, semperque habendi erunt. Pulchrum erat

erat cernere genera haec hominum immista
 Parochis ad laboris & mortis gloriaeque cer-
 tamen . Maiorque adhuc in ipso luctu vo-
 luptas , ipsos in tali certamine contemplari
 Parochos , qui nec vinci sese volebant , & vic-
 tos vltro fatebantur , eaque Patrum victoria ,
 non secus ac triumpho quodam suo gestiebant .

Circumferebant Altaris mysteria per vias
 cum eo apparatu & luminum honore , quem
 conditio temporis dabat . Vbi in moribundum
 aliquem iacentem humi inciderant , subsiste-
 bant , & audita confessione offerebant ei Pa-
 nem Angelorum : protinusque ille , tali cibo ,
 (sicuti sperare debemus) subducebatur in
 Coelum , & exemplo atque inuitamento cae-
 teris erat , vt oppetere ita auerent . Pul-
 sabant ostia Pattes Parochique : enitebantur
 scalis in fenestras : & vtra alimentorum parte
 foret opus , obuia benignitate prompti largiq;
 aderant . Nam , & sportulae è Cardinalis do-
 mo sequebantur refertae bellarijs , cupedijs ,
 cibis , qui palatum etiam irritare vel excitare
 morienti possent .

Dumque reficerentur ita corpora animique ,
 hinc diuino , hinc humano cibatu , superue-
 niebat saepe , occurabatque Cardinalis ipse
 grande solatium , & ijs , qui curabant ita in-

utroque

utroque homine periclitantes, & ijs, qui periclitabantur, atque curabantur. Si fieret obuius fortè Sacerdoti, qui Christi Corpus sub umbella portaret in morbosam aliquam funestamq; domum, fiebat statim affecla mysterij, ferculumque coeleste deducebat & reducebat in Templum idem, vnde egressa pompa erat. Acciditque interea memorabile illud, vt, cum anus vna semel, & nondum planè senex alter iterum, nescio quo spiritu procumbentes ante Sacerdotem pyxidemque eius, nondum elutis animi sordibus impertiri sibi sacra poposcissent, increparer eos submoueretque Cardinalis hac ipsa voce, quam vaticino illius ore effatam retulere qui audierunt.

„ Quin tu faceffis hinc cum intempestiua &
 „ contaminata ista pietate? quin vteris Sacra-
 „ mento Poenitentiae prius, deinde ad mysteria
 „ haec tremenda accedis?

Abscessereque illi, & rem confessi, sicuti erat, flagitium patefecere quod admittere voluissent. Prodibat ita subinde Cardinalis: & Eucharestiae Sacramentum celsissima res illa inprimis vt sanctè decorèque administraretur in tantis rerum hominumque turbis excubabat. Nec alia tam intima causa prodeundi fuit.

DE LAZARETO ECCLESIASTICO
 QVOD CARDINALIS INSTITVIT

INDIGNVM ac deforme visu pariter & cogitatu erat, homines sacros ministrosque sacrorum, inter nuda mulierum etiam cadauera nudos trahi carro eodem ad fossam, ibique nihilo honestiore sepulcro misceri, & contegi simul omnes: quod turpe spectaculum, turpemque ritum, necessitas & miseria temporis dederat. Canonicae aedes sunt, quae proteruae inutiles opes Humiliatorum lasciuierant olim: merueratque lasciuia illa censuram, & ex censura, post scelus immane, finem excidiumque Ordinis: & soboles illic hodie Parochorum alitur atque eruditur. Hanc elegit Cardinalis Ecclesiastico Lazareto sedem, non tamen ut promiscue Sacerdotes Clericiue omnes illuc contacti peste deportarentur: sed ij fere, qui per aliquod eiusmodi ministerium incidissent.

Praefecerat Lazareto huic principio quidem Hieronymum Septalium Medici Septalij fratrem, qui ex Archipresbytero Modoetiae Poenitentiarius Maior Urbis factus erat eius animi litteraturaeque Vir, quales raro antea paucos Ecclesia Mediolanensis viderat, paucioresque

cioresue fortasse etiam in posterum alios, vlla, vel Ecclesia, vel Ciuitas visura est. Mortuo autem eo, Primicerium Vicecomitem Sororis suae filium, de quo in principio libri huius memoraui, praefecit. Hi fuere Praefides Antistitesq; Ecclesiastici Lazareti, post alterum alter. Et idoneos ipsi alios ex grauissimo Ordine Oblatorum assumpsere, qui praesiderent ibi atque excubarent in vtramque curam, vt, & cum dignitate tractarentur atque alerentur decumbentes ibi clausiq; Sacerdotes, & benè pieq; moriendi simul adiumenta omnia haberent. Aliarum rerum copia prouisa domi parataq; suppetebat: alia subinde comportabantur mittebanturque illuc è Cardinalis ipsius Domo prout ipse mandarat.

Medici item & Chirurgi, & ministri inferiores, tum conducti certique, tum extra ordinem parati promptique alij, vt praesto isti essent, prout illorum quisque decessisset. Mortuisque prioribus Oblatis in ministerio curaue illa & administratione Lazareti, non deerant ex Ordine eodem, qui succederent alacriter, palmamq; adamarent, tum vt Cardinali ipsi gratificarentur, tum verò, quia in munere cadere illo gloriosum putabant. Porro, quia tot super alias alijs assidue vrgentibus impensis,

impensis, nimium oneris erat, opesque & fortunae Cardinalis, tum Ecclesiasticae, tum patriae multiplices quodammodo fatigabantur: admoniti sunt reliqui per Urbem Clerici, Canonici, Párochique omnes, vt pecuniarum aliquid, quantum scilicet cuiq; commodum esset, conferre ne grauarentur in opus id, & aded pium, & aded commune omnibus, quandoquidem posset accidere cuilibet, vt domo illa subsidijq; ijsdem indigerent, quae animo simul & corpori pararentur. Contulere benignè multi, quos verecundia, quos pietas, quos etiam diuitiae stimulabant.

Et diuites intra id Lazaretum pecuniosque nonnulli, cùm viderent in propinquo finem, tradendo custodibus ea, quae non poterant auferre secum, quaeue in alterius vitae comparatione spreuerant, subuenere necessitatibus, & auxere piam eam gazam. Fuit in aedibus Canonicae Lazaretum hoc per quattuor menses. Numerus ibi decumbeatium, maior minorue interdum: sed vt minimum, sexaginta fuere semper, quorum vt quisque conualuerat, aderat caeteris minister, pretiaque diuinitus acceptae salutis certatim ita persoluebant Numini, & Cardinali, & Ecclesiae huic.

DE PÉCVNIA VLTRO DELATA AD CARDINALEM
PER DVOS AGRESTES ET PER LOMEL-
LINVM GENVENSEM

AD x Cal. Quinct. sub eum diem, quo die supplicatio cum D. Caroli Reliquijs augustissima eadem & infausta per Urbem habitata erat, stabat Cardinalis in conclavi, quâ Pontificatus insignia Crucem asseruari mos Aulae Metropolitanae est. Hora erat diei fere secunda: & facta in domestico sacello re diuina Pontifex, nunc suo more illic ambulabundus & lenta propter assiduam meditationem spatia conficiens, nunc applicatus ad parietem, admittensq; interea eos, qui accedere & alloqui vellet, extrahebat illam matutini temporis horam, idq; negotij pro solatio inter solitudines & animi afflictamenta habebat. Nemo qui vellet ingredi prohibebatur: constiteramque fortè ego in angulo illic iuxta cubiculi ostium. Veniunt longò cubiculorum ordine agricolae duo pari fere aetate, pari gradu, vestitu etiam viliori, quàm sicuti esse aratoribus solet: sed facies utique honestior erat.

Ingrediuntur iure suo, & positis geribus ante Cardinalem, is qui maior natu videbatur, ita inquit. Domine germani fratres sumus, cultores

„ cultores agelli, quem pater item agricola no-
 „ bis reliquit. Habemus abdita in sinum & in-
 „ futa vestimentis hîc duo millia nummum au-
 „ reorum, quam pecuniae summam, agri fruc-
 „ tus, & parcimonia nostra laboresq; dederunt.
 „ Habemus in animo deponere aurum hoc ad
 „ Em. Vestrae pedes, vt habeat ipsa, dispensetq;
 „ sicut ei videbitur. Haec dicta: statimq; deprom-
 „ mebant. Commouerat noua res Cardinali
 „ animum: & profectò suspicatus, vana afferri,
 „ nec homines satis sanos esse illos, monebat:
 „ viderent quid agerent, quidue loquerentur.

Cùmque respondisset eorum alter: compo-
 „ tes ipsos esse mentis, nec errorem sibi esse
 „ vllum: accito è familiaribus vno Cardinalis,
 „ mandauit vt duceret istos ad Archidiaconum,
 „ & cum eo colloquerentur. Deducti per sca-
 „ las, & introducti, praefati pauca de sua condi-
 „ tione & mente, diloricauere illico sibi à pecto-
 „ re lacernas, & chartacea inuolucra, effudere
 „ continentia nummos, quos vbi adnumerauere,
 „ postulauerunt, vt per scribam publicum, sicuti
 „ factum esset, res tota testato consignaretur,
 „ quemadmodum scilicet, pecunia ab se tradita
 „ Cardinalis arbitrio esset, & recepta per Ar-
 „ chidiaconum nomine eius, tabellisq; obsi-
 „ gnatis abire.

Retuli sicuti videram hoc, haud sine alta
 equidem, & tunc, & postea semper, & hoc
 praecipue momento, contemplatione mentis
 animique illius, nempe contemnētis aurum
 & nolentis vinquam polluere manus alienae
pecuniae contactu. Sed ne pecuniam quidem
 ille suam adspicere, adeo non contrectare
 solitus fuit: voluntarijque largitores hoc ipso
 tempore repudiati fuere cum summas incre-
 dibiles offerre voluissent. Lomellinus fuit ditis-
 simus haud dubie popularium suorum, quem
 vidimus in Vrbe solitarium fere quendam, cor-
 pore procerum, colore fuscum, habitu vix ad
 priuati modice locupletis formam. Hic, simul
 pietate ardens, simul mole opum impeditus, &
 pertaesus fortasse in patria sua nonnihil Me-
 diolani morabatur, plane dignus, qui Cuius
 etiam hinc esset, quique habitaret nobiscum.

Mittebat occulta subsidia Monasterijs, prout
 magna aliqua nota Viro necessitas impetusue
 animi eius tulisset. Tria milla nummum aureo-
 rum ad Cardinalem, semel, iterumque detulisse
 ferebatur diuidenda sicut ei placuisset. Hacten-
 us grata peregrini hominis liberalitas pie-
 tasque fuerat. Honos etiam à Cardinale
 habitus ei laudatusque ipse prolixè est. Ut
 verò accesserat demum, obtuleratque decem
 millia

millia, & fortasse amplius : tunc Cardinalis, audita summa quae dabatur, vultu pariter animoque suspensus, aliquandiu primò haesitavit, veluti deliberabundus : ecquid, Apostolicum decorum foret, ab vno priuato homine accipi pecuniae tantum. Dein, explicata liberaliter fronte : Vos verò, inquit, aurum argentumque istud deferre potius ad alios, qui magis indigeant. Abijtq; ille obstupefactus : & sicuti postea compertum est, pecuniam dedit hominibus nihil vñquam tale repudiare affuetis, qui strenuè accepto tam largo munere, multa in sacros vsus pretiosa vasa coemerunt : & addidere columnas, statuasque & picturas, & aurata lacunaria Templo. Reliquum in domesticas necessitates cecidit, quae magnae, & multae tunc fortè vrgebant.

MONITA ET CONSILIA PER CARDINALEM
EDITA CLERO

EXTAT serie longa cautionum & remediorum, quas cautiones & remedia Clero tempore hoc edidit. Neq; alienum fuerit, praecipua quaedam inde transtulisse huc, vt vnà cum narratione malorum, proponantur in specimen vigilantiae tantae nimirum, sed ad vtilitatem quoq; alienam, si huiusmodi rerum vsus alicubi inciderit,

inciderit, quod ne fiat, optamus sanè, & à Deo Opt. Max. precamur. Baptizandis infantibus, qui ab utero pestilente editi in spem illam dubiam, exiguamque vitae essent, quoniam esset id omnino Sacramentum, cui consummando caeremonia deniq; solennis, ipseque Sacerdos, & autoritas Ecclesiae requireretur, cauerat ita monueratque. Si quem ita natum abs te baptizari contingeret, siue tu Parochus loci, siue alius pro Parocho Sacerdos eris, non nisi interposito, si facultas erit, igni, facies, quò sanies illa aeris tibi infantique circumfusa dissipetur, tempereturue saltem. Absinthij nonnihil etiam, vel aliquid huiusmodi herbarum injici curabis in remedij partem.

At in Sacramento Poenitentiae administrando, quae post lustrales aquas altera, porta salutis est, facies ista, & curabis. Si aegrotus erit in eo statu, ut moueri loco possit, euocabis in partem aliquam, ubi liberiore, & aperto Coelo consistatis, tuque & ille expiandus: ibique peragetur res. Si moueri non poterit: stabitis vos ad fenestram, vel in limine ostij, obseruato hactenus interuallo, ut arcana confessionis extra periculum sint. At propius accedere si necesse erit: cauebis,

„ ne contingat vestis tua vestem , tegumenta-
 „ vlla aegroti , halitusq; tuos cum ipsius anima,
 „ & spiritu , quamminime consociabis , & ore
 „ quoad eius fieri poterit , in aliam partem ob-
 „ verso confistes , auditor tu scilicet , arbiterque
 „ culparum .

„ Cubiculum illud vbi eritis , subfumigio in-
 „ terim aliquo purgari debet ad grauitatem ,
 „ odorum & quicquid aliud poterit inesse tabi-
 „ fici tollendum . Id commodissimè fiet accensa
 „ lauru , vel iunipero , bacchulisq; generis eius ,
 „ siue paleis etiam ad extremum , si caetera de-
 „ sint . Iuuerit & tempora frontemque leuissè
 „ aceto , necnon per pilulae osseae vel eburneae
 „ foramina admouisse odoramaenta naribus , id ,
 „ quod priore quoq; pestilentia factitatum pro-
 „ fuit . Vosque talia factitando , & custodiendo ,
 „ industriae saltem & obedientiae meritum vt-
 „ cumque habebitis . Caetera deinceps omnia
 praescripserat Cardinalis , eadem cura , dili-
 gentiaque in Sacerdotum suorum vitam : ve-
 luti haec .

Posse Mysterium , quo sacro ad supremum
 certamen oleo morientes inunguntur , hoc
 tempore sanè omitti . Sed si quis vellet insigni
 pietate Sacerdos hoc etiam munere defungi ,
 satis haberet alterum tantummodo oculum .
 inunxisse

inunxisset aegro: supersederet vnctione lumborum, & crurum, quae minus necessaria Sacramento esset. Moneret aegrotum: decumbere clauso ore, corpore cooperto, ne spiritu aut vapore pestem ille inhalaret. Matrimonij solennia non indigere contactu: posseque Sacerdotem, dum nuptialia illa verba effatur, vltro submouere sponfos. Rem diuinam, illud esse mysterium, quo nusquam arceri Populus possit: semperque oportere licere congregari ad sacra, & conuenire promiscuos: caeterum, posita ad templi valuas subductili Ara, posse conuenire, & interesse rei diuinae Populum, ita, vt neque Sacerdos ipse contrahat ex conspata multitudine morbum: neque multitudo plus morbi referat domum, quam attulerit illuc. Sed viderit, cauertque Sacerdos, ne sacrificales apparatus adhibeat, quos mortui Sacerdotis euident pestilentia polluerit.

Statim vbi mortuus ille esset, omnia instrumenta sacrorum, indusiaque, linteamina, mapas, ipsamque adeò Parochi supelectilem, purgari vniuersam, & seponi debere, meliusque fore etiamsi ante casum eius vltimum, ad prima indicia viciniae periclitantis, preciosa quaeque, & difficiliora purgatu seponerentur illico, & ritè obsignarentur, vt finita deinde
clade:

clade discerni suspecta ab integris possent. Sepulturae quoque caeremonias, & ritus ad haec pericula attemperauit. Quae licet minima retuli tamen, vt exemplar hoc excubantis ad omnia Pastoris repraesentaretur illustrius, magisque confirmaretur: & scias nihil omitti debuisse curae maioris illic, vbi leuia etiam haec & parua dictu susciperentur.

Sed & missae per Dioecesim vniuersam ad Parochos Vicariosque litterae magis adhuc ad viuum expressam habent imaginem atque simulacra omnia Pastoralium sensuum erga Animarum hunc Gregem: verbaque singula verè videri magni Pauli voces possunt. Induite viscera charitatis. Videte Gregem, videte circumuentos vltima necessitate filios, quos peperit vobis & assignauit Ecclesia Mater. Parati estote, sicut nos quoq; parati sumus abijcere mortalem hanc vitam potius quàm deferere familiam hanc, & domum, prolemq; nostram. Amplectimini sicuti vitam & solatia, pestem, dummodo lucrifacere Christo Animam vnā possitis. Sicuti faces, & lumina fulgeant modestia, sobrietas, & castimonia vestra, caeteraeq; virtutes. Id Coelestis irae placamen erit.

Haec totidem fere verbis, & in eandem sen-

sententiam , pleraque alia scripta reperi in Pontificalibus ad Parochos epistolis : simulque adnectebat. Monerent saepe Populum : non occultandam esse , dissimulandamue pestem : & grauissimè peccare , si qui occultare , ac dissimulare vellent .

CVRA CARDINALIS IN MONASTERIA
VIRGINVM SACRARVM

AD Monasteria Sacratarum Deo Virginum, quò infirmior ibi sexus , & vitae conditio velut exfors vitae , societatisq; communis, eò praesentior ipse aderat cum subsidijs, solatijsque omnibus , & omni prouidentiae suae cura : mandauitque omnia , & praescripsit , Quae statim, quaeue postea fieri deberent, vt innoxij illi, pij, solitarij, coeloque reseruati coetus , integra fama , integris animis , nec sine iusto quotidiano nutritu conseruarentur. Prouidit , atque effecit , vt subinde coempta, & comportata dierum aliquot cibaria haberent, qua scilicet coemptione, & prouisu censuerat, inter caetera, vitari colloquia inutilia cum multis , multorumque adeò introitus in Monasteria necessarios eosdem & semper anticipites.

Caetera,

Caetera, quae inferri, siue intromitti per conditorium versatile solerent, absque inuolucro, pannoue villo, stanneis, vitreis, aeneisque vasibus indita esse debere praecepit: ipsumque vas, ipsamue fiscellam, siue quid eiusmodi aliud, nequaquam recipi intra Monasterium, sed extracto, & recepto, quicquid illud tulissent, restitui protinus & extra claustra fieri oportere monebat. Sic & vasa canistros, fiscellas, ferculaue alia id genus è Monasterio, quae traderentur, aut non debere tradi per id tempus, aut si tradita semel, & in manus egressa forent, non recipi oportere, contrectariue amplius. Scrinia item & capsas & quicquid aliud in custodiam, fidemque Monasterij Virginumue singularum tradere vellent amici consanguineique, ac benemeriti etiam de tota domo, & de vniuerso Ordine homines, admitti intra septa vetuit.

Numeroque circumscripto ac definito feruentium, circumscripsit simul consuetas illas ad clathra colloctiones officiaque muliebrium epistolarum, bellariorumque missus, & alia eiusmodi semper quidem inania, & fere illicita, tunc verò etiam damnosa, & lethalia, ac nisi cohiberentur pestem illatura Monasterio.

Praefagit

PRAESAGIT DIVINITVS CARDINALIS FINEM
ADESSE PESTI ACCINGITVRQVE AD
RENOVANDA STVDIA CLERI
ET ARTES

PAROCHOS VRBANOS ad LX mortuos esse cùm renuntiatum Cardinali esset, illacrymatus cladi est: & superstites iam pauci, qui circa eum in solitaria illa domo erant, retulere, quemadmodum in ea consternatione & luctu vidissent cum D. Ambrosij effigie colloquentem ea contentione vultus & habitu oris, vt quærimonia quaedam intelligeretur mista precibus ad antiquum illum Pontificem Urbis, ne Clerum Ecclesiamq; suam funditus interire sineret. Et rursus, notauere ab eo colloquio digredientem auertentemque sese exhilarata fronte in eum modum, quasi responsa quaedam propitia & amabilia accepisset: Finem adesse pesti: exoratumque Numen annuere, vt Ambrosiana res salua incolumisque foret.

Laxari deinde quotidie paulisper Cardinali animus: simul & paulatim decrescere malum. Atque, ineunte Septembri, magis magisque confirmatus, ipso natali Deiparae Virginis die, nihil intermisso eo solenni, cùm de more concionaretur, non dubitauit fausta & laeta
& salu-

& salubria omnia polliceri ac denunciare Populo : ipsaque deinde secuta est salus . Reddita salute Vrbi , nimboque dissipato , quicuncta obtenebrarat , emicuit simul ille studiorum artiumque vindex animus , quem tempestas adeò foeda obductum hætenus alienatumque tenuerat .

Tunc institit renouare Seminaria iuuenum , proponere præmia , conquirere Magistros , doctoresque litterarum , & quicquid aliud ad nutrienda ingenia opportunum foret . Pictores , atque Sculptores eximij , quoniam extincti etiam ipsi incendio , cladeque tanta fere abstulerant secum artis vtriusq; gloriam , & disciplinam , quae socia , & aemulatrix , solatiumque litterarum semper fuerat propria Urbis huius : eas artes vnà cum artibus , scientijsq; maioribus instaurare , ac reducere in Urbem vehementissimè concupiuit intenditq; . Generis vtriusque scholas in Bibliotheca , Collegioque Ambrosiano reuocauit : & illustrium artificum opera , quae per vacuas domos deserta , & neglecta iacebant , iusto pretio coempta transtulit in id Musaeum . Non alia gratiora studia , & mediramenta Cardinaliterant quamdiu postea in terris fuit , sicuti fusius , atq; copiosius in eius vita exposuisse me arbitror .

Dicta et Sententiae Cardinalis
de peste

CVM haec omnia, sicuti vidi, atq; accepi scripsssem, porròq; pergerem indagare, & colligere vndique plura, quò plenior memoria rerum harum actionumque Cardinalis ad posteros, in exemplum, disciplinamque perueniret: nactus sum ipsius quoq; breuiaria quaedam, in quae suo more contulerat, quicquid foecunda illa, & semper ad philosophandum intenta mens, etiam è tantis Patriae calamitatibus elicere salutaris & pulcri amoeniq; potuisset. Non fraudabo, neque ipsum hac quoque gloriae parte, neque ingenia & vitam, vtilitatis & elegantiae fructu: placetq; transferre in monumenta haec nostra, pulcherrima & tristissima multa, quae spectator exitij Pontifex, de funesto illo tempore, tum notata reliquit, tum verò etiam in familiari sermone dicere ac narrare consueuerat. Quomodo dicta memorabilia Socratis, eiusque sapientiae altitudinem scriptores alij custodierunt: ita nobis etiam hae commentationes, & dicta Federici de peste custodientur.

Primùm omnium, ille cladem Urbis Mediolani hanc antiquis Hierosolymae cladibus, quadam

quadam iudicij clementiaeque diuinae similitudine aequabat, repetendo ex Machabaeorum libris memoriam temporis eius, cum Rex Antiochus irae Numinis minister cuncta ruinis illic excidioq; dedisset. Iras eas fuisse misericordiae, benignitatisq; coelestis: neque diuinitus aliud quaesitum, quàm vt Populus ille modestior fieret: sic, & Populo Mediolanensi accidisse. Dixerat Cardinalis, scriperatq; hoc, simulque adnectebat: intuentem opera se se pietatemque Ciuitatis, numquam adèd graua exempla coelestium irarum in eam fuisse expectaturum. Sed arcana diuina exquirere, siue interpretari homini illicitum. Quae sublimi ore effata vox, & solatij semper, & testimonij loco esse Metropoli debebit.

Exsequendo inde caetera Cardinalis idem, suam de pestilentiae origine sententiam exposnebat altitudine sapientiae, quae, mixta ex litterarum, & rerum omnium vsu ei adfuit. Et diuinitus repentè ita immissam, & profectam ab humanis quoque causis, & datam simul vtrinque tabem potuisse esse aiebat. Testeq; & authore vsus Homero eodem, quo grauissimi philosophorum, & sanctissimi Patrum vtuntur, demonstrabat, vibrantem pestilentiae tela Phoebum haud temere à Vate fuisse in-
ductum.

ductum. Ita, Numinis vim, ad coercendos hoc
etiam telo mortales esse ab illo declaratam :
sed, & rerum argumentis intelligi volebat :
nostram hanc pestem opus fuisse diuinum.

Argumenta ex eo, quod exercitus ille cohortesque Germanorum, quae pestem intulere, Viroi, intactae fere peste mansissent : quodq; Catholicus exercitus in Subalpinis ad Casalem acciperet hinc quotidie cibaria, pestilentia grassante, à nostris, neque commercio tamen eo pollueretur, haud occulta vi diuina, cui sic placitum : loca quidem alia, & homines alios hoc purgari pestilentiae remedio : alibi vero differri remedium id, & mala potius alia referuari iisdem, quos clades ista leuissime attigisset. Etiam intra septa Lazareti, nocte ea, quae propter eluuiem aquarum suprema inclusis esse potuerat, non esse violentia tempestatis absumptos, quos tamen pestis absumpserit postea fere omnes. Ita nempe destinatum, vt non solum perirent hi mortales, sed etiam, vt peste perirent.

Hanc diuinitus pesti causam, atque initia è Coelo haec fuisse differebat. Caetera humanitus in hunc modum haud sanè multum abhorrentia illis, quae, & à nobis perscripta sunt. Orta est (aiebat) ex fame pestis: famem
steri-

„ sterilitas agrorum , sed & iniuriæ militares
 „ dedere , violentiaque gentium externarum il-
 „ lata terrae huic . Namque Longobardorum
 „ genus , delicatum idem , & forte est : forti-
 „ tudo indomitos ad bella , laboresque fecit ,
 „ quemadmodum historiae testantur . Sed rur-
 „ sus superbia , fastidioque , & mollitie ingenio-
 „ rum , incommoda , quibus etiam contumeliae
 „ adiunctae sint , adspernantur , pessimèque ode-
 „ runt . Inde malorum acrior sensus , despera-
 „ tioque , & taedium , & facilius recepta per
 „ impatientiam tabes . Haec de origine mali
 „ sententia Cardinalis fuit , quatenus immissum
 „ effediunitus potuit , quatenusue etiam ad cau-
 „ sas , & principia humana referri id posset .

Principum Regumue externorum artificia
 & dolos , atque conspirationes capiendae ita
 per vastationem Urbis , nullas fuisse censuit .
 De venenato ad spargendam pestem vnctu ,
virulentisque mixturis , atque veneficijs , fue-
 rintne aliqua , an finxerit verè talia vanitas ,
 timorque hominum , haud desinebat : eiusq;
 rei sententiam in suspenso reliquit . Huc ta-
 men inclinare visus est , vt famae assentiretur
 circa id quod dictum , creditumque est , tam-
 quam perditici , & insani nonnulli , meditatione ,
 & spe rapinarum id vngendi scelus excogita-
 uissent :

uissent : horumque vecordiam amentiae nonnullarum artium aequiparabat . Quid non sperare Alchimistas, Astrologosue comminisci? Sic, & vnctores fortasse despondisse sibi praedam ingentem, mutationemque fortunae, si exhaustae familiae, deletae domus forent . Verum, incerta haec, & in sinu nondum exploratae veritatis abdita . Caeterum, manifestum certumque illud : prouidentia, altoq; consilio Numinis illatam Vrbi pestem adoleuisse mortalium scelere, vt mortales ipsi coercerentur, fierentque meliores .

Quod autem circumacto per tot clades pestilentiae tempore, plus licentiae plusque libidinum apud pauperes iuxta & diuites cerneretur, quam quantum ante pestem fuerat : rationem peruersitatis, corruptelaeque huius variam atque multiplicem esse potuisse : in primisque illam . Insolescere, efferrique homines post pestilentiae tempora, gaudio immodico, & inepto, tamquam de morte triumpharint, fuerintque ipsi in communi calamitate, singulari suo fato, & sorte felices . Velut, qui cibo potuque caruerunt, vbi data potestas, explentur, ingurgitanturq; affatim : sic istos, in genus omne voluptatum, quibus se putant fraudatos fuisse, demergi : rapere .
vicia

vitia cuncta audivis, debaccharique & lasciuire exultim. Haec sicuti haecenus exposita sunt, scripta reperi à Cardinale in aduersarijs, quae raptim ipse conficiebat.

Caetera ibi erant eadem cura collecta, & notata sapienter: de artibus profeminandae pestis, & origine artium earum: de monstris: de horribili facie pestilentiae: de poenitentia Ciuium, & frequentatione mysteriorum: de ministris: de remedijs inanibus ad pestem. evitandam vulgo adhibitis: de remedijs quoque salutaribus, quae ad resouendam ex tanta clade Ciuitatem, artesque restituendas adhiberi possent: & alia huiusmodi, quae, ex commentarijs nunc repetita iisdem, tanto plus authoritatis habent, quanto plus dignitatis, & sanctimoniae Authori fuit: ad quem cuncta subinde referebantur, & cuncta ipse prudentissime considerabat.

In capite de pestiferis artibus, ita scribit.

„ Mendacio veritas, & falsa veris, facile, libenter-
 „ que miscentur. Sic & de peste manufacta, ple-
 „ raque dicta sunt, quae, tum facile credas, tum
 „ promptè refutaueris: nosq;, sicuti admittimus.
 „ nonnulla eorum: ita fidem alijs abrogari posse
 „ censemus. Illud pro certo affirmare non dubi-
 „ tem, fuisse multos, qui, velut aasolui se se ne-
gligentiae:

„ gligentiae crimine existimarent, si pestem,
 „ quam contactu, vel halitu contraxerant, vn-
 „ gentium dolo impositam sibi fuisse diuulgarent.
 „ Vngendiq; artes, verè an falsò hae ferebantur.
 „ Vagari per Urbem, & circumire nonnullos:
 „ chartasque circumferre venenatas, quae per
 „ supplicum libellorum speciem oblatae incau-
 „ tis, contaminarent perimerentq; accipientes.
 „ Telluri, frugibus, edulijs, nummulis etiam, qui
 „ diuiderentur in pauperes, adspersa seu indita
 „ haec alimenta pestis: pessulos obijcelq; por-
 „ tatum, & vasa ipsa aquae lustralis omnia de-
 „ mun, quae contingere manu vnctores possent;
 „ polluta venenis, tabeque eadem. Altiora
 „ perticis folliibusque petita: & tantam hanc
 „ fuisse rabiem, conspirationemque vngendi,
 „ vt coniuratorum, seu emissariorum vnus pe-
 „ tierit admitti in Monasterium: atq; admissus
 „ intulerit sub larua sanctimoniae pestem, gre-
 „ galesque miseros inunxerit ibi ad vnum omnes
 „ non prius detecta fraude, quàm, & periire
 „ fere cuncti.

„ Haec, & alia, quae multum fuerunt in ore
 „ famae, neque credimus, inquit, omnia Car-
 „ dinalis, neq; temere vulgata fuisse censemus.
 „ Caeterùm, de eo vngentium furore ita scri-
 „ bere pergit hisce fere verbis. Intra Lazaretum

vnctor

„ vnctor vnus publicè confessus est, initum sibi
 „ cum Daemone foedus : monstrauitque locum
 „ quò arculas, & vasa referta venenis abdidisset,
 „ ac deinde statim ab ea confessione, & indicio
 „ efflauit animam. Is antequam expiraret, sti-
 „ mulante desperatione, ac rabie, ferrum, in-
 „ remedia quaesuerat: quo subtracto, siue ne-
 „ gato, tentauit, si acie nummi fauces incidere
 „ sibi posset. Mulier vna confessa vltro flagi-
 „ tium, filiam edidit participem sibi & ministram.
 „ Comprehensa statim, & cum vasculis, caete-
 „ roque vngendi instrumento reperta est. Ra-
 „ piebatur, quidam eiusdem flagitij manifestus
 „ ad supplicium, carroque impositus, effusa ad
 „ spectaculum multitudine eadenti per totum
 „ iter ferro subinde à carnifice, brachia, lacer-
 „ tosque nudus perfringebatur, prout supplicij
 „ forma dicta, & irrogata erat. Monstrauit hic
 „ è spectatoribus vnum, dixitq; satellitio: com-
 „ prehenderent: reum esse culpae eiusdem: seq;
 „ hoc socio, & ministro sparsisse venena, tabe-
 „ fecisse quamplurimos.

Tales, & alij casus à Cardinale collecti,
 memoratique sunt, è quibus pauca haec, ceu
 specimen, atque exemplum insaniae artificum
 illorum relata sunt: sed quia quaestio haec,
 uti expositum antea est, multiplici torfit am-
 bage

bage dubitantes, fuerintne venena haec, & aliqua vngendi ars, an vanus absque re vlla timor, qualia saepe in extremis malis deliramenta animos occupare consueuerunt: pro sententia, & quaestionis fine ponam Cardinalis ipsius quoque de ea re dubitationem, repetendo quae in partem vtramque disse- ruerit.

„ Aiebat namq; ita. Constat: non vnicam,
 „ neque primam hanc esse pestem, quae frau-
 „ de, flagitioque mortalium conflata dicatur.
 „ Nam extra Italiam, & intra, furores eiusmodi
 „ non semel extitere, liberq; de peste manufacta
 „ extat, haud dubium argumentum, aliàs quoq;
 „ saeuisse mortales in vitam, salutemque commu-
 „ nem, & tela diuina sceleratis inuentis quo-
 „ dammodo esse imitatos, scelusque processisse.
 „ Neque enim res eiusmodi est, quae fieri
 „ quidem possit, sed difficultates habeat pluri-
 „ mas, atque incredibiles, sicuti de Alchimista-
 „ rum arte fertur, quae metalla sanè excoquere
 „ in naturas, coloresque alienos audet, verùm *Alchimistarum*
 „ arduo inexplicabilique fere conatu laborat *uenefica.*
 „ circa id ipsum, consumiturque, & senescit.
 „ Altera haec, vbi virulenta tantummodo inue-
 „ nerit medicamenta, quae nimium etiam faci-
 „ lia inuentu sunt, contenta scelere suo, & in-
 „ strumento

„ strumento hoc, sine magna mole peragit rem,
 „ expediteque grassatur. Accedit ad perdita
 „ mortalium ingenia, maiestatemque naturae
 „ passim etiam venena exhibentis, natura quoq;
 „ & potentia Daemonum semper inimica homi-
 „ num generi, stimulatix, & ministra, imò, &
 „ magistra flagitio, per quod mortales in mu-
 „ tua perniciem implicantur, praedaq; gratissi-
 „ ma corporum simul, & animarum paratur hosti.
 „ Confirmant ista famam, quae de vnguētis,
 „ & venenis increbuit. At in diuersum illa suc-
 „ currunt. Non potuere priuatis sumptibus
 „ haec portenta patrari. Regum, Principumue
 „ nullus, opes, authoritatemque commodauit.
 „ Ne caput quidem, authorue quispiam vncto-
 „ rum istorum, furiarumque reperitur. Et haud
 „ parua coniectura vanitatis est, quòd sua spon-
 „ te euanuit scelus duraturum haud dubie usq;
 „ in extrema, si vi aliqua, consilioque certo ni-
 „ teretur. Media inter haec sententia, me-
 „ diumque inter ambages dubiae historiae iter:
 „ homines militares, violentos eosdem, & la-
 „ sciuiæ affuetos, partim quidem externos,
 „ partim verò è nostris, posteaquam conditionem
 „ temporum, stipendij angustias, duritiam labo-
 „ ris, famemq; pertaesi fuere, coepisse agitare
 „ inter se, & moliri, quatenam suis malis, cala-
 „ mitatibusq;

„ mitatibusq; finis foret. Adiuuante Daemone,
 „ facesque admovente irritatis ita animis, ar-
 „ tem vngendi excogitauisse hanc, cuius for-
 „ tasse etiam elementa, & rudimenta artis è
 „ locis attulerant ijsdem, vnde, & pestilentia
 „ ipsa gradum huc fecisset.

„ Neque nouum hoc, vt calamitatibus, in-
 „ commodisque fugiendis, scelerati homines, ad
 „ scelera ipsa confugiant: sed omni semper aeuo
 „ tales aliqui extiterunt, quos, & fortunae,
 „ animorumque similitudo confociauit, sicuti
 „ praesertim de Catilinae, coniuratis Romana
 „ monumenta prodiderunt. Deterrimos autem,
 „ siue teterrimos omnium mortalium hos fuisse
 „ vnctores, vel ex fine eorum, ac genere mor-
 „ tis in articulo extremo apparebat. Nam my-
 „ steria, vt plurimum, & inuitamenta salutis
 „ aeternae adspersati, iuxta laqueum ipsum tor-
 „ ui contumacesque manebant, & post multos
 „ irritos conatus, atque hortamenta adhibita
 „ nequicquam velut capita addicta Orco stran-
 „ gulabantur.

„ Vnus eorum in ipso flagitio vngendi de-
 „ prehensus, & captus, cum puniendus illico,
 „ strangulandusque duceretur, conspecto carro,
 „ quo misti cadaueribus Monati vehebantur,
 „ capto impetu, proripuit se se ducentibus,
 „ transi-

„ transilijtque in mediam illam mortualem pe-
 „ stilentemque turbam velut tutissimo perfugio
 „ inter bubones & saniem, sanieque diffluen-
 „ tes, quàm manum porrigere nemo ausurus esset.
 „ Petitus vndique telis & saxis, multa illic vul-
 „ nera accepit, estque carro eodem euectus ad
 fossam. Haecenus prudentia, sententijsque
 Cardinalis, sed aliquantò subtilius more
 philosophantis tractata quaestio est de vene-
 nis, & vnguentis ad faciendam, alendam,
 proseminandamque pestem, vt inter aegra sic
 aut mortua corpora, vnctores, rapiendi, agen-
 dique, & ferendi cuncta locum haberent.
 Morientium verò casus, & spectacubula abo-
 minanda, miseranda narrauit, posuitq; haec.

adolescentulæ
 moriendus.

Adolescentula nobilis fuit: cui adeò intum-
 muerat lingua intra fauces, obstruxeratque
 septa dentium, vt per octo dies cibi nihil su-
 mere posset. Secto dein vlcere, indita in os
 fistula, vitales succos parentes instillare coe-
 perunt, quibus recreata paulisper, recrude-
 scente aliquanto post morbo, periit. Mona-
 chorum vni par linguae tumor, cibum, vi-
 tamq; abstulit, ita, vt per decem dierum spatium
 exserta duorum digitorum longitudine lingua,
 in summis doloribus, foediorè tamen specta-
 culo, quàm tormento moreretur. Mulier intra

er casus.

Laza-

Lazaretum per quinque dies nusquam teneri potuit, quin perpetua cursitatione emetiretur omne id spatium, iretque viam, & rediret, vi scilicet morbi acta in furorem.

Conscindebat sibi vestem nudabatq; corpus, & vincula iniecta rumpebat, qualia spectacula pestilentiae Atheniensium, insanosque nuditatis illic etiam amores refert scriptor, per quem clades ea nobilitata est. Ex eadem Lazareti turba quidam alienato stomacho à cibis, octiduo toto planè ieiunus, & sine voce velut elinguis pro mortuo habebatur. Non die vadit ad stabula Monatorum, arreptoque illic indomito equo nocturnus, ad auroram usque nusquam intermisso cursu, per prata fatigavit adeo bestiam, ut dirupta concideret, ipseque cursor vnà exanimaretur. Fuit, qui corroso, & ambeso utroque crure viuis relinqueretur: Fuit, qui lacerato stomacho praecordia horrendo hiatu palpitantia & aperta praeberet.

Deiectus è mentis potestate Monachus iuuenis agitante pestilentia hominem, eiecerat è claustris se se: vagabatur dictitans ipsum esse Pontificem: pedum oscula poscebat, quae quia dabat nemo: moestus abstinentiam cibi coniunxerat, decreueratque mori. Remedio
fuit

fuit obsequij simulatio : atque adoratus pro Pontifice à nonnullis in speciem , annuit ut sibi alimenta porrigerentur , morbumq; & insaniam depulit. Insania nihilominus ridenda simul , & miseranda fuit alterius , qui stagno demersus ad fauces usque pertingente aqua per triduum expers cibi cantitabat , id sibi tutissimum esse perfugium aduersus satellites : erepta sibi furto decem millia nummum aureorum , quod à Caesare donum accepisset.

Estque hoc etiam Atheniensis illius pestilentiae penè germanum , quod ibi quoque morituri, puteos, aquasque sectabantur, sicuti Thucidides refert. Iam foedum illud inprimis , dirumque visu erat, quod sanie , sanguinemque fundentes naribus , aut ore aegri, vel integri , validique concidebant illicò , & expirabant. Excussit capitis dolor nonnullis oculos : & ridentes alij , nesciosque pestis se se dictitandæ efflabant animam : deiecere se se praecipites alij , è fenestris : & fuere , qui concurrerent inter se fustibus usq; ad necem : hiq; concisi verberibus simul , & absumpti peste, procubuere loco eodem , ubi concurrerant , atq; dimicarant ita per furorem.

Grauidae abortiuos foetus excludebant .
Tempestiui editi partus delegabantur alendi
capris,

capris, quæ ipsæ in maternam hanc vicem paratae per Lazareti prata errabant, praebebantque mammas materno etiam sensu. Adnotatumque est pecudum earum vnam, adeo adamasse infantem, qui semel admotus forte erat ut nullum alium ad vbera admittere vellet. Hunc ipsum amores deliciasque Capellae, cum experimenti causa occultassent, quibus ea curiositas fuit, impatiens desiderij bestiola, & balatu, & fastidio pabuli dolorem testabatur, ac reddi sibi alumnum, quodammodo poscebat, itaut intelligeretur. Mox prolato infante, motus inconditos edebat, argumenta laetitiae gestientis.

Et miseriarum quidem humanarum vltima exempla haec: illud verò clementiae diuinæ singulare planè munus fuit, quòd in tanta colluione rerum, tantisque miserijs sceleratissimi quidam, qui per viginti annos nunquam peccata ritè confessi fuerant, ac si quando Ecclesiae legibus id mysterium obire coacti fuissent, fraude doloque impio polluerant sacra, seque ipsos: hi ipsi intra Lazaretum tacti coelesti repente spiritu contumaciam exuerant, reliquerantque morientes eam de se opinionem, quasi rectà in Coelum iuissent. Fautque nonnullis adeo Coelum, ut in excessu,

*Capella aluit
fancem miserijs
periculos amore*

cessu, articuloque ultimo vitae mirifica visa viderint, superum nempe species, ac Deiparae praesertim faciem, quam, & monstrauere circumstantibus: hique de ea re testimonia perhibuerunt. Haec dicta Cardinalis erant.

De Corpore Diui Caroli efferendo, supplicationeque ea in principio fere pestilentiae inualescentis cum ageretur, numquam placuerat ei hoc: credideratque, negotium valde esse anceps ob causas sanè alias etiam, & quaedam arcana suspicionum suarum circa eam rem: ne scilicet, stolidissimi mortalium & mulierculae simplices, externa specie aestimare assuetae res quoque diuinas, expectarent depingerentque sibi maius praesentiusue quiddam eo quod visurae essent, quodque nihil ad merita beatitudinemque Sanctorum attinet, ut Corpora nimirum etiam illa, quae includere coelestes animas communi forte mortalitatis relinquuntur absumenda tibi, quae sequitur huius vitae finem.

Sed timuerat praecipue videratque id quod accidit: si vnguenta scelerata & victores in Vrbe essent, opportunam sceleri fore supplicationem, ac posse in tanta frequentia & concursu, quantum ea habitura esset, & vngere com modius, & occultari impuras illas inhumanaeque;

manasque manus . Si non essent : certum & inevitabile utique fore illud , quod etiam sine frequentia & concursu quotidie fieret inter singulos . Congregata agmina per vias populumque corporibus & spiritu consociatum & connexos inuicem inter se ciues, haerentia viris etiam corpora vestesque feminarum fore pro vinctibus & vnguentis , certiusque adeò malum .

Abnuerat ideo Cardinalis dissuaseratque etiam ne depromeretur Diui Caroli Corpus, neque supplicatio haberetur illa non omnes modò domos Urbis , sed rura simul pagosque adductura in vnum agmen . Sed ubi acrius instabant : tunc adiuncta ad Ciuitatis & publici Consilij authoritatem atque magnificentiam Ecclesiastica quoque maiestate & splendore , enixè incubuit , ut aequaret pompa , si minus magnitudinem Diui reliquiarumque eius : at certè Cleri Ciuiumque pietatem .

In singulas supplicationis habendae stationes, quae preces & flebilia carmina recitanda essent , ad exposcendam opem, clementiamque Diuinam, praescripsit ipse, atque edidit, prout in paruum volumen collata ista omnia extant . Et quia populi votis , ac publica quadam inter aerumnas gratulatione exposcebatur , ut
ipsum

ipsum Diui Caroli Corpus, non recondere-
 statim habita supplicatione, sed adorandum
 affatim, contemplandumque relinqueretur:
 simul datum hoc desiderijs, & pietati

Ciuitatis, populique totius vti de-
 monstraui: simul composita à

Cardinale est, editaq; di-
 sciplina adorationis
 eius, vt ad-
 sisterent

in

sanctissimi Cadaueris conspectum
 eo animorum habitu omnes

quem verè habitum ef-
 ficere Pastor ille

diuinus, &

forma-

re

voluisset tunc cum inclusa

coelestis Anima cor-

pore eodem

tenere-

tur.

IOSEPHI RIPAMONTII

DE PESTILENTIA QVAE

MEDIOLANI FVIT

ANNO CIO DC XXX

L I B. IV.

H AETENVS ego in haec tristia
 monumenta contuli coelestium
 irarum vltima exempla : pestem
 causasque pestis ipso malo
 grauiores : corrupta in tabem
 instrumenta & gaudia vitae ,
 spiritum nempe hunc , halitusque mutuos :
 versum in funera populum , ac penè sepultam
 frequentiam nomenq; Urbis. Veneficia quo-
 que , & venena , & venenorum officinas , &
 potentia vique Daemonum instructos ad ea
 coquenda , & dispensanda mortales : siue vera
 ea fama fuit : siue iniecta falsa suspicio animis ,
 vt ad caetera mala tormentum etiam id , &
 aere , & inane accederet . Simul , aduersus
 haec inenitabilia mala , & ingruentem hanc è
 Coelo necessitatem excogitata remedia , &
 sicuti credere licet , haud ingratos irato Numi-
 ni ,

mini, salutis, ac veniae impetrandae causa conatus eorum, qui Numinis destinatione plectebantur, exposui.

Magni quoque Cardinalis & Archiepiscopi Federici sollicitudines & egregia facta, & vnus Viri animum spiritusq; mirificos, totius Reip. animis penè pares, ipsamq; Remp. & opibus, & pietate cum Pastore suo quasi Pastorem alterum in tanta Populi calamitate coniunctam repraesentauì sicuti potui, imò sicut res tulit. Quae omnia ita inter se vel connexa fuerunt, ordine, ac successione rerum, vel confusa propter temporis & rerum earundem importunitatem, vt per nos etiam tum continuari prout accidere debuerint, tum differri, ac separari, prout & continuata tractu narrationis, & dilata sunt atque collocata seorsim. Atq; ex tota triennij procella, quae fuit, dum ab occultis manifestisue causis pestilentia conflaretur: dum assurgeret incederetque sensim: dum ingrueret vi tota, & fauisset, repeti nonnulla alia altius, & congeri vndique velut in cumulum acerumue quendam commodius mihi nunc ad memoriam conspectumue rerum expeditiusque est.

Exponamque in primis publici Consilij Ciuitatisque Acta, & decreta, prout Secretarius Ecclesia,

Ecclesia, tum innocentia vitae, tum scribendi prudentia probatissimus Ordini consignata, & notata omnia reliquit. Ephemeridesque verè istae, veluti ars, & disciplina depellendae pestis in posterum esse poterunt. Omnia ibi perscripta consilia Procerum, responsa, decreta, mandata, litterae: summae quoque pecuniarum, & viae pecunijs in tali tempore inueniendis, & curationes, ac difficultates, ac diuisa ministeria inter Decuriones ipsos, & pleraque alia, quae tempus id tulit.

Anno cio dcc xxviii Ad v Nonas Octobris à Tribunali Sanitatis, ad Tribunal Prouisionum litterae missae sunt huiusmodi scriptum habentes. Propterea quod pestilentia, per Galliam, Flandriamque, & Germaniam quotidie magis inualesceret, iamque apud Bernam, & Luceriam Vrbes, & in Valesanorum quoque terris, ac nouissime ad Posclauium, & alia Rhaetorum loca finitima Vulturenis serpere, grassarique palam id malum coepisset: ob eam rem, communicato etiam cum Urbis Gubernatore consilio, statuisse Praesidem publicae valetudinis, non vltra cunctandum esse, quin, & Urbis Portae munirentur solitomore cancellis, & tesseræ instituerentur. Eius rei principium placere fieri ad xv Cal.

Cal. Nouembis. Proinde postulare, ac monere vti darentur opportuna mandata, & cuncta in tali discrimine prouideri, ac fieri solita prouiderentur, & fierent.

Responsum à Tribunali Prouisionum est, eius negotij impensas ad Regium aerarium pertinere, ac super ea re pendere litem. Caeterum tamen, & Vicarium, & XII Viros censere, vti referreretur ad publicum Consilium: statuerentque LX Decuriones, & decernerent arbitrato suo, sicuti semper antea factum, seruatumque esset.

Relatione facta LX Decuriones huiusmodi decretum fecere, Quod sine publici iuris detrimento, ac sine praeiudicio, fraudeue vlla iam institutae litis atque petitionis fieret: daretur Vicario facultas sumptuum, impensarumque faciendarum ad eam formam, quae prioris pestilentiae tempore seruata esset.

Anno CIO DCC XXIX ad XII Cal. Februarij ad impetrandam è coelo veniam, & pacem decreuere Decuriones, vti pro salute mortuorum ad omnia templa res diuina fieret. Ea quatuormillia Hostiarum fuere. Sumptus è publico datus est.

Ad III Nonas Maij Vicarius in publico Concilio ita verba fecit, vt diceret: confluentibus

tibus vndique in Urbem famelicis agricolis, compleri omnia illuue, & squalore: cerni strata humi corpora passim, & expirare per compita quotidie nonnullos: pestemque, etiam si non aliunde inferatur, posse ex colluuiione hac oriri: proinde rem fore dignam sapientia, & nobilitate, & pietate Decurionum, si curam, negotiumque suscepissent purgandi hac turba Urbem, & subsidia aliqua decernendi, ne tabescerent fame, qui iam essent in Vrbe pauperes, neue is numerus concursu etiam externorum augeretur.

Decuriones, ob eam rem misericordia simul, & periculo commoti mandauere illico, vt tria millia nummum aureorum depromerentur ex aerario in pauperum alimenta, assignarenturque. Simul, ad continendos in agris agricolas, iussere certum frumenti numerum ex publicis horreis distribui per municipia, & pagos, vendariq; pretio eodem, quo Ciuitas emisset.

Nonis Iunij ad prioris pecuniae summam, duo millia nummum aureorum adiecta sunt: eaque assignata in eisdem vsus, praeter summam aliam, quam singulae per Urbem Paroeciae, facta per domos ostiatim corrogatione contulerunt.

Idibus Decembris Vicarius in Consilio, retulit:

retulit : se cum Excellentissimo Gubernatore de praesenti rerum statu colloquutum : pleraque dicta inuicem . Summam , finemque in eo : quoniam pestis , famesque timeretur , debere comparari , cogique in horrea , feliginis , millij , panici , oryzaeque vim , quantameumq ; interrogati super ea re praefecti horreorum , emi posse responderent . Id necessariò faciendum esse , ne deessent alimenta plebi si quid tristius accidisset .

Pridie Iduum Decembris consulti praefecti rei frumentariae de ea emptione ita responderunt : posse emi feliginis tria millia modiorum : millij modios octingentos : mille modios oryzae : pretium in vniuersum fore , quadraginta quinque , siue quinquaginta millia nummum aureorum . Huius conficiendae pecuniae rationem proposuere praefecti , additamentum ad feliginis millijque vectigal : eamque sententiam probauere Decuriones .

Ad xviii Cal. Ianuarij Gubernator alias etiam inueniendae pecuniae vias proponi iussit : propositumque est nouum ad tritici , & olei vectigalia corollarium : nec non illata mentio de capitem , & ostiorum exactione instituenda .

Eo die in Consilio recitatae sunt litterae missae

missae à Praefide Sanitatis actumque de noua pecunia exquirenda ob publicas necessitates, quae multae simul instabant. Lazareto imprimis, tantaeque intra septa illa inclusae multitudini esse subueniendum. Pecuniae portionem, quae, facta in singulas prouinciae partes descriptione, Ciuitati conferenda in commune obtigisset, primo quoque tempore esse persoluendam: cunctando, & differendo, rem aggrauari, conditionemque fieri deteriorem. Etiam ii. Viros, quorum alter, ad Leucum, alter ad Nouocomum praesidere iussi essent, terere ibi tempus inutiliter, eamque legationem inutilem esse, scribere quotidie, ac denunciare ipsos, nisi purgationes, & quadraginta dierum experimenta accedant, quae sine magno sumptu peragi non possint. Haec monita Praefidis fuere.

Postulabatque idem ab Ordine vniuerso Decurionum, ut, quoniam multae, grauesque impensae extra ordinem faciendae essent, potestas fieret Tribunali Prouisionum exsequendi mandata, quae à Tribunali Sanitatis, ob publicam salutem subinde darentur. Res ad Conseruatores Patrimonij reiecta est, ut, quoniam veterem consuetudinem, & iura, partesque Ciuitatis ij optime nossent, caperent
inde

inde consilium, officioque satisfacerent.

Ad xv Cal. Ianuarij Regius Gubernurator, annuit, concessitque, ut tributum in capita exigeretur. Qua concessione facta, Conservatoribus datum negotium est, ut de ratione tributi eius ineunda inter se consultarent, moxque referrent. Praefecti horreorum etiam consultare iussi de frumenti coemptione ad eam summam, quae iam statuta & praefinita erat.

Ad xi Cal. Ianuarij coemptionis huius instituendae causa facultas data Praefectis est, ut quindecim millia nummum aureorum foenore sumerent.

Anno cio. ioc xxx Ianuario ineunte placitum, ut ad Casalem maiorem afflictum pestilentia locum, tantum Oryzae, oleique mitteretur, quantum mille nummis aureis emi posset.

Ad vij Cal. Aprilis, efflagitante Praeside Sanitatis novam pecuniae vim, quam ad prohibenda pestilentiae contagia necessariam esse diceret, quia non modica erat summa, quae postulabatur, relatum denuò est ad LX. Decuriones: hique, licet anno superiore Conservatoribus facultatem suppeditandi cuncta necessaria tribuissent: tamen ob novi impendij

dij grauitatem , nouum fecere decretum , & iam concessa firmauere , denuntiationibus vtendo solitis , ne Ciuitatis iura ob eam rem quicquam detrimenti paterentur . Porro ad haec humana consilia , diuinae quoque opis implorandae consilium accessit , ac pro Animarum salute , quae purgante igne torquerentur , decreta , sicut anno superiore , quatuor millia hostiarum : quae sacrificia totidem mille libris steteret . Dimidium summae eius ad Monasteria missum est , quâ maxime iuncta paupertati pietas , & religio emereret , celebrisque esset .

Ad III Nonas Aprilis , erogantur , Praefide Sanitatis efflagitante , quadringenti aurei nummi dispensandi in miseras , necessitatesq; pauperum . Exposuerat , namque Praeses , cerni per vias , & diuerticula Urbis spirantia cadauera adhuc : infici tetro odore aërem , spiritumque superfusum : oculos , animosque intuentium pauore confundi . Eo die agitatum de infelicibus hisce ad Hospitale Stellae , siue aliquò aliò deportandis , alendisque ibi : dictumque est : posse dimitti extra Urbem ex eo numero omnes , qui aliunde , quàm ex Ducatu huc ad mendicandum venisse reperirentur .

Ad III Idus Aprilis retulit Vicarius ad LX

Decu-

Decuriones : dictum esse sibi à Magno Cancellario , & Gubernatoris quoque nomine significatum : oportere subsidia adhuc maiora parari , vt stipes , & eleemosinae per Urbem largius aliquantò diuiderentur. Namq; mercatores opera facienda dare solitos , quorum mercede plebes alitur , id emolumentum subtrahere coepisse , magisque subtracturos , quò latius manaret , cresceretque pestilentiae terror. Ita, periculum esse ne cessante quaestu , per otium , & egestatem , ad flagitia plerique verterentur. Praesidem quoque Senatus , suo , & Ordinis nomine monere id ipsum. Haec à Vicario dicta , & exposita publico Concilio. Protulit etiam , recitauitque litteras sibi missas à Praeside Sanitatis huic denuntiationi & querimoniae congruentes.

Inerant dicta , & sententiae graues. Quàm numerosa multitudo haec : quàm assueta commodis etiam inter labores , & vitae voluptatibus : quàm porrò periculosum , & exitiabile Reip. si strenua simul haec , & lasciua plebes , à delicijs , & luxu , ad famem desperationemq; redigeretur . Scripserat ad Vicarium talia Praeses , & in epistolae fine penè desperata verba quaedam huiusmodi posuerat . Adest calamitas , exitiumque certissimum : nec de
pestilentia

„ pestilentia dubitari potest, quin praesens ca-
 „ pitalisque sit . Periere Monati nuper . Heri
 „ Chirurgus . Hodie Lazareti ianitor, & me-
 „ dicus Aplanus incidere in morbum . Pater
 „ Felix etiam grauissime laborat . Nos verò in-
 „ ter tanta deprehensi pericula, & minas, nisi
 „ subsidia aliqua certa videmus, queis tueri, ac
 „ sustentare in tanta calamitate pauperes nos-
 „ trae commissos fidei possimus, vix sperare
 „ audemus in suscepto diutius munere perseue-
 „ raturus, facileque abijciemus hastas . Decu-
 riones hac denuntiatione perculsi decreuere,
 vt è suo numero sex eligerentur, qui ad Patri-
 monij Conseruatores additi summam habe-
 rent rerum omnium potestatem, remque pe-
 cuniariam arbitrato suo dispensarent cum hac
 exceptione tamen, vt quandocumque summa
 grauior eroganda foret, referrent de ea re ad
 Consilium .

Scripsit. Gubernator ad LX. Decuriones :
 pergerent strenuè parare subsidia quae tem-
 pus posceret, ne vltima expectarent, quo
 scilicet tempore ita accidere posset, vt obsessi
 tamquam, & inclusi nulla tantae Urbis Po-
 pulo suppeditare alimenta possent . Populus-
 que tantus inter duo extrema mala, pestem,
 & famem absumeretur .

Etiam

Etiam sine monitis , hortamentisque istis ,
fatis curarum, satisque sollicitudinis erat Tri-
bunali Prouisionum, & Consilio publico: sed
nihil amplius fieri potuit, quàm, vt faculta-
tes iam datae renouarentur.

Cal. Iunij renouatae sunt , non cum eo
tantùm , vt fideiubere Selecti possent , sed
etiam, vt oppignerandi, atq; alienandi quae-
cunque Ciuitatis vectigalia ius esset. Item,
ob Gubernatoris, & Senatus, & Magni Can-
cellarij obtestationes , super conferenda por-
tione pecuniae , quae purgationum toto Du-
catu faciendarum causa Ciuitati obtigerat,
accepta conditio augendorum frumenti &
olei vectigalium, quantum, & quamdiu opus
foret. Interea dies aderat , quo die, purgan-
dae vniuersae Ciuitatis initium, dirimendiq;
Ciues, à mutuo contactu , & intra sua quos-
que tecta secludendi, fieri oporteret, vt qua-
draginta dierum probatione, integri , morbo-
sique discernerentur.

Ob eam rem, postulabat, monebatq; Praeses
Senatus uti è procerum numero bini regio-
natim eligerentur, qui, vnà cum Senatoribus
in id ipsum electis, ad omnia , quae possent
accidere , excubarent . Erant in singulas
Vrbis Portas alij quoque nominandi , qui

Laza-

Lazaretis , tugurijsque cum summa potestate praesiderent.

Et nihil humanae diuinaeque opis omit-
tendo Decuriones, simul auxere Selectorum
numerum, quò facilius, conuentus ob res
necessarias haberi possent : simul decreuere,
vt omnia, quae tantummodo quatuor eorum
legitime, ac rite congregati statuissent, perin-
de rata essent, ac si conuenissent, assissentque
omnes. Cineralium ieiuniorum religionem
Romano ritu inchoandum esse censueuerant :
sed id votum, non sicuti caetera probauere
Paroeciae : ideoque omissum est.

Praeter tesseras, & cancellos iam circum-
data munimenta portis, & publicae securi-
tati, & praeter militares custodias, statio-
nesque nobilium virorum, quos suae Portae
praesse debere binos antea decretum erat :
architecti quoque circa Urbis moenia missi
sunt ad inspiciendum, si quà fortè, vel humi-
lior murus, vel ruinae aliquae ascensum,
transitumue clandestinum praebere possent
ijs, qui fallere custodias, & per fraudem in-
gredi vellent. Prout retulere vitia moenium,
labesque factas, nihil dilatum, quin refice-
rentur cuncta, probèque instaurarentur.

Crebrae super his, alijsque rebus litterae
mitte-

mittebantur à Tribunali Sanitatis , nunc , quae Praeses ille cum eo Consilio statuisset , exponentes : nunc vt à Tribunali Prouisionum alia statuerentur opportuna petentes . Exposuerant autem hae litterae inter caetera : censuisse id Tribunal , commodiores , facilioresq; fore custodias , si Portarum Urbis , Noua , & Vigentina , clausae obstructaeque tenerentur : idque ita fieri iussisse . Lazareti disciplinam constituisse ipso optimis legibus , & institutis , quae collata in paruum vnum , & salutare volumen propediem missuri essent ad duos è Patrimonij Conservatoribus , Hieronymum Legnanum , & Antonium Romanum , vt ad eam formam atque praescriptum administranda cuncta , & exsequenda curarent . Pertinere ad quietem , & statum , atque salutem afflictæ nunc quidem , sed aliquando incolumis futurae Ciuitatis , vt omnes Paroeciae describerentur .

Id Decuriones vti quamprimum , seduloq; fieret , operam dedere , electis tum è suo numero , tum è reliqua nobilitate viris idoneis , qui susciperent curam . Ad eos missae litterae sunt , quarum summa erat . Quantopere semper à Christo Salvatore commendati , pauperes essent : tam acceptum eidem fore laborem

laborem quicumq; horum causa susciperetur. Proinde accingerentur ad descriptionem huiusmodi pro sua quisque parte, ordine & rectè, & primo quoque tempore faciendam, quò promptius, Ciuitas, cognita singulorum, conditione, & statu, subuenire necessitatibus posset. Colloquerentur inter se delecti ad hoc munus, & consilia communicarent.

Dein profecti in rem praesentem, assumptis Parocho & Designatore, siue Antiano, singulas obirent suae quique Paroeciae domos, excitisque habitatoribus in suum conspectum benignè quemque interrogarent, masculos, foeminasque, & iuberent referri nomina in album cum aetate, & conditione cuiusque, & genere vitae, & quae quisque subsidia vitae habeat, quamue facitet artem, & si quae alia insuper cognoscenda & inquirenda putabunt. Si quid fortè difficultatis id negotium habebit, si quid noui inciderit, referant ad suae quique Portae Praefectos, quibus, & descriptionis ipsius codices, tabulasq;, statim ubi erit peracta tradere debent. Haec summa litterarum fuit, quarum exemplum acceperunt singuli, & munus iniunctum à Republica obiere.

Peraçto in hunc modum censu, litterae
aliae

aliae dimittuntur ad eosdem , qui obierant ad munus , tabulasque tradiderant . Rogabantur nunc , vt quotiescumque intelligerent , inter eos , qui inclusi domibus tenerentur , aliquos esse , miserè laborantes ob pauperiem , ac destitutos vitae alimentis , inspecto codice , qui nomina , & fortunam omnium contineret , ad pistrina destinata mandarent , indeque panis dimensa pro cuiusque egestate suppeditarentur diuidenda ostiatim per homines probos , quos ipsi elegerent .

Vtensilia , fulcra , tabulas , mensas , lintea , culcitras , lodices , aliaque id genus , quae aliquo pestilentiae contactu , siue suspitione nonnulla inquinata essent , cremari placuit , pretiumq; dominis à Ciuitate persolui quanti quaeque res aestimatae essent . Ei aestimationi faciendae , qui praesse deberent nominati fuerunt . Mox & alij nominantur , atque eliguntur per quos conquisitio fieret mendicorum externorum , scilicet , vt in duo diuersa loca coacti , & inspecti , prout ius , fasque erat ablegarentur , exonerareturque aliena illa multitudo Ciuitas . Ablegandis verò , & à Ciuitate segregandis in loca separata multis , qui è Ciuium numero subinde manifesti pestis , aut suspecti reperiiebantur , cum
à Prae-

à Praefide , & Tribunali Sanitatis destinaretur suburbium , cui à Trinitate cognomen est , id consilium Ciuitati minime placebat , Ac Praefidi respondere Decuriones : satius videri , si aedificarentur tuguria per agros , ibique morboſi collocarentur , quàm vt pollueretur , fieretque pestilentiae domicilium pars illa integra adhuc , & intacta malo : super ea re non modo diffidebat à Tribunali Tribunal : sed ne inter Decuriones quidem ipsos , aut inter curatores , custodesque Sanitatis satis constabat vtra potior sententia foret .

Dicebatur hinc : regionem eam , & vicina suburbia scatere aquis , & nequaquam insalubribus , & aptis ad lauacra , rem adeo necessariam Lazareto , sordibusque eluendis : esseque in vicino prioris pestilentiae sepulchra fossam ingentem . Contra stabant , incolumitas iam dicta loci , cui sic fieret iniuria , vicinitasque viarum , & frequentium , & ferentium è locis , vel ad loca felicia adhuc , & saluberrima , nesciaque pestis : frequentem insuper esse Vicum testis , & hortis , & ad nexa vinearum vbertate , quae pretium auget , vt non nisi magno pretio conduci posset ea Lazareto sedes .

Rursus,

Rursus, quod ad tuguria potius extruenda attineret, erat inter ambigendi causas, nomen, & fama Ciuitatis, quae tamen in eò misero rerum statu, commercij nonnullius causa, tuenda utcunque esset. Nam signa extrema perditarum rerum, & pestilentiae dominantis esse proiectum in mapalia populum. Et posse timeri, ne finitimae quoque, & subiectae Ciuitates hoc terrore consternatae reuerentiam exsuerent, tollerentque, & prohiberent commercia cum Metropoli, quo nobis irrogato exilio, plus miseriarum, maiora damna imminere, aggrauarique manifestè annonam. Sed ne palearum quidem esse satis ad domicilia populo ponenda haec. Et id, quod esset materiae straminisque huius, sordidum, humidumq; reperiri, ac si sol vrgeat, aestuare, & torreri corpora intus, nouamque imminere morborum luem. Si fierent ex tabulis asseribusque tuguria: longum id opus nimis, grauemque fore impensam, & custodiarum simul, ministrorumque numerum ita oportere augeri.

Reperiebantur infecti quotidie complures, neque Lazareti Gregoriani capacitas ultra sufficiebat, admittebatue ullos. Ideo vici Vigentini pars electa est, quā insulam efficit
Vicus.

Vicus. Electi, qui cum incolis agerent, uti vacua fieret ea pars. Alij, qui culcitras, lodes, ligna, saccos, & mille vestimenta emenda curarent.

Et huiusmodi rerum, & alendi populi voraces impensae cum obuersarentur animis, iamque praesens, & impatiens morae necessitas ipsa sumptuum, & erogandarum illico pecuniarum instaret, ad rem antea susceptam, atque tentatam, animum adiecere Decuriones, ut regij auxilij partem exposcerent, quod non modò tanti Regis clementiae erga fideles adeò subiectos, Maiestatique ipsius consentaneum, sed etiam iure debitum esse arbitrabantur.

Ad Governatorem Spinulam obsidentem, eo tempore Casalem Urbem, nova legatio missa est, quae exposceret Ciuitatis nomine id auxilium: communes misérias, & iura demum ipsa demonstraret. Legati Vicecomites duo, Io. Baptista Coriolani filius, & Eques Carolus ière: taliaque à publico Concilio Governatori dicere iussi erant.

Pestilentiae morbum, qui Urbem inuasisset, non remittere de vi sua, sed crescere in dies, terribilioremque fieri. Penè etiam ad extrema ventum esse. Nec dubitare Ciuitatem,
quin

quin ad caeteros sumptus, erogationemque pecuniarum intolerabilem, alendae propemodum vniuersae plebis onus accedere debeat, nisi tot millia fidelium Ciuium, tot capita innoxia infantes paruulosque pueros relinquere absumenda fami simul, & pesti velit. Sed ne dubitare quidem, quin onera, impensaeque istae pertinerent ad fastigium, Maiestatemque Regis. Extare exempla, quemadmodum veteres Mediolani Duces pestilentiae temporibus subierint haec onera semper, & oppressam malo Ciuitatem ita subleuarint. Carolumque Caesarem decreto etiam suo declarasse id ita esse faciendum.

Nec discordare legum auctoritatem, quae semper huiusmodi impensas, a Ciuitatis, & Populi miserijs, ad potentiam, opesque Principum inclinarint. Mediolani tamen hanc Regiae maiestatis, & munificentiae vicem, conatos esse sustinere Decuriones, vt fidelem Populum eidem Maiestati conseruarent. Nunc ad vltima ventum esse, remque desperatam agi, si vltra sustinere conentur. Aerarium, non solum exhaustum esse Ciuitatis, sed etiam in ventura tempora oppigneratum, obligatumque teneri. Tributa quae viritim, seu ostiatim imponantur facta esse vanum sine
vllius

vllius rei fructu nomen: neque exigi posse, propterea quod, qui pendere ea deberent, nudi iam ipsi, inanesque facti sunt: atque nobilitatem praecipue ipsam penè incultis, & desertis ob militum hospitia agris, sibi inopem, nihil habere quod in commune conferre possit.

Ptoinde supplicare statuisse Regio Gubernatori, & per eum, Maieitati Regis, vt tam afflictæ, tam fideli Ciuitati subsidia aliqua inueniantur. Nominatim autem postulare hoc, vt quicquid pecuniae Regio Fisco pendat Ciuitas, remittatur, donec leuata malis, & paulisper recreata erit. Hoc certe laxamentum datum fuisse Ciuitati etiam anno 1576 tunc cum neque pestilentia par, neque rerum aliarum angustiae tantæ essent, quantæ vrgeant nunc, porròque immineant.

Marchionem Aiamontis, qui Prouinciã eo tempore gubernabat, & scripsisse de statu Ciuitatis ad Regem, & de leuamento ac remissione rogatum annuisse: quorum vtrumq; & rogaretur nunc, & verò etiam à potestate, & benignitate pari speraretur.

Spinula legatos humanissime alloquutus, litteras eis ad Ciuitatem, hoc est ad Decuriones capita Ciuitatis, dedit scriptas in hanc senten-

sententiam . Maximo moerore se esse affectum , ob cladem , & mala Ciuitatis , quae Vicecomites duo, Carolus, & Ioannes Baptista , pari prudentia , & nobilitate Viri sibi exposuissent . Et augeri moerorem hoc ipso, quod bello impeditus interim publicis hisce malis interesse non possit omni sua ope subleuaturus benemeritam adedò Ciuitatem, si adesset , praesensque esset . Attamen, magnopere confidere se, & pro certo habere, nobilissimos viros, & rerum capita Decuriones, in eo positos gradu dignitatis, officio suo non defuturos, caeterisque etiam praebituros exemplum pietatis , quam erga Patriam explicare & exercere debeant .

Hoc illud esse tempus profundendi largè, atq; libenter ea, quae temporibus alijs retineri, & augeri ius fasque est . Ac licet difficile sit conferre sumptum curamque omnem in partem vnā illic vbi pleraque alia sollicitudinem eandem , impensasq; requirunt : posse tamen considerare ipsos, ac videre, quod necessitas ista pauperum praecipue alendorum, sustentandaeque plebis, praeuerti rebus alijs omnibus , anteponique debeat , ne egestas , & desperatio priuata ruinam , exitiumque publicum trahat . Se pro sua parte nulli rei, actionique

actionique defuturum, quam ad pericula haec auertenda pertinere posse existimet. Quicquid à Tribunali Prouisionum, siue à Tribunali Sanitatis in rem fore iudicatum erit, in eo daturum operam, vt intelligant, non deesse sibi studium erga Metropolim, voluntatemq; optimam: & ea quae legati petierint, accuratè consultaturum, quomodo fieri possint.

Longinqua nimium, & lenta subsidia fore haec apparebat, haëenusque verborum tantummodo officia erant. Res autem ipsae dilationem nullo modo patiebantur. Ideo in Concilio magnopere erectis ob difficultatem exequendi animis agitatum, qua ratione, & via, quibusue pecuniarum aceruis protinus haec omnia expedirentur, quae particulatim agitata aliàs, nunc cuncta simul vnà cum morbi incrementis ingruerant. Tribunalque Sanitatis suo iure efflagitabat quadraginta millia nummùm aureorum, quo subsidio Tribunal id agere agenda, & prouidenda prouidere posset.

Alia separatim aureorum millia sex decreta fuere persoluenso rerum pretio dominis, quorum domestica instrumenta cremarentur, ne quid vsquam infecti siue contaminati reliquum fieret.

Ad

Ad xvj Cal. Maias congregati LX Decuriones nominatim facultatem dedere selectis istis, vti praedes ipsi fierent, atque fideiuberent nomine Ciuitatis apud eos, qui professi erant daturos se Ciuitati mutuò vigintiquinq; millia nummum aureorum, quem pecuniae numerum Praeses Sanitatis necessarium esse dixerat, ad purganda per Ducatum vniuersum, corpora, loca, vtenfilia, domos omnes, quacumque pestis aliqua suspicio parua fuisset.

Actum de mittenda legatione ad Gubernatorem Spinulam, qui Casalem eo tempore obsidebat summa legationis: deploratio miseriarum, necessitatumque Ciuitatis: item deprecatio onerum, atque tributorum, quae onera, & tributa Gubernatores alij in tali tempore condonare ac remittere consueuerunt. Legati, qui mitterentur, permissum eius rei iudicium ijsdem, qui, & pecuniae publicae, dispensatores, arbitriq; facti erant ad omnes pestilentiae impensas.

Actum eo die de religionibus etiam votisque nuncupandis, vt quoniam fluxa incerta, vana essent omnia, quae consilij, & ope humana prouiderentur, certum illud efficacissimumq; auxilium, peteretur è Coelo, quod & saeculo

saeculo superiore salutem perditis rebus sub D. Carolo attulisset.

Negocium dedere selectis, ut consultarent, referrentque ipsi, quae vota, quae Religiones institui nuncupari oporteret. Ex eorum sententia, & responso decretum in haec verba factum est.

Diem Visitationi Beatissimae Virginis sacrum Populus Mediolanensis ad triennium proximum inuiolabili lege festum, religiosumque habebit. Eius diei peruigilium seruabit. Triennio elapso libera, & soluta religio haec vniuscuiusque pietati relinquetur, neque ultra tenebitur populus hac votiua lege.

Eo Visitationis die quotannis in perpetuum ad Deiparae Aedem, quae iuxta Diui Celsi templum est dona portabuntur à Tribunali Prouisionum, procedentque opifices cum insignibus suis sicuti moris est. Solenni ritu res diuina fiet, praebente Tribunali sumptum intereruntque omnes: ac primo voti huius anno, Decuriones ipsi inuitabuntur à Tribunali ad solenne hoc: singuli funale portabunt à se coemptum, offerentque Virgini liberatrici.

Ad D. Barnabae Fontem dona mittet Tribunal

bunal mille aureorum nummum aestimatione: publicè portabuntur, tradenturque ritè, ac testatò loci Praefectis.

Eminentissimo Borromaeo Archiepiscopo Urbis supplicabitur à LX Decurionibus, vti corpus, quod Diui Caroli fuerat, composito ad pietatem agmine, ac supplicatione solemni portari per Urbem velit. Si annuat: ea supplicatio quàm magnificentissime adornabitur, eritque pompa conueniens tantae Animae reliquijs. Atque recordata Ciuitas quanto Pastor ille feruore animi, & quanta in Populum caritate egisset, tunc cùm hanc Urbem in ipsius etiam Pontificatu, pestilentia depopularetur, tantò praesentius nunc è Coelo affuturum esse Diuum sperans, statuit, vouitque, decessus eius diem, festum, & nulli mortali operi faciundo sacrum seruandum, esse populo huic, eaque in perpetuum, religione se se obstrinxerunt.

Haec publicè nuncupata vota pietate, consilioque Decurionum, tantò plus spei, solatijque afferebant animis, quantò magis difficultates omnium rerum, & aerumnae, simulque pericula in posterum & cum futuri metu praesentia mala inualescebant, aggra-
uabantque

uabantque homines, qui cùm pecuniam Ciuitati mutuam se daturos ostendissent, mutaerant consilium, & praecisè negabant.

Praeses interim idem, Tribunalque Sanitatis postulabant à Rep. ingentes pecuniae summas, ob duo noua Lazareta, quae diffuso iam latius, & finem haud inueniente morbo, fabricanda raptim instruendaque essent omnibus necessarijs, vt infecta, vel suspecta iam aliquot millia ciuium egentissimorum alerentur ibi, & curarentur praeter aliam multitudinem, quae in Lazareto maximo prior acceperat cladis miseriaeque sedem. Nec à Praeside tantùm ob has aliasque instantes, praesentisue necessitates, Ordo sollicitabatur: sed & Magni Cancellarij, nunc preces, & monita, nunc Regij nutus auctoritas accedebat, vt ne tempora omitterentur frumenti, olei, oryzae, salis, medicamentorumque coemendorum in quadraginta dies, quo tempore inclusa domibus tot millia alenda & curanda de publico essent.

Lectulos quadringentos vt minimum, & reliquam necessariam supellectilem esse parandam in Lazareta duo, quorum instruendorum cura Decurionibus Antonio Raynoldo, & Io. Petro Negrolio

Negrolio tradita esset. Haec , & alia , quae singula ardua forent, acta, & decreta vno die omnia simul : ea dies fuit ad x Cal. Iunij.

Ad vi Nonas Iunij, Vicarius, quia cum peste crescebat simul opinio insita animis pestem esse manufactam, repertaeque erant maculae, & vestigia passim vnguentorum, praeferebat id veneficium : retulit de augendo premio indicij, si quis flagitij eius index inueniretur. Decretumque est vt ad ducentos aureos nummos, & exsulum duorum impunitatem iudicis arbitrio concedendam, quae iam praemia Gubernator proposuisset, atque edixisset, adderentur Ciuitatis nomine quingenti aurei nummi.

Retulit idem : quoniam à Praefide Sanitatis significatum sibi esset: nullos inueniri medicos, qui vellent ingredi Lazaretum ad inuifendos ibi, curandosque aegrotos : Collegiumque Medicorum rogatum à Tribunali per litteras, vt destinare aliquos vellet, cunctari adhuc, nec mittere quemquam, ideo non debere differri, quin Ciuitatis quoque nomine scriberetur ad id Collegium, vt patriae subuenirent, arte sua, neue negando subsidium dehonestarent Artem, quae per se honestissima nouos hinc acceptura honores esset.

Decreuere Decuriones scribendas esse literas ad Collegium Medicorum : suntque praecriptae, & missae cum precibus, & obtestatione graui sicuti res postulabat.

Responsum à Collegio est : datuos è suo corpore, qui succederent ad muros vsque Lazareti, & stantes citra fossam mederentur vtcumque aegris : ingredi ad certam perniciem illa pestilentiae recta nolle quemquam. Inita ratio est, vt vnus, alterue medentium, publicè conducto, non procul à Lazareti septis, & assignato domicilio habitaret : stipatores, custodesque corporis, circum turgia, & casas, lectulosque deducerent : stipendium augeretur, quò promptius adiret pericula quisquis ille suscepisset id munus proposito quaestu, Nec domi tantummodo medicos quaesuit Ciuitas : sed etiam dato negotio mercatoribus, qui, per Germaniam, Galliamque negotiabantur, artis eius homines illecebra stipis elicere, & conducere tentarunt.

Annuerat interea Borromaeus Eminentissimus, non titulo solum hoc, & communi honoris appellatione, sed etiam singulari virtute Cardinalis, & planè paterna caritate Archiepiscopus Urbis, vt D. Caroli Corpus supplici agmine

agmine & pompa , quanta maxima posset adornari circumferetur, ostenderenturq; Coelo reliquiae Viri , qui iras olim eosdem placare praesentia sua potuisset , quemue labores , & merita illa subduxissent hinc in Coelum. Ac posteaquam, annuere ita Cardinalem, renuntiatum Ciuitati est: accuratissime Decuriones omnia agebant , vt ne quid ad supplicationis habendae honorem, celebritatemque deesset.

In primis autem elegerunt è suo ordine duos , qui cum Archipresbytero Ecclesiae Metropolitanae Alexandro Mazenta consilia communicarent , rationemque inirent , qua potissimum descriptione , & ornatu fierent Arca , & umbella condendo , ac superne tegendo Corpori , dum per vias , & compita item describenda portaretur. Ad eam consultationem electi Marchio Ioannes Maria Vicecomes , & Balthasar Barzium fuere .

Apud Eminentissimum Borromaeum , Ministrosque eius nihil ab vlla parte remissum, quod piè , quod decorè , & ad mouendam populi pietatem accommodatè fieri posset : paribusque studiis , hinc ciuilibus , hinc Ecclesiastica potestas , & magnificentia sacrorum erecta erat ad efferenda in publicum, & adornanda ossa , exuiasque Pastoris cuius
nomine ,

nomine, & fama nihil fortè vñquam in hac Metropoli plausibilius fuit: & supererant, qui spirantem ipsum, viuumq; vidissent. Litterae Pastorales à Cardinale Federico scriptae fuerunt, & eius iussu propositae locis omnibus, vt sciret Populus id, quod de aperiendo sepulchro, & efferendo in lucem sacro Corpore parabatur. Inerat hortatio grauissima ad singulos, vniuersosque, vt quoniam in tanta patriae clade, rebusque pene desperatis ventum esset ad spem hanc vltimam, mouendi ab tumulto ossa, & Corpus exanime Pontificis, qui conseruatae olim ab se Urbis deprecator etiam nunc in Coelo singularis haberetur: mouerent pariter ipsi animos ad piacula culparum suscipienda, quae gratissima coelesti deprecatori huic semper fuisse haud ignorarent. Coniungerent ieiunia, Confessionesque sacras, & mysteria Altaris.

Non interim quies vlla dabatur ab necessitatibus, curisque publicis, crescente impensarum magnitudine, quantò magis crescebat malum, & remedijs adhuc omnibus contumacior pestilentia, non humana, non diuina ope coërcebatur. Scripsere Decuriones ad Senatum implorantes Ciuitatis nomi-

ne Regiam opem, atque facultatem imponendi tributa, quae imponenda censuissent. In primis verò petebant, vt saluum esset Ciuitati ius repetendi, atque exigendi à Regio Fisco pecunias: quod Senatus aequum fore respondit.

Ad xvij Cal. Quintileis de votis publice nuncupatis Cardinali Archiepiscopo, Ciuitatis nomine supplicatum est in hunc modum.

Implorandi auxilij diuini causa aduersus pestem, quae tantam iam Mediolani stragem edidisset, nec de saeuitia remitteret quicquam inter caetera piacula coelestis irae LX. Decuriones optauisse, vt diem Visitationi Sanctissimae Virginis sacrum populus Mediolanensis, & sacrum Diuo Carolo diem festum, vtrumque, religiosumque seruaret, in perpetuum quidem hunc, illum verò conditione ea, vt triennio exacto libera vniciq; religio esset. In haec exquisita esse populi etiam ipsius studia regionatim, siue Collegiatim, atque annuisse, consensisseque omnes. Proinde petere nunc ab ipso Pastore populi, & Pontifice Vrbis, ac Praeside Sacrorum, vt haec nutu autoritateque sua confirmare velit, iubeatq; Parochos decreta sic,

fic , & sancita , & publice suscepta vota promulgare , sicuti , & religiones eiusmodi alias promulgari solenne est.

Spinula Gubernator è castris ab Casale patentes huiusmodi litteras dedit. Quoniam turbato propter pestilentiam statu Urbis, alia quotidie , ex alijs negotia orirentur , quae ad Regium Gubernatorem referri, imperioque eius, & potestate decerni oporteret, ipseque in praesentia bello occupatus, Regis, & Reip. causa abesset : ideo in magnum Cancellarium Antonium Ferrerium nomine ius omne Gubernatoris, potestatemque transferri, vt hoc absentiae, & pestilentiae tempore agenda, & decernenda cuncta agere , & decernere posset , eique Decuriones Urbis , ad omnia praesto essent.

Ad caeteras pecuniae conficiendae artes , quae excogitatae iam & tentatae erant , urgente necessitate noua consilia quaedam iniere Decuriones , & exposuere Magno Cancellario , Senatuque . Ea fuere huiusmodi.

Admonerentur vniuersi per Urbem quibus commoda domi res , vel si monita parum , hortationesque proficerent , imperio etiam , & auctoritate compellerentur , vt in tantis patriae necessitatibus , conferrent in publicum,

cum, quantum quisque pecuniae, frumenti, vini posset, eoque subsidio Remp. ad alendos in tali tempore pauperes adiuuarent. Vicissim ijs ex pecunia publica certi redditus assignarentur pro ea summa, quam quisque Ciuitati commodasset.

Ediceret Gubernator, ediceret Senatus vt profiteretur vnusquisque quantum argenti, quantum frumenti, vinique haberet: ac facta per singulos huiusmodi professione, imperarentur tributa per domos, atque aequabiliter, pro modo, & habitu cuiusq; exigenterentur.

Euocarentur auctoritate publica Collegia medicorum, Collegia causidicorum, mercatorum verò in primis, atque nummulariorum, & cum eis ageretur, vt Reip. ex qua creuissent, hoc maxime tempore commodarent, pauperibusque pro sua parte subueniendo capesserent pietatis simul gloriaeque partem.

Darentur Ciuitatis nomine litterae ad Cardinales, aliosque, qui ampla per Prouinciam agrumque Mediolanensem Sacerdotia obtinerent: hique rogarentur, vt ex magnitudine, opulentiaque sua vellent subuenire cultoribus terrae eiusdem, vnde emolumenta percipissent, porroque percepturi essent, si non ad solitudinem, quae videretur imminere, redigeretur.

geretur . Par obtestatio adhiberetur Monasterijs, locisque pijs, vsurpaturis falsò vocabulum hoc titulumque pietatis in posterum, nisi piè nunc erga pauperes largeque agerent .

Supplicaretur demum Eminentissimo Borromaeo, vt ad caeteram suam spectatissimam hoc tempore caritatem, atque munificentiam adderet & aliud caritatis officium: Clericosque suos, quorum plerique locupletes, tum in Vrbe, tum extra Urbem essent, ad ea, quibus abundarent, depromenda, & diuidenda hortaretur .

Haec omnia sicuti cogitauerant exposuerantque Decuriones, facienda censuit Senatus, deditque is Ordo litteras ad publicum Concilium Regis nomine, sicuti moris est, & autoritate perscriptas, quibus & cogitata prudenter omnia affirmabant Patres, & opem suam ad ea obtinenda, atque exsequenda paratam fore ostendebant .

Haud deinde finis erat huiusmodi litterarum, nunc Decurionum, & publici Consilij ad Senatum, nunc Senatus ad Decuriones: & modò ad Gubernatorem vterque Ordo, modò ad Ordinem vtrumque Gubernator ipse scribebat . Saepe in castra ad Hispanum com-
meauere procures: saepe inde in Urbem nunc

man-

mandata, nunc promissa aliqua venêre super
ijs rebus, quas legati subsidium aduersus pu-
blica mala petentes, exposuerant. Cladesque
pestilentiae haec, magnitudine, ac varietate
consiliorum & negotiorum, atque difficulta-
tum subinde orientium penè bella aequauit.
Sed includere huc, tum legationum acta, tum
litterarum exempla supersedebo, ne nimis
longum fecerim, & genus iam, ac summa
earum demonstrata est.

Caeterùm, dum tota consternata Ciuitas in
hunc modum exitij sui contemplatione ange-
retur, nec minus conquisitio remediorum
animos, quàm corpora morbus exerceret,
spes repente salutis affulsit, siue quia ad de-
pellendam pestem, humana quoque nonnihil
ope, consilijsque humanis profectum erat:
siue quia clementia diuina, non delere, sed
admonere populum voluerat, effeceratque
iam istud, & terruerat satis, purgaueratque
Vrbem. Coepit paulatim remittere morbus:
deinde quotidie magis, magisque supprime-
batur, & mortuorum numerum, dimidio,
quàm pridè minorem quotidie renuntiabant
homines, quibus ea cura mandata erat.

Ita pleraque eorum, quae cogitata, & de-
creta erant, irrita fuere: ventumque eò est,

vt

vt Praefes Sanitatis Archonatus ad Decuriones scriberet decedentem se Magistratu liberam peste relinquere Urbem : id diuino munere datum : sed , & consilia , munificentiamq; Ciuitatis profuisse . Finis in eo : quoniam multis persoluenda merces esset , qui strenuam Reipublicae operam , fidelemque nauassent , erogaretur pecunia sibi ad eam summam , vt suam , & Reipublicae fidem , in eo liberare posset . Mille aureorum nummum in praesentia datum est : de caetero facta spes : Praefesque laudatus , quod prouidè omnia , rectèque administrasset .

Pro tanto beneficio grata Ciuitas erga Maiestatem , clementiamque diuinam esse volens , consultare inde coepit , quatenam acceptissima dona esse Numini possent , quidue publicae pietati maxime consentaneum foret . Censuerant Decuriones , inter alia nonnulla , quadraginta dierum solenne ieiunium inchoandum esse Romano ritu , vt accessio illa poenitentiae salutaris vicem quasi donorum ingentium expleret . Id quia populo non placuerat , exquisitaeque sententiae vaticum in id congruerant , vt de vetere Ambrosiano instituto Quadragesimae ineundae nihil mutaretur : ad alia itum , quae , nec attingerent
populi

populi sensus, nec instituta antiqua verterent.

Penfilem lychnucum cum perpetui luminis alimento in Aede D. Mariae Gratiarum locauere ex argento faciendum, atq; suspendendum primo quoque tempore ibi vnciarum sexcentarum pondere. Item ad Deiparae Aedem, quae iuxta Diui Celsi est decreuere sacrificalem apparatus esse mittendum pari sumptu. Nec non ad summam eandem Patroño Urbis D. Ambrosio, Temploque eius dona, quae maxime opportuna viderentur: censuitque Cardinalis, non posse melius in praesentia collocari quicquid illud pecuniae offerendum Templo esset, quàm munienda simul, & adornanda clatris Ara maxima Templi eius: Idque factum ita est. In Diui Sebastiani Aedem absoluendam, atque expoliendam, & pecunia collata praesens, & decretum, vt summa maior daretur. Sexcenti aurei nummi diuisi in monasteria, coetusque pios, prout quibusque egestas, & fama sanctimoniae maior esset.

Caetera, quae ad honorem Deo Opt. Max. habendum, gratiasque pro tanto beneficio agendas pertinerent, permissa Conseruatoribus, vt consultarent, viderentq; ipsi, quibus maxime donis, quibusue caeremonijs adorari

Numinis

Numinis clementiam oporteret , quae Ciuitatem iam ad extrema deductam in ipso penè exitij articulo conseruasset .

Malignitas & liuor , inuidiaque pessima venena populorum , Rerumpublicarumque maximarum fuere semper , & erunt . Ne miserrimo quidem hoc pestilentiae tempore cessauere quominus , impeterent carperentque summam rem , tamquam omisissent , neglexissentue Proceres Urbis aliquid , quod fieri munificentius , accuratiusue posset . Eius rei iudicium , ac sententia mihi in suspenso relicta sit . Id quod in tabulis , rationibusque publicis reperi , quod ad sumptus attinet tantummodo ponam . Quippe summa pecuniarum de publico erogatarum ob pestem , ita perscripta , atque ad nummum relata est aureorum nummum cclxvii millia supputatione videlicet ea , qua nummus aureus pondo , librasue senas pendit . Neque mendum , fraudemue subesse rationi suspicari poterit , quisquis , aut antea cognouerit , aut postea considerare volet omnia haec .

Lazaretum maximum , Lazareta minora spatia camporum , quae tugurijs occupari necesse fuit : tuguria , quae structa penè innumerabilia fuerunt . Vtensilia , conductas pe
 Urbem

Vrbem aedes, pharmaca, medicos, alimenta egentium aegrotantiumq; populo per decem continuos menses: & tamquam in vna domo, prouisa, apparata, praebita cuncta tot millibus. Atque, vt funesta haec ratio subtilius aliquanto, exactiusq; repraesentata sit, simul, vt omnis populi Mediolanensis aetas haec etiam miserabilia sepulcra maiorum suorum agnoscat: Sancti Barnabae Lazaretum Ticinensi Porta fuit, Gregoriano Lazareto, & forma, & magnitudine pene par.

Decem iugera agri occupabat: habebat in medio extructam subitario opere sacram Aedem. Aquariae machinae, quae largè fontes in publicum euergerent, fuere ibi, quatuor lauacra fordibus eluendis. Tecta ad agendas excubias, ne qui egrederentur. Tecta Patrum, qui ad curam praecipuè animarum excubabant. Tecta separatim eorum, qui purgati iam, cura tamen adhuc, custodisque attinebantur. Extra Lazaretum haec, intus vero cubicula ccxvii capitum ibi ad quatuor millia fuere.

Lazaretum Portae Cumanae iuxta Trinitatis Aedem haud dissimili structura, & descriptione apparabatur. Sed ad diem consummari perficique non potuit. Aliaque
pariter

pariter inchoata Lazareta cum antecessisset praecipiti sua celeritate malum, id incommodi attulerant, ut & magna impensa struerentur, & usui esse non possent. Subsidio fuere viculi nonnulli vacui facti statim, instructique & muniti, ut quasi Lazareta etiam haec fierent. Eiusmodi Lazareta, sepositique viculi in hunc usum, & repente clausi, fuere quatuor. Porta Orientali unus contra S. Rochi Crucem. Porta Vigentina alter. Porta Tici-nensi tertius. Porta Cumana quartus. Includebant multas hinc inde domos, & ad muros usque Urbis, haec septa pertinebant.

Usus, atque commoditas inde praecipue petebatur haec, ut qui quadraginta dierum iam prima pericula euassent, alios quadraginta dies exigerent hinc ad depulsi penitus periculi fidem, indeque purgati penitus, & securi, integrique dimitterentur. E sordibus ipsis, & media colluione Lazaretorum extracti quicumque euaserant sic, atque superstites experimento fuerant, lauti, vestibusque nouis induti cura & religione patrum, composito ad pietatem agmine in nitida haec, & tutiora Lazareta ducebantur. Ad xxvj. millia hominum aliquando fuere, quos in spe maiore, seu minore, penè desperatos, siue penè inco-

incolumes, quadragenaria mora detinebat: & quindecim millia in Lazaretum maximum prima statim euectione deportata fuerunt.

Piget, pudetque tam infauti operis si mapalia adhuc, & sepulchra, funeraque, & cadauera mihi argumentum fiant. Mapalia ad P. N. sexcenta quadraginta quinque fuerunt. Ad P. V. septingenta quindecim. Ad P. R. trecenta, non amplius. Stetere singula nummis aureis binis, & imposita campis fuere, quorum pretium persolutum dominis est: gratiaeq; possessoribus agrorum insuper actae, quod Reip. ita commodassent. Fossae maximae cadaueribus accipiendis campos alios occupauere separatim, ac fuere istae numero xxiv. praeter minores alias ad Portam vnamquamque fossas, quas quotidie aperiri, & excauari cogebat pereuntium multitudo.

Mortuorum numerus haud ità exactè iniri potuit, quia in medio pestilentiae feruore perierant etiam illi, quibus mandatum erat, vt summas eiusmodi referrent. Hisque alij, & deinceps alij suffecti pari violentia omnes auferiebantur, donec minima illa curarum, vna cum maioribus alijs necessariisque curis ob desperationem omissa est. Coniectura tamen aestimatioque communis fuit: centum quadraginta

draginta millia capitum fuisse, quae perierunt: reperique ita perscriptum in tabulis, rationibusque iisdem, vnde haec mihi petita sunt omnia, quae retuli. Sed coniectura alia tristi, miserandoque indicio numerum auget, addendo his etiam eos, qui in hortis, cellisque vinarijs defossi proximorum manibus clandestinum domi tumulum acceperunt.

Ea defunctis corporibus ludibria adijciabantur vespillonum metu, quod genus, haud minus quam pestilentia ipsa formidabile erat: ingressiq; semel isti domum forte vnam, diripiendo, atque dilapidando cuncta excidium secum, luctumque inferebant.

Et sicuti anceps ea coniectura est, dubiusque numerus ob id peste mortuorum: ita illud minime dubium: si longior pestilentia fuisset, neque Ciuitatis nomen, neque publici Consilij subsidia reliquiasque antiquarum opum vltra duraturas, suffecturasue populo diminuto quamuis, & minima ex parte superstiti, ac de eo rerum statu Decuriones ad Gubernatorem Prouinciae Spinulam, inter caetera scripsere hisce verbis.

„ Ciuitas Catholicae Maestati deuotissima,
 „ ac fidelissima omnium quotquot intra tanti
 „ Imperij fines continentur, etiam ante pestem,

ob

„ ob incommoda temporum exhausta penitus,
 „ & aere alieno demersa iacebat. Nunc Am-
 „ brosianum aerarium omne consumpsit, om-
 „ nesque tentauit foenoris, & mutui vias, vt
 „ populum alendo, ac sustentando, sicuti fecit,
 „ Deo, & Regi, & Patriae seruiret: subiitque
 „ impensas, quas Maiestas ipsa inuictissimi
 „ Caesaris Caroli Quinti ad Regium Fiscum
 „ pertinere declarauit.

Sanè fastidij periculum apud legentes in
 hac praecipue parte vrget si pergere velim
 singula exequi, prout quaeque decreuerunt,
 & instituere Proceres. Vbis, vt exitium istud,
 internecionemque Patriae prohiberent. Sed
 mihi religio quaedam sit omittendi quic-
 quam eorum, quae sapientissimi viri in hoc
 tristissimo tempore, & vltimo pene casu cu-
 randa, & agenda susceperunt. Nam edicta,
 quae de singulis rebus, ac de vnoquoque
 capite promulgauere fortasse diffugient olim,
 siue absumentur, prout scilicet mobilitas est,
 leuitasque chartis. Monumenta verò haec si
 minus poterunt aeterna esse, stabile sanè illud
 fixumque habebunt, vt consumpta renouari
 possint. Nec edicta ipsa, sed summam eo-
 rum, sententiamque ponemus. Iussere mu-
 niri, & custodiri pagos, municipia, villas
 omnes

omnes agri Mediolanensis, ne promiscuè
aditus pateret, neue exitus daretur. Nomi-
natimque praescribere, quae Oppida, quae
loca ditionis, imperijque alieni caueri oport-
eret, ne aduenae admitterentur inde in Vr-
bem. Edixere, vt nomina quotidie referren-
tur, prout quaeque suspecta, siue manifestè
morbosa, & contaminata domus deprehensa
esset. Medici, Chirurgique dati, & quibus
ad curationem necessaria deessent decreta,
omnia è publico. Vetita bombycum ob te-
tros odores foetura: sublatum omne scruto-
rum, vestiumque commercium, quae vestes,
quaeue scruta polluta iam vsu alieno: pollue-
re etiam corpora possent. Nundinae quoque
sublatae, nisi quod ad Leucum sub certis le-
gibus vti haberentur, permissum, concessum-
que est. Reuocauere Patresfamilias in Vr-
bem, cum paulatim vniuersi ferè iam in agros
exitij metu concessissent. Nouas aedium lo-
cationes, prohibuere fieri, ne migrando, &
traijciendo supellectilia homines, quibus iam
essent initia contagij traijcerent simul, atque
inferrent in aliena tecta morbum. Et quia
quotidie crescebat leuitas, ac pertinacia
plebis adspernantis scilicet vti dictum est, pe-
stilentiae famam, atque insectantis eos, qui
asse-

assererent hanc, & remedia aliqua loquerentur: Egere cum Principe Gubernatore Urbis, ut minas & poenas, auctoritatemque supremam interponeret: isque ab Carmanio-la, ubi propter belli necessitates hoc tempore morabatur edicta in eam rem opportuna composuit, misitque in Urbem.

Et quia contumacem eam simul, famelicamque plebem alendi, ac sustentandi onus intolerabile quotidie magis fiebat, nec horrea sufficiebant si panis ex tritico sicuti institutum fuerat, quotidie diuideretur, instituerunt, ut millium, & panicum etiam propria pabula plebis coquerentur in panes, restrictiorque simul instituta dimensio est, prout exhausto iam fere poenore, parcius, restrictiusque dispensari cuncta res coge-
bat. Supplicauere Regi, ut onera, tributa, vectigalia, quae penderet Regio Fisco Ciuitas, tantis hisce Reipublicae necessitatibus, oneribusque quotidianis, & tantae cladi remitterentur, sicuti etiam priore pestilentia factum esset.

Et mox ad omnes cogendae pecuniae, cogendique frumenti rationes auersi, edixere: qui trumentum inuehere in Urbem, quiue Ciuitati pecuniam commodare, foenerarique vellet:

let: huic, & pro frumento pretium, & pro pecunia septumciale fœnus, Remp. dare, ac persolvere paratam fore: ac si quis frumenti pretium etiam in redditus annuos cedere sibi, mutarique vellet: optionem fore liberam, ut duarum conditionum altera venditor uteretur. Si qui institores, propolae, salsamentarij, aromatarij, quiue etiam carbones, & ligna venditare consueissent, aut non sedulò instructas suo quisque mercimonij genere apothecas habere curassent, aut pretia rerum augere vellent: his irrogatae multa, tum quingentorum aureorum nummum, tum ad maiorem quoque summam, si visum ita Decurionibus foret.

In pagos municipia, villas, dimissae litterae, ut messores, agricolae, praediorumque conductores, qui intra x ab Vrbe lapidem agros, praediaue conducti haberent, adseruarent accuratè paleas in tuguriorum usum, atque insuper in demetendis frugibus meminissent incidere culmos ad eam longitudinem ut usui esse possent. Descriptio per viros nobiles in Vrbe facta domorum, familiarumque singularum, cum sua cuiusque conditione, & censu, & artificij genere, numeroque etiam, & aetate incolarum, & quot in quaque domo perijissent

periissent iam, quotue inde in Lazareta exportati essent. Eiusque faciendae descriptionis edita mandata, ne qua in subsidijs, eleemosinisque diuidendis publica fraus, errorum admitteretur.

Et pauperes admoniti ipsi, ut quoniam remittere iam aliquid pestilentia coepisset, inciperent unusquisque ad pristina opificia, & artes, erigere, atque adiacere animum: ne semper publica subsidia expectarent, sibi otiosi, alijs graues: nam Ciuitatis opes iam fere esse consumptas. Ita deficere Rempubl. nec exsatiari posse singulos. Scripta ad terrorem, disciplinamque haec: caeterum tamen aduersus necessitates ultimas, facta pristinae munificentiae spes, quotiescunque dissidiae culpa abesset. Aduersus mendicos, atque erroneos, indigenas, alienigenasue latae poenae, statuto bidui spatii nostratibus, intra quod, ad Diui Ambrosij Zenodochium stitisse deberent: externi, nisi intra quartum ab edicto diem facerent hinc procul, atque abirent, triremium, aut virgarum, prout sexus, siue aetas, indicta poena.

Monastriorum, & Monastiarum acrius coercita licentia, ut laqueo strangularentur, furcisque penderent, qui eorum, quacumque earum,
aut

aut furarentur è domibus, aut defoderent, occultarentue furti, aut defossa haec, & occultata non indicarent, deferrentque ad Magistratus. Fatigamur nos quoque talia referendo: satietasque subit animum meum illa videlicet, aduersus quam veluti obfirmatus, & iniunctus edicta, & decreta sic delibare, & perstringere omnia statueram: ac fastidio nunc rebellante, stylus ipse fatiscit, penèq; excidit manu. Nouo, & breuiore adhuc genere compendij vtar.

Quot pericula, quot infortunia, quot humanae fraudes, ancipitesque casus, quot etiam consiliorum remediorumque formae in tali tempore, talique malo, tantoque populo, tantis etiam Reipublicae opibus esse potuerunt: totidem in tabulario Ciuitatis reperi decreta, edicta, monita, litteras, commentariosque publicos, publicasque consultationes, & liberalitates, & magnos Generalis Concilij prouisus, tum ad depellendam, diuina simul, & humana ope pestem: tum ad plebem in ea calamitate sustentandam, tum vero etiam ad coërcenda interim hominum scelera, licentiamque fraenandam. Atque diligentia Procerum haec totis sanè mensibus spectata est, quamdiu Imperium tantummodo

modò mortis, funerumque manebat: sed aliquantò maior, attentiorue esse coepit, vbi fenescere coeperat, ac remittere malum.: Edictaque temporis eius, indicio esse possunt, auctam vnà cum spe solitudinem etiam fuisse, ne muneri, clementiaeque diuinæ deessent, quae iam cladi finem daret. Sic fere nobis Acta Ciuitatis edita sunt ab Secretario Ecclesia, filio Secretarij Iacobi, qui confecerat reliqueratq; Diarium. Nunc & ea referam, quae apud Tribunal Sanitatis decreta & acta fuisse reperi, vel coniuncta istis, vel mixta & connexa vicissim.

ACTA TRIBVNALIS SANITATIS.

Inter principia rerum, casuum, calamitatumque tantarum, cùm pestilentiae nondum in Vrbe signa vlla terrorue nondum vllus eius esse coepisset, cùmque securi Mediolanenses adhuc & patrio more in delicias voluptatesque suas, imò & in studia sua effusi, sicuti dixeram, solutique agerent: & fama interim accidisset, Caesarianas legiones, quae ad rem Mantuanam vindicandam afferendamque Imperio mitterentur, spargere per totum iter contagia, quae Germanicae gentes

gentes nihil à communibus morbis pro nativa illa seculis obfirmata consuetudine distinguunt : iamque duodecim familias ad Lindum nostro more clausas ob pestem discretasque teneri : ob eam famam eosq; nuntios, Praefes Arconatus magnopere contenderat , vt ea Ciuitas decreto Tribunalis notaretur damnareturque velut exsors vsuum commerciorumque nostrorum . Nam quia praeter morbosarum legionum per eos fines hoc tempore iter , est Vrbs Lindum suspectae semper Germaniae velut emporium , magnopere pertinebat ad salutem , atq; securitatem nostrae Ciuitatis , interdici , edici , promulgarique authoritate publica, nequi homines, quaeue merces inde admitterentur . Sed respectu priuatarum rerum , quae , sicut iam inde antiquus ille scripserat semper officere publicis , & officient , obtineri non potuit hoc . Namque Ciuium nostrorum praeualidi ac ditissimi quidam , siue negotiatoribus , siue negotijs ipsis affines , interimque pars etiam ipsi Reip. non vltima , obstiterunt , siue sententijs , & authoritate sua , siue per alios , quorum opera Tribunal utebatur .

Medici Conseruatores magnopere suaserant , vti fieret ; saltem donec deferbuisset
aestas,

aestas, cuius calore nudaretur semper re-
gereturque pestis, si qua alicubi latitaret.
Vbi viderunt irrita sua monita, nec Philoso-
phiae decretis inter potentiorum emolumen-
ta esse locum, egere saltem, & tenere, uti
certus homo mitteretur in ea loca qui per-
quireret cognosceretque & perscriberet in.
Vrbem omnia de statu rerum: quo passu pes-
tilentia progrediretur, quosue sensim ipsa
gradus explicaret, & quae itinera posset in-
uenire in Prouinciae nostrae fines.

Missus in id à Tribunali fuerat Iulius Vi-
mercatus nomine, strenuus, fidus, audax,
cuiuslibet periculi contemptor, dummodo,
commendationis, & laudis, & spei, & prae-
sentis emolumenti nonnihil etiam ipse habe-
ret atque reportaret: obijtque cuncta, &
collustravit, atque perscripsit, nullo omisso
aditu, nullaue pestilentiae latebra, quò non,
& uti curator patriae ac legatus, & publicae
salutis uti speculator quidam accessisset. Re-
tulerat iste cuncta prudenter etiam non modò
accuratè: sed ne decreta siue edicta ex eius
relatione ac litteris opportuna fierent, prae-
ualuere nobilium, ut dixi, mercatorum artes,
quibus conditio temporis dabat, ut veris im-
misceri nobilibus possent, quine etiam clari
genus,

genus, pleni diuitiarum, animo infatigabiles,
 & traijciendi semper aliqua necessitatibus,
 atq; consilijs illigati in longum erant. Horum
 violenta palam, siue per occultum authorita-
 te effectum est ne periculosi illi ex Germania
 traiectus tollerentur statim, atque inhiberen-
 tur, sicuti oportuerat, ac sicuti Medici Con-
 seruatores censuere. Tesserarum quoq; vsum
 à Praeside Rhaudensi anno 1628. vtilis-
 sime, ac saluberrime institutam disturbauere
 isti, ac sustulere. Ea fallacia Tribunali obie-
 cta est, cùm adhuc Germanicus ille exerci-
 tus, vnde timebatur aderatque pestis in an-
 cipiti esset expectatione, & fama, quonam-
 iret. Vt verò descendere paulatim, & fle-
 ctere huc, & captis in Rhetia, positis, com-
 munitisque castellis, propior iam propiorq;
 fieri: Edictum à Tribunali est, ne qua
 coemptio fieret vestium, vtenfilium, vaso-
 rum, rerumue aliarum, quarum praedam
 eae legiones egerant è pagis, atque muni-
 cipijs in quibus nota iam strages, & praeda
 pestilentiae erat: grauesque exitialibus eiuf-
 modi rapinis aduentabant, & vt cuique mi-
 liti aliquid in manibus erat, quaerebat vili-
 tate emptorem. Ita vile edictum fuit, ac
 mercatu illo mortis, compendioque perni-
 cioso,

cioso , multi seque , & alios , patriamque polluerunt ultro euntes ad ferales illas nundinas cupidine lucri.

Agitatum antea fuerat in Generali Consilio Ciuitatis , apud Tribunal , apud Senatum , apud Quaestores Ordinarios , & instantius vehementiusque hoc tempore actum est , vt si minus vitari posset Germanicarum Legionum hoc iter per Prouinciae loca , moraque damnosior itinere : at certè nauibus deuectae per Larium acciperentur : vnde periculi minus terris , & minor occasio praedarum auido , dissoluto , & barbarum in morem efferato militi futura erat . Sed Comenses , sicuti fama fuit donatiuo quodam vitauere id incommodum : hominesque domini , & arbitri negotij eius , sicuti fama fuit , accepto congiario quatuor millium aureorum nummum à Procuratore Coloniae viam inuenere qua Lacum magna ex parte exonerarent. Ac si nauibus vti statutum fuerat , & faciliore compendio itineris , & minore Prouinciae damno deportarentur , edita , praescripta , disposita omnia erant , quae si ordine facta seruata fuissent leuior foret pestilentia inter ipsos : leuius parciusque impertiretur alienis : neque foedassent atque lacerassent al-

tera

tera rapinarum & licentiae peste populos quacunque transferunt.

Ab Valle Solida per Margutij vndas intrarent , sicuti fuerat nauigatio descripta , Verbanum : Ticinoque Papiam : inde per Padum , quâ postea placeret ad expeditionis loca deuenirent . Alia nauigationis via proponebatur ita scilicet , vt à Belintione ad Magadinum imponderentur in naues : tertia fuit haec , quae obsepta & interclusa pondere argenti est , vt ab Vulturena Valle Larium ingressae legiones quatuordecim inde millium traiectu Verbanum inirent , tenderentque ad Lauenum : siue etiam vt permensae flumèn Abduam tenderent ad Padum : ad Castrum nouum , ad Abduae fauces : inde quacunque ducerent Imperatores Ducesue : & praefecti earum .

Ab utroque Tribunali , ab Senatu , & à Magistratibus Urbis excogitatum ita decretumque fuit . Vt autem spreto hoc , & commutato itinere , latrocinijs , incendijs , & omni saeuitiae genere , ultra militarem quoque modum omnia peruastrarunt : & inflammato Colico , direpta Valle saxina , Brian-taeis Orobijsque spoliatis , & toto Abduae gyro , qui dicitur , crudelius infestiusque de-

depopulato , quàm sicuti barbari quilibet hostes inuaderent , vestigia simul , & semina pestilentiae , vnà cùm barbarico passim hoc insultu relinquebant : tunc noua quotidie decreta fiebant , & noua sed parum profutura Tribunalis edicta promulgabantur.

Ad x. Cal. Nouembris anno 1629. cùm indicatum à Protophyfico Septalio denuntiatumq; Tribnnali esset : Clusium pagum Leucensis agri vltimum , quà confinia Bergomatum sunt , haud dubie laborare pestilentia : decemque agrestium illorum tuguria infecta esse : cùmque similes ab Colico , & Bellano nuntij venissent , ac scripsisset ab Leuco his congruentia Medicus quoq; Maruelus : censuit Tribunal idoneum hominem ad ea loca esse mittendum , qui inspiceret sine mora , & referret. Ciferus quidam missus est : eiq; mandatum vti Nouocomum ex itinere profectus assumeret inde medicum , quò certius cuncta cognoscere , & referre posset. Retulere , nullam in ijs locis esse pestem decepti scilicet à medicamentario quodam tonsore , qui artem circum ea loca facitabat.

Affirmauerat namq; ille : mortuos quidem esse nonnullos : sed causas repentinae mortis , aut ex vligine locorum , aut ex militaribus iniurijs,

iniurijs , quas in Germanorum transitu per-
 pessi fuissent : & humani corporis fortuita
 multa esse quae pesti assimilarentur . Paucis
 post diebus , cū allatum esset , pagos etiam
 alios quotidie infamari pestilentiae suspicioni-
 bus , accidereque mortes ibi subitas , & vbi ac-
 cidissent , pauorem sequi , fugamque caetero-
 rum : intremiscere vicina , & , qui siti longius
 essent , versari in pari sollicitudine ac metu :
 decretum ab Tribunali est , vt supplicaretur
 Deo Opt. Max. in cuius sinu ac potestate
 Maiestatis esset , & malum depellere si iam
 serperet , & prohibere , ne oriretur .

Inde Alexandrum Tadinum elegerunt , qui
 praeter sapientiae ingenijque laudem , etiam
 rerum usu ac dexteritate , & socia natalium
 fide emereret . Hunc appellauere , vt ad cae-
 tera sua merita in Patriam adderet hoc . Iret
 suscepta libenter peregrinatione inspiceretq;
 omnia toto quantum spatio Germanorum
 agmina tetendissent , ac scriberet subinde ad
 Tribunal , quatenam integra , quae malo con-
 tacta loca reperisset . Adiungere ei Viceco-
 mitem Auditorem : & vtrique viaticum ac
 necessaria cuncta decreuere . Ad iv. Cal. No-
 uembris profecti ex Vrbe , quanta maxima
 poterant celeritate percurrerunt atque obie-

re

Caus. Viri.

re Larij lacus omnem oram : Saxinamque Vallem : collesque Briantaeos , & Abduae fluminis Gyrum .

Quarto die postquam exierant , scripsere ad Tribunal litteraeque eorum recitatae sunt, tristia omnia afferentes . Vt Olsiniatum in Briantaeos , appositum Abduae flumini pagum atque inde Galbiatum venerint , homines reperisse illos velut in peste manifesta trepidantes inter se , & , aut separatos abdicatosque à caeteris , aut in sylvas , in nemora proiectos , siue ultro abeuntes , ne corripentur : interimque plena omnia egestatis ibi & squaloris : ac ni propere subuentum sit, adeò miserabiles & destitutos esse paganos , vt pestem , si non haberent iam , ipsi facere possint . Haec priora esse loca , quae adierint , ubi substiterint : paria & de locis pagis municipijs vltioribus audiri : ac subinde scripturos , vt quoquò obuenissent : opus esse chirurgis , medicis curatoribusue caeteris , ne tam infausta principia exitus peiores darent .

Ad iv. Idus Nouembris audita relatione edixit Tribunal , edictaque dimisit , ne qui locorum eorum aliter quàm pro pestilentibus , haberentur , ne qui recipeantur : tesseræque illae institutae primò , deinde omissae , grauiore edicto

edicto sancitae , quod deinde edictum ob poenas appositosque custodes obedienter & accurate seruatum est .

Confecto deinde reliquo itinere legati visis , cognitis , constitutisque omnibus , & quocunque venerant ad pestilentes trepidosque in nouo malo , & laborantes variè paganos , prouisa illic & relictà de publico omnium rerum ope quae necessaria foret , rediere in Urbem , & ingressi ad Tribunal , renuntiata legatione , certam & manifestam & vicinam iam Vrbi pestem haud sine audientium gemitu repraesentauere . Dictum eis mandatumque est : ad Gubernatorem quoque accederent exponerentque eadem , sicuti fecere . Rursusque Tribunali renuntiauerunt : displicuisse Gubernatori audita haec , vehementerque esse commotum : sed belli grauiiores esse curas .

Cùm omnia exposuissent , tradidere Tribunali relationis etiam suae litteras : mandatumque est , vt in Acta referrentur , essentque in tabulario ad perpetuam memoriam monumenta amplexa originem & initia cladis . Continent descriptam velut in membrana faciem statumque terrarum , quas adiere legati , caputque legationis ipse Tadinus non
medico

medico tantum sed & historico quodam munere in ea peregrinatione egregie defunctus, delineavit ardua, plana, valles, sinusque varios, & lacustres oras, quæ terrae alluuntur aquis, quæue squallent & rigent: quæ flumina, vitesque & horti, seu hortorum instar spatia camporum: quæ saxa tantummodo & rupes, insidentesque rupibus montani maiora pariter, & minora domicilia agrestium, tuguria, turres, palatia, casas: quot quæque loca familijs censerentur: quid aperti & opportuni ad pestem, veluti hostem accipienda: quid etiam muniti & abditæ & secreti ab contagione proximorum haberent. Atque geographia sanè pestis hæc illa verò accuratius etiam, quæ magis propria delegati muneris fuere: quas miseras, quæ stabula paganorum vidisset incubantium nempe secutulis paleisue iisdem, quæ paedore adhuc & illuie Germanorum calerent: quæ demum remedia & fomenta omnibus dedisset: quas leges atque cautiones aduersus exitium illic haud dubie nascens, quos homines ad curandum, quæue adiumenta reliquisset, ut adhuc intacti subuenirent ijs qui iam foedati & demersi tenerentur: ut illis ipsis alia subsidia suppeterent ybi incidissent in calamitatem

tem egestatemque eandem : vt demum cadauera etiam , quae passim immista viuis , & afficiebant tetro odore adspectuque semper terribili hos , & ipsa carebant vltima sub terram quiete , mandarentur humi , & procul ab oculis ablegarentur.

Ex agris, vallibusque, & syluis haec ad Tribunal delata primordia mali tanto molestioribus animis Principum accepta suere, quanto magis alienum atq; securum id anni tempus . Nam pestilentia velut aestiua mala auis est. Hyeme fere delitescit monstrum, abditurq; frigorum cauernis vt suo mox tempore erumpat, atq; attollat vna cum sole caput . At intra moenia ipsa Urbis, tempore eodem confessa tacite, & minitata quid aestas ventura pararet ac ferret, aderat, stetitq; intra capita quinque : quos casus non intellexere Principes : & errorem nihilominus etiam hunc suum referri voluere in Acta, vt documento posteris esset.

Tulerat quasi primitias & prodigia hyberna urbanae pestis Locatus ille initio operis memoratus mihi. Fuerat hic in aestiuis ad Leucum miles , & cupidine veniendi in Urbem cum tesserâ adulterata intrarat. Venerat collum tergaque onustus atque etiam
indutus,

indutus, & aggrauato toto corpore vestimentis, quae coempta nuper ex media Germanorum peste superinduxerat sibi, & ferebat id voratio iam quaestu mercimonium in Urbem.

Mortuus in xenodochio maximo Urbis, sicuti dictum est, quotquot attigerant hominem steterantque circa eum, affecit: & aut periere etiam isti, aut conflictati febribus acutis igneisue bubonibus aëgre euasere. Primus igitur hic pestilentiae casus inter Tribunalis acta extat: consignarique ita placuit. Mortuae deinde sunt, aut mortis signa bubones, & carbunculos praetulere mulierculae quaedam ex familia siue contubernio hominis, qui Columna vocitabatur cognomento, & in proxima aedium parte habitabat, vnde prodierat miles. Harum cremari vestimenta, linthea, mundumque muliebre iussit Tribunal. Nam pleraque à milite acceperant. Et quia compertum postea fuit: in mortis metu misisse ipsas ad proximam S. Rochi Aedem aliquid vestis rerumque aliarum, ut propulsatori pestis Diuo vota siue dona suspenderentur: mandatum ab Tribunali est, uti tollerentur inde, & conijcerentur in eundem rogam, ne scilicet intempestiua illa feminarum pietas noceret contactu transferetque

ad Populum è sacrata fede illatam hanc ex
Germania pestem.

Ad iv. Nonas Nouembris venere in Aulam
senex Septalius eiusque filius Senator nomi-
ne , quem pater erudierat atque instituerat
omnino sibi futurum nominis & Artis here-
dem , sed non diu postea superstes fuit , &
Alexander Tadinus , qui connexus vtrique
familiaritate & amicitia studiisque ijsdem , &
amore erga Patriam , vnam quasi cum eis do-
mun vnamque scholam efficiebat . Venère
confuso vultu , & exposuere , Portae Ver-
cellensis obscurissimam vnam esse domum ,
cui caput Bernardus Bellanus scrutarius ,
& proxeneta quidam . Ad eum diuertisse
conditione etiam obscuriore satellitem , qui
ab Merato municipio quacunque de causa
profugus , coemptum de Germanico vno mi-
lite colobium habuisset . Hunc statim correp-
tum esse febris : nec durauisse vltra biduum .
Apparuisse in mortui tergo vibices atros , fu-
runculosque consimili colore nigricantes . Et
mox proxeneta hospitem simili letho absump-
tum easdem praetulisse morbi pestilentis notas.

Feminam inde , quae moribundis illis , ob
 pietatem , siue mercede accepta , adesse , &
 ministrare non recusauisset , contagij mani-
 festam

festam cecidisse inter aliarum manus. Laetentem ex eadem domo infantem inter vbera quidem, sed peste haud dubie vulneratum expirasse. Catharinam anum, & filiam eius, & filium occubuisse omnes ob commune contubernium, ob colloquia, & necessarios sub paupere tecto contactus. Clarissimi medici treis ingressi simul quo dictum est die talia retulerant: censuitq; Tribunal attentius iam atque accuratius esse praeparanda prouidentaque omnia aduersus pestem, quàm factum antea fuisset: subibatque iam annus, qui totam Vrbi cladem ferebat.

Huius anni principio, cùm ab duabus ex diuerso Portis, Orientali nimirum, & Vercellenfi, pari passu incedere per Urbem ac serpere pestilentia coepisset: censuit Tribunal disponenda apud Lazaretum esse omnia opportunè, quae ad aegros subinde accipiendo diuidendosque per tuguria pertinerent. Et quia loci Valetudinarijque eius disciplina iam inde à Francisco Sfortia constituta & descripta extabat, rogauere Conseruatores suos medicos nempe Tadinum & Septalium Protophyfici Septalij filium, vt, & capita singula recognoscerent, adderentque, & mutarent, si quae mutari, demi, addi praesens con-

conditio temporum ac rerum postularet : & caput vnumquodque fufius clariufque populari lingua, quae ab infimis etiam humilibusq; miniftris intelligi poffet, explicatum probe haberent apteque ad eos vfus, eamue neceffitatem, cuius adefse tempus apparebat. Id curae Conferuatoribus fuit : & ea capita, leges, & inftituta fingula veteris Lazareti explicauere ftatim atque retulere in tabellas.

Referebant deinde quotidie medici Conferuatores ijdem, & apud Tribunal quotidie conquerebantur, nec fibi fidem, nec auctoritatem efse decretis ob vaecordes in hoc peftilentiae negotio, non modò plebis, fed nobilium quoque multorum animos, qui rem efse confictam crederent ferrentque fermonibus, exhibilarent fimul atque exploderent, & pro patriae hoftibus haberent fententiae alterius auctores. Nuper penè lapidatum efse Septalium & conuitia dicta factaque grauiffimo & venerando & innocentiffimo feni.

Tadino infultaffe tonforem vnum, & in eius caput concitare voluiffe alios, qui superuenerant ibantque via. Medicos profectò minores, vel peregrinos Urbis, ac proinde fine amore, fine fenfu erga patriam alienam, vel indigenas quidem, fed maleuolentia corrup-

tos

tos atque aemulatu aduersus Collegium , quò non reciperentur ipsi adhuc , tumultuari , fremere , infringere quantum possint , & euertere decreta Tribunalis , consilia Conseruatorum , & hoc velut inane nomen , inanemq; Magistratum spernere simul , & irridere , & infectari . Socios hisce fieri collegasque temeritatis , non tonsores modò vilissimos , qui ab capillo & barba flecterent ipsi quoque paulatim ad medicam artem , & auderent vulnera curare manu ferramentisque iisdem : sed iustos quoq; chirurgos , qui , sicuti propiores , ita & amiciores arti esse deberent .

Hos igitur vno agmine omnes irruere & vadere acriter in pestilentiae assertores & monstrare plebi , monstrare nobilitati , veluti carnifices , si minus corporum , certè animorum , quippe qui moerorem luctum imaginationemque mortis , & excidij publici inferrent , & pestem verè hanc sententijs creare suis vellent , atque creassent iam penè apud multos . Censuit Tribunal , ac fecere Conseruatores , vt , quoniam argumenta caetera , ludibrio essent , ipsaque etiam pestilentiae fama eluderetur : at argumento certè vno , quod apud stolidos iuxta & prudentes efficacissimum foret , approbarent rem : increparent

rent simul confunderentque animos.

Suberat dies, quo die viri feminaeque & plurima in equis ac rhedis suo more nobilitas & feriata ab operibus multitudo, populusque vniuersus ad Gregoriana septa vadit agminibus ab lucis exortu ad noctem usque continuatis, ex quo scilicet sepulta illic priore pestilentia suorum ossa reuiscere sic & expiare ac propitiare ibi manibus Numen, instituere superstitis cladis, perseveratque posteritas haec: & cum luxu etiam velut in pompam spectaculumque illuc itur.

Hunc diem elegere Conseruatores, vt nimium lugubri spectaculo tamquam argumento firmissimo confutarent quicquid illud, siue ab vaecordia insita, siue quodammodo fatale diuinitus federat animis. Imposita in carros cadauera quae dederat eo die pestis etiam numerosiora solito transuehi praeter ora oculosque tendentium ad solenne, siue redeuntium inde, iusserunt: quasi fortè portarentur ad fossas, & excauata inibi sepulcra, sic vehes onustae ibant.

Tunc dolor, gemitus, & sublatis altè clamores diuinae misericordiae opem exposcebant: renunciatumque Tribunali est, ea specie obiecta oculis haud parum profectum esse ad
id,

id, vt rei numquam adhuc satis creditae nonnulli etiam antea increduli assentirentur.

Decreuere, opponendas in subalpinos esse, custodias, ne altera etiam ab Susa & Pinarolo barbaries posset huc pestem transmittere, quae tanta iam aderat nobis, vt transmitti hinc ad eos posset. Cum capitis proscriptioisq; minis edixere, ne qua coemptio esset vestium, scrutorum, & aliarum eiusmodi rerum, deterriti videlicet casibus, & morte eorum, qui ex scrutarij Bellani domo talia mercati fuissent, habuissentue.

In tantis assiduè vrgentibus curis, quae super alias aliae quotidie oriebantur, grauissima cum dolore & indignatione erat cura, de hominibus, qui regionibus, municipijs, portis, in Vrbe, extra Urbem appositi custodes arbitri moderatoresque rebus casibusque quotidianis, immodicè abutebantur eo iure, ac potestate, neque Magistratum ibi, sed Imperium tyrannidemque exercebant. Erant homines, qui, vel decoxerant fortè olim, & negotij alicuius publici indigebant: vel ita abundabant diuitijs, vt eas augere immensum, & hisce patriae malis crescere etiam altius ipsi destinassent: vel demum affectae famulique talium, quaererent ab aliqua re-

rum

rum procuratione stipem, producebanturque ad munera, quasi per heros istos suos, & diuisum cum eorum auaritia siue cum pauperie ac necessitate quaestum habebant.

Alius eorum, adsimulata pietate quasi patriae pater: alius quasi magnitudine opum, & ingenij feruore validus ad imperia obtinenda continendosque in officio populares: alij velut operarij ministri mandatis per industriam & laborem ad exequenda omnia, prompti adsumebantur capita exitialia furiarum instar & simillima pesti, tolerabanturque isti ob penuriam fugamue meliorum.

Fuit è superiore illa classe decoctorum, siue diuitum atque praepotentum, fuit qui ex vacuis iam aliquot dominorum morte aedibus iuberet ad se deferri quicquid pretiosi, quicquid etiam in aliquo domestico vsu expectitum, aptumue reperiretur: atque è tectis illis, quâ, vel abstulisset pestilentia possessores, vel terrorem expectationemue sui fecisset, congestos haberet apud se torques annulos, aenea stanneaque vasa, lintea, subuculas, haec & alia quasi conseruaturus, vti restitueret, re vera, vt conseruaret sibi retineretque praedam.

Horum importunissimos atque rapacissimos
exau-

exauthorare & remouere à munere, non quidem poterat statim cognito latrocinio Tribunal: sed dato spatio quodam & quaesita opportunitate obtentuque nonnullò remouebat: & ipsa pestilentia submouerat punieratque commode aliquem. Decretum postea factum est de minuendo in vniuersum numero istorum, quibus delegata munera veluti cum imperio prouinciaeque mandatae pestilentes erant: & quò pauciores iam isti erant, eò commodius procedebat res vt in malis, minusue querelarum deferebatur ad Tribunal.

Medici chirurgique multi cùm mortui essent, & vix iam reperirentur in classe hac, siue in illa qui defungi possent aut vellent, siue secandum curandumue aliquid esset manu, siue purgationis causa praescribendum: decreuit Tribunal, & praemijs inuitandos qui in Vrbe reliqui essent huius geminae Artis, & ex vrbibus locisque alijs quantalibet proposita mercede conducendos.

Decretum de purganda quadraginta diebus Ciuitate, parum commodi, plurimum verò perturbationis atque malorum etiam ad incrementa siue alimenta pestilentiae attulerat. Nam, & integri siue conualescentes tabidis adhuc & ferentibus intra viscera morbum
periculosè

periculosè associabantur : & vitato maiore Lazareto , apud minora illa per singulas portas excitata , tamquam in ganeam popinasq; ibant vtriq; pariter , assurgentes nempe iam è malo paulatim , & demersi implicitique alij tabe eadem . Ibi deinde per bacchanalia quaedam & ludos , & per omne lasciuiae genus foedabantur ipsi foedabantque alios , & , aut moriebantur ante experimentorum finem , aut experimenta ipsa in perniciem sibi verterant . Aduersus id incommodum nihil remedij Tribunal explicabat , nisi vt dissolui & euanescere decretum sinerent , sicuti pleraque alia , & decerni , & negligi contemnique , & qui contempsissent , impunitos contemptosque relinqui necesse fuit illic vbi proprie regnum & imperia tantummodo mortis rata validaq; essent .

Illusit deinde Tribunali casus improuidus , siue potius improuida spes & semper coeca cupiditas ad ea etiam facillime credenda , quae flagrantissime expetuntur . Muliercula vna fuit , quae ab Verbani lacus pago profecta in Urbem stimulante materna cura ob filium addictum fortè triremibus , adiit Tribunal , exposuitque : aduersus pestem remedia esse sibi inenarrabilia quaedam , haud dissimulans ,

anest. Mahon

mulans, quòd, & peritia naturae rerum, & munere diuino, & arcanis denique modis, de quibus nihil vltra effari sibi fas licitumue esset, reperisset ea & teneret. Si sibi filium, si filio matrem restituerent, spemue restituendi facerent, ingressuram extemplò Lazaretum, atque ibi promissa quae afferret, confirmaturam statim esse rerum fide.

Ingressa & admissa illuc, depromebat sanè pulueris & herbarum aliquid, verbaque etiam nonnulla super aegrotos haec medicamentaria mulier mustitans atque perplexè pronuntiabat: sed facilè animaduertère qui attendebant, comminisci eam vltro voces obscuras illas, neque herbis aut pulveri virtutem inesse salutiferam vllam: damnumque insuper & perniciem in eo, quòd, vt mouisse vtique aliquid & effecisse videretur, dederat ea, quae corpus exhaurirent in mortem: expirauerantq; nonnulli inter eius manus. Haec muliebris fallacia imposita Tribunali grauissimo erat.

Egère deinde apud Senatum, vt quoniam praeter capitalium criminum reos, plurimi etiam ob aes alienum nexi vinctique carcere attinerentur, ibique in sordibus & squalore multitudo ea contabesceret, atque iam essent mortui multi, demerentur vincula sic vinctis,
laxa-

laxarenturque custodiae , & sine mora dimitterentur quicunque dimitti possent. Senatus censuit eligendos ex eo Ordine , qui cognoscèrent controuersias , litesue singulorum , crimina quoque & causas , & arbitrato suo soluerent retinerentue vinctos. Per treis menses ob aes alienum prehendi duciue in vincula vetuere quemquam.

In extrema hac & permixta è varijs casibus parte operis non exigui solum & funesti , sed etiam penè sordidi, certè humilis atq; abiecti, dum humilia pleraque & leuissima dictu , quae vix recepisse siue respexisse Historia dignata sit ; admittimus vndique , & prout ad manum venêre , siue sub calami apicem vltro successere narramus , ne illud quidem quod in publicae salutis cura prouidêre proceres nostri , abdicasse repudicasseque debuimus . Opificium & emolumenta simul circa sordes spurciciasque bombycum , vnde nascitur hic quo superbit & fulget nobilitas tota, splendor fastusque vestium , aemulator idem , & socius auri, respexere non leui cura. Viderant censuerantque , si vermium haec foetura , & ex foedis adedò animalibus adedò quaeestuosa officina & quasi mercatura naturae prohiberetur , eripi sua alimenta populo , tum urbano huic , tum rusti-

rusticano alteri, cùm per omnes agros, apud omnia rura tam auidè expectaretur eius mercimonij tempus, & vbi aduenisset, tantis adlaborantium vtilitatibus exerceretur. Sed infici aera tetro odore ingrato atque odioſo operis etiam, quae coquere, & excernere illa asuetae, compendij spe insuper, aut praesenti mercede minus sentirent.

Ideo, licet in commune edictum fuisset ne hoc pestilentiae anno ratio vlla sementis eius haberetur, adhibuere ei edicto modum, atque edixere rursus, & praescribere, quomodo fieri posset, & quae cautiones forent. Ne intra municipia, neue intra pagos ipsos, sed tantùm ad villas & separata mapalia, tecta, casae fieret, nisi si tamen ea mapalia tecta villae casae iam infames ob aliquem pestilentiae casum essent. Si quis è municipio vel pago vel etiam ex Vrbe ipsa, colono & operario alicui sementem vti fit cum dimidia parte fructuum dare vellet, fideiuberet eius nomine prius nihil contra leges & praescripta facturum.

Strata lectuliue bombycum & quicquid illud postquam ad opus abiire, subsedit, in agrum, in aperta loca, procul à tectis agrorum sedibusque portaretur. Fierent crebri interim ibi ignes, addita lauru, iuniperoque, & alijs

& alijs eiusmodi fruticibus herbisue odoratis, quae nusquam defunt. Sed & caudices samentaque vitium ad id fore vsui. Tum verò, ne qui intra cubicula eadem vbi essent alerenturque bombyces, haberent sibi cubilia, cauerentque, ne inter odores eos perniciosè sopirentur: leuissima sanè & minima haec apud quotidianos vulgaresque politicos: sed neque leuia neque parua iuditio atque aestimatione aliorum, qui meminerint ab Grecorum sapientissimo scriptum ita fuisse olim. In verbo etiam vno, siue in motu corporis opportuno aliquo tantùm, siue in nutu, in significatione sola oculorum, vim inesse maiorem, ad sapientiae animique magnitudinem indicandam, quàm in multis magnis egregijsque factis.

Ac sicuti sapientissimus item alter è nostris, qui Romanorum facta condidit, dixerat, per illa minima, quae interdum ipse narraret, creuisse id Imperium: ita per haec minima, quae sic excogitauere Proceres nostri, & instituere, stetit post opem misericordiamque diuinam, ne tota periret peste Ciuitas: ne ager hic vniuersus, & vniuersa per agros rura conflagrarent malo eodem.

Erratum & in alijs rebus, sed in eo praecipuè est, quòd duas Portas Vrbis, Orientalem
atque

*Indicia, ex
postumus cog
de vniuersa boni*

atque Ticinensem , ab communi commercio separare ac dirimere cùm debuissent principio proceres , neglexere id ingenti damno sicuti dictum à nonnullis creditumque fuit . Si clausissent, damnassent, & damnatam in pestilentiae metu portam utramque custodiri iussissent, sperari potuerat , infrenato ita obstructoque in Urbis interiora aditu , haesuram fuisse in limine pestem, & velut reiecto à portis hoste omnia deinde in tuto . Id dictu ; quàm re facilius fuit . Haud ambiguum certè hoc: sicut ab Orientali, Locatum militem, ita ab Vercellensi porta fuisse cum hospite suo scrutarios, qui primi semina pestis intulere in Urbem.

Eius, vel non intellectae , vel omissae rei tota culpa collata est in vnum , cuius in publico consilio sententia non in eo negotio tantùm damnosa fuit . Etiam ille lauacra sustulerat , quae apposita fluentibus extra Lazaretum vndis , eluebant simul auferebantque sordes, & perpetuae scaturiginis opportunitate fruebantur: contenderatque & tenuerat, vt alia lauacra instituerentur apposita stagno , quâ scilicet residues & putrefactae aquae, tum corruptae suapte natura , tum ab illa immunditiarum eluue corruptiores, continerent verè exhalarentque pestem . Reperi in aduersarijs codicibusque

cibusque rationum, quatuor millibus aureorum nummum stetit Reip. id opus. Ita violentus ignarusque homo naturae rerum, tanta illa mercede impendioque publico nihil emerat aliud, quam ut augeret, ac proferret, nutriretque morbum.

Non sumus profectò homines nos, qui temerè interpretari diuina iudicia velimus, ac temerè in irarum iudicijque nostri partem euocare supremum impenetrabile inenarrabile coeleste illud, si quid fortè displiceat nobis, ac si fortè offensi aliqua mortalium leuitate vitioque & culpa fuerimus.

Caeterum tamen, notabile hoc admirabileque euenit, ut, & probus improbusue ille nobilis, qui procuratione Reip. suam gerebat, quiue gerere volebat vtramque, nec poterat, aut sciebat, & huic addicta cohors Commissarij, ministri, curatoresue nonnulli, qui deliquerant admiserant peccauerantque multa caderent grege vno & perirent. Primul-
dusque, & Confanolerius, & Pontinus apparitor, qui, empto, dein vendito pestilenti linteo causam initiumque praebuerat, ut septem millia mortalium perirent, & alij nominum culparumque similium homines, cum suis quisque familia funditus absumpti die vno omnes

omnes praebuere diuinae Iustitiae exemplum.

Non explicare est, quale virus, & quanta atrocitas fuerit pestilentiae huius: cumque, si nihil aliud, certè vacua penè facta Vrbs atque tot memorati casus argumento esse possint: confunditur adhuc mihi animus admiratione & terrore ob vnus sacrae familiae interitum mortefq; repentinas omnium quotquot in ea familia erant: neq; id ab contactu siue congressu vlllo, ne ab execrabilibus quidem illis vnguentis, ac venenis: sed tantummodo ab re tam leui, & vana, quàm ipse est fumus. In via Marina celebri propter amoenitatem suam, nec minus ob amoenum ingenium nobilis & lauti viuicide se-
apud sanctos
consilium
ita dicitur
 nis, qui aptissimum id spatium iuxta pomœrium Vrbs ad equorum curricula ambulationesque caeteras inuenit monstrauitq; principibus, & accepta autoritate purgavit, auxit, aequauitque ad lineam, vnde & ex conditore cognomentum manet. Ibi, dum vestimenta, plumae, culcitrae, scrutaque, & alia pestilentiae supellex cremaretur horis nocturnis, tunc, cum verisimile esset dormire omnes, penetrauit nidor in vicina tecta Monasterij, atque inde per fenestrarum rimas ad ipsa Patrum cubilia peruenit.

Postero

Postero die mortui complures eorum : caeteros lentae mortis tormenta vexauerunt per biduum. Inde par omnium exitus : neque superfuere ex eo numero, nisi quos pars aedium interior aliqua ab nidore & fumo remotos clausosque tenuisset.

Inter omnia, quae annus hic, & populi Mediolanensis commutatio haec tulit, nihil reperi adhuc, quod perinde mouerit animum meum, quouae legentium etiam animos perinde moueri posse putem, quam populi eiusdem pietas semper quidem inclyta & nota adeò propria terrae huius, ut veluti nata hinc & in terras quoque alias diuisa hinc atque profeminata videri possit, sed adeò stimulata & aucta miserijs, ut ad gentes item omnes & nobile & vtile exemplum futura sit.

Praeter suscepta publicè ieiunia, & vota, & sacra, aliaue omnia, quae propitiari potest Numen, ac praeter decretas ab Generali Consilio largitiones Christi Saluatoris nomine ad loca pia, datamque stipem egenis, ut propitiarent haec pietatis opera Saluatorem: praeter haec, quae religio & munificencia natiua Ciuitatis inuenerat feceratque, factus etiam unusquisque sibi erat author & magister atque stimulator piorum munificorumque sensuum

sensuum erga res diuinas , & erga omnia ,
 queis moueri creditur Numen , vt misérias
 culpasque mortalium clementer ac benigne
 respiciat .

Ibant ad templa calcantes nudo pede solum
 infelix , os humerosque recti sacco , caeden-
 tes terga loris vt manaret yberrime cruor,
 & illud doloris ac poenitentiae gestamen,
 verteret in purpuram . Ibant luce palam hoc
 habitu multi : sed & nocturno tempore plu-
 res . Ibant ignoti solitarijque : sed & facto
 agmine inter se tantummodo noti lacrymas
 & preces & flagella illa consociabant , ad-
 dentes , sibi verbera quisque haud sine certa-
 mine quodam , quod inter tenebras ipsi tan-
 tummodo sentirent : ictusque repetitos ita ta-
 men crescentemque sonitum velut accensis
 inter eos aemulatione animis , etiam notauere
 nonnulli , qui speculati nocturna agmina
 haec , insistere vestigijs , & sequi , & adistere
 cupiuerunt .

Feminae etiam , quò tenerior in calamitate
 acriorque ad honesta pariter & inhonesta om-
 nia sexus ille est , flagellationes & incessus
 eiusmodi suos obibant , ac veluti placamina
 haec offerebant Deo , & Virgini Deiparae , &
 Diuis , qui proximi intimique in sempiterna
 illa

illa Aula habentur. Haec in publico : plurā & maiora domi intra suos quique parietes, & efficaciora opinor ad impetrandam è Coelo pacem excogitabant tentabantque, & Maieſtati infinitae, tamquam obſequia vltima animi pietatiſq; humanae ad mouere conabantur. Pecunias, quarum amor etiam in deſperatione rerum atq; in exitij metu exiuit vltimus, non quidem vti viles ſibi que contemptas adhuc, ſed vti cariffima & pretioſiſſima pignorum ſuorum offerebant, non ſanè indigenti talium Deo, ſed libenter, vti credere fas eſt, acceptanti voluntatem & animos, quaſi indigeret.

Mulier olim auara, ſenexque tenaciſſimus auri : foenerator ſaeuus aliàs, & impudens, & magni draconis inſtar theſauris incubans : multi nobiles etiam, non illicito quaestu, ſed legitima ſucceſſione accumulatas opes ceu decora & ſubſidia domorum antiquarum amplexi : omnis paulò pecunioſior artifex, propola, proxeneta, locuplexue mercator, clericusue longa ſeneſta, vel opulento ſacerdotio diues : hi ſimul omnes : alij poſtea : quidam, vt illico nota res fuerit : aliqui, non niſi cognita poſt mortem exempla edidere, vnde intelligi potuit, proprium in morte bonum hominis

hominis esse magnanimitatem hanc , quae
 abdicata omni alia spe , & cura , seque &
 sua cuncta Deo permittit, imò potius reddit.
 Ut quisque horum timuerat videratque exi-
 tum vitae propinquantem : ut quisque eua-
 dere superstesque esse cupiuerat : ut quique
 etiam abire procul à conspectu malorum , &
 in vitae alterius oras migrare tandem ibiq;
 requiescere auebant : hi omnes pro habitu &
 conditione suae fortunae singuli pecunias tra-
 didere pro sua & aliena salute consumendas .

Tradidere , alius Sacerdoti , cui & pecca-
 ta confessus fuerat : alius amico : alius etiam
 inimico si deerat amicus : non nemo Reip.
 legauit : legauere Monasterijs , Templis , so-
 dalitij sue : deprompsere sacculos : transcrip-
 sere nomina : patefecere arcas . Etiam
 occultata in cauernis inaedificata parietibus
 monstrauere . Et fuere tamen , quorum sac-
 culi , zonae , ollaeque refertae superstites
 fierent huic liberalitati dominorum , legaren-
 turque nullis , & inter rudera deinde turpio-
 ribus latebris fortè reperirentur , incerto
 cuiusnam ea pecunia fuisset . Reperi in Aëtis
 carmina praecationum , quas aut religiosissi-
 mi quique sibi composuerant aduersus pe-
 stem : aut Ciuitas ipsa publicè susceperat ,
 quasi

quasi parum religionum, parumue precum iam esset in Vrbe, qua nulla alia foecundior, neque diligentior rituum & precationum iam inde antiquitus habetur.

„ D. Nicolae decus, & gloria Tolentina-
 „ tum: Diue, quem paupertate, & virginitate
 „ insignem sibi elegit Deus: cultor, & custos
 „ obedientiae Diue, cuius miracula Ordinem
 „ Heremitarum illustrant. Cultor & custos
 „ Obedientiae Diue, ob cuius miracula & si-
 „ gna Ordo Heremitarum claret, famaue eius
 „ volitat per ora virum. At tu tuis meritis à
 „ nobis depelle pestem. Id pium carmen
 „ tamquam apud alias gentes etiam expertae
 „ virtutis canere didicerant pueri mulieresque
 „ nostrae.

Multaque eiusmodi, vel descripta, vel impressa per manus tradebantur, atque passim è foribus aedium hae tabellae pendebant. Vnum insigne carmen fuit D. Mariae Virgini Deiparaeque Sanctissimae compositum, quo liberatam peste Vrbem Coimbricam famae erat, transmissumque ad nos publica pietas religiosissime acceperat. Referamque & apponam etiam ego religiose id carmen in eadem verba sicuti fuit.

„ Stella coeli extirpauit, quae lactauit Do-
 „ minum

„ minum nostrum, mortem pestis, quam planta-
 „ uit primus parens hominum. Ipsa Stella
 „ nunc dignetur sydera compefcere, quorum
 „ bella plebem caedunt dirae mortis vulnere.
 „ O piiffima Stella Maris à peste succurre no-
 „ bis. Audi nos Domina. Nam filius tuus te
 honorans nihil negat. Salua nos Iesus. Haec
 & alia multa diuinitus auertendae pesti cum
 humanis quoque remedijs inuenta, & adhi-
 bita fuere: & vis auxiliij diuini fuprema de-
 ftinatione latebat in occulto tamquam nega-
 retur, ac tantò poftea clementior in tempo-
 re efficaciorque futura erat.

Haud profectò ij fumus nos, neque verò
 effe debemus, qui Patriam Patriaeue Recto-
 res vlla vmquam finiftra fama oneratos effe
 velimus. Potius id periculum eft, ne quid
 etiam fuperuacui fauoris noftris ineffe litteris
 quidam putent.

Caeterùm, fi relinquitur etiam mihi ius li-
 bertatis, quo iure propria laus huius veridi-
 cae Artis conftat, haud dubitauerim in id
 redire, quod notatum iam alibi reprehen-
 fumque eft. Non intellecta, non credita
 ftatim pestis haec: non prouifa & extructa
 tuguria ftatim: non miffa protinus in Lazare-
 ta multitudo, vt quemque figna arguiffent
 dam-

damnassentue: sed intra tecta cohibiti clau-
sique scilicet illic ubi supra icalas, &
intra impluuium, & subter laquearia ea-
dem, ad quadraginta capita interdum, &
alicubi plures, visibus, & sordibus, & halitu,
& quctidiano inuicem foetore contamina-
rentur: hae causae fuere, cur ne preces quidem
ipsae statim efficaces fuerint apud potenti-
am illam infinitam vnde malo finis parabatur.

Etiam congruens impuneque mihi fue-
rit deplorasse calamitatem aliam, quae non
sine luctu adhuc, imò nec sine pudore pu-
blico veluti quaedam in naturam iniuria
Ciuitatis audiri legiue possit. Fuere aliquot
huius pestilentiae menses, cùm non modò
periret haec satura vitae iam & debita
vtique morti multitudo, sed futurus alter
ille populus, soboles, & spes, & subsidia Reip.
recens, editi infantes si perierat peste ma-
ter, extinguerentur casu eodem.

Nam, aut recusabant praebere vbera
mercenariae nutrices deterritae nempè
metu: aut, si defunctae officio erant: vel
nouam pestem exugeret ab vbere infans:
vel imbueret ipse nutricem. Ita, praeter tot
millia ciuium, periere in ipso limine vitae
etiam qui nondum gustarant senserantue
vitam.

vitam . Et indignior foediorque conditio fuit millium aliorum , quae concepta simul & sepulta vtero corpora inchoata puerperae mortuae iuxta spem partus abstulere secum . Ac licet non sentirent isti mortem : sensit tamen postea Resp. damnum, subtracto ita, supplemento, quod veluti paratum iam opportunè prodibat . Proceres , quòd non & huic infortunio remedia opportuna parassent, excusabant praeter ipsius infortunij vim , sumptus etiam aliarum rerum immanes, atq; difficultatem inueniendarum in tali tempore, puerperarum, integri, nec vitiati lactis, quae ne sumptibus quidem parari vllis possent .

EX TOTO FAMIS ET PESTILENTIAE TEMPORE
REPETVNTVR ADHVC NOVA QVAEDAM

QVOD in magni sui Operis parte praefatur Romanae Historiae princeps, nobis etiam vsu venit, vt crescere sentiamus pagellas exigui voluminis , quod prima quaeque perficiendo minui debuerat: ac velut ab proximis litori vadis ingressi pedibus aquas , quicquid processimus , in maiorem quasi altitudinem inuehimur . Nec facile finis exitusue vllus , si pergere velim , atque ex illo trium annorum turbine

turbine colligere, & conferre huc in cumulum acervumque quendam omnes novos terribiles hominum casus: omnia infortunia Urbis: dominantium curas: noua edicta munificentiaeque nouae publicos conatus: remedia, siue conquisita, & adhibita multifariam, siue praesentia & oblata: neque intellecta corcatis mentibus ab maiore potentia, quae pestem hanc populo immittebat, immissamque depellere postea volebat arbitrato suo. Sed attingam atque delibabo ea tantum, quae vel ad exemplum in posterum, vel ad liberalem etiam in re ad eò tristi oblectationem, praecipua mihi visa erunt.

Iam primum igitur in hoc exactae tam ingratae narrationis fine velut noui operis exordio notatum positumque sit hoc: praeter coelestia illa signa monitusque syderum haud quidem umquam obseruata nobis, sed peritis formidata semper, duplicesque cometas, alterum anno 1628. alterum anno ipso pestilenti, horrida vtrumque specie visos, praedictiones etiam in eos annos extitisse fatidicas, antiquas, & famis, & pestis, sicuti, & mala ista euenerunt. Nec pudor fuerit ipsa posuisse carmina foedata licet ineptorum omnium voce cum in circulis conuenticulisque omnibus canant homines hoc. Mors, & fames vigebit
vbique

vbique. Et illud. Mortales parat morbos : miranda videntur. Ac vidimus, quomodo confiterit Vati fides, & congruerit vtraq; clades recideritque in suum annum. Verum nihil commune nobis cum hisce vaticinijs, & professi sumus iam, & profiteri adhuc iuuat. Vaticinium verò longè certissimum, & longè verissimum aliud, vnde mala illa non magis praenuntiata, & monstrata, quàm nata fuere, numeris modisque diuersis includitur, quos, & ponemus, vt in perpetuum memoria extet.

Numerus legionum, quae cum ducibus suis ex Germania venêre in Prouinciam, ac de quibus opinio fuit apud nostros iuxta & alienos, tamquam vastitatem & famem, pestemq; intulissent, ille fuit scilicet. Equites vii. millia quadringenti quinquaginta sex, Pedites xxviii. millia. Summa omnium xxxv. millia cccc. lvi.

Quaecumq; iter haberent hae legiones, descripta de more manipulatim hospitia militum erant per rura circumiecta itineri, pagosue propinquos. Sed si Gallorum hostiumue quorumlibet exercitus ille esset : non potuit, aut licentia militum, aut fuga paganorum esse maior. Veluti si loca illa per quae habebant iter, diripienda accepissent : ita, vrere, spoliare, praedas agere bouum, & iumentorum, rerumue

rerumue omnium , quae abdita in tectis siue defossa sub terram essent . Vbi materia furori non suppeteret haec , iniiciebantur vincula dominis aedium , captiuique trahebantur , vano etiam in montium cacumina effugio si fortè ditiozem agrestem vel accola inuidus , vel fama monstrauisset .

Sequebatur namque illuc inexcatus praeda miles hospitemque suum in latebra aliqua repertum multabant verberibus , donec iret secum & abdita , defossa illa proderet vltro ipse retereretque , & extraheret daretque barbaris manipulis in manum . Neque duces obuiam ibant , siue quia particeps etiam ipsi praedarum : siue quia opum , & fortunae magnitudine nonnulli , & obtupefacti atque alienati suis quisque curis , & mole cogitationum , quas ab domo attulerant , clausis auribus vti leuia haec & minora adspernabantur .

Cùmque praegressis turmis , cohortibus , tribunis , qui exempla ediderant haec , alia subinde agmina sequerentur , efferata hoc ipso , quòd abstulerant iam omnia euerterantq; priores , nec fere quicquam reliquerant quòd deliniri ac mitigari posset auditas siue egestas irata noui militis , ereptae sibi praedae dolorem in spoliatos vtique effundere isti volebant .

bant. Inde per continuos aliquot dies ultra quam tolerare ibi vitam possent in summis iugis, aut in cauo aliquo vallium recessu, familiae totae habitabant, & postquam tracto demum per fines exercitu, in sua quisque tecta redire audebant, aut ablata cuncta quae potuere auferri, aut fracta, diruta, cremata, dissipata, effusa caetera inuenerunt. Hae per illud tempus toleratae iniuriae damnaque illata agrestibus, non solum corpora squalore & illuie & debilitate, sed etiam desperatione & moerore animos affecerant: pestemque profecto si non attulissent hae Germanicae legiones, inducere ita & efficere potuerunt. Id notasse oportuit ut nostri intelligant Principes, quantopere semper in eorum exercituum aduentu excubandum sit.

In Lazareti legibus atque praescriptis & constituta ibi disciplina, praeter ea quae legibus institutisque eis principio exposita fuerunt, fuerat etiam hoc saluberrime & aptissime ad regenda ibi tot mala excogitatum atque statutum: ut è proceribus bini per interualla eligerentur, qui inspicerent ibi tuguria partesque singulas, & tum pauperum necessitates, tum praefectorum in suo cuiusque munere diligentiam fidemque cognoscerent, atque, tum prouiderent ipsi autoritate sua, tum ad
Tribunal

Tribunal Sanitatis ordinemue Decurionum cuncta referrent .

Medici Conseruatores alternis quotidie circumirent eadem pestilentiae tuguria & referrent. Sacerdotes essent alerenturque ibi, non solum, qui mysterijs & sacramentis expiandarum purgandarumq; animarum curam & munus in illa tecta pastorale sustinerent : sed etiam, qui hortamentis & solatijs amabiliter ac paterne vnumquemque confirmarent. Circitores essent Curatoresue certi mercede conducti ad id vt diuisis inter se vicibus adirent quotidie Lazaretum, pericula specularentur, casusq; omnes, & mortes, & quicquid poena vel animaduersione remedioq; dignum offendifsent, ac referrent cuncta in praeparatum ad id codicem, & cum eo codice adirent subinde Tribunal.

Cloacas, latrinas, & latrinarum instar stabula tectaue pauperum & alia eiusmodi foeda loca per Vrbem inspicienda, purganda, tergenda haberent, ne teter odor ille accederet etiam ad malum, malique alimentum esset. Muneris eorundem hominum esset, vt quosque, aut intra Lazaretum, aut in Vrbe mortuos subinde inuenissent, non modò adnotasse nomina in codice, sed & cremanda tradere vestimenta eorum, & quicquid circa mortui

mortui corpus in usu aliquo fuisset : cubiculum etiam tuguriumue eius accenso illic igni odoramentisq; superiniectis purgandum curarent . Magis minusue suspectos , & à suspectis , eos , qui manifeste infecti essent , cogerent vivere separatim , neque classium harum homines inter se misceri paterentur . Custos esset vnus , penes quem custodia , & cura rerum , quae , aut publicae Lazareti , aut propriae singulorum forent : idemque omnia insuper propria muneris huius obiret . sicuti praescripta editaque essent .

Longa inde capitum series , & longus ordo , tum praefectorum in partes singulas , tum legum in praefecturas , & munera ipsa , quae contineretur , staretque regimen illius languidae multitudinis congregatae in familiam vnā : subitque satietas iam cū transferre huc , & describere singula cogitauissem . Sicuti Urbem duae obscurissimae domus , nominaque etiam obscura duorum hominum labe fecerant temerauerantque totam : ita non infimi nominis municipia Modoetiam , & Seronum , aliosq; municipali dignatione pagos , parua scintilla corripuit ac penè deleuit : cuius etiam paruae rei magnum exemplum duobus casibus notasse haud inutile fuerit ad noscendos per omnia quasi mores mali huius ,
quod

quod semper, vnde minime quis crederet, exit, & vbi per vnum vile caput incessit, vi fertur ignea, & aequat summa imis, neque cohibetur vlla hominum ope donec cuncta peruaferit. Rursusque scintilla eadem, vi alia occulta, in vno consistere capite amat, quod vbi strauerit abieceritque, contenta funere illo, non progreditur vterius.

Emerat anus vna de Germano milite hyberniam vestem suffultam nempe pellibus, spurcum, & anceps militaris alicuius feminae gestamen, etiam si pestilentia abesset. Huius indumenti emprix femina cum Seronum aliunde venisset, & mortua statim ipsa est, & totum illud haud ignobile municipium reliquit ab foetore contactuque suo repletum, peste eadem.

At apud Cassanum in Abduae ripa quidam, dum emptum de Germanico item milite sulphurei pulueris sacculum solueret atque aperiret, integer sanè atque incolumis in pago ad eam diem integro, atq; incolumi, capitis repente doloribus extortus ad insaniam, fluctuatus aliquandiu & agitato impulsusque huc illuc, non totius horae spatio duravit, finiuitque tormenta simul & vitam. Et fuit quidem post aliquot deinde menses circum ea loca pestis: sed casus illè vnicus atque singularis,

singularis, sicuti terruerat tamquam ingruente per id caput publico exitio incolas: ita mixtam gaudio admirationem hominibus eis tulit, quod nihil praeterea mali tunc accidisset, atque è multis qui sacculum eundem attigerant, fuerantq; & cum venditore milite, & cum emptore hoc altero in colloquijs, in caupona, in naui, ne vnus quidem tentatiuncula signoue aliquo suspicionem merumue praebuerat contagij, quod intra omnium viscera iam suo more & abditum & peruagatum esse credidissent.

Contraria his fortuna ad Modoetiam fuit cum mulier ibi quoque vna thecam & in ea muliebrum ferramentorum aliquid ab Germanicae cohortis centurione accepisset. Namque acum inde capiti admouerat ad discriminandum fortè capillum, siue ob quid eiusmodi aliud, & exanimata illico est. Mortuae circa eam duae, treisue consanguineae, siue vicinae, & gregales, necnon viri consanguineiue earum: & nihil vltra tunc damni fuit in municipio siue oppido, quod & capere statim spectacula omnia pestilentiae potuerat, & postea cepit atq; exhibuit ad Urbis ipsius penè modum.

IOSEPHI RIPAMONTII

DE PESTILENTIA QVAE

MEDIOLANI FVIT

ANNO CIO DC XXX

LIBER V.

ONAM atque exhibebo in hoc
 funerum funestarumque rerum
 sine, spectaculum quoddam, lu-
 dumue comparationis, inter hanc
 pestem, & alias, quae magnis
 Urbibus olim, imò, & nostrae
 huic acciderunt. Comparari namque ista &
 conferri inter se decet: simul, vt intelligatur
 id quod initio dixeram: pestem hanc fuisse,
 grauissimam omnium, cui nempe solidum, ac
 totum conueniret tam horribilis mali nomen:
 simul, vt in ipsa talium malorum diuersitate
 similitudo conspiciatur adeò germana, & con-
 gruens omnibus notis, vt apparere possit, &
 quandocumque pestis oriatur, vestigijs fere
 semperinsistere ijsdem: & vbi orta fuerit, grassari
 finilibus quoque modis, insaniasque morta-
 lium easdem praebere. Scriptoribus quoque
 nobi-

nobilissimis renouari gloriae suae partem hac
data occasione haud indecorum fuerit.

Incesserat pestilentia olim Athenarum Urbem : eaque fuit tanta clades , vt scriptorem quoque nobilitarit . Nam , neque narrator erit rerum vñquam alius , qualem Roma Graeciae semper inuidebit , ac ciues expulere sui Thucididem : neque inter monumenta Thucididis , elegantius subtiliusue quicquam ea descriptione morbi habetur . Constatque subtilitas & elegantia illa , non tam ingenio Scriptoris , quàm atroci rerum facie , quae ipsa legentium animos , turbat simul , & delectat , haud aliter quàm sicuti turpissimus in tabula anguis , quò foedior est adspectu , hoc placet magis , atque arridet : oculique noua semper spectacula sibi exquirentes , in eam deformitatem intenduntur , atque defiguntur .

Ita , res simul , & narrator , & tanto scriptori , tantaeque cladi interiectae Athenae , per lycaea , porticusque philosophantium , post tot saecula hodie celebrantur : ac nomen Urbis illius , haud minus memoria cladis , quàm fama scientiarum & artium viuit . Par ex clade fama & gratia sequitur Liuium , & Syracusas , ex quo , obsessam Urbem , & roborata duorum exercituum ab discrimine conflictuque

tuque armorum ad miseriam lentae tabis redacta Patauinus ille repraesentauit. Etiam inter Homeri carmina, pauculi versus, quibus ille cecinit immissa militaribus copijs tela haec, aceruosque mortuorum, & canibus, alitibusque pabulo relictam gentem, quae tota in armis erat, sunt legentibus hodie terror, miraculumque, & voluptas.

At linguae, saeculique deterioris Scriptor nulli horum comparandus, sed qui, aut è veris fabulosa confinxit, aut vera narrare fabulas docuit, quod etiam artifice ac magistro popularis Italica lingua, lepores, elegantiasq; suas ferè assumpt, is Patriae suae pestilentiam, atq; excisum Urbis Florentiae statum, & res ita penè deletas describendo per artem, quam ludicrus facetusque narrator ab Historiae principibus acceperat, mouet ingenij sui admirationem simul, & misericordiam tantae cladis: semperque Bocacij Pestem polita ingenia relegere volent: rigor etiam, atque seueritas ipsa id rerum humanarum exemplum insatiabiliter spectabit. Saeua, & miseranda, turpiaq; & indigna exempla, quae per Urbem, patriamq; nostram hanc, in vitam, & corpora hominum pestilentia edidit, paria prioribus illis, aut etiam maiora

iora fuerunt : & , nisi quod ingenio minore , memorata sunt , grandius hodie foediusque spectaculum , renouata litteris erunt .

Caeterum , quia satis lacrymarum adhuc , satisque miseriarum , & flebilium querelarum satis vrbi est , pergam ego quicquid istud triste , ac lugubre narraui , temperare lepore quodam , & amoenitate , comparando , quae scriptores illi , velut composita in scenae ostentationem retulere , cum ijs , quae vidit aetas nostra , & passa est . Ita ludus quidam similitudinis inducetur , qui varietate casuum , & collatione , atque alterno inter vetera , & recentia , inter aliena , & nostra mala , excursu , recreabit animos . Et quia post excidium , velut ab stirpe floridior Ciuitas nostra resurgit , atque resumunt etiam pristina oblectamenta Ciues , nobis quoque faciendum est , vt amara haec memoria excidij , comparationis dulcedine leniatur , & cladibus alienis temperata mitescat .

COMPARATVR PESTILENTIA NOSTRAE VRBIS
CVM ANTIQVISSIMA PESTE ATHENIENSIVM .

Si comico inter tragica verbo vti licitum est , non ego lacti lac , non ouum ovo magis

gis germanum, magisque simile esse arbitror, quàm haec Mediolanensis pestilentia germana penè facie nostris temporibus retulit Atheniensem illam, quae à Thucidide descripta est. Adeò, & initia prima ambitusque morbi, & incessus, & causae ipsae, vnde tabes vtraque fluxisse credita est, inter se congruerunt. Mali quoque genus, & mos quidam, vestigiaque & coniecturae incedentis, & ubi incesserat, corripueratque cuncta, terrores, & ruinae, stragesque, & suspicionum quoque portenta, & conditio temporum, calamitatumque aliarum concursus, nihil discrepauere à Graeca illa: siue tulit simillima ista casus, siue rebus humanis inest orbis, & vicissitudo quaedam, ut vices eadem per saeculorum intervalla recurrant.

Pestilentia, quae Athenas inclytam illam tanta casuum varietate Vibem, ad finem olim penè adduxit, minitata prius ex longinquo fuerat Vrbi: dein ab Lemno, locisque alijs, propius, propiusque accedens, institerat moenibus, irrupératque demum, & cuncta corripuerat, scilicet, ut sollicitudines, & curae morientium pariter, atque superstitum aggrauarentur hoc ipso, quòd datis ita ad praecauendum coniecturis, obtorpuissent. Sic,

&

& nostra clades incessit. Diceret aliquis, conspirasse monstra, ut in diuersa Mundi parte ad duarum clarissimarum Urbium excidium, aditu viaque eadem grassarentur.

Adeò nostra pestis etiam veluti Atheniensem illam sedulò aemulata, longinquos primò peruastrauit, alienosque tractus, dein adiacentia Prouinciae finibus, Prouinciam deinde ipsam, postremò Urbem tanto impetu, ut nihil praeter nomen, & tecta Urbis relictura videretur. Et itinera pesti quidem haec, antiquitus in Athenarum Urbem, nuperrime in Metropolim hanc fuere adeò consimili diuersitate, ut vestigia eadem in vtraque parte impressa monstrari possint. Sed reliqua etiam simillima fuere. Atheniensium multitudinem refert Thucidides, vagante per singula capita morbo, & absumente quotquot attigerat, desperata omni humana ope, vertisse primò ad Deos vota: deinde, postquam hi quoque frustra inuocabantur, vnicum in desperatione, & morte subsidium habentes, omnis remedijs, omisssaque etiam imploratione Diuùm, penitus, seque & Remp. permisisse cladi. Ortam autem ex eo fuisse desperationem, quòd, & medici ipsi inprimis absumerentur vi morbi, & saepius instaurata vota precesq;
nihil

nihil proficere viderentur, nisi, vt exasperaretur quotidie morbus, atque recrudesceret. Conſternatos patriae ſuae clade animos, omni que diuino ſimul & humano auxilio deſtitutam inter prima peſtilentiae tela Gentem hac imagine repraeſentat narrator antiquus, mouetque cum terrore miſericordiam erga ſic pereuntes. Haud aliter etiam in Ciuitate noſtra, & genus penè medicorum inter prima experimenta interijt: & euidente Numinis ira repudiari aliquandiu preces Ciuitas ipſa vidit, haud minus proſecto, quàm ea, quae oculis cernuntur.

Simileq; etiam illud, ac veluti genuinum inter noſtram Athenienſiumque peſtem hoc loco occurrit: quòd pars vtraque, cùm nulum finem ſuae calamitatis videret, non item cauſas, originemque mali explicare poſſet, retulit has ad fraudem humanam, & fieri mortalium arte putauit, quod ira Numinis fiebat. Credidit vniuerſa Athenienſium multitudo, Peloponneſios eſſe, qui delendae Urbis cauſa puteos veneno inficerent, & cum ea tunc fortè Gente bellum gerebant. Nos item in pari clade, conſilij pariter, remedijque expertes, credidimus, malam aliquam eſſe mentem, malamque manum, quae manibus

nibus, & ope aliena coqueret venena, & spargeret ea; suspicio veluti morbus alter & noua calamitas Vrbi fuit. Etiam vana Sacra Isidis illi circumtulere, sicuti nos coeleste D. Caroli Corpus: & demersere plerique se se aquis, & alia incredibilia multa fecerunt, vt similitudo pene ipsa, sicuti magnitudinem, & claritatem Urbis, & Populi vtriusque, ita cetera omnia delegisse sibi & composuisse quodammodo videri possit.

COMPARATVR HAEC PESTILENTIA NOSTRAE VRBIS
CVM FLORENTINA PESTE.

Post antiquam illam Atheniensium pestem, Florentina pestis recentior illa occurrit, quae ab nobilium fabularum auctore Florentino, non fabulosa, sed vera historica res descripta extat refertque nostram hanc haud aliter, quam si alteram ex altera artifex aliquis ingeniose expressam ostendere ac venditare in tabula voluisset. Non sanè tradit narrator ille summus, atque amoenissimus Etruscorum, sed tradidere potiores ad fidem alij, compertumque nos ex annalibus Gentis ita habemus: pestem eam ingenio passuque hoc incessisse.

Ab

Ab Fesulis, & Prato, & Volaterris, alijsq; minoribus aliquandiu populis minitata Metropoli, expertaque vires illic, expectata inde simul, & contempta, & irrita, & absq; vlla certa sede vagata per colles, camposque voluptuosos, corripuit demum Urbem Etruriae caput, fixitque regna sua illic. Tunc scilicet, hinc tyranni impotentis feritate, hinc grauissimi censoris ritu euertit omnia simul & ordinauit: fluentemque delitijs, & immodico luxu factiosum pariter negotiatoremque populum, etiam coeli muneribus, & amoenitate terrae superbientem effertentq; sese supra caeteros, ad aequa redegit. Acciderit autem nobis hoc etiam, an verò acribus censurae initijs, irritò fine, redire coeperint, imò redierint iam omnia in pristinum statum, relictum mihi sit in sinu veritatis, & famae, quae certius, ac melius etiam ex longinquo nos intuetur quàm ipsi nos.

Populus Luxu

Caetera colorem vnum trahunt, vt descriptio nostrae pestis altera futura sit, si in similitudinis vel potius vnitatis huius experimentum ea perstrinxero quae Florentiae acciderunt cùm populus etiam ille populari hoc traiecitio morbo defloraretur, absum-
retur,

retur , excinderetur imò totus. Non alia ibi principum aduersus exorientem aduentantemue pestem vigilantia somni fatalis instar : clausaeque portae , & vetiti introitus in Urbem , & custodita ritè omnia haud alio effectu , quàm si aperta , remissa , neglecta cuncta fuissent : ac negligentiae tamen etiam ibi satis ad id vt non sine hominum quoque culpa clades intraret , quae missa diuinitus aderat.

Supplicationes & vota , & quicquid humanus timor , humana pietas , ab humanis remedijs auersa penitus in coelum , tentare illic & exposcere audet , irrita ibi quoque haec , & negata siue dilata clementia Coeli in id tempus , quo pandi misericordiae diuinae portas , roresque salutiferos super Ciuitatem pariter illam effundi debere impenetrabilis arcani lege fixum immotumque stabat . Signa etiam illa , & pestiferae labes , quae pestem ferebant simul , & adesse nuntiabant , vultu incessere eodem , ac varietate etiam ipsa praetulere illud inter pestem vtramque simile atq; indiscretum.

Nam , alijs pyri , alijs oui magnitudine , alijs inguine laeuo , vel dextero exoriebantur illi toties inter nostra funera nominati fununculi , carbunculi , antracesque , & bubones :

&

& ab ea paulatim sede partibusque corporis per membra deinceps omnia extuberare coeperunt. Postea, nihil sane extuberabat, sed liuebat tantummodo corpus, huic rarioribus maiusculis, alteri, densis, paruulusque maculis, & moriebantur, quos labes ea foedasset intra tertium fere diem, sine febris complures, aliqui etiam aestu caloribusque agitati tamquam febrerent. Sicut ignem concipit arida admota materies: concipiebat ita pestem, illico, & mortem quisquis sanus integerque propius ad corpora illa accessisset.

similitudo.

Referuntque narratores pestilentiae huius: si quis ab aegroto tacta contigisset, ineuitabile inde exitium, certissimamque mortem, absumptosque ita complures: & non hominibus modò accidisse hoc, ut ab insito rebus etiam inanimis pestifero corrupto spiritu corrumperentur exanimarenturque ipsi, & alios deinde exanimarent: sed pecudes ipsas, quarum spurcitijs & impuritati nulla consociatio est cum hominum halitu, & vita, sic esse vulneratas, atque infectas. Referunt veluti magna incredibilia portenta haec. At nobis ea facilitas transeuntis per vestium etiam rerumque contagia, morbi, adeò nota res fuit, ut nihil aliud obfuerit magis. Vidimusque canum,

&

& felum , & aliorum eiusmodi animalium strata cadauera passim, haud dubie, quia proiecta , & iacentia humi nonnulla attigerant, traxerant, versauerantque rostro .

In tantis ludibrijs, tantisq; ruinis, & intam deplorabili statu vitae mortalium, tria hominū genera Florentiae notata fuisse perhibent.

Vnum genus erat sobrium, hilare, moderatum, quale nullae philosophorum leges, nulla seuerior tetrica disciplina, ne saluis quidem rebus, & incolumi Ciuitatis statu damneret. Hi curas edaces, & moesta cogitationum excutiendo penitus, abdicandoque & fugitando, sed & voluptates haud minus vitando inhonestas, modico, sed exquisito cibo potuque utebantur, & facto grege in contubernium aliquod salubre congregati, quò nec strepitus, nec fama funerum accidere posset, fidibus, & cantu, colloquijs honestis segne ibi otium oblectabant egregiè munitos aduersus pestem ita sese existimantes.

Alij contra, remedio assumpserant omne luxuriae, lasciuiæque & petulantiae genus. Vagabantur hi bacchabundi ac dissoluti per vias, & ingressi tecta etiam aliena, quae vacua fecerat dominorum, mors regnabant ad breue tempus ibi tamquam in suo, ac
reptis

reperitis illic in propatulo omnibus , quae clausa aliàs & obfignata siue custodita habentur , fruebantur liberè his absque vlla cogitatione quod reliquiae mortuorum istae essent . Vt cuiusq; domus satiati delitijs erant , tum auferentes inde quicquid fortè placuerat , tum relinquentes ibi mortuos è sua caterua nonnullos , ad alia subinde , atque alia domicilia desertarum opum ibant , & his quoque proculcatis , & effusis potius , quàm absumptis , aut supra dolia , thoros , arcas easdem occumbebant , aut egesto quicquid pretiosi erat , parauerant diuitias , quæis itinera ipsa locupletarent , extincti videlicet atque collapsi antequam peruenirent illuc vbi abscondere talia destinarant . Et fuere qui portarent absconderentque feliciter : ac ditatas ita Florentiae domos esse nonnullas constitit ex calamitate ea , & solitudine ac spoliatione aliarum .

Porrò , & hisce desperatis atque rapacibus , & sobrijs , modestis , delicatisque illis , interiecti alij fuere , qui , nec parce ac restrictè , & timidè , sicuti priores , nec sicuti classis altera , latronum furentiumue discursu , sed eleganti & circumspècta securitate , per suburbanos hortos , per déuia camporum , & fere circum
moenia

moenia Urbis ambulabundi ludibundi capta-
rent: laxamenta quidem illa animis, sed &
corpus opipare lauteque nutrent: & aduer-
sus auras pestilentes, muniti flosculis, &
omni suauium odoramentorum genere nares
cerebri praeccordiorumque vias, communem
eius anni sortem aut euitare ita studerent,
aut vitari posse credendo differrent saltem,
& iucundè interea, tranquillè ac remissè in
metu, & fuga & morte caeterorum, agerent
vitam. Simillimique alij istis, procul ab Urbe
fugitantes, rura villasque petebant, quasi fu-
turi illic extra pestilentiae & mortis aleam.
Nec ideo fefellere: deprehensique sunt etiam
ibi nonnulli eorum. Sic Florentina inge-
nia fugerant, spreuerant, & voluerant elu-
dere pestem: illuſeratue pestilentia ipsis.

Fuere non aliter etiam in Mediolanensi
pestilentia furōres & lasciuiae latronum &
latrocinijs opportuna vacuae domus, & ex
diuerso, modesti, cauti, ad curam suae salutis
attenti, lautissimi homines, exitusque talium
etiam Florentini populi mortibus pares

COMPARATVR PESTILENTIA ANNI HVIVS
CVM EA QVAE FVERAT ANNO
CIO IO LXXVI

SED lubet abire ab externis ac potius *Galerius sim habet.*
Squaerere domi similitudinem hanc, & pestilentiae mores semper eosdem: neque comparatio tantum haec, sed noua narratio Patriae casuum erit. Et nulla sanè bella, nullaeue fuere legiones, quae vexauerint illa Patrum aetate transitu vel mora Prouiuciam, feminaque pestis per iniurias sordesque & contagia militis externi iecerint, & reliquerint sparsa per terras quacumque incesserant, ut inde perueniret dira seges in Urbem, sicuti in hac nostra aetate, nostroque penè excidio accidisse demonstraui.

Namque, debellato per Carolum Caesarem Rege Francisco, Galliaque per captiuitatem & vltima exempla Regis illius, aut prostrata & abiecta penitus, aut excitata & irritata nequicquam, simul amplectente modis omnibus ac volente quietem Rege filio victoris Caesaris, atq; transfuso diuinitus in id caput spiritu pacis, & sapientiae, quantam maximam alicui dominantium, & alicui mortalium vniquam contigisse pronuntiauerunt sapientes,
non

non solum pacata per Italiam, & tranquilla cuncta habebantur: sed etiam Reges fere conticuerant externi, nec temerè aliquandiu arma vlla mouebant. Ne fames quidem antecesserat pessima illa furiarum trium, quae nunc tumultuari populum coegit, atq; penè deflorauit obsequij gloriam plebi iturae ad arma, si qua alia plebes magis proprium id sibi decus contendere vellet. Sed initia pestilentiae prioris illius inde exitere, vnde non facilè quis crederet, & vnde facilè tamen exoriri potuerunt: fuitq; diuersa simul, & simillima origo mali nobis patribusq; in hunc modum.

Vrbs Tridentum, & Vrbs Mantua, necnon finitimae Venetorum Vrbes, Venetiaeque ipsae inquinatae malo hoc erant: &, dum populi gentesq; illae finitimae terris Urbibusue nostris terrae vtique pestilentes essent, abirentq; quotidie magis in solitudinem atq; vastitatem: erat interea Mediolani Iubilaeum Apostolica secularis anni celebritas, Apostolicumq; munus à Pontifice Gregorio XIII. concessum Metropoli huic, ad eam formam, qua paulò ante Vrbi Romae solito annorum ambitu redierat diu expectatum id grande salutare mysterium. Ad Iubilaeum hoc, quo reconciliatur Numini
genus

genus humanum, & coelesti indulgentia purgata culpis, ac renouata mortalitas ad gaudia numquam interiturae vitae instauratur, dum confluerent vndique agmina: minime mirum fuit, si, ex ijs, quas dixi terris intulere aliqui pestem.

Melinianum atque Paruzerum, hic ignobilis in Verban lacus ora pagus, illud frequens decimo ab Vrbe lapide municipium, fuere peste in illa veluti Clusium nunc, & Bellanum, Modoetiaque, & Seronum, & alia mista obscuris nobilia loca, quas morbi portas aditusque primos appellare possis, quoniam, hinc, atque illinc principia mali extitere, fixitque circum ea loca pedem pestilentia gemina Urbis, & hoc, & illo tempore maiores minoresue luctus allatura Metropoli, & insignem vtraque relictura sui memoriam ad posteros gentesque omnes.

Ac sicuti Locatus & Bellanus, & alia villium capitum nomina, quae posui, obscuritatem in omne tempus nobilitauere suam hoc ipso, quod infame sibi fecere nomen, infameque testum, vnde prima cum bubonibus, & alijs pestilentiae signis cadauera prodierunt: ita mapalia Cumina prope vicum Olitorum, & eo in vico Olitrix anus meruere
tristis

tristis memoriae partem apud nos hac tam turpi nota veneficioque, quòd eorum nomina leguntur prima inter primos, qui hanc funestauere patribus Urbem : perscriptaq; extant in temporis eius annalibus, quomodo homines quoque nostros, qui primi traxere, dein profeminauere morbum, & perscripsimus nos, & abominati sumus. Et hactenus quidem pari plane gradu pestis vtraq; processisse visa est, originemque etiam eandem habuisse, quatenus ab terris vtraque alienis, ac si minus ab milite prior etiam illa, certè ab peregrinis illata fuerat.

Illud verò circa eadem rerum initia differt, quòd nulla contumacia maiorum aduersus praesentis morbi fidem, nulla infania plebis irridentis explodentisque malum, nulla remedium dilatio notata traditaue est, quae praecipua nostri temporis damna causaeque damni, neque dubia fuere, neque in tradenda rerum harum memoria dissimulari potuerunt. Sed statim exterriti, statim erecti attentique in prioris pestilentiae principio omnes, & qui gubernabant, & qui ad gubernacula sedentibus obtemperare atque ad exequenda imperia nutusq; obseruandos adesse debebant in tempestate illa naufragioque imminente.

Non

Non reperi tunc motum fuisse petulantia
 populum, medicosue penè lapidatos, iniec-
 tasue cunctationes etiam à procerum minis-
 trorumue nonnullis : parique modestia, &
 pauore, & strenuitate imperatum obeditum-
 que est : ita tamen, vt non effugerent ideò,
 sed minuerent sibi cladem, quam nostra aetas,
 & proles haec, hi domorum earundem he-
 redes, non credendo & contemnendo promp-
 tius latiusque acceperunt. Verùm, in hoc
 aliquanto dispare habitu animorum & rerum
 temporisque & Reip. ipsius, atque in hac
 diuersitate penè fatali, incidit adeò simile
 quiddam, adeòque in ipsa similitudine miri-
 ficum, vt quasi res plane diuina, & compo-
 sita diuinitus accipi possit ab ijs etiam, si qui
 sorte potius & casu pleraque rerum humana-
 rum congruere ita inter se, & euenire inter-
 pretantur.

Quippe Tribunal Sanitatis, quod inter
 hosce Libithinae fasces, inter Regna mortis
 haec, in tyrannide pestis, veluti compar atque
 oppositum tam impotenti dominatui Regnum,
 sapientia maiorum instituit, ac delegatam
 huic vim maiestatemque suam voluere Reges
 interea dum scilicet ipsa etiam paueret trepi-
 daretq; Maestas : id inquam Mediolani Tri-
 buual

bunal anno illo cio id lxxvi. obtinebat Sena-
 tor Hieronymus Montius Senatoris Princi-
 ualis pater, Auus eius Montij, quem nostrae
 pestis tempore, & fuisse Praesidem, & in eo
 magistratu decessisse memorauimus, sequente
 Virum mortemque eius haud ambigua fama
 Ciuitatis vniuersae, quasi non decessisset ma-
 gis, quam vtrò ipse pro Patria sese deuouisset.
 Tam promptus in pericula animus, tanta
 Iuueni generositas, & contemptio vitae, dum
 propositum sibi ante oculos haberet Patris sui
 Patrem, dumque vellet hunc imitari simul,
 & se quoque relinquere posteris imitandum.
 Is igitur nostri Praesidis Auus anno illo
 cio id lxxvi. Praeses Sanitatis cum fortè esset,
 statim ubi pestilentiae fama verberauerat au-
 res, & excitatus ipse strenuè est ardore, &
 caritate, ac nobilitate insita quidem generi
 ac stirpi, sed & propria ipsius: & tribunalia
 illico magistratusque caeteros excitauit, qui,
 nec stimulis tamen, nec adhortatione sicut
 accepi, indiguerunt.

Omnia decreta, instituta, facta protinus
 eadem munificentia sumptibusque & animis
 ijsdem, quibus & decreuere fecereque poste-
 riores, nisi quòd incredulitas horum, atque
 ex incredulitate dilatio quaedam perniciosa
 fuit.

fuit . Missi datique custodes ad pontes tra-
iectusque fluminum : & praeter custodias
claustraque portarum Urbis , moenia etiam ,
tum educta altius , quàm praebere posset ascen-
sum humilitas , tum obstructa & instaurata
quàm foret aperti & ruinosi nonnihil , quàm
transcendere siue transilire homines possent .

Conscripti milites in singulas regiones Vr-
bis , centuriaeque factae , quae excubias in- *Militia.*
uicem circum moenia agerent . Electi ex
nobilitate qui circumirent in equis assidue
Vrbem obirentque custodias & omnia reco- *duces.*
gnoscerent : alij , qui ad tertium quartumue
miliare , longiusque etiam quotidie excurre-
rent : alij , qui ulteriora , & longinqua per
agros obirent viserentque , descripti fuere cum
satellitibus & milite quique suo tamquam in
hostem . Ipseque Montius , licet grandi iam
natu , & animo quàm corpore validior , vel
contacta iam , vel tantummodo suspecta rura
adibat , cingentibus latera nobilibus alijs
propter Viri nomen , & integritatis , ac sa-
pientiae famam , quae de Senatore eo erat ,
occupaueratque animos .

De tesseris , & cauponis , & pagis , locisque
omnibus diligentissime cautum : ne qua fraus
fieret : neue adulterinae pro veris , ac legiti-
mis

mis tesseræ exhiberentur : ne qui reciperentur in publica diuersoria peregrini : ne qui etiam in pagos , aliaue loca admitterentur , sed munito cancellis aditu , qui accessissent arcerentur , ac monstraretur eis aliud per deuia iter , quo videntes itinere ad deuia item diuersoria cauponasque diuerterent , vbi hospitalia quidem eis omnia iure gentium , sed absque commercio , & communicatione vlla praeberentur. Geruli , baiulique , & ferendis oneribus , operibusque faciendis victitans multitudo ad quæstum è montibus vallibusque suspectis conuenire solita , ne vltra certum numerum incretceret , interdictum.

Deserti , vagiq; & destituti per vias pueri puellaeque , & pari mendicitate viri feminaeque , conquisiti collectique omnes , & coniecti extra Vrbem in antiqua domicilia , quibus ex Victoria nobile cognomentum manet ob fusosibi caesosque hostes , & albicantia diu ossibus arua , sicuti conspiciuntur adhuc. Ibi sordidae , inconditae , squalidae centuriae mendicorum D. Caroli sumptibus alebantur , instituebanturque simul , non aliter quàm sicuti vidimus nos Stellae Xenodochium in Vrbe completum multitudine eadem . Lazaretum quoque Gregorianum , & Lazareta minora
pestis

pestis eadem impleuit.

Quae iuuat conferre sic omnia, vt intelligatur constetque per omnia illud, nihil inter pestem vtramq; fuisse diuersum, praeter magis minusue creditam principio hanc, & praeter maiorem etiam minoremue in exitu numerum eorum, qui periire quia non crediderunt. Et, cum recentior classis, non nisi posteaquam in conspectu funera erant, assentiri voluerit, capereque malorum suorum fidem: antiquior altera rumores ipsos pro denuntiatione certissima habuerat. caueratque statim quantum aduersus destinata suprema cauere ac providere mortales possunt.

Ad boletos vsque & poma acerba, vnaqueque immaturas haec cura descendit: atque edixerunt ne venalia ista in Vrbe haberentur: edixere, ne coriarij facitarent artem alerenturque bombyces qualia tetri odoris inquinamenta viderant etiam sustulerantque nostro tempore procures nepotes filijue eorum. Cloacas, fossas, nilos, receptacula purgamentorum Urbis, quae nunc subterraneo meatu aquarum eluunt euerrunt ambiuntque totam, aut antiquitus inchoata absoluerunt, aut, vbi non erant, facere instituerunt. Pecuniaria res in iisdem tunc fuerat angustijs iisdemque

*Descriptio
Lienum
Medicinalium*

demque difficultatibus, in quas, & nostra aetas nostraque pestis incidit: ampliusque etiam tunc credo esse laboratum.

Nam & exhauferant aerarium, aereque insuper alieno Rempub. onerabant ducenta millia nummum aureorum donata Regi ob Flandriae bella in suos illos & Catholicae Religionis hostes, atque perduelles: neque solita vectigalium, quae publica res innititur, toleratque onera necessaria, exigebantur. Remedio fuerat malum aliud, foenora, & versurae & hoc, quod noua semper incommoda parit aeris alieni subsidium, quo implicantur, inuoluunturque vinculis inexplicabilibus dum volunt sese expedire non homines, modo singuli, sed populi etiam Respublicaeq; ditissimae miseri, atque inexplicabilius, & damno maiore, nisi quod aduersus publica damna viri- tim quisque constans, & liber solutusq; agit: fitque malum ita sempiternum, & fere sine sensu, quia non ducuntur in vincula Ciuitates.

Id, quod, & denuntiatur ab hac Ciuitate Consilioque Generali semper libere est, & clementer, facileque auditum, denuntiauerunt tunc quoque Decuriones, & professi fuere litteris tabellisq; omnibus, quoties in extricanda, siue in eroganda grandi ob hosce sumptus.

sumptus aliqua summa gemuerant. Pertinere ad Maiestatem Regis huiusmodi onera, & impensas. Ita scriptas esse leges: extare Caesarum exempla: subiisse Sfortiam: annuisse Carolum V. & anno c10 10 xxix. decretum de ea re fecisse: aliaque similia istis, dicta, & accepta cum responso illo scilicet. Maiestatem quoque Regis aere alieno penè esse demersam: quod responsum negotiatori fortasse cuiuslibet graue pudendumue foret: apud dominum fere Orbis, & auriferi mundi possessorem ab solis vtraque domo ordientem finientemq; Regna, non item dedecori istud.

Eaedem igitur Reip. denuntiationes eademque responsa Regiorum super negotio hoc fuerant prius, quae nostro hoc anno saepius repetita esse retuli. Vtroque tempore reperti sunt, qui Reipub. commodarent, peterentque, & haberent aliquandiu sustentatae Patriae gloriam, quae postea, lucro foeneratorum intellecto, minor fuit. Reperebant maiores, & imitata est sequutaq; Ciuitas illud etiam, ut alendae plebi quoddam aliud aerarium instituerent, facta ex pijs locis collatione pecuniarum, sine strepitu, sine foenore, sine etiam recusatione cuiusquam, quoniam id Reip. quasi patrimonium esset.

Ad propitiandum Numen auertendasque;
 coelestes iras, non facile dixerim, vtra magis
 intenta, magisque larga, & supplicationibus,
 & votis fuerit aetas, cum neque religiosius
 ampliusue quicquam facere veteres illi po-
 tuissent: & posterius, quasi certamen, non
 exemplum modò pietatis inde sumpsisse vi-
 deantur: ac plane certauere cum eis. Nun-
 cupauerant illi sua vota: supplicationes ad
 templa per continuos aliquot dies habuerant:
 destinauerant aedificanda alia templa propul-
 satoribus pestilentiae Diuis: posuerant aedi-
 culas: ieiunia, festosque dies instituerant:
 & recordati, quemadmodum anno CIO IO XXIX.
 cum incidisset idem atrocior etiam violentia
 Vrbi malum, impositae fuerant columnis ad
 compita cruces, quae, simul acerbissimae
 Christi necis recordatione solarentur atque
 confirmarent indigna & perpeffu aspera mul-
 ta patientes: simul, spem & pignora salutis
 praeberent: haec ipsa, quae iam exolesce-
 bant trophaea renouauerunt, & populum ad
 victricia illa mortis, & Sathanæ signa sem-
 per intuenda excitauere.

Haec, & alia maiores in sua peste pla-
 camina coelestium irarum, & subsidia re-
 bus excogitabant, quaesierantque. Quod-
 que

que longè gratiosissimum, & non gratia-
 modò, sed etiam potentia quadam & suo
 iure validissime efficax viderant fore placa-
 men, deduxerant ab summa testudine Templi
Clauum, qui confixo olim Saluatore fuerat. *Clauus, qd*
 etiam ipse pars humanae salutis: neq; potior *habetur in sch*
 alia in terris salus: atq; coeleste pignus id, & *maximo p*
imbutum diuino cruore ferrum, veluti depre- *per p. b. am*
 catorem vnicum produxere, cui venia negari
 non posset. Circumtuleratq; Cardinalis Ar-
chiepiscopusq; Carolus, insequente populo per
Vibis vias, incomparabili temporis eius prae-
rogatiua, cum futurus Diuûm vnus, & destinatus
choris iam ille sempiternis pulsaret precibus
 & incessu suo coelum, & in parte supplica-
 tionis esset cui preces fundere sequens aetas
 debebat. Id supplicationi maiorum singulare
 adiumentum obtigerat, & summa commen-
datio apud affine iam Pontifici coelum. At
 nos in spe vltima mouimus protulimusque.
 Reliquias Pontificis eiusdem, nec dum tamen
 matura veniae dies erat: & quomodo appro-
 batum id cognitumq; fuerit, ipsa crescentis
 deinde morbi fide, caeteraque ad impetratam
 vsque salutem exposuimus: nec repeti ultra
 comparariue ista attinet.

Exactae comparisonis loco erit, si perre-
 xero

xero exequi ac recensere quae fecerant in sua peste patres auique Procerum horum : quae pertulit ac vidit ille hodierni populi parens, fatorque populus : quae interim egit diuinus eius aevi Pontifex haud vltima rerum meritumque tantorum , vnde beata sempiterna vita ei in conspectu beatissimo infinitae Maiestatis : vnde radiatum quoque caput apud mortales, & decretus eius nomini, ac memoriae honos , quem obtingere posse mortali , misericordiae diuinae opus est tam rarum , quàm rara capita electa & nata atq; adulta & profectò confirmata in id.

Ab ea supplicatione maiorum, quae superauerat haud dubiè nostram, & ab ea pompa, in qua duae maximae res apparuere Vrbi : nempe adaetus per neruos venasque Saluatoris ille Clauus, & Clauum attollens lacerata, & confixa doloribus ijsdem diua dextera Pontificis : ab circumlato ita per Urbem pignore, quo non produci , siue circumferri maius aliud potuit : coepit grauescere malum illud alterum aequale pesti, siue causa fere pestis : & fames, quae nostram, tum antegressa, tum comitata pestem, priori pesti haftenus ex parte pepercerat, orta violentior est, & infestissime circumstetit hanc.

Non

Non suppetebat iam annoua ex agro, qui tam late circumiectus Vrbi, lateque per spatia immensa excurrrens desiderabat cultores iam fere suos, qui, aut mortui erant, aut abdititugurijs, in mapalia relegati, perculsi attonitique pauore, aut deseruerant opus, aut segniter pigreque faciebant. Excogitatum à Consilio Generali est, annuitque temporis eius Gubernator, & regia mandata in id dedit, vt ex Prouinciae vrbibus, ab Laude Pompeia nominatim, & Alexandria, & Nouaria Ticinoq; quoniam eae sunt maxime fumentariae Vrbes, frumenti copia coemeretur, atque comportaretur. Non sanè negabant de frumento quicquam: sed increscente, ac diffundendente sese quotidie latius morbo, omne cum Metropoli commercium horrebant: atque ideo non facile super ea re inter Metropolim Coloniasque conueniebat.

Et Papienses praecipue detrectare ausi mouerant sui fastidium, haud secus, quàm sicuti apud Romanos olim grauiter notatae Coloniae fuerunt, quae militares delectus Imperio negarant. Sumpta tamen ex Laumellino agro praesertim copia frumenti est, ratioque inita, positionibus itineribusque descriptis, vt apud Villam Craſtam in praeparata ad id horrea

horrea iuxta nauigabilis fossae ripas ea copia deueheretur, atque transdita in nouos saccos imponeretur in naues, portareturque ita sine vlla terrarum earum fraude ac detrimento in Urbem. Id, quod diligentius attentiusque fieret, & dederat Ciuitas, & Coloniae ipsae mittebant è suorum numero, qui ad loca illa sederent, quâ conuehi frumentum, exonerarique, & imponi deberet.

His etiam permissum imperium, & facta potestas cogendi frumentarios omnes conductoresque agrorum ad id, vt iusto pretio venderent Reipub. quicquid tritici, hordei, oryzae, seliginis, in horreis haberent: neque vt venundarent solum, sed etiam, vt Mediolanum in horrea publica conuectum probeque curatum exhiberent. Alia Binascum annona ex agro Ticinensi, alia ex Laudensi ad Gaheram, quod loco nomen, portabatur. Fuere in ijs locis instituta emporia: ibantq; ex Vrbe illuc quibus empto opus esset, ne cogerentur, qui ea portabant venaliaque habebant, terras intrare pestilentes. Praefuerunt, parte in vna Scacabarotij, Guidus, & Iulius: in altera, Marcus Fannianus praefectus annonae.

Cumque pauperibus alendis curarentur
ista,

ista, & fierent, sine quibus fere non durat
 vita, balsamentorum etiam, oleique, & ga-
 neae, & rerum aliarum, quae potius sunt irri-
 tamenta palati, quam alimenta vitae, necnon
 lignariae carbonariaeque rei, & carniū &
 altitium, caseique, suscepta publice cura est,
 tamquam priora illa suppeterent, quibus ista
 accedunt: taliaque è Placentino agro prae-
 fertim accersenda mandauere Ambrosius Ar-
 chintus, Gvidus Cufanus, & Caesar Petra-
 sancta. Aded, nullius ne minimae quidem rei
 cura spernebatur in maximarum sollicitudi-
 num concursu, ac tumultu: quam Romani
 Senatus prouidentiam, dum summa imperij in
 discrimine esset, admiratus scriptor vnicus
 ille populi principis terrarum, illa ipsa, quae
 posui verba posuerat.

Caeterum, cum, & minima haec, & ma-
 xima alia vrgentia, & horis omnibus ingruen-
 tia simul, onus iam intolerabile fecissent,
 repetebatur adhuc à Proceribus illa nobis pa-
 riter actio saepius repetita nequicquam: ad
 Regium Fiscum pertinere impensas. Respon-
 debantur solita illa quidem de aere alieno
 Regis etiam, ac de mole Imperij, cui mini-
 um esset quicquid auri nasceretur in venis,
 siue per flumina inclyta subsideret, quicquid
 aut

aut mitteret Indus, aut tot Regnorum tributa conferrent. Sed, & fatigatis assidua efflagitatione Regijs inuenta subtilitas est, quae iure etiam atque interpretatione legum id negaret quod res ipsa negabat. Manavit à Governatore siue à Consilio Secreto, siue simul vtrum responsum in haec verba.

Quod de pestilentiae impensis conquere-retur efflagitaretque Ciuitas, & ad Maiestatem Regis spectare onus contenderent egregij Viri Decuriones: de ea re sic videri: petitionem esse diuidendam, quatenus, & stipendia ministrorum, & reliqua sumptuum ea petitione coniungerentur. Stipes eas, operarumq; mercedes, onus esse Maiestatis: alendi populi non item: & pauperes vtique sustentandos esse Ciuitati, ex cuius corpore corpora omnino illa essent. Sic, & declarasse, sanxisseque ipsos, quandoquidem, in ea fame, quae septennio antea fuerit, subierit vltro Ciuitas id onus, atq; septuaginta millia nummum aureorum erogata de publico pauperibus alendis fuisse reperiantur.

Rursus ad ea Ciuitatis nomine Decuriones: quod pie liberaliterque Ciuitas aliquando fecisset, non debere id pro praeiudicio accipi, nec fraudi esse oportere merita & obsequia

in Regem . Inductos enim esse pietate , & fide erga ipsum , Maiestatemque tantam , ne tot millia in eius Imperio perire fame sine-
rent in Vrbe scilicet , quam ea Maiestas prae-
cipua indulgentia , & benignitate tueretur ,
caramque haberet . Cùm , & Decuriones
aequa postularent , nec Regius Fiscus oneri
subeundo esset : quod medium inter necessi-
tatem atque munificentiam erat , fecerunt .

Quaterna millia nummum aureorum in
singulos annos ex vectigali salario exigenda
Ciuitati assignauerunt , quae ad quatuor mil-
lia ex vini metretis summa adijceretur , nec
paruum in praesentia leuamen , nec eiuf-
modi tamen , quale res ad extremum adducta
requirebat . De reliquo spes à Gubernatore
facta erat , posse ab Rege impetrari , si laxa-
menti aliquid ab magnis necessarijsq; sumpti-
bus nata Maiestas foret . Sumpserunt Procures
inde animum : Bripiumque Sfortiam accomo-
datum aulae moribus , & , nobilitate ingenta ,
simul gratia apud Regem perferendis publici
Consilij precibus idoneum in Regiam des-
tinauere . Perscripta ei mandata legationis
negotijque totius : alia relicta ipsius arbitrio ,
prout inclinationem animorum vidisset men-
temque Regis .

Legatus clar

In primis autem agere hoc , & exponere debebat: Decretum Caesaris, clarè, & discretè sine exceptione vlla esse perscriptum , vt paternae voluntatis etiam reuerentia heres filius Imperij gloriaeque eius moueretur ad statum adeo afflictæ Ciuitatis clementer benigneq; respiciendum. Et legatio quidem ea exitum postea suum habuit, quem inter temporis eius negotiâ annales nostri continent Pestilentia verò nihil dum sanè remittebat , vt maxima omnium , quae vmquam accidere cladum eiusmodi videri posset, nisi longè maior illa nostra fuisset, in qua narranda feci ego fortasse more aetatum hominumque omnium, qui sua mala semper suaeque bella efferre supra casus alienos , & augere amant , & vt quidque nouissime accidit , hoc illud fuisse maxime terribile omnium maximeque atrox praedicant.

Fecerat hoc etiam tempore magnitudo pestis angustum & impar multitudini Lazaretum : atque capacitas illa tanta domicilij, quae descripta est, sufficeret in tali malo fortasse cuilibet Vrbiū aliarum . Metropoli populoque huic, tunc, sicut, & nostra aetate accidit, solita semper etiam erga beneficia liberalitatesque dominantium obtrectatione
penè

penè increpita est, siue auaritia liberalitatis siue improuidentia sapientiae veterum Ducum; qui intra eos tantummodo fines opus id regale descripsissent posuissentque. Debuisset latius ampliusque metari castra illa mortis, spatiumque capere illud, vnde pars nulla versae tantae Ciuitatis in mortem talemue & pericula mortis excluderetur.

Factum est in eis Lazareti angustijs, & in ea periclitantium morientiumque multitudine id, quod & nostra postularat monstraueratque necessitas: credoque ego exemplum inde sumptum etiam fuisse Lazareta extra Urbem alia aedificandi, qualia nuper steterunt: edixerantque & impetrarant, vt ex vicinis Vrbi locis intra vicesimum miliare, ligna, tabulae, paleae ad ea aedificanda comportarentur, operaeque etiam conuenirent. Ducena in singulas portas tuguria posita fuere, quarum & formam, sicuti in eius pestilentiae monumentis descripta extat subijcere ac repetere haud alienum fuerit, vt non modò priuatim inter Urbis acta conseruetur: sed publicè inspicì possit alienis etiam, si fortè scripta vmquam haec egressa hinc, & delata aliquò erunt.

Situs eligebatur quam minime depressus, & quantum fieri posset erectus, atque accliuus.

Ordines

Georgius Nig.

Ordines classessue tuguriorum porrigebantur in longum, aequalibus, ubi loci pateretur natura lineis. Distabant itinera denum inter se cubitorum interuallo: interuallumque inter tuguria ipsa cubitorum senum fuit. Erant omnia aditu limineque obuerso ac spectante in eandem partem: spiraculum supra limen tenue habebant, tegmenque ostiolo praetentum ad id, ut aegrotus unusquisque cadente etiam inbre stare sub dio, frui liberioribus auris, vitare taedia carceris illius posset.

De Lazareto
Erant è paruulis trabibus contexta pauimenta ipsa quoque edita à terra, & alta paulisper, ne noceret humor, additis in circuitu cauis quibusdam, per quae caua pluuiæ aquae euergerentur in fossam: & erat unicuique Lazareto circumducta fossa, tum, ne qui temere per diem aut licentia tenebrarum, ingrederentur, insultarentque clausis, tum, ne temere etiam ipsi inde exire possent: inq; fossam eandem aquae decurrebant aliae, quae in varios Lazareti usus ab proximo quoque alueo ductae, & corriuatae circumcirca erant. Extra cancellos, & septa cuiusque Lazareti tuguria struebantur militi accipiendo, qui rationem ad limina agebat.

Alia ibidem tecta coquendis cibis tabernacque

naeque medicamentariae , & omne quasi instrumentum populi vnus, omneque numerosissimae familiae ministerium in eo aditu erat. Altè erecta Crux ostendebat ei languentium populo Saluatorem affixum : ac sicut in maiore Lazareto , ita ad minora etiam illa , praecipua cura diuinarum rerum fuit. Dabatur quotidie signum , ad quod procumberent in genua singuli, Crucemque intuentes, illa Christi tormenta meditarentur. Res quotidie diuina fiebat, aedificatis, & positis eo situ sacellis vt ab sui quisque limine tecti, si minus auditor, spectator certe tanti mysterij esse posset.

Ad effugia prohibenda inclusorum, imperium, & cura nobilibus viris erat. His centeni milites attributi singulis cum scriba publico ministrisque alijs : ducesq; ipsi appellati. Summa impensarum in hasce custodias ad librarum quadraginta sex millium ascendit, ac relata ita est. Aedes vnicuique Lazareto propinquas custodiarum huiusmodi causa, lignaque & culcitras & quaecunque alia in tabernacula militum ducumque ipsorum vsui forent, qui praeparanda coemendaque haberent electi fuere.

Ad cibaria item paranda , & exhibenda

Laza-

Lazaretis, suos vnaquaeque Porta nobiles habuit, per quos ea maxima omnium res diligentissime administraretur. Non autem temere in Lazareta, nec facile pauperes omnes promiscueque admittebantur. Sed ut quemque educendum ex Vrbe deportandumque illuc circitor, cuius ea cura, retulerat, inspiciebant cognoscebantque electi in singulas Paroecias ad id. Si causam necessitatemue probabant, admittebatur, atque referebantur in codicem omnia haec: nomen cognomentumque ipsius: conditio & status, & cui vxor liberique essent, numerus quoque eorum, & quod die, ex qua Paroecia & domo receptus, eductus, admissusque esset.

Ad Lazareti porrò limen iste deductus, siue deportatus, posito quem attulerat vestitu lauabat, & noua aliqua coopertus tunica mittebatur in tugurium. Bini, terniue in singulis tugurijs erant: gradusque facti etiam, ut, siue manifeste infectus, siue tantummodo suspectus quisque esset, in sua separatim classe ordineque collocarentur. Habebant classes ordinesque isti ministros quoque separatos, vetito inter eos commercio congressuque omni, ne pars melior ab deteriore corrumperetur.

Medi-

Medicorum penuria laborabatur, latitantibus, siue diffimulantibus artem, qui vitae dulcedinem ante quaestum habebant. Ac licet salaria ultra solitum etiam effusa proponerentur, non tamen è tenebris, siue è Villis extrahi potuere nonnulli, qui abdiderant se se, mercedemque mortis abominabantur. In ea necessitate artis, cuius etiam nomen, solatium & medicina aegrotantibus est, cum undique conquirerentur qui titulum saltem auctoritatemque medentium inferre in Lazareta possent, ac vellent, reperti sunt apud Ticinum Galli homines, qui dicerent, ac profiterentur se se medicos, nec mento fronteque, & corporis habitu discrepabant. Depromebant etiam aphorismatum aliquid, & producti forte à caupone ad aegrotos illic in vicinia nonnullos, praescripserant dederantque pharmaca, quibus epotis conualuerant non morituri tunc utique illi.

Aiebant ire se Venetias ad Urbem illam peste liberandam, & ibant. Quatuor hosce, siue quinque medicos, nihilo peritiores, potioresve muliere montana illa, quae nostris temporibus, sicut memoravi, Lazareto illuc, conduxerat luculenta conditione missus eius negotij causa Lonatus, adduxeratque secum

cum in Urbem. Pactum erat stipendij in singulos menses, quantum ne legitimi quidem, & iusti medici poscere auderent.

Mille sexcenti aurei nummi fuere, cuius pecuniae pars maior, data illico repraesentataque est. Ducuntur in Lazareta isti: & deprehensa paulo post nescio quomodo temeritate, atq; inscitia, coniecti in carcerem, caesi virgis, & pecunijs exuti, quas acceperant, mox, ne oneri insuper essent, dimissi abierunt diminuto etiam grege verberonum: nam duos eorum pestilentia ipsa puniuit, mortuique in vinculis sunt. Actum deinde cum Collegio medicorum uti quoquomodo subuenirent, & eius authoritate Collegij prouisum necessitati est, ac prodire inde, qui munere suo fungerentur. Assignata quinquagenum aureorum nummum mercede singulis è publico in singulos menses.

Lanfranco Boniperto **N**ouariensi ob viri famam, & egregium in ea arte nomen menstrui centeni persoluebantur. Pharmaca, potiunculaeque, & quicquid aliud curando, ac resouendo corpori repertum est, è S. Coronae medicinis, quae regali munificentia fundatoris stant pauperibus apertae petebatur. Vbi loci eius copiae non sufficerent, proce-
rum,

rum, ac Reip. sumptu, impendioque prompto satisfiebat. Et subsidium ad omnia maximum erat diuina tunc inter mortales mente spirituq; diuino Coelestem in terris agens vitam Cardinalis Archiepiscopusque Carolus, cui non res alia opinor, aliaue pars vitae magis, aut patefecit in huius aerumnosae vitae termino Coelum, aut Coelestes honores postea decreuit, quàm facta temporis huius: veluti delitium accepta pestis caritate & amore erga populum: effusae opes: venditae terrae: nudata domus vti subueniret: & maiora adhuc ob salutem alteram inuenta per eam, & per totum illud pestilentiae tempus exhibita Ciuitati: quae quoniam editis de eius vita, & Pontificatu libris à me satis explicata esse arbitror, inuertere nunc, & repetere supersedebo. Dimensa panis, & vini ad tuguria, quae dabantur, fuere ad hunc modum.

Triticei panis in singula capita vnciae viginti, vini synceri non diluti vnciae viginti octo, orizae aliquantum, & si quid mutauisset praeterea medicus, siue delicatius leuiusue praescripisset, imperauissetque iure suo aegrotis dabatur. Tradebantur à dispensatoribus haec, accipiebantque inclusi horribili propter

*Sanctus Ce
ae miseris.
rat, uenir
omnia*

33
propter contagia cautione: eratque simillima
res, ac si alteri quidem ad ferrarum cubilia
accessissent: alteri verò velut ferae planè quae-
dam abdita introrsus occultaeq; manerent.
Stantes pròcul ab limine, qui attulerant ea,
deponebant humi, dein abibant: inclusus,
non nisi digressò latere pròdibat tollebatque.

Nisi corpora singula haec efficerent uni-
uersum Reip. corpus: & nisi tanti esset, Me-
tropolim conseruare tantam: nisi etiam in-
quisquilijs ipsis sordibusque plebis vita prin-
cipum etiam ageretur: miraretur quis, vnde
tanta diligentia, tot repertae artes erga plebe-
iorum horum vitam: Librarum centum quin-
que millia insumpsit Ciuitas, vt haec abdita
tugurijs per Lazareta multitudo; salubrius,
ac melius quàm apud suos quique lares ale-
rentur: diligentiaque maior fuit circa qua-
dragenarios illos secessus explorandis in-
securitatem corporibus aduersus insidias &
secreta pestis.

Apud Classès ordinesque tuguriorum in id
destinatos, si quis mortuus inter experimen-
ta ipsa esset: nemo eorum, qui intra septa
eadem mansissent, inde mouebatur, restitue-
baturque in Vrbem antequam exisset quadra-
gimus ab eius obitu dies. Vbi ea dies exie-

rat,

rat, tunc mouendus restituendusque ille, in alia nitida septa traducebatur, quae aditus duos habebant. Altero aditu ingrediebatur is, atque ingressus, detrahebat sibi vestimenta, quibus indutus erat, detractaque proiebat foras, & ad lauacra ibi parata lautus, purgatusque nouam assumebat vestem, quae ab altero aditu illata traditaque ei erat: & portâ mox ipse eadem egrediebatur si quidem nulla contagij signa comparuissent. Sic nudabantur, lauabantur explorabanturque corpora virorum. At feminae propter pudorem in manu obstetricum erant. Per eas inspectae, tentatae, probataeque dimittebantur: quae, & parientium intra Lazareta nixus adiuuabant.

Dimissi deinde isti & restituti in Urbem, atque in pristina recta deducti, non aliter exeundi inde vagandique ius habebant, quam si viginti dierum spatio solitarij illic etiam inclusiue mansissent. Ad tuguria qui mortui pecuniarum aliquid reliquerant in vestimentis, tradiderant, patefecerantue alicubi abditum: eae pecuniae, vel proximis ipsorum ab electo in id Decurione restituebantur: vel si non erant affines, aut propinqui, publici iuris fiebant. Par seueritas, & fides diligentiaque

tiacque procerum in pecunia, quam aliqui
tamquam morituri deposuerant, euaserantque
tamen. Recipiebant enim omnia ad terun-
tium sicuti deposuissent.

Vltimae morientium voluntates ne vanae
irritaeque essent, decreuit Senatus licitum
fore custodibus ministrisque Lazareti quibus-
libet, scribere, & obsignare testamenta, idque
perinde ratum fore, ac si solito Scribarum,
Notariorumue strepitu ac tumultu perscripta
authoritas tabulaeque obsignatae essent. Ac
ne qua per inscitiam fraus admitteretur peior
etiam damnosiorque captiunculis & fraudibus
artis, additum decreto est: non aliter rata fore
testamenta eiusmodi, quàm si cognouisset ea
approbauissetque Senatus.

Lactentes infantes, & recens ab vbere sub-
ducti, maiusculique alij, sed pares adhuc in-
fantiae debilitatique lactentium, & mortuis
matribus, alteroque etiam parente destituti
multi, grex infelix, & non aetatis imbecilli-
tate solum, sed etiam fortunae conditione
miserandus, aut moriebantur in lectulis iisdem
calentibus adhuc vltimo spiritu parentum:
aut sorte infeliciore superstitibus, trahentes
aegre rudem atque inexpertam vitae animam,
per humum euoluebantur, nullo tollente, nul-

lo etiam in proprijs suis malis, & vrgentibus super praesentia mala periculis quoque maioribus aduertente malum dedecusque temporis istud.

Aduerit sustulitque Resp. Domusq; parata capacissima est, in qua, tamquam sub matris ubere, materno sensu alerentur producerenturque ad vitae spem isti nati tantummodo in id, vt mori inter vitae rudimenta deberent. Nutrices, altrices, obstetrices etiam, & aliae ministrae istis, omneq; tenerum, id delicatum, & molle matrum genus, quod nato vixdum, mox fascijs cunabulisque constricto, atque inter mala simul & praefagia malorum vagienti animali, in suam quasi vicem mater omnium natura parauit: multae inquam velut Reip. filijs, publico sumptu & procerum cura conductae matres fuere in ea miserabilium nuper, mox felicium infantum domo. Domusque haec, & tuguria, quae alia super alia struenda fuere, dum crescit assidue aegrotantium numerus, dum etiam palearum copia materiesque vilior alia faciendo operi deest, quinquaginta M. libris Reipub. steterunt.

Ad x. Cal. Nouembris LX. Decuriones pro populi salute nuncupauere vota Diuo Sebastiano

triano Martyri, ut ciuis ille Urbis huius, per
vulnera illa sua, & receptas in viscera pro
Christi fide sagittas auerteret pestem hinc
Deumque propitiaret. Votaque fuere con-
cepta in hunc modum.

- „ D. Sebastiane Martyr, quem terra haec
„ Coelo edidit: quo Ciue, & alumno suo gloria-
„ tur Vrbs Mediolanum, ut gratia meritisque
„ tuis apud Deum impetrare velis huic cladi
„ finem, quae patriam tuam infesta appetit: at
„ nos vouemus Templum nomini tuo, quod
„ posuere maiores nostri, intra quatuor hosce
„ annos, qui proxime venturi erunt, amplius
„ magnificentiusque aedificaturos. Anniuersa-
„ ria festa die, quae mox nomini tuo aderit,
„ factam è crystallo pixidem Templo dabimus,
„ ut Reliquiae Corporis venerandi, quae ibi
„ sunt, pie atque honorifice recondantur. Idq;
„ vas ea die Decuriones nos, cum Populo, &
„ Clero portabimus rite confessi peccata &
„ sumpto Eucharistiae Sacramento, quò gratius
„ donum acceptiusque sit. Haec nuncupauere
vota, quae ut essent rata Ciuitati, scirentque
omnes, quibus ei Diuo promissis obligaren-
tur, euocatis vicatim hominibus, qui Paroe-
ciae quisque suae nomen auctoritatemue-
ferrent, rem patefecere, sicuti publice su-
scepta

scepta decretaque esset . Assensereque Syndici , & scribendo affuere .

De forma , & modo instaurationis , aedificationisque Templi permissum Alphonso Callarato , & Ioanni Arcimboldo , Baptistae Vicecomiti , vt describerent ipsi formam statuerentq; & curarent . Accensi erant animi tum religione erga Martyrem Ciuem Urbis , tum spe veniae salutisque impetrandae per eum : ac vota insuper alia addidere , quae nescio , an maneant omnia nunc , & cum fide persoluantur , an verò exoleuerint , sicuti factum est , fietque semper , vt sentiant etiam Diui fraudes hasce hominum , magnoque & antiquo humani generis crimine coniungantur haec : vota fallaciaeque in Sanctos .

Vouerunt annuente etiam , ac suadente Hispano Governatore Decuriones , & Mediolanensium suorum nomine promiserunt : Sodalitium fore instituendum Martyri huic , in quod nomina darent primi omnium , Marchio ipse Governator , vxor , liberique eius , Decuriones deinde , & Senatus , Magistratusque Urbis , & reliqua ordine nobilitas , vt cuiq; gradus , aut locus . Instituta , & onera Sodalitij , Consortijq; huius , non oneris , aut legis , sed tantummodo voluntatis fore dixerunt :

nec

nec praescripta vlla & certa , sed vt quisque
 suscipere vltro aliquid & facere pie voluisset,
 veluti haec. Diuidere in pauperes eleemo-
 sinae nonnihil : & quibus amplior esset for-
 tuna, conferre copiosius etiam largiusque
 pecunias , vnde subueniretur pudicitiae pe-
 riclitanti , si qua inter nobiles praesertim
 huiusmodi puellarum discrimina essent . Se-
 qui , ac deducere funalibus accensis agmen,
 cum ipso Martyris peruigilio portarentur
 in Templum maximum Reliquiae eius : fu-
 naliaque deinde ea relinquere in pios vsus,
 atque in vsum praecipue hunc , vt collocan-
 dis in matrimonio puellis pecunia etiam inde
 efficeretur . Vouere insuper, festam & nulli
 faciendo operi sacram in perpetuum populo
 Mediolanensi fore diem, quae dicata Marty-
 ris nomini ac memoriae quotannis recur-
 rit. Ituros eo die cum Archiepiscopo Urbis
 Cleroque Metropolitano ad Templum illud
 oblaturisque dona, pompa, & ritu eodem ,
 quo ad Diui Ambrosij Basilicam cum singu-
 larum artium vexillis, vexilloque augustissimo
 Pontificis antiqui itur annua die , quae pro-
 xima festo Paschatis est. Votum denique fuit,
 vti res diuina nomine sumptuque Ciuita-
 tis quotidie fieret in D. Sebastiani Templo :
 eligeretur

eligeretur in id à Ciuitate Sacerdos: eique Sacerdoti onus iniungeretur suppeditandi sumptum ad sacra solennia facienda in eum diem, quo die nuncupata haec vota essent.

Cardinali Archiepiscopo supplicatum, vt author ipse fieret, quatenus sine autoritate etiam Ecclesiastica non possent peragi haec, indeque penderent. Interea, nec humanis remedijs, nec diuina adhuc ope leuabatur malum: uestigaliaque Reip. & magnae Ciuium liberalitates, atque imperata etiam tributa quotidianis pestilentiae sumptibus exsuperabantur. Reperio fuisse tempestate illa, qui crebris repetitisque largitionibus conferrent in publicum summas, quas cogi potuisse vix fides, nisi relatae in codices perscriptaeque extarent. Nomina tunc opulentiae principalis in Vrbe fuere, Iacobus, & Franciscus, quibus Abdua cognomentum. Hi, siue traditas à maioribus, siue accumulatas industria sua opes nobilitauere subeundo in publici oneris partem, largiendoque Ciuitati pecunias, siue commodando citra quaestum iniuriamque foenebrem, quae vilis, & odiosa mercatura nonnullorum aliorum fuit.

Non sufficiebant ista tamen: actumque de uestigalibus Reip. vendendis, vt summa tri-
ginta

ginta millium aureorum nummum efficeretur. Deerant emptores : ac necesse fuit per Gubernatorem homines ad id compelli pecuniosos , vt pecuniam in eo emptionis genere collocarent . Senatus, iustitium esse iussit, dimisitque captiuos , qui ob aes alienum nexi attinerentur : & posita trabea Patres velut interim obliuisci maiestatis in vestitu breuiore incedebant .

Agitatum inde , & in Senatu , & inter Proceres de remedio , quod vnicum idem atque difficillimum , praecipuumque & vltimum inter pestilentiae extrema semper habitum fuit , vt scilicet Ciuitas vniuersa, tamquam vnus homo , atque tot adhuc millia promiscuae multitudinis, quasi corpus vnum, abdita, seclusa, discreta tenerentur in quadagesimum vsque diem, qui terminus experimentorum aduersus contagia haberetur . Fueratque dilata res ob sumptuum & impendij magnitudinem, angustiasque rerum , quas tanta intra parietes relegata , & obsessa multitudo suo iure postulatura esset ab iisdem, qui relegassent, tenerentque obsessos : & tumultus profecto aliquis timeri poterat. si tot mala simul populum egissent in praeceps : squalor , & solitudo sub tecta : fames, egestas, & ne laboris quidem artiumque

& operum emolumenta vlla: mētus contēptusque mortis, & in conspectu mors, & desperatio vitae, & Reip. quoque morientis imago quaedam, vt stimulus ad omnia audenda, ipsa impunitas foret.

Pridie Cal. Nouembris edictum est: claudi domos, includi oportere omnes: abstinendum esse commercio, & contactu, & euagatione luceque communi, & promiscuis vitae vsibus, si recipere vitam & lucem, & pristina commercia Ciuitas haec vellet. Id aduersus contagia remedium esse excogitatum: placereq; ita Gubernatori Urbis, & Consilio Secreto, Senatuque, & Tribunali Sanitatis, ac Tribunali Prouisionum, & LX. Decurionibus: quae regia, & paterna nomina Urbis susceperint hanc pro salute publica curam.

Quadraginta dierum hanc fore molestiam, exiliumque necessarium, & salubre simul. Ne quis interea pedem ab sui limine recti efferret. Si qui secus faxint, poenae proponebantur; proscriptiones, & mulctae, & quicquid interminari maiestas, ac potentia dominantium solet. Necessaria interim omnia curaturam esse Remp. edictumque id secuta res ipsa est. Quo imperatum erat die manere domicoeperunt pauperes diuitesque:

& ta-

*Interdictum e
commercium.*

& tabernae clauduntur omnes praeterquam quibus annonae mercimonium inesset. Extant in actis nobilium eorum nomina qui in singulas regiones Urbis praefuere muneri curaeq; huic, ne pauperibus annona deesset, quorum familiae regionatim descriptae erant.

Misericordia nomen est sodalitio Procerum qui sub eo nomine vectigalia ampla dispensant ad summam annuam viginti quatuor aureorum millium, nisi quod hae clades, & turbae temporum multum de ea quoque summa pauperumque patrimonio diminuerunt.

Difficultates.

In eius Sodalitij Aulam quotidie congregabantur electi, atque inter se consultabant, ut inexplicabilium difficultatum novos subinde nodos, qui ex alijs alijs obijciebantur, expedire possent. Adiuncti eis fuere bini alij in singulas portas, pluresue etiam, ut in quaque parte cuique plurimum negotij incidisset. Ad singularum aedium limina deponebatur quicquid vel Resp. dabat, vel ex agri fructibus ad quosque portabatur, siue in Vrbe emebatur ex tabernis. Clausae portae Urbis: neque vllis aditus praeterquam eis qui annonae inferendae causa accessissent. Hique statim ubi ad loca destinata tulissent quicquid

quicquid illud , siue priuatim ad aliquos , siue publicè venale aduehebant, egrediebantur datis redditisque chirographis : neque intra moenia poterat eorum pernoctare quisquam.

Discurrentium , euntium , ad necessaria quaeque coemenda , & diuidenda cohortes electae , descriptaeque erant : hominesque eos data ab nobilibus nota distinguebat , ne impune aliqui tamquam è cohortibus ministerioque illo vagarentur . Institores , & pro polae ad capita exitusque viarum , & in medio cursu passim erant , vt poma vinumque & genus omne ciborum accersere ex proximo quilibet posset : remissaque solita vectigalium fuere venditoribus vt emptori accederet id quod Reip. emolumenti peribat.

Tabernae, & cellae apothecaeque maiores, vnde haec ipsa mittebantur dabanturque venum, non nisi ab hora tertia ad solis occasum aperiri iussae : ita vt cancellis obiectis non nisi perfosos siue demersos aceto nummos acciperent, purgareturq; sic liquoris acrimonia metallum. Quid in quaque domo fieret accideretue : quae bona , quae infauista signa notarentur : quae repente mortui essent : quae ex insperato conualuissent : haec omnia cognoscere , ac referre , cura nobilium
aliorum

aliorum fuit, qui in singulas paroecias electi
bini nouerant claufas illas domos, dominosue
sue inquilinos & statum earum haud secus
quàm familiam quique suam: nominaque;
& habebant relata in codices suos, & quoti-
die recognoscebant.

Circumducebant medicos hi secum: & vt
de quibusque senserant pronuntiauerant
medici, retinebant intra parietes eosdem, siue
ad tuguria mittebant. Erat & arbitrij pruden-
tiae eorum, cognita causa, potestatem facere
exeundi, quibus ea necessitas incidisset. Et
sicuti cognoscere, prouidere, referre isti de-
bebant: ita fuere alij principes fere nobili-
tatis, qui in vigilias etiam atque in acta
horum inquirebant, habebantque, potestatem
ijdem ad necem vsque animaduertendi in mi-
nistros viliores iuxta, & in inclusos, ne illi,
suo more, per furta & rapinas curationem
exercerent, neue isti exirent domo pernitio-
seque vagarentur. Nobiles alios in suo quem-
que munere monitis & auctoritate conti-
nebant. Par disciplina etiam à Cardinale
Archiepiscopo adhibita est, & mansere
Clerici sub recto quisque suo legibus ij-
dem. Eius prudentia sanctitateque Cardi-
nalis institutum quoque fuit, vt ad eui-
tanda

tanda otij mala, quae velut aegrum corpus alia ex alijs subinde gigneret defes intra parietes vita, feminis virisque septenae per horarum spatia precandi vices septenaque signa obseruarentur. Eaque precationum disciplina quotidianusque ritus, & expectatum subinde signum ad id proderat, vt, & animi semper aliquid piè cogitando, atque agendo occuparentur, & propitiari interea posset Nomen.

Ad satellitia custodiasque caeteras, quae pestilentiae causa iam in Vrbe erant, additus circitor Vrbs, qui separatus, ac proprius horum quadraginta dierum esset. Circumibat iste cum sua cohorte visebatque domos ipsa obseruans vestigia si quis absque singrapha exisset. Tenebat manu virgam supplicij praesentis minas in delinquentes atque deprehensos. Sed & furcae steterae fixae per vias. Volueratque Gubernator Germanorum quoque cohortes in singulas portas dare custodiae causa: sed excusauere Decuriones imparem sumptui Remp. & onera alia, quae sustineri non possent.

Abijtque mox ille cum familia sua Vigliuanum eductis secum è Consilio Secreto primoribus aliquot, qui consilium ei intimum

ad

ad omnia erant. Regimen, & summa rerum Imperijque in Vrbe permiffa Raynoldo Praefidi Senatus, & Gabrio Serbelloni est, quibus non alij potiores ea tempeftate habebantur. Ille peritia legum, & factò ad leges animo, hic militari laude, & vterq; dignitate vitae praecelebant: magnumque Serbelloni nomen, & inclyta facta temporum eorum annalibus perscripta extant. His institutis, atq; tali rerum forma quadraginta dies decretorium explorandae pesti tempus inchoantur, & exactum ad finem vsque spatium est constantia & ordine maiore, quàm sicuti nostris temporibus eadem suscepta, deinde conturbata, & omiffa res fuit.

Initium agenda rei more maiorum sumpserunt ab superum cultu: Castillioneusq; Senator, cui regio Portae Vercellensis, facta inter patres diuisione regionum Urbis, tuenda, & curanda obtigerat, author fuerat, vt in Diui Francisci templum conuenirent ad Sacramentum: conferrent in comune pecunias, unde pauperibus benignè fieret, atque vouerent, quotannis id ipsum esse facturos, cuiusmodi votum fuisset etiam anno 1624. in tali funere pene Ciuitatis Reipublicaeque totius.

Coepta igitur in hunc modum, dein procedente

dente diaeta, corpora quidem hominum, velut animalia venenata caueis inclusa tenebantur ne confociarent inter se, neue transmitterent virus : & vbi in domestico exilio, atque in carcere hoc populi exulantis apud suos lares, signa aliqua morbi extiterant : supellectilia generum omnium, & quicquid domestici instrumenti tangitur ab corpore humano, tangitue corpus, quicquidue etiam adspectu halituque ipso contaminatum esse posset, purgabatur expiabaturque : & purgandi expiandique fuit ars, quam Mediolani verè natam hoc tempore seu inuentam gloria infelix Urbis est : consignabiturque litteris etiam hisce infelicibus ars ea, non sanè vt caeterae inuideant Vrbes, sed vt transferre inde aliquid possint ad suos vsus & gratiam habere Metropoli, si tempora inciderint haec quae etiam inuidia mortalium finitur.

Notabatur statim funesta illa facta domus eiusmodi signo vti dignoscerentur, vitarenturque pestiferac aedes sicuti pestis ipsa. Extracto per Monatos cadauere, deductisque extra Vibem ad tuguria aegrotis si quæ erant, eiciebantur in viam, siue in impluuiam caplae, & scrinia, totaq; supellex eorum. Non nisi testatò, non nisi monitis atq; accitis

accitis quorum ea cognitio , aperiebatur , tollebatur , monebaturue inde quicquam . Pecuniae quod repertum erat , defernebatur ad Franciscum Homatum publici tunc aera-rij custodem , depositaque apud eum haec pecunia manebat in id tempus , quo restituenda foret . Vilissima quaeque cremabantur : caetera Monati exscripta , & exsignata accipiebant , atque ad lauacra portabant , conuoluta , & colligata separatim , ut suo quaeque ritu purgarentur . Ingressique aedes alij Monati nitidi scilicet purique cum storacis & thuris picisque copia adolebant inhospita , tecta parietesque foedatos : lixiuioque simul & calce cuncta proluebant , quasi disijceretur , elueretur ita , rumpereturue pestis . Eiusque mixturae ratio seruabatur haec , ut librae singulae thuris , & singulae picis conijcerentur in flammam : & medicatus utrinque vapor per tecta diffundebatur . In ijs , quae purganda portabantur ad aquas , inscriptum erat , cuius quaeque essent : schedulaeque praeferentes nomina per Monatos eosdem singulis adfuitae fascibus monstrabant dominos , quibus restituenda sua cuique supellex & mercimonij genus omne erat .

Domus purgatae fuerunt octo . M. non-
gentae

gentae quinquaginta tres : familiae iv. M. sexaginta sex & præter impendia per domos facta priuatim ab ijs , quorum intererat manere & conseruari & pura esse haec , insumpsit Resp. in subfumigia purgationesque istas librarum centum viginti M. Serici infecti rudimenta quae saluant nentque bombyces donec intra opus ipsi suum inclusi quiescere , haec turpis & foetida officina vermium datura splendorem , & lucra corporibus officinisque vrbanis , imposita cratibus , facto , & subiecto è carbonibus igni , addita in ignem mixtura temperabatur vapore fumoque illo ne teter insitus odor nidorue noceret .

At facti iam serici fila , vestesque generis eius in athena conijciebantur feruentia medicaminum eorundem acore : & illic , vbi ferebant fiebantque ista , probè circumclusus , & septus vndique locus erat , ne emptus ille pretio fumus , & socius fumi calor , absque effectu , fructuue vlllo evanesceret atque diffugeret in auras . Sic & auri argentique fila purgabantur . Gossipium vestesque gossipinae , lanaeque omnes , nisi si iam imbutae oleo essent , feruido , dein gelido liquore demersae , repetitis vicibus , cogeantur saniem relinquere ibi , quàm antea ebibissent .

Lini

Lini canabisque infecti manipuli fascibus demittebantur in profluentes aquas atque per triduum in viuo amne relinquebantur. Textilia omnia fumo odorato adoleri satis visum. Pellium, aliae tradebantur igni, quae nempe viliores erant: aliae conijciebantur in calcarias cupas: aliae, quarum pretium & damnum, ideoque cura maior, concalefacto suffimentis ligneo vase, supra id circumagebantur in versatili machina ne periret sua mollities & gratia pilo, saluaeque post aerumnas etiam delitiae manerent, neue quid noui periculi sub delitijs mollitiaeque illa occulta-
retur. Codices, aduersaria libri, & bibliothecae ipsae, quodque chartarum in apothecis, in tabernis, apud notarios, apud leguleios, apud medicos erat: coria quoque & plumae, & tomenta, culcitrae, lectulique omnes, & tabulae pictae & metalla, & quicquid aliud in aliquo vitae usu, siue in aliqua studiorum aut deliciarum parte mortalibus est, purgata omnia, deterfa, excussa salutaribus iam auris ac serenitate Coeli, liquoribus, odorem crebris, reperta scilicet arte, ne dum purgantur ista perderentur, atque interea dum saluti consulitur, etiam vitae cultus maneret.

In lauacra aedificanda, emendasque fabricae eius causa áreas, aedes, situsque circumiectos, insumpsit Resp. librarum viginti quatuor M. Granfolietus, & Spinula Genuenses talibus animis esse debuerunt, quales ex eadem patria animos, ceu miraculum tulit huc etiam aetate nostra Lomellinus largitor ille pecuniarum adeò effusus ut modestia accipientium laboraret: imò, ut ne possent quidem accipere nisi immodesti. Et donauere isti quoque Reip. nostrae pecunias: & empti ex Laudensi agro cibaria vendidere pretio pauperibus nostris eodem, quo emerant ipsi inuexerantq; in Urbem: & quaestus institorum importunos, imò & suos ad Ciuitatis alienae utilitatem ita transtulerunt. Et aemulatae peregrinum id decus singulae Paroeciae Urbis, turpeque existimantes, si vincerentur liberalitate externa, & non potius vincerent ipsi hanc, suos quaeque pauperes sumpserent alendos, atque publicum onus in sese auerterunt.

Quadraginta dies experimenta pestis, ordine hoc atque hisce ciuium externorumque liberalitatibus agebantur: & nondum eius spatij dimidium exactum erat cum sentire coeperat Ciuitas remedij vim, & praesens inde

inde leuamen : atque vnà cum eo quadragenario ciuium scessu procedebat spes inchoata salutis, moribusque senescebat : notabili temporis ac pestis vtriusque differentia, cùm in nostra numquam succedere peste potuerit hoc, vt ad extremum vsque spatij eius, vel obsequium, & patientia plebis, vel Resp. ipsa duraret.

At apud maiores, non perseueratum modò in incoepto fuerat, sed etiani, cùm ad ipsum periculi terminum & quadragesimum illum fere diem, latitando scilicet, & carendo luce communi peruenissent, orsi rursus à primo die, quadraginta exegere alios, quò acrius exploraretur, introspicereturque malum insidiosum fallaxque semper, & capitalissimi hostis more modoque, non induciarum modò fidem, sed pacis quoque pacta contemnens. Sic & Gubernator ipse mandarat cùm ad Vigleuanum hoc tempore sederet, scripsissentque Decuriones ad eum salubria fieri cuncta, & abire pestem.

Noua Reip. vectigalium facta venditio est ad summam librarum ccc. M. coactique priuati, sicuti prius emere vectigalia eiusmodi, conditione scilicet ea, vt quodcumque vellet populus posset pecuniam resti-

restituere emptoribus, atque in perpetuum recipere, quae praesens necessitas alienari vendique coegisset. Certauere municipia pagique proximi cum longinquis munificentia & caritate erga Metropolim ad veterum coloniarum penè instar, quae pateras aureas misère Romam, ut afflictis Imperij rebus tenuitate sua subuenirent.

Ab Casale maiore mille vasa vini venerunt una cum eius Reip. legato, qui donum id Reip. nostrae offerebat ornabatque verbis etiam in hunc modum. Scire Casalenses, metropolim suam dominamque Mediolanum, in eo laborare, ut suppeditaret alimenta tot pauperum millibus, quos pestilentia domi clausos, & abductos ab opere quemque suo teneret. Proinde misisse ex agri sui fructibus in Urbem id veluti tributum, & missuros alia deinceps quae ibi nascerentur, quaeue efficere & conferre ipsi possent. Orare ut hosce vini cados acciperent libenter, neq; ex re ipsa, sed ex offerentium animis, ac voluntate aestimarent munus, quomodo Senatus etiam populiue Romani maiestatem erga Coloniarum obsequia motam fuisse veteris memoriae monumenta testarentur.

Decuriones, accepto munere laudauere nobilis municipij comitatem, & fidem alijs quoque Reip. temporibus egregiè cognitam atque testatam, & honori postea Casalensibus ea res apud Senatum etiam fuit. Collegiumque Iudicum, quod seminarium quasi Senatorum est, isque nobilitatis, & prudentiae flos Mediolani habetur, in disponendo munere, quod multi petebant, Casalensem hominem antetulit ob id meritum eamque praerogatiuam quia ex municipio ille esset.

Haud multò post, municipio ab eodem, leue sanè dictu, sed ob aegra pauperum corpora gratum Principibus etiam, & amabile donum venêre mille pulli gallinacei, quos ita sicuti erant caueis inclusos ad tuguria portandos illico diuidendosque mandauere. Commune loci eius fecerat comiter munificeque hoc erga laborantem afflictamque Metropolim, & grata perinde ac debuerat munificentia fuit.

Augebant apud Decuriones recentis meriti gratiam antiqua decora Oppidi, & iam inde ab veterum Romanorum temporibus continuata nobilitas magnarum quoq; Urbium honoribus par. Considerata Othoniano bello castra
maiora

maiora fuisse haec. Id maioris famae principium, celebreque apud Romanos etiam nomen: postea semper claruisse litteris & armis omnique honestarum artium cultu. Subibatque memoria inprimis: hoc illud esse oppidum, vnde Cuius inclutus Ioanninus Baldesius nomine, quasi trigeminorum illorum vnus, in quorum dexteris permixta olim summa Romani Imperij fuit, congressus singulari certamine cum Henrico Henrici Caesaris filio Cremonam obsidente diremerit bellum, cui bello Mediolanenses pro Coloniae libertate adfuerunt: & percussio in mortem hoste victor, imposuerit tributo finem, quod Imperio Cremonenses annuam pendebant: vnde & statua liberatori posita est, quam anniuersaria die ciues eius Urbis iniecto rubri coloris paludamento recolunt celebrantque.

Aderat iam finis pesti cladique maiorum. Et pietas cura; apud illos eadem fuit, qua cura, & pietate nostra insatiabiliter aetas in calamitatis sine perseuerauit, & venerari Numen ob salutem acceptam, & ad clementiam diuinam adiungere suos quoque conatus. Et vota, quae nuncupata fuerant, sicuti persoluimus nos, ita persoluerunt illi prius. Et quoniam inciderat S. Sebastiani dies in
ipsum

ipsum ferè terminum quadraginta dierum; qui semel exacti inchoatique rursus praecipitabant ad suum iam in spe optima finem: ipso peruigilio diei eius, solenni supplicatione tulere ad Martyris Aram ac posuere ibi pyxidem cum sacro osse cui votum id opus absolutumque erat.

Interfuit supplicationi Gubernator Provinciae Aiamontius, non alia magis causa profectus ab Vigleuano ad Urbem, quam ut solenne id obiret. Interfuere Senatores Decurionesque XII. fecitque D. Carolus ad eandem Aram: atque ex eius manu Sacramentum Eucharistiae sumpserunt quotquot aderant: sed cauerant prouiderantque illi, quod nostri temporis procures, aut non viderunt aut neglexere cum vidissent. Quippe vetuere congregari in templa populum: exire domo plures: fieri agmina per vias: aliasque alijs prodeundi horas, alios dies, alia demum non supplicandi modò, sed rerum quoque agendarum tempora praestituerunt, quae nobis non obseruata temporum descriptio, confusaeque vices, & promiscuae inter supplicationes multitudo, corporaque corporibus aggregata dedere pestis etiam ex religioso pioque discursu sementem. Eos, qui metu secesserunt

secesserant in villas , fugerantque in agros ,
vetuerunt redire in Urbem , cū mitescēte
peste redirent quotidie aliqui eorum , accede-
rentque ad portas vnde irriti exclusique di-
mittebantur .

At nostra aetate profugi isti nobilium vl-
trò etiam reuocati sunt , propositaque insuper
edicta in contumaces . Caetera in salutis li-
mine par diligentia nobis illisque fuit : & in
spe noua noui quoque ad salutem conatus , vt
benignitati diuinæ industria etiam hominum
ceu ministra adesset . Laborare pestilentia ,
Cenomanos , Urbemque Brixiam demersam
teneri malo eodem , ex quo Metropolis haec
iam penè emerisset cū allatum esset in Vr-
bem , vetuere quicquam commercij esse cum
hominibus Urbis gentisq; eius : & non modò
edicta in id , sed custodias quoque opposue-
re . Id ipsum in Ticinenses paulò postea fa-
ctum ob eandem de Urbis illius peste famam .
Perculerantq; ista vehementius Gubernatori
Hispano animum , ne clades iam depulsa re-
dirēt . Nam & Praeses Montius anno iam
exacto suo , abierat Magistratu , successeratque
Brugora nouus ad huius vigiliae munera Se-
nator . Cautum edicto Regio , vetitumque
seuerè est , ne qui admitterentur etiam si tes-
seris

seris instructi venirent. Permissa Gabrieli Cerbellono potestas admittendi quos ipse vellet: nec nisi prolato chirographo eius poterat ingredi quisquam. Templâ quoque assignata nominatim fere iuxta pomerium Urbis quae pietatis simul & animi gratia adirent, alia viri, alia feminae. Sic Medici ipsi censuerant, dandum esse laxamenti aliquid, ut ex carcere diuturno respirarent: neque tamen permixti iunctique ad loca omnia temerè vagarentur.

Velut è caueis emissae aues contineri non poterant, pueri feminaeque praesertim: rumpebatque leges lasciuia sexus atque aetatis indocilis legum. Ideò claustris custodisque nouis opus fuit: & cohibitae rursus intra domos feminae nonnullae puerique earum. Non lasciuia modò, sed petulantia maior in Gregoriano Lazareto durabat: atque coniecto illuc in vicina arua quicquid infelicium intugurijs Lazaretisque alijs fuerat, nec non instituta iuxta Diui Dionysij aedem hospitali domo curandis mollius, alendisque multis, qui ex malo conualescebant iam atque reficiebantur: permixtoque aegris impuro praesertim, & spurco Monatorum genere: ibi veluti scelerum flagitiorumque omnium fe-

ges extiterat, quae, sicut aegra diutino morbo corpora morbos subinde novos sibi gignunt, ita ex consuetudine & conuictu hominum illorum nata erant, & tuguria siue cubilia verè scelerum illa diceres. In ipso pestilentiae sine inter exordia publicae salutis vomica adhuc foeda haec Vrbi erat: quali scilicet labe corrumpi, & deturpari Lazareta vidimus etiam nos infandaque multa fieri illic, & nihil omitti eorum, quae turpiter assidue inter mortales fiunt.

Magister, & Rector, censorue, & Iudex cum summa potestate inuentus datusque est vnde minimè quis crederet: & vnde tamen aetas etiam nostra inuenit habuitq; Frater Paulus à Brixia fuit è Capucinorum ordine, ad alia similis Fratri Felici: ad alia, per seueritatem asperosque mores, & quandam ex Patria ferocem indolem etiam aptior muneri. Hunc Diuus Carolus Lazareto temporis eius praefecerat: & durauere ad nostram aetatem, qui narrarent Fratris Pauli satellites, carnificesque, & patibula equuleosue, armatumque ipsum, & vultu pariter ac iudicijs decretisue minacem semper, ac trucem: quale spectaculum, qualemue Franciscani hominis in Magistratu cuculloq; personam necessitas & conditio

conditio temporis dabat. Et censor quidem ille castigauerat represseratque libidines, & furta, & vitia cætera illa erumpentia assidue ex miseriarum egestatisque cauernis: intra cauernas verò easdem spectaculum interim aliud haud minus admirabile erat lasciua illa, proterua, nuda multitudo accipiens subinde tunicas, & lodices è Pontificis domo quae mittebantur.

Namque D. Carolus, quemadmodum in eius vita exposui, peristromata, & aulaea, & genus omne stragulae vestis omnesque fortunæ principalis apparatus iam inde ab Auunculi Pontificatu temporeque illo Romanæ dominationis aulicorum diligentia accumulatos, atque conseruatos, aut vendiderat, ut tegumenta aliqua miserrimis hisce pararentur: aut conscindi repente diuidique in eosdem iusserat. Mirareturq; & rideret aliquis cernens illic nitentem Aulae cultu plebem, purpuraque & serico, & omni alio pretioso textu contextos: quibus ea raptim facta segmenta obtigerant. Fuere, & ciuium, mercatorumue ditissimi, qui millenas in hæc Lazareta lodices mitterent. Resp. in squalorem hunc nuditatemque plebis insumpsit lib. viii M. cum neque tota pestis, neque tota
salus,

salus, sed quiddam vtrinque; tertium, & proximum saluti, & proclive ad perniciem teneret animos alterna spe, alterno metu, simulque pudore pristinae dignitatis, ac munificentiae cui par iam non esset tot sumptibus exhausta Ciuitas. Sub anni finem, non solum purgata malo Ciuitas, sed etiam purgati suspicionibus animi ciuium consistere demum in spe solida, & certo aliquo vitae statu coeperant: ac de liberanda iam Vrbe agebatur, tentante rem eam, & urgente Senatore Mazenta Praefide, qui Praefidi Brugorae successerat, eratque totus in eo, vt intra praefecturae suae annum tuguria demum omnia conuellerentur, ac ne vestigia quidem vlla funebrium earum domorum extarent.

Expectata est ipsa D. Sebastiani dies: eoque die, per edicta, per praecones, inter festos quoque reboatus, & laeto sonore bombardarum, atque omni publica gratulatione promulgatum est: Urbem Mediolanum clementia nutuque diuino, Beatissimae Virginis ope, deprecatione superum, ac deprecante praefertim Martyre, Ciueque Sebastiano esse pestilentia liberatam, redditamque sibi, redditam commercio Urbium aliarum. Licitum fore iam omnibus egredi domo, redire domos, frui libertate

*descripta
Lectia.*

libertate pristina, & iure coeli lucisue communis. Sic autoritas publica promulgarat, & solenni eo antiqui Ciuis die velut natali Urbis triumphatum exultatumque est. Nox insecuta dies alter fuit, ob luminum accensorum toto Urbis sinu, ambituque solem. Ex pergulis, ac fenestris culminibusque tectorum, per fora, per vias copiose haec lateq; micabant: & nocturnus planè Sol is videri potuit. Narrauere superstites: ne clamosior quidam vmquam illa D. Sebastiani nocte fuisse diem vllum, cum & palata tota per vias quantacumque superfuerat multitudo cieret laetis vocibus adoraretque Diuum: & tympanorum strepitu, clangore tubarum cuncta resonarent.

Acta Mediolani haec anno CRO IO LXXVI.
 immortalis illo, inclytoque in omnem memoriam titulo, quòd D. Carolus tunc Populo Pastor erat. Isque Populum in ea clade sustentauit coelesti suo spiritu, laboribus & pietate Cleri, quem ipse instituerat, Ordinumque caeterorum, ac praesertim ardore Patrum
etatis tio Patru è magna Societate Iesu, qui tunc Ordo futurus postea tantum Ecclesiae lumen, & tantus ad omnes late gentes honestatis ac litterarum sapientiaeque magister, aderat fere
 adhuc

adhuc tyro, & coelestia apud Pontificem
hunc rudimenta ponebat.

PRAESIDVM NOSTRORVM NOMINA REPETVNTVR:
MINISTRI CAETERI QVAM MVLTII FVERINT
INDICATVR.

INTER duas hasce clades, priorem nempe posteriorioremq; pestilentiam, notata ista sunt, vel adeò similia inter se, vt res penè vna videri posset: vel adeò diuersa, vt ne comparari quidem conferriq; potuerint. Nunc illud super omnia maxime notabile occurrit, quod ne aliter quidem accidere poterat, quàm sicuti euenit, non casu sorteue aliqua, sed constanti ac perpetua successione domorum Illustrium Urbis, ab quo perenni fonte, magistratibus honoribusque capeffendis, iam inde à principio rerum, idonea capita existunt. Foretque sanè etiam in luctu iucundum hoc, inspicere atque contemplari inter prioris pestilentiae curationes & munera filios nepotesue nobilium, praeferentes auorum patrumue nomina, qui munera prius illa gesserunt, si nomina singulorum recensere possemus.

Tenuit regimen & in medio pestilentiae feruore publicae salutis habenas, atque in eo
funebri

funebri Imperio mortuus est è Patrum numero sicut retuli M. Antonius Montius Senatoris filius & Senatore Praesideq; item Auo, Cardinalis Archiepiscopi; frater, qui tanta per terrarum orbem hodie fama regebat Populum Ecclesiamq; hanc. Vix dum Senatoria aetate factus erat ab Rege Senator ob sapientiam notasq; virtutes, sed & propter merita maiorum. Mortuus est in flore aetatis, & non modò populari fauore, sed etiam apud primores, finita inuidia defletus. Augebat dolorem, quòd exigua liberùm relicta stirpe decessisset. Gratia quoque & dignitas oris, & elegantia ingenij partem huius publici moeroris trahabant. Incusauere lugentes id quòd in hoc iuvene sempiternum ad laudem & maxime gloriosum fuit. Namque generositate insita velut calamitati iratus obtulerat sese periculis mortemque quaesisse videbatur.

Praefuerat è Patribus item ante hunc reuereratque primos pestilentiae menses Archo-natus, natu maior, nondum tamen ingressus ille senectam, pari erga miseras Urbis animo, pariter etiam ipse prospiciens, nec sanè formidans imminentem sibi exitum, aliquando vitabundus, & rursus intrepide vadens praesensque ad omnia, quae munus illud terribile

ribile ferret. Extinctoque Montio superstes, precibus & obtestatione Senatus extra ordinem obibat vigiliam iterum eandem, quia non potior alius, neque par ei ullus habebatur: & euadere non potuit. Mortuusque reliquit Patriae desiderium sui, quantum su quisque malo & pauore sopiti ciues sentire potuerunt: sed sensere maius acriusque tormentum ex ciuis & Senatoris huius interitu posteaquam è periculis damnisque suis emer si ad circumspectiendā etiam publica damna erexere animos.

Nota Viri nobilitas familiaeque nomen, quod augere & illustrare ipse potuerat, si non ei contigisset, vt tam illustri loco nasceretur. Tanta morum & vitae dignitas ei: tanta peritia legum, comitasque & mansuetudo & beneficentia erga omnes. Per gradus fere singulos, quibus ad summa peruenitur, dato in minoribus magistratibus experimento, factus erat ex rerum capitalium praefectura Senator: ibique pestis rabida florem hunc alterum Patriae decussit.

Praesides, qui succedere alij, ad aemulanda priorum decora, nomenque, & ingens, & Ciuitati gratum, sanè accendebantur. Sed nequaquam materies, & occasio inlarefcenti
eadem

eadem deinde erat. Quippe inciderant in pestilentiae fere finem: & fere vna eis cum peruersitate, ac nequitia Monatorum, siue cum sordibus & auaritia similium hisce pauperum colluctatio erat, ne isti occultando scruta, & flammis eripiendo stragula, scruta, subuculas, lintea, lodices, quaeue alia ob contagium cremari oportuerat, alerent reducerentue pestem. Ac Praefidi Vicecomiti in primis ea infelicium auaritia, negotij multum dedit: vt coercendis puniendisue istis, & reprimendo impudentissimo mercaturae genere, quod in nouam Reipub. perniciem penè haud sine diuinæ clementiae contemptu palam, siue per occultum à pluribus exercebatur, occuparetur illud sublime ingenium.

Erat Senator Praefesque hic ex veterum Principum Urbis genere, ac stirpe: spiritusque proinde gerebat ad omnia summa erectos atque intentos, quos in hoc humili negotio magnifice, ac splendide explicauit, atq; autoritate sui nominis, & horrore poenarum prohibuit redituram ab vilissimarum rerum, contactu traiectuque pestem. Antistes hic alioquin iuris ciuilis, & aevi nostri Scaeuola Paulusue habebatur, siue quilibet alius eorum, quorum responsa, & rescripta bonis olim
latinae

latinae linguae temporibus condidere leges.

Non alia inter sapientes fama Praefidi à Basilicapetri qui repullulanti postea in media securitate circa Larium malo radices fibrasque recidit, & accolae, ne contraherent mercimonia vndaeque illae pestem fraenauit. Seueritas & rigor aderat viro, roburque, vel animi, vel corporis tunc ad omnia indomitum: vnde, & non immeritò litterati homines in sermonibus hunc assimilauere ei, quem antiquitas ferrea intestina habentem Graeco eius rei vocabulo nuncupauit. Mansuefecit in Praetura Cremonenses. Accusatus apud Regium Censorem absolutusque à Rege est non sine eorum nota, qui accusarant.

Ad pia opéra penè prodigus auri templum extruxit: quotidiana sacra instituit assignauitque census annuos vnde fierent. Aliquot milia nummum aureorum insumpsit templo, quod posuit apud cognominem familiae suae pagum: cognomenque id familia ab Apostolicis vsque temporibus ex eo praefert, quòd ad condendam Apostolorum Principi Petro Basilicam areae spatium Pontifici Urbis Caio concessere maiores. Hos animos atque robora Praesidium, & subsidia profecto haec

*Buerger
intestina*

haec illo pestilentiae tempore habuit Vrbs .
 Caetera Decurionum & Procerum nomina ,
 quos Decuriones ipsi Proceresque adhibuere
 si referre velim , neminum , ac titulorum pro-
 fectio volumen efficiam , nec ideo vniuersa
 complectar : opusque fatebor adiri non modò
inexplicabile ingens , sed odiorum etiam , &
inuidiae plenum , ob eos , qui praetermissi
 erunt .

Sic & vates Homerus , cùm diffideret posse
 recenseri copias , copiarumque duces , qui ad
 bellum venere illud , inuocauit noto carmine
 musas suas vt recenserent ipsae , numerosque
 inirent . At mihi optandum esset , vt inge-
 nium , & facundia maior , non modò numerum
 istorum , sed vim etiam , spiritumq; & egre-
 gia facta , certaminaq; pietatis inter ipsos , &
obitas denique mortes referret . Mansere in
 Vrbe cadaueribus immixti : obiere rura re-
 gionesq; funestas non secus ac domum quis-
 que suam : obiere sepulchra : obiere legatio-
 nes : in castra iuerunt , publicisque necessita-
 tibus viritim etiam insumpsere opes .

Nec sine laude gloriaque sua reliqui Ci-
 uium , negotiatores diuitesque plebei , & mi-
 nor haec obscuriorue nobilitas , quae maio-
 rum gentium illos saepe nobiles superare
 diuitijs ,

diuitijs, aequare virtutibus ac vitijs assueta, in hac praesertim Vrbe semper vtrinque par illis, hoc tempore dedere egregium sui specimen. Nominaque etiam horum, & necesse nunc est omitti propter multitudinem, sicuti dixerat quidam olim, Aegaei Maris Insulas, referendi raedio in numerum aestimationemque permitti: & meruerant ipsi tamen vti noscitantur. Fuere ad Lazareta dispensatores iidem & quasi principes: Nutriere corpora simul, & illa mortis domicilia gubernare principum ritu: & mandata omnia procerum exequendo, subsidia rerum afflictarum verè fuere, non prudentia solum & industria, sed pecunia, quod tunc rerum haud dubie caput erat.

DE SENATV ET PRAESIDE SENATVS, QVI HOC
PESTILENTIAE TEMPORE EVIT

IN hoc autem magistratuum & ciuium certamine, & quasi ambitione ad Patriam, velut ex funere eripiendam: & in hoc negotiatorum etiam certamine ad munera iniuncta obeunda strenue ac fideliter: in Imperio hoc, & in Rep. pestis & mortis, alte imminabat omnibus praeeratque summa potestas
&

& vigilantia Ordinis, cui nominis sui magnitudinem atque fastigium ipsa Regis Maestas credidit atque delegauit. Potentissimumque Regem hunc Ordinem nuncupari institutum est egregio temperamento ad continenda, & quasi placanda studia humanae ambitionis ordinumque caeterorum; ne qui cum Regio Senatu cettare dignitate loci vellent. Sicut excubiae publicae salutis, aerariumque Populo morienti simul, & esurienti fuerat illud: toties iam in hac tota narratione memoratum Generalis Consilij Tribunal: ita subsidium, & Ara aduersus veneficia terroresque veneficiorum fuere Patres! Apud eos iudicia, & poenae exercebantur tanta moderatione, simul, & seueritate, vt, si verè fuit illud in Vrbe flagitium, non potuerit is ordo clementius agere quàm sicuti egit vna puniendo morte reos & non canibus ferisue obiectando lanianda corpora eorum: sin autem suspiciones, & indicia tantummodo flagitij extitere de quibusdam, non potuerit eiusdem Ordinis prouidentia esse maior quàm fuit ipsa etiam puniendo scelerum initia, quae suspiciones hasce praebuere monstrificas, & inhumanas.

Questioni de veneficijs & vnguentis è Patribus

tribus praefuere Picenardus, & Arias: ille olim in Ticinensi Gymnasio primus interpretes, sed & apud Gymnasia caetera, fama & nominis celebritate primus: postea Senator: inde Magistratus Ordinarij Praeses: denique creatus in Supremo rerum Italicarum Consilio Regens, excusata senectâ, Patriae & quieti relictus benignitate Regis. Arias erat in florida adhuc aetate studijs, & indole comparatus magno seni huic: nobisque etiam ad scribenda bella temporum horum omnia supeditabat, ut haec historica res, & notitia consiliorum, & narratione casuum, & iudicij quoque nostri de maximis rebus explicatione ditior auctiorque fieret. Perseverauere vterque in suo munere, non strage populi, non casibus deterriti suorum cum vinctae familiae fuissent ab ijsdem in quorum veneficia domini inquirebant.

Fuit hoc pestilentiae tempore Princeps Senatus Io. Baptista Trottus Senatoris Camilli filius, Aluyssij nepos, qui Francisco Sfortiae adeò probatus intimusque fuerat, ut ad disponenda consilia Principatus, ordinandumque Reip. statum, non alio magis vteretur. Ita de eo Viro incisum est in lapide, quem Praeses ipse, Auo, & Patri, numquam omissa maiorum suorum

rum recordatione ponere statuerat in Basilica D. Marci, cum familiare sacellum instauraret ibi atque ornaret. Ab tali stirpe editus hic Praeses Senatus erat. Atque tot publice priuatimq; vinculis obligatus, & memor hinc auiti paternique nominis, hinc onerum, quae suae fidei ab Rege imposita essent, magnopere anxius nunc sollicitusq; agebat, non solum, ne periret Maiestati Ciuitas, sed etiam ut eius conseruatae decus eximium vnà cum Ordine suo, laudemque optimam ipse haberet. Inter tantas exitij minas, in media interneccione fere Populi, cum & Magistratum quotidie casus audirentur, & Patrum numerus, nonnullorum morte diminutus esset, omnique paulatim ipse domestico famulatu priuaretur, vix vnumquam ex Vrbe discessit. Ac sicuti perseverauit in sua statione semper: ita hortabatur assidue Patres uti perseverare ac manere vellent. Aiebat, esse Ordinem, qui non modò vicem & curas, sed nomen quoque Regis in hac Vrbe sustineret: esse Urbem, unde securitas & tutela penderet Urbium Prouinciarumque aliarum: in quam Caesarum quoque Maiestas, & Imperij magnitudo semper intenta esset, ut & subsidia huc opportuna mittat, & subsidijs non minoribus

hinc

hinc ipsa iuuari possit aduersus suos & Catholicae Religionis hostes. Aliaque, tum in Senatu, tum in quotidianis conuentibus quos domi habebat, differebat in eum modum apud Patres, corpore sublimis, vultu decorus, & raro, vel temperantiae, vel naturae ipsius munere, nihil imminuta propter senectam, dignitate oris. Vidimus Secretarij Carnèrij litteras ad eum, in quibus petebat & mandabat ille nomine Regis, vt perscriberet totam suam de origine pestis, ac de illa vnguentorum suspitione sententiam: ita visum placitumque Maieitati cognoscere quid de ea re ipse sentiret.

*Laus P.
Trotti*

DE FAMA DEPVLSAE PESTIS PER D. CAROLVM
AC DE REGIA ARCA DATA CORPORI EIVS
ET DE NOVA SVPPPLICATIONE HABITA
PER VRBEM

CAETERVM, inter tanta merita Ciuium atq; Magistratum erga Metropolim afflictam, tantosq; labores, inter tot diuina simul & humana remedia quæsita malo huic, tot nuncupata vota, tot modis efflagitatam, & speratam è Coelo opem, spes vnica Populo semper fuit tantus ille Diuûm Carolus, & Ciuis, & pater,

ter, gloriaque & lumen Patriae sempiternum. Credidere superstites, ac velut ab communi tumultu rediit ciues, funditus interituram fuisse Parriam hanc, nisi Pastor ille sua apud Deum Deiparamque gratia auertisset exitium. Credidere, totum in preces eo deprecante Coelum auersum obtinuisse salutem Vrbi, nec aliter stare potuisse. Manauitque fama haec etiam apud gentes populosque alienos, & cultus inde Diuo auctus est. Animum etiam erexere Reges erga Coelestium beneficiorum euidenti dextera dispensatricem illam animam. Ac Rex ipse Regum obuersus antea semper in magnum id nomen, motus hoc tempore est, ut arcam è crystallo, quam condendo eius Corpori fieri mandarat, appropriari iuberet, quae dudum inchoata moles per triginta fere annos lente ad eam diem, nec nisi per intervalia procedebat.

Anno sexto demum post depulsam pestem Urbemq; liberatam consummatum est opus: & stetit Arca, non artis modò, sed naturae quoque miraculum, imago verè Solis, & digna, quae solem illum alterum circumferret, ostentaretq; gentibus, quae ad spectaculum confluxere. Dum ipsi nos aliosque cruciamus

mus memorando bella casusq; funestos, sanguinaria Regum dissidia, coniuratos in Catholica damna Principes, & foederatorum insultu conturbatam repentè Prouinciam Ecclesiamque hanc: Dum narramus redditos hosti luctus, & fugam, & haec sepulcra Gal-
lorum: Dumque Historicum hoc Opus nunc strenuè, nunc lentè procedit, magnopere ego recreatus sum videns inter D. Caroli solennia nuper laeta iucunda incredibilia multa, qualia nec viderat vlla prius aetas, nec talia fortasse vmquam in posterum spectacula mortalibus erunt. Vidimus in Templum illata dona Catholicae Maiestatis nullis parabilia Regum opibus, nisi ostendisset Numen abditas alias natura opes, vnde dona parari haec possent. Excita sunt ab sedibus suis municipia pagique omnes, & facta Vrbs eo die domicilium Prouinciae penè totius Urbiumque finitimarum. Incessit mistus Clero Sacrisque, & Insubriae supplicanti Gubernator, Imperator exercituum horum posito tantisper bello armisque abiectis: & obuersa in ipsum steterè, tot millium agmina, tamquam mansuefacto ad haec solennia Hispano Marte siue bellico instinctu, qui apud gentes nationesque alias nihil curat aliud praeter arma
sua

sua & caedes. Vidimus concitos ab Orco
 Daemonas, Orcumque ipsum ob tales Ec-
 clesiae triumphos, desperatione ac rabie
 commotum palamque intremiscentem. Et
 spectatus interim atq; auditus in celebrandis
 Apostolico Spiritu Diuini Pontificis laudibus
 Pontifex Orator non successor modò tertius
 iam hic ipse, sed plane simulacrum, atq; effi-
 gies. Haec mihi digna visa sunt, quae monu-
 mentis nostris includerentur: atque subijciam

HISTORIAE NOSTRAE FRAGMEN.

I N Q V O

DIVI CAROLI CELEBRITAS

ARCA DONVM CATHOLICI REGIS

POMPA DVCTA PER VRBEM.

ANNO M DC XXXVIII.

INTER consilia magnarum
 rerum expeditionesue par-
 I uas exacto sic fere autumno
 Gubernator Urbis statue-
 rat redire ad Urbem, vt,
 quoniam omnia Regis & Imperij
 negotia feliciter ex animi sententia
 gesta essent, Superis etiam habere-
 tur honos, atq; Catholicae Maie-
 statis nomine, caeremonia quadam
 & actione grauissima ipse defunge-
 retur. Suberat namque dies, quo
 die D. Caroli memoriam Ecclesia
 Mediolanensis anniuersaria gratu-
 latione concelebrat, effusis Populi
 studijs, & finitimorum vndiq; con-
 cursu, iam inde ab eo tempore,
 quo Pontifex Paulus, efflagitante
 praesertim Catholico Rege conse-
 crauerat, addideratque Sanctorum
 numero id vere Coeleste nomen.

Et

Et augebat hoc anno celebritatem,
 atque religionem, ac solita gaudia
 diei eius ingens Regale donum Ar-
 ca, veterum Aegypti Regum aequi-
 paranda monumentis, intra quam
 conditae Diuini Pontificis exsuuiæ,
 auro, & argento, & crystallo luci-
 dissima rerum naturæ parte cir-
 cumclusæ, indicta ad id supplica-
 tione, per Urbem exquisitissima
 pompa efferendæ erant, atque Po-
 pulo ostendendæ præsidium sola-
 tiumque simul. Indixeratque solen-
 ne id Cardinalis Archiepiscopusque
 Montius, inter caetera piacula coe-
 lestium irarum, quæ per belli tem-
 pus hoc omne suscepit, nunc etiam
 erecto ad eam spem animo: posse
 D. Caroli meritis, & pietate Populi
 supplicantis exorari Numen, vt
 pacata consilia Regibus daret:
 paxque

paxque demum ita conueniret, de
 qua concilianda humanis quoque
 consilijs tunc magna contentione
 agebatur. Hunc obire diem, atq;
 interesse supplicationi Principem
 oportebat, sanè ob Regis super ea
 re mandatum, sed etiam, quia vo-
 tis & expectatione publica, & ve-
 luti ore omnium ipse exposcebatur.
 Stimulabat quoque pietas ingeni-
 ta animum, quae nota Viri laus
 fuit, necnon gloria regij Operis,
 cuius absoluendi stimulator etiam
 ipse fuisset. Sub Velaschio primùm
 coeptum fuerat de facienda Arca
 cogitari: isque primus, & commen-
 dauerat Regi Reliquias hasce Pon-
 tificis: & mouerat tantae Maiestatì
 curam, vt fieri Arcam erogarique
 pecunias iuberet, prout scilicet ali-
 quot millia erogata statim, & sup-
 peditata

peditata fuerunt . Longa deinde
 obliuio regij mandati apud Guber-
 natores alios etiam in pace fuit , &
 res veluti deserta iacebat . Guzmanus
 demum inter bella victoriasque
 suas , & inter ancipites Prouinciae
 casus , quaesivit hoc etiam Coeleste
 praesidium , vt Tutelari Mediola-
 nensium Diuo persolueretur inchoa-
 tus honos , & Corpus , quod eius
 magnae Animae fuisset , splendidis-
 sime collocaretur . Absolutumque
 ita opus multum aucta dignitate &
 fama eius , ideo quia Cardinalis
 ipse Pontifex Urbis flagrantissime
 amplexus Sancti decessoris gloriam,
 non modò excitauerat autoritate
 sua regios , vt mandata Regis in eo
 approperando opere exsequeren-
 tur : sed monuerat erudieratq; ipse
 artifices , qua forma & descriptione
 expoliri

expoliri deberet Arca, nempe ma-
 gnitudine & elegantia ingenij, & af-
 fectatione antiquitatis, talium quoq;
 peritus: vereque aestimantibus, ab
 ingenio Cardinalis haec Regia Arca
 cultior ornatioque prodijt. Ele-
 gantia & magnitudo eius tanta emi-
 net, vt manauerit fama haec inter
 peritos: nullas argenti, vel auri
 summas potuisse dare tale quiddam,
 nisi fauor quoque Numinis, tum
 erga Diui ipsius honores, tum erga
 munificentiam pietatemque Regis
 velut in parte Artis fuisset, nempe
 commotis artificum ingenijs, vt in
 conditorio hoc faciundo, se se ipsi
 artemque superarent. Et Solis ve-
 re simulacrum Arca videri potuit
 haec, quali scilicet verbo Graeca
 elegantia olim vice voluminum in
 re simili vfa est: neque reperio
 nunc

nunc ego aptius simpliciusue aliud. Segmenta cryſtalli , vnde fieret , inuſitatae magnitudinis , ac lucis , lucidiora cryſtallo , ſorte quadam diuinitus reperta olim fuere . Narraturque caſus ad miraculi penè inſtar , non ſicuti mos eſt , vt operibus eiufmodi portentofis ac raris miracula nonnulla adiſciantur , ſed ſicuti caſus & negotia caetera quae euenire referuntur in annales . Obtinente Velafchio Prouinciam Urbemq; hanc , artifices duo , quorum ille arte , ad opera quae in Regiam mitteret , facienda utebatur , ſomniauere nocte vterque eadem : qua in rupe , quibusue cauernis glebae praegrandes laterent ad id futurae vſui , vt opus fieret inter Catholici Regis theſauros , & inter Eccleſiae monumenta habiturum gloriam famamq;

namque ingentem . Nomina artificum , Franciscus Cingardus , & Angelus Benzonus fuere , atque perscripta sic in D. Caroli memorabilium Volumine extant . Re per ipsos ad Gubernatorem delata , iussu eius profecti isti ad Glicigam in Valesianos (id monti nomen , cuius oblata species per quietem vtrique fuerat) indicio pastoris , qui circa rupes eas armenta pascebat , reperere crySTALLI moles hasce amplissimae magnitudinis , quarum claritati & fulgori simile nihil umquam ullae officinae vidissent . Additurq; miraculo admirabile insuper illud : dum glebae molesque istae secarentur , atque expolirentur , neq; vitij , neque incommodi quicquam extitisse , cum ex eadem vena destinatae ac reseruatae in profanos vsus

aliae

aliae, contumaces, operique difficiles, tum scaterent vitijs omnibus, scabro, ferrugine, nubibusque maculosis, & vomicis, centròue, & rubigine, & capillamento: tum verò etiam in machinas impositae frangerentur atq; dissilirent. Descriptionem formamque Operis artifices in membranis exhibere non cessant lineari pictura, quae totum partesque designat: talemque ipse ostendam. Sed & ostendisse prius haec nostra nunc suscepta cura debuerat: qualis visa mihi fuerit Arca, & quemadmodum viderim moveri caeteris oculos animumq; non modò propter materiae pretium & opificij pulchritudinem statim ubi ex tenebris officinarum ea prodierat, stabatque vacua adhuc: sed multò magis ob mysteria, & sacros quosdam

quosdam ab diuinitate horrores ,
 posteaquam acceperat iam intra se
 Reliquias , & dilectum illud Coelo
 caput tegebat ostendebatque simul .
 Nam planè , velut ab globo , siue
 ab fonte lucis exoriebatur copio-
 sissimus vndique fulgor , qui statim
 vbi coeperat aciem vtramque per-
stringere , permulceret simul , atq;
 solaretur , confunderetq; rursus , vt
 abstinere nonnulli , & parcere oculis
 cogerentur . Tanta radiatio crys-
talli erat naturae gemmantis , tan-
 toque lumine intermicabant statuae
bracteaeq; & crustae argenti effictae
in facies humanas , & vermiculatae
ad effigies rerum , ita connexis re-
 bus , vt , & claritati austeritas data
 esset : & repercussu claritates ocu-
lorum excitarentur : & variaretur
 vnitas apte ad id ne satiaret Arca
 ad-

adſpectum, ſed impleret, facilitate
 translucida ſcintillans illuminanſq;
 circa ſe aera repercuſſum: atque
 haec omnia, temperamento, quod
 ſoli artifices intelligere poſſent.
 Subibantq; animi reſceſſus, & lumi-
 na frontis haec omnia ſimul. Ad-
 miratio proxima terrori, & mixta
 ſtupore, vndenam adeò admira-
 bile nouumq; illud. Veneratio hinc
 erga nouitatis quoque maiestatem.
 Mox deſiderium pariter, & vere-
 cundia contemplan- & inter ho-
 ſce tam varios diuerſoſque motus
 focia voluptas: & in voluptate cu-
 pido maior: attonitique manſere
 omnes: & poſteaquam abire co-
 gebantur, ſive, poſteaquam Arca
 ſubtrahebatur ipſa, defixas in ea
 pupillas mentemq; reliquerunt. Et
 auertebantur interea animi ad ma-
 gnitu-

gnitudinem donatoris Regis eodem momento contemplandam. Vndiq; Rex Philippus & Domus Austriaca, nomenque Hispanum sublati altè vocibus resonabant. Viuere Regem hunc prolemque eius; florere Imperium; viuere ac florere Gentem ipsam misti nostratibus alienigenae precabantur, Ac didicerant etiam feminae comparatione uti, & infra Maiestatem hanc Reges ponere ceteros. Et dignitas ista quidem, atque magnitudo Operis eliceret ita plausus, atq; reuocaret ad spectacula saepius eadem vsurpanda, alienos etiam politicose homines, si qui praesertim veterum Romanorum post tot secula reuiuiscere, & adesse possent, quibus videlicet studium & cura visendi, non extenderetur vltra contemplationem

nem artis & naturae rerum, siue,
 non ultra tertium illud, quod ad-
 mirabile vtrunque existit, quoties
suum nempe certamen, ars, & na-
tura exhibuerunt. Caeterum, pro-
 prium in hoc spectaculo quiddam
 erat nostrae pietatis, quod suspensa
alte teneret pectora & mentes, sen-
 sumque hunc interpretem mentis :
 eaq; voluptatis, & gaudij pars non
 nisi posset ad nos peruenire, quibus
 aeterna vita, & gloria sanctarum
 animarum sanctè vereq; intelligitur.
 Namque per totam Arcam, superfi-
 ciemque eius, simulacra Angelorum
expressa argento disposita cerne-
bantur in tales discriminata facies &
figuras, quales formae gestientium
 esse debent in beatissima illa vita,
 aeuoq; sempiterno, illic, vbi aligeri
 spiritus puerili specie seculis adulti
 innu-

innumerabilibus implent ornantque
 Aulam, plauduntque Deo, & San-
 ctis, & vicissim ipsi iucunditate
 complentur. Haec per totum Ar-
 cae ambitum in vultus humanos
 assimilata diuina soboles circa pre-
 tiosissima inclusa ossa artusq; sacros
 gtatulabunda stabat, gloriamque re-
 praesentabat illius Animae tantam,
 vt pueret penè triumphi, quem
 manus & studia mortalium eo die
 adornassent, atque celebrarent hu-
 militer angustijs, & obscuritate sua.
 Effictus mortali materia sempiter-
 nus ille chorus surdo figurarum dis-
 crimine tulerat Paradisi secum effi-
 giem inuexeratq; Paradiso animos,
 & ab rerum humanarum cogitatio-
 ne alienarat, & docuerat simul ve-
 nerari Sanctos sanctius, atque au-
 gustius, quàm sicuti apud homines
 colun-

coluntur . Ea admonitio discipli-
 naque inesse videbatur penè anima-
 to , circa Arcae ornatum , & minis-
 teria argento . Blanditur illic Diuo
 Carolo Coelum deliciaeq; nomini ,
 ac memoriae eius illic fiunt . Ap-
 paret amabile certamen Angelorum ,
 siue consensus , & conspiratio quae-
 dam , vt suo quisque obsequij mu-
 nere fungatur , inseruiatq; Pontifici ,
 qui ab sede Templi huius migravit
 in proximas Numini sedes exuta
 mortalitate , & cuius ipsa mortali-
 tas intus ibi collocata iacet praefer-
 ens adhuc voluntaria afflictamenta
 laboresque exhaustos . Sedent alij
 in fastigio Operis praeconiumque
 Diuo agunt : instant attento pueri-
 liter ore tubas , cientq; ad gloriosa
 haec spectacula genus humanum .
 Cithara fidibusque canunt alij blan-
 dissimo

dissimo adspectu penè cum voce.
 Hic admiratur. Ille exultat. Stat
 aliquis secum ipse meditabundus.
 Quispiam habitu facieq; venerantis,
 ob haec miracula suspicit adorat-
 que Numinis Maiestatem. Tenent
 eodem habitu Pontificatus insignia
 plures apparatusque sacrificalem
 quo fulserat inter Ecclesiae Princi-
 pes Cardinalis tantus ille olim: in-
 telligunturque simulacra penè ipsa
 sentire magnitudinem eius. Constat
 Arca ordine duplici desinente in
 rhombi figuram: unde, & rhom-
 boidem appellauere. Primus infe-
 rior ordo distinguitur in angulos
 antesue duodecim, maiores mino-
 resque. Longitudo ordinis huius
 cubitorum est quatuor. Vnum cum
 dimidio in latum patet. Basis co-
 ronidem habet cum mutulis, & co-
 ronis,

ronis , & scamillis : ipsam conflata
 ex argento duodecim animalia sus-
 tinebunt : totusque contextus intra
 extra ex metallo eodem. Angulus
 vnusquisque cum argentea caryati-
 de est : qualia scilicet fuggrundijs,
 ac tectis ornamenta veteres subde-
 re repererunt : caryatidesque ita
 duodecim in eo inferiore ordine
 numerantur : & puerilia angelica
 simulacra ferentia Pontificales vti
 dictum est in modum trophaeorum
 apparatus ibi applicata ad plinthos
 sedent. Anguli isti , siue antae co-
 ronidem vtramque regunt , & eam,
 quae subiecta excurrit : & eam quae
 desuper ab cymatio iniungitur .
 Singuli singulas ex argento statuas
 erigunt habitu facieque Virtutum,
 ita sicuti vnamquamque earum pin-
 gere , ac figurare antiquitas institue-
 rat :

rat : suntque ita duodecim ibi per
 totum circuitum gyrumque Virtu-
 tes. CrySTALLINI contextus interiecti
antis sunt, & in vnoquoque con-
 textu segmenta crySTALLI tredecim :
 quorum vnum amplitudine supra
 caetera cingitur includiturque ab
minoribus illis octangula figura ela-
boratum, & cuncta late collustrans.
 Sic duodecim amplissima segmenta
 in primo hoc ordine construunt Ar-
 cam vnà cum minuscule sua cohor-
 te circumclusa cuncta argento. Nec
 tamen maximis illis par amplitudo
 omnibus : & duo minima grandif-
 simorum ad Arcae caput vtrumque
 posita sunt. Argentum, quo deuin-
 cta & conferta segmenta tenentur,
 auro obductum est. Segmentaque
 omnia ista simul centum quinquaginta-
 sex numerum explent. Alter
 ordo

ordo, quò operitur consumaturque
 Arca penè germanus huic inferiori
 ordini est, tum dispositione Ca-
 rryatidum, tum Coronidis adspectu.
 Sed variatur, & abscessu laterum
 siue curuatura, qua fastigiatur in
 rhombum, & dissimilitudine etiam
 ista, quòd ouatis pars ea segmen-
 tis fenestrata est. Ac sicuti figurae
 Angelorum inferius sedent: ita &
 sedent hìc, & stant, illae scilicet
 quae stemmata regia ferunt. Nam-
 que vt inter haec etiam mysteria
 conseruaretur debitus honos maie-
 stati nominique Domus, quae praeci-
 puum in terris Ecclesiae munimen-
 tum est, quaeue dona haec dedit: in-
 uentum ab Ecclesia grato animo vi-
 cissim, vt in describenda Arca pone-
 rentur stemmata Domus eiusdem:
 stemmaque Austriacum ex auro in-
 sum-

summa arca praeferunt discreti per
 intervalla Angeli, quos ipsos cin-
 gunt interlocantque duo veluti mo-
 dulantes heroicum carmen. Stem-
 ma Demarchi Leganensium in Arca
 infima tenent Alites alij, quod mo-
 numento ad posteros sit, hunc fuis-
 se Prouinciae Gubernatorem, sub
 quo absolutum id regium opus.
 Par honos, & gratia reddebatur
 Eminentiss. Montio Pontifici Urbis,
 propterea quod apud Demarchum
 ille egerat, vt Arca absolueretur.
 Sed abnuit ipse: monuitque: po-
 nerent potius in lamina titulum:
 quo Archiepiscopo sedente, quo
 anno aedificata Arca dedicataq; es-
 set. Caeterùm Cariatides hîc quoq;
 duodecim in maiores minoresque
 distinguuntur: & reliqua ad eandem
 formam, nisi quòd, breuiora hîc
 omnia

omnia sunt, & simulacra videlicet, & Caryatides ipsae, prout pars etiam ipsa breuior humiliorque. Coronidem quaterna argentea vasa vestita folijs ornant. Segmenta crysalli partis huius septuaginta septem in membranis notata, atque exsignata reperi. LX. millibus aureorum nummum Arca stetit: eaque in regios codices relata summa est: minime silenda, vel subtrahenda laude etiam vnus, inter Urbis & Ecclesiae primores clarissimi Viri, per quem sub Pontifice Montio, & Governatore Guzmano, pecunia omnis tractata & administrata est, fabricaque etiam curata Operis, vt rectè, atque ordine ad diem sine errore mendoue vlllo appropere-tur. Primicerius Vicecomes fuit Cardinalis Federici Sororis filius.

Ei

Ei super generis claritudinem iudicijque elegantiam, commendatione hac electo, quod Domui Borromaeorum annexus ita esset, curam hanc, Ecclesiastica simul, & Regia potestas, & Princeps vterque delegant. Guzmanus, ut celebritati, sicuti dictum est, interesset, & Regis nomine Arcam Pontifici Metropolitano ritè offerret, atque assignaret, ab Alexandria Derthonam: inde Ticinum proficiscitur: ab Ticino Mediolanum venit ad iv. Nonas Nouembris, sub ipsam nempe D. Caroli diem, dispositis ita consilijs, ut peracta celebritate rediret absque mora vlla ad exercitum. Venit quieta cum modestia, quae ipsa causam aduentus facile testaretur, iuncto nigris mulis seiuge curru: caeterum cultu fere priuato, ita

ita scilicet vt erecta gaudio plebes
 quacunque ille praeteruheretur ,
 Prouinciae liberatores , terrorem
 flagellumq; Gallorum Hispanos in-
 geminarent . Et voces quidem eae
 auditae sunt ; sed interiore sensu
 gratulationeque animorum plau-
 debatur magis . Hora erat diei
 fere vndecima , tenebraeque iam
 appetebant , cùm inter hosce plau-
 sus Princeps ingrederetur Vr-
 bem . Quieuit in Palatio paulif-
 per , egitque nonnulla , & vacauit
 de more alloquijs . Mox Templum
 maximum ingreditur inspecturus
 atque assignaturus Ecclesiasticae
 potestati Diuoque Carolo regalem
 crySTALLINAM Arcam , quae iam illa-
 ta Sacrario ad id stabat . Aderat
 Cardinalis Archiepiscopus , Ca-
 nonicique primores circa eum
 velati

velati insignibus suis : & statim ad
 famam actionis caeremoniaeque eius,
 implebatur multitudo Templum :
 ac prohiberi turbam oportuit , quae
 inter tenebras haud aliter quàm me-
 dio diei laeta simul , & curiosa suo
 more accurrerat . Volebant omnes
 fanè videre Arcam : sed Cardinalis
 Archiepiscopus haud minus oculis
 appetebatur , cùm essent in tanto
 ciuium peregrinorumque concursu,
 qui numquam eum vidissent . Pauci
 sunt admissi dum traditionis caere-
 monia perageretur . Referam verba
 ipsa Regiae donationis ad Eminen-
 tissimum Cardinalem Archiepisco-
 pumque Montium effata opportunè
 in eam rem à Gubernatore Guz-
 mano , sicuti fuit ei Viro decòra
 grauitè profluens eloquentia , quae
 Principem deceret . Catholica Ma-
 iestas

„ iestas D. N. Regis Philippi IV. in-
 „ ter praesidia rerum suarum, maxi-
 „ mi semper hoc aestimauit, quòd D.
 „ Carolus Borromaeus natus in Im-
 „ perio suo esset. Praecipua religione
 „ semper nomen memoriamque eius
 „ Maiestas eadem venerata est, enixe-
 „ que egit, vt à subiectis suis perinde
 „ coleretur: ac praemia pietati vicif-
 „ sim è coelo fuere, quae grato animo
 „ assidue recolit Rex, & perpetua re-
 „ cordatione conseruat. Credit enim
 „ effici patrocínio praesertim Diui
 „ eius, & precibus apud Deum, vt
 „ Catholicum hoc Imperium, & Auf-
 „ triaca Domus florens incolumisque
 „ maneat, fusis, siue compressis tot
 „ vndique hostibus, & verso in ipsos
 „ bello, quod in perniciem Domus
 „ Imperijque huius conflarant. Haec
 „ tanta coelestia beneficia, non sanè
 remu-

„ remūnerari, sed colere volens Ma-
 „ iestas Domini mei Regis, Arcam
 „ hanc asseruando Corpori Sancti Pon-
 „ tificis, cuius apud Deum, Deipa-
 „ ramq; precibus impetrata esse cen-
 „ set, fieri iussit, & mihi seruo suo
 „ infimo, ac fidelissimo mandauit,
 „ vt sicuti facta aedificataque hodie
 „ habetur, in eum vsum traderem
 „ huic Metropolitanae Aedi, atque
 „ assignarem, sicuti trado nunc, atq;
 „ assigno. Petoque ab Emin. Vestra,
 „ vt ipsius Diui Caroli nomine, do-
 „ num hoc, re quidem ipsa tenue,
 „ animo autem, & pietate donantis
 „ longè maximum accipere libenter,
 „ & conseruare velit. Accipiat hoc
 „ Regiae deuotionis, & grati animi
 „ monumentum, cuius claritudine ac
 „ luce Reliquiae magni Cardinalis ful-
 „ gebunt, sicuti purissima illa Anima
 Patriam

„ Patriam Ecclesiamque hanc optimis
 „ moribus & egregia disciplina verè
 „ fulgentem reliquit. Accipiat in-
 „ quam, ea vicissim beneuolentia, &
 „ caritate, vt inter preces, & sacri-
 „ ficia Templi huius meminerit com-
 „ mendare Deo Opt. Max. salutem
 „ incolumitatemque Regis, & Impe-
 „ rij huius, vnde honos, & obsequia
 „ haec erga Diuum. Sed me quoque
 „ sub patrocinium, & Diui Caroli
 „ clientelam hanc, caritate ac bene-
 „ uolentia eadem recipere dignetur,
 „ qui regiaë pietatis in opere facien-
 „ do fui praecipuus, atque promptis-
 „ simus minister: quemue iam Diuus
 „ ipse recepit singulari suo fauore er-
 „ ga victricia haec arma. Non enim
 „ aliter ab necessaria defensione Pro-
 „ uinciae proferri potuissent in hos-
 „ tium quoque fines: muneriſque
 eius,

eius, atq; deprecationis apud Deum
 fuisse fatemur, quòd prolata ita sunt,
 & exitus adhuc hos habuere felices.
 Accipiat Eminentia Vestra regale
 donum, cui simile aliud Maiestas
 eadem, eiusdem Imperij opibus, &
 pietate parandum fore sperat Em.
 Vestrae Reliquijs quandocunq; per
 vestigia ista Diui Caroli peruenerit
 ad huius mortalis vitae finem. Di-
 xerat totidem, fere verba Guzman-
 nus, quae plena quidem ipsa per
 se fuere pietatis, ac reuerentissimi
 sensus erga Diuum Carolum, sed
 pietate simul ac dignitate pronun-
 tiantis augebantur. Et Archiepis-
 copo Cardinali praesertim, non
 admiratori solùm, sed etiam imita-
 tori eximio Diui Caroli virtutum,
 vitaeq; totius, altè mouerant haec
 Principis dicta animum. Is, vt erat
 quasi

quasi praesentia Diui ipsius simul , & regiae pietatis consideratione defixus , talia quaedam respondit.

Facere Catholicam Maiestatem id quod Regi Regum , & Christiani Orbis Monarchae potentissimo cōueniens decorumque esset , quodue à parentibus suis , Auoq; & Atauo , & longa Caesarum stirpe hereditarium accepisset , vt praesidia salutis , & Imperij sui duceret cultum & religionem erga Dei Sanctos . Nec sibi nouum hoc , sed coram diuque spectatum cū Sedis Apostolicae Nuntius Aula in illa ipse moraretur . Diuum Carolum , inter caeteras virtutes , & immortalia facta , quae ipsum assignauere Coelo , illud etiam ad extremum vsque tenuisse , vt Imperio Domuique faueret , cui securitas , & tutela Catholicae Religionis

22 ligionis innititur . Ideo , honores
 22 tantos ab regia munificentia meritò
 22 semper ei habitos fuisse , porròque
 hodie haberi . Arcam , quae tan-
 tarum humanarum opum arbitro ,
 modicum munus ac leue videretur ,
 sibi Cleroque suo rem videri pre-
 tiosissimam . Cordique futurum ,
 non solum , vt pro magnitudine sua
 thesaurus ille custodiretur , sed etiam
 vti conderetur Ecclesiae monumen-
 tis , & litterarum ope monstrare-
 tur , spectaculoque , & miraculo , &
 exemplo esset , quacunque litterae ,
 & Reges , & opera magnanimita-
 tis degunt . Dixerant inuicem talia
 Principes : atq; testificando , & scri-
 bendo , quae dicerentur , siue age-
 rentur , adfuere Caymus , & Plato-
 nus illustria nomina Secretariorum ,
 ille Ecclesiasticam , hic Regiam auc-
 toritatem

toritatem inter publica acta ferentes. Sic nox, & actio illa transierat. Eadem nocte collocatur Cardinalis Archiepiscopi penè manibus in Arca ipsum Diui Caroli corpus cum infula, caeteroque Pontificali ornatu, & habitu sacrificantis. Cogitatum primò fuerat, vt facies fabricato aptè ad id aureo vultu tegeretur. Postea simplicius rectiusque visum, apertam nudamque relinqui, qualem scilicet eam, dies, ac solitae in Sanctorum etiam corpora iniuriae reliquam fecere. Corruerat labefeceratque genam alteram, non tam vetustas, quàm decidua perennis gutta per viginti annos ab vligine sepulcri, cùm nondum apertum id inspectumque esset. Genae alteri percerat magis iniuria eadem, nec tamen integra manebat. Dentes, &
mor-

mortuale spectaculum oris , rictus-
 que, & hiatus ille , qui carne absum-
 pta manet , nescio quid pristinae
 similitudinis retinebat , quod senio-
 rum animos paternae illius imaginis
 recordatione permoueret , quodue
 etiam ad effigies illius , & simulacra
 quae extant , congrueret , nec nisi
 flebiliter , & tenerè adspiceretur.
 Celebritas & pompa, qua venerabile
 pignus, & haec relictæ terris coelestis
 animae receptacula in publicum ela-
 ta sunt, vt post LIV. hunc ab eius de-
 cessu annum iterum populo mon-
 strarentur , partemque spiritus , &
 auræ purioris hae sanctæ Reliquiae,
 incessu , & adspectu suo afferrent
 Vrbi , quam spirans olim praesensq;
 ille constituisset, atq; seruasset, ab alijs
 perscripta extat. Extulerant è Sacra-
 rio Arcam , condito iam in eam cor-
 pore ,

pore, clausamq. ita, & ritè praeparatam in Ara maxima venerabundissimul, & delibuti gementesque gaudio collocarant. Templi ornatus erat, qui supremas illas aeternas sedes domiciliumque Beatorum, splendore, & hilaritate festa, maiestatesimul, ac decoro, quantum terrestria coelum imitari possunt, referret. Molestque augustissima haec, quanihil in terris altius, & superumChoris vicinum ac simile magis esse creditur, ceu populus alter, & altera sacra Diuina Ciuitas ad Beati Pontificis adspectum gaudia concepta testabatur. Omnia, quae veterum ingenijs, quaeue nouis artibus, & Cleri huius erudita ad sacros apparatus magnificentia, sumptibusque effusissimis, vmquam in vlla publica gratulatione, excogitari, fieri, induci, attolli,

attolli, describi quoque, & pingi potuerunt, facta, & structa descriptaque, & inducta erant. Ipse D. Caroli thesaurus supra veterem tumulum è regione Arae maximae eminebat laceffens videlicet ille, euocans, inducensq; claritudine splendoribusq; suis Templo veluti Coelum, laceffens quoque, & prouocans aemulatione diuitiarum thesauros gazasque regias: imò has ipsas structa annulorum gemmarumque mole complexens. Nam pleraque donorum illorum miserunt ac dedere Reges: & seruati è periculis, aut re bene-gesta, siue vt gerere possent, in posterum vota, siue iam acceptorum beneficiorum hasce mercedes sacrauere Diuo. Ipsi quin etiam per statuas, & argentea simulacra efficti Principes, efficta ora partesue reliquae cernebantur.

in totidem imagines, quot morborum formis conflictatur humanum corpus. Res diuina facta est ab Eminentiss. Cardinale, & Archiepiscopo Montio. Is de laudibus & mirabiliter acta vita Pastoris Pontificisque Sanctissimi perorauit, sicuti Cardinalis quoque Federicus olim eadem anniuersaria die perorarat, rara temporum laude, ut Cardinalium Episcoporumq; summi, fuerint iidem summi Oratorum. Nec mirifica solum ob eloquentiam, sed ob Regiae munificentiae laudationem, iucunda multitudini Principibusq; fuit oratio, cum obuerso in Coelum augusto sacro ore Pontifex hic orator Diuum Carolum ita alloqueretur. COELESTE
CAPVT : DECVS ET CORONA
PONTIFICVM : PONTIFEX OLIM
ET

ET CIVIS PASTORQUE NOSTER
 ET PATER PATRIAE HVIVS.
 EN VT RELIQVIIS NOMINIQUE
 VESTRO BLANDITVR MISTVS
 MVNIFICENTIAE REGVM DIVINVS
 QVOQUE FAVOR. EN VT HISPANVS
 HODIE MONARCHA DAT ARCAM
 QVAM NVLLAE HVMANAE OPES
 DARE POTVERVNT. VELVT
 AEDIFICATA HAEC IN COELO EST:
 ISTINC E COELO MONSTRATA
 FVERE PIETATE REGIS MIRACVLA
 CRYSTALLI VT CONDITORIVM
 FIERET DIGNVM LARGITORE
 MONARCHA DIGNVM PVIRITATE
 CORPORIS QVAE SPLENDORES
 HOSCE VICIT.

Sa-

Sacrificio peracto, sublata, & ef-
 ferri coepta est Arca. Portauere
 Episcopi quatuor in speciem succol-
 lantes. Alij, qui pondus ipsum uti-
 que ferrent, circumiecto velamine
 tegebantur. Cardinalis Archiepis-
 copus licet imbecillo propter recen-
 tem aegritudinem corpore aderat
 ipse quoque succollans. Senatores
 umbellam per aliquantulum spatij
 attollebant. Mox alij succedere,
 prout quique suum id ius suamque
 praerogatiuam esse contenderunt.
 Gubernator suo loco procedens ac-
 census funale tenebat. Iniuria diei
 triumphique huius fuerit, retulisse
 consuetos magnos Urbis appara-
 tus, obumbrata itinera panno, pa-
 rietesq; pretioso peristromate pic-
 turatos, & diuitum domorum ex-
 positas ad certamen opes, quacunq;
 pompa

pompa incessit, caeteraue demum,
 quae etiam aliàs spectata fuere, vel
 spectari potuerunt. Proprium decus
 diei huius fuit strepitus, & confu-
 sio per Urbem, & multitudo, quam
 non poterat capere Vrbs. Deserta
 interim fuere Oppida Urbesq; fini-
 timae, & capi eo die potuerunt, si
 prouidum, atque intentum occasio-
 ni hostem interea habuissent. Ab
 Venetijs insuper, ex Piceno, ex
 Ligurum, Heluetiorum, Rhaeto-
 rumq; finibus venire multi, scilicet
 antecapto diligenter tempore, vt
 ad diem celebritati occurrerent.
 Nec singuli tantum ex domibus fa-
 milijsue singulis, sed domus fami-
 liaeque totae gregatim, & ferentes
 feminae paruulos liberos, liberiue
 vltro sequuti parentes, vel clancu-
 lum profugi à parentibus arripuere
 huc

huc iter . Etiam fessa aetate nobi-
les obscuriue plerique , vel quibus
cruda viridisque senectus , morboſi ,
lymphati , capti luminibus , manci ,
debilesue , & luxati , infelicia tra-
hentes corpora , venire , irrepere ,
& aſſe voluerunt . Aliudque ſimul
infeliciũ genus aderat , augebatq;
multitudinem hanc volentium à D.
Carolo expoſcere opem . Namque
compertum ego ita habui : homines
maritos , quibus infaſta , vel ſuſ-
pecta ſui matrimonij conditio , ma-
tronaſque viciffim , quibus effrenis
in adulteras alias libido maritorum
vitam animumque inquietaret , ve-
niſſe cum ea fiducia & ſalutari ſim-
plicitate , vt purgato per Diuum
Carolũ vi occulta , & expiato ,
ſiue emendato geniali thoro , fa-
maque reſtituta , ex deſperatis , &
con-

contemptis laeti honestiq; redirent
domum : eandemque simplicitatem,
siue fiduciam etiam inter nostros
scio fuisse nonnullis . Scio fuisse ,
qui , re perdita domestica afflicti,
circumuenti periculis , sperauerint
hinc auxilium , impetrauerintq; vel
certe dixerint se se impetrasse , non
minus profectò , quàm quibus in
calamitate aliqua corporis palam,
& manifestè subuentum . Ac sicuti
circa corporum morbos , & incom-
moda haec , admirabilia quaedam
euenisse dicuntur : ita grauioribus
alijs animi , & fortunae domorumq;
morbis aiunt triduo hoc in D. Ca-
roli gratiam propitium fuisse Nu-
men : multosque statim sensisse me-
lius ire sibi negotia , tollique labes ,
& sanari animos , prout precati es-
sent , attulissentque vota in id .

LX. millia peregrinorum hoc tempore in cauponis diuersorijſq; fuerunt: iſque numerus relatus in publicum eſt. Adijce nunc, quantum praeterea numerum verifimile ſit, ad amicos, propinquosque diuerſiſſe; cū nulla non domus, ſumma, ſive infima, ſive mediocris, plena hoſpitum fuerit, quos deinde in tecta alia, & domos pauperrimas, ſive deſertas priores illae exonerabant xenia cibosque mittendo, vt laxarentur ita anguſtiae, quas ſua unicuique multitudo fecerat. Et conductas aedes, ante quam venirent habuere, quibus ea facultas. Etiam in Monasteria, & collegia frequenter itum. Interimq; tamen turba penè maior fuit eorum, qui ſub dio pernoctauere. In tanto numero colluieque mortalium, qui
ſtrepit.

strepitus , ac tumultus , & quae
 turbae per Urbem , atque in Tem-
 plo maximo praesertim esse potue-
 rint , depingere sibi animo , & ima-
 ginari facile quilibet potest . Rixae,
 clamores , & alicubi saxa , gladijque:
 ac vulnerati , siue elisi aliqui in mor-
 tem . Perpetuus in templo fragor ,
 & rugitus verè torrentis , qui auctus
 nocturno imbri , proluuiem aqua-
 rum immensam per saxa è monti-
 bus deuoluit . Sed praeualebant
 stridores , & latratus tonitruaque
 phanaticarum , tantaque tormenta
 infelicibus illis ad D. Caroli prae-
 sentiam , vt desierint eo die credere
 aliqui , fallacias esse muliebres , ve-
 reque rabie illa & furore tartareo ,
 si vmquam aliàs cognitum sit , ob-
 fidere corpora humana spiritus in-
 fernos , illabi praecordijs sensibusq;
 mor-

mortalium, & regnare torquerique
 illic in suam obsessorumue poenam.
 Satis constitit, solutas, & liberatas
 eo die nonnullas, quibus aeterna
 inexplicabilia vincula iniecisse Sa-
 thanam appareret. Neque omise-
 rim alios pietatis quoque furores,
 quibus instincti viri feminaeque in
 fustes in sarissas vltro incurrere
 spectati sunt. Nam cùm staret pro
 cancellis cohors praetoria Germa-
 norum, instructa telis ad turbam de
 more submouendam, hique tela, &
 sarissas in terrorem assidue huc il-
 lucque vibrarent: cùmque satelli-
 tum alia cohors his immixti, non
 quaterent modò fustes baculosque
 suos, sed etiam absque discrimine
 intentarent, ac saeuior ea commi-
 natione truculentiorque fere esset
 vultus eorum importunitasq; vocis:
 aduer-

aduersum ire tamen, atque irrum-
 pere nihilominus, & verberari vl-
 tro, verberareque audebant: eaque
 veluti pugna fuit per totum tempus,
 quo stetit Arca in conspectu: ac di-
 scessere plures ora faciemq; cruenti:
 & vicissim pulsatus ad necem ab
 iuvene satelles fuste eodem, quo
 pedem huius ille compressisset. In
 disponendo ordine supplicationis,
 gradus, & discrimina dignitatum
 feruari non potuere. Inter duos
 summos Ordines Ciuitatis, cum
 vterque Ordo propinquiorem san-
 cto Corpori locum capere ipsi, atq;
 habere studerent, orta contentio:
 & contentioni Princeps amabiliter
 iratus: atque, vt in tali certamine,
 reddita pax, & reconciliata gratia
 statim: neque dignitatis haec am-
 bitionisue humanae, sed pietatis
 videri

videri certamina potuerunt. Diuumque ipsum delectatum fuisse arbitror, intuentem è Coelo iurgia circa se haec, atque in populorum tumultu, procures etiam inquietatos. Ea sola species deerat miscentis Coeli cum genere humano gaudia gratulationemque suam, siue turbati huius paruuli Orbis magnitudine gratulationis, & triumphis. Peracta supplicatione, repositaque supra Aram maximam Arca, iam serum fere diei appetebat. Cardinalis Archiepiscopusque Montius epulum dedit eadem disciplina & forma, qua Diuus Carolus etiam, Cardinalisque Federicus post solennia fere aliqua dare consueuerunt. Fuere in eo conuiuium Episcopi quatuor: Altempsijque fratres, qui D. Carolum ab materna origine proxima

xima affinitate attingebant. Etiam apud Leganensem in Regia pari modestia militare prandium fuit procerum amicorumque nonnullis, qui postero die ad exercitum vnà cum ipso redituri erant. Dilata profectio est ab die Veneris in diem Sabbatum, qui dies fuit ad VIII Idus Nouembris. Eo die ab Mediolano Ticinum: inde Alexandriam itur &c.

Menda, quae irrepsere, tum solita illa & nota operarum, tum importuniora quaedam, veluti *praeterueheretur*, & *mutuo*, & alia id genus: itemque per obliuionem repetita nonnulla, nec nisi in editionis fine animaduersa Scriptori, benignè accipient legentes clementerque aestimabunt.

MEDIOLANÆ

Apud Malatestas, Regios ac Ducales
Typographos.







